

## An-ching Maina Isolo Bebera-na Man-a

Isolo bebera-gijagipa mande saksako, Isol dongbebeama ine chanchiman-arang basakobade dongahama ine Jim sing-aha.

"Oe," ine Isolo bebera-gijagipa mande aganchakaha, aro iana Jim aiao inmanpilaha.

Isolo bebera-gijagipa mande indine aganangkuaha, "Adita bilsirang re-angaha, chingni dejakrani atchiao, ua bakgitchakko nie romitingo anga Isolo bebera-na gitik gitik dakmanpilaha. Bi-sako tuatramo Doanko nie romitingo, uni jaksirangko moatmitingo uko nie roanian Isol donga ine angko bebera-atnasiahachim."


### 1. JEKON DAKAHACHIM, UKO DAKGIPA MANDE DONGA

Mandeko dakgipa saoba donga ine an-ching u-in a man-a aro u-in nanga. Gisik a-ning bitgiparang indake agana je, mandeni taningo hajalni hajal nikgimin bimangrangko mikosto ka-e dongimin donga, taningchi kam ka-e manderang neng-nikanirangko namatna man-a, maia nama aro maia namja uko u-ia, aro taningchin chanchie mande sakantian an-tangtangko nambatatna skani donga. Tanigan be-en gimikko sason ka-ani ja-pangba ong-a.

Computer rangba bijolini bilchi kam ka-a, indiba computer koba mandeni taningni u-ianichisa bikota aro kam ka-ata.

Unigimin gitko segipa mandeni bimangni aro uko Ong-atgipani gimin indine agana:

**"Anga nang-ko mitelgen; maina angko dildil ong-gni aro aiao inmanani dakaha; Nang-ni kamrang aiao inmanani ong-a aro uko angni gisik namedake u-ia." - Git 139:14.**



Isolni kamko nina gita an-ching chel-bee re-angna nangja. Bring bitchip dakgipa mandeni taning aro gipin be-enni bakrangan Isolni kamko mesoka aro Uko changgipa tarigipa ong-a ine mesoka. Mandeni jedakgipa pump ka-ani kolko tariani baksaba mandeni ka-tongko tosusana man-ja. Mamung computerni kamkoba mandeni taningni kam baksa tosusana man-ja. Mamung televisionni kamba mandeni ku-rang ba mikron baksa tosusana amani ong-ja. Mamung air condition ba ding-atani kolrangan mandeni gingting, ka-sop aro bigilrang baksa tosusana amani ong-ja. Indake mandeni bimangni bring bitchip dake kam ka-ania mandeko saoba dakaha ine mesokani ong-a, aro uko dakgipa saobara Isolan ong-a.

Mandeni bimangara chu-gimik be-eno kam ka-giparangni nangrime ka-ani ong-a - pilakan mingsa minggipin baksa nangchapchapa. Ka-soprang, aro ka-tong, an-chi ja-dilrang aro masilrang pilakan ge-sa ge-gipino pangchakgrike aiao inmanpile kam ka-a.

Na-a paisa bisilko ge-chikung ra-e uarangko ge-prako 1 aro ge-gipino 2 ine sulsul 10 ona setoke jepo chippilode, jeponiko nigija knoke 1 oni 10 ona segiminko sulsul bikotpilna man-genma? Chang million chikkung koltaitaioba changesamangba sulsul dake bikotpilna man-na ka-dongani dongja.

Da-ode ok, taning, ka-tong, an-chi ja-dil, nachil, mikron, wagam, uarang gimikni apsan somoio kam ka-rimani gimin chanchiate nibo.

Manden be·enni name kam ka·na man·anini gimin nang·o mai talatani dongen?

**"Aro Iso inaha, 'An·ching an·chingni jagring gita aro an·ching gita mandeko dakgen'.....Aro Isol An·tangni jagring gita mandeko ong·ataha, me·asa aro me·chik dake uamangko ong·ataha." - A·bachenga 1:26, 27.**

Skanggipa mande skatangtang ong·banade man·jaha. Isol uamangko An·tangni bimang gita ong·ataha ine Sastroo agana. Ua an·chingni gimin chanchie an·chingko tariaha.

## 2. JEKON DAKAHACHIM, UKO DAKGIPA DONGA

Isolni ong·atani kamara mandeosan bon·aija; salgisak gimikchinan Uni kam sokanga. Bijolini teng·aniko gualbo, aro salgichi teng·aniko niatskabo. Matma Ja·kol ine an·chingni minggipara (Milky Way), millionni million askirangni dol ong·a aro aski rongprakan an·chingni sal gita dal·dala. Agansrangode an·chingni salba ua aski jinmaoni rongsasa ong·paaia. Ia Matma Ja·kol gita dakgipa aski jinma dam billion ritchasana baten bangbangko dongangkuenga ine telescope chi nio nikaha.

Unigimin gitko segipa indine sea:

**"Salgirang Isolni rasongko aganpraka, aro bangbangan Uni jakni kamko mesoka," - Git 19:1-3.**

Mandeko aro salgiko nie an·ching maiko aganna man·gen?

**"Chengon Isol salgi aro a·ako ong·ataha." - A·bachenga 1:1.**

**"(Isol) pilakna skang ong·a, aro Uo pilak nangrime donga." - Kolosi 1:17.**

Isolni dakgiminrangan Isolko Dakgipa Rugipa ine parakani ong·a. "Chengon Isol salgi aro a·ako" ine agangipa kattarangan janggi tanganio an·chingni u-isokgijagiparangna aganchakaniko on·a. Pilakkon dakgipa Isol donga. Dal·gipa gisik a·ning bitgiparangan da·alo Isolo bebera·aha. Dr. Arthur Compton, Nobel boksisko man·gipa, gisik a·ning bitgipa, Sastroo Isolni a·gilsakko dakaniko seani gimin indine agana:

"Anga an·tangde a·gilsakko aro mandeko Dakgipa Rugipa donganiko ma·siahaon angni bebera·aniba a·bachengbaaha. Ia bebera·aniko man·na angna raka ong·ja, maina iano ma·sina altua je, jeon miksongani donga, unon Isolni gisik seng·ani kam donga. A·gilsak salgisakni name kam ka·ani aiao inmanani kaman - Chengon Isol salgi aro a·ako ong·ataha ine mesokani ong·a."

Isol donga ine Sastroo mesokna jotton ka·ani gri, indiba Uni donganiko ua sakki on·a. Dr. Arthur Conklin, saksa sam bolni gimin u·igipa gisik a·ning bitgipa changsao indine seaha: "A·gilsako janggi tangania skatangtangsa ong·baaiakon ine aganania chapa ka·ram biapo bom gopretani gimin sa dictionaryko kan·dike sena man·jaha ingipamung apsan ong·aia."

Mamungba griaonikode mamungkoba man·na ka·dongani gri ine pilakan u·ia. An·ching bosturangko taria, daka, indiba mamungba donggijaonikode an·ching pulko ba beng·blok mangsakoba dakatna man·ja. An·chingni samtangtango donggiparang indine an·chingna mesokani ong·a: Isol ong·ata, Isol daka aro Isol ripinga. Ia a·gilsak aro mande maikai ong·baaha ine sing·anina aganchakanide Isolni gimin sa dictionaryko kan·dike sena man·jaha ingipamung apsan ong·aia.

## 3. ISOL MANDERANG BAKSA DONGRIMNA RE·BAAHA



Askiarigipa salgirangko dakgipa, aro a-gilsakko dakgipa an-ching baksa nangrimna am-engna. Ua Mose baksa nangrim- meliah. "Aro jedake mande ripengtangna agana, Jihova Mose baksa mikkangchakchake agangrikachim." (Re-ongkata 33:11). Aro Isol nang baksaba ripeng ong-e nangrim-melina skenga. An-tangko ja-rikgiparangna Jisu indine aganaha, "Na-simang angni ripengrang ong-a." (Johan 15:14).

Manderang Isolni gimin u-in a jotton ka-ronga, maina pilak manderangan toromde dongtoka. Matburingrangde Isolko olakkina ganchi rikja. Indiba mandekode jechiba re-angbo, uamangni Isolko olakianikode an-ching nika. Uamang gisik ka-tong ning-ode Isol baksa nangrimna skani aro Isolni ripeng ong-na skani donga. Isolko am-na skani dongahaode Ua dongenggenma ine jajrengani an-chingo dongjaha.

Ritcha chi-sku sotsku bilsio Russiao millionni million skango Isolko bebera-gijagipa manderang Isolo bebera-tokaha. Saint Petersburgni Universityni saksa professor (skigipa) indine aganaha:

"Angni sandie niani kamo angni ka-dongchakna man-anian mamungba gri. Ang baksa kam ka-parimgiparangba ang baksa apsan dake niktokaia. Niksokgija salgirangni gimin ching sandie nioe an-tang janggi tanganio konggranganiko tosusaate nion maiba chu-onngijaniko anga nikaha. Unon nang-ni Sastro on-atgipako anga poraie nion angni janggi tangani konggrang dakgipara gapatako man-aha. Angni janggina ka-dongchakaniko Sastroonikosan anga man-aiah. Anga Jisuko angni Jokatgipa dake ra-chakaha, aro chong-motgipa tom-tomaniko aro janggi tanganio chu-onngikaniko anga man-aha."

Kristian mande Isolo bebera-a, maina ka-tongni nangbataniko ua Isoloniko man-a. Kristianrangni Isol manderangna gital janggi tanganiko, gital chanchianirangko aro gital kusiniko on-na man-a.

Isolo bebera-ahaon mamung duk ba neng-nikaoni jokginok ine Isol ku-rachakja, indiba An-tangona meli-nangrime dongna re-bagipa sakantiko dilna aro rakkina ua ku-rachaka. Da-o millionni million Kristianrang indine aganenga je, uamang pilak an-tangtango donga gimikkon galkugen indiba Isolkode watgaltaijawaha.

Ian pilak aiao inmananirangnaba bata je, a-gilsakko Dakgipa Rugipa mande sakanti, me-asa ba me-chikba ong-china pilak baksan nangrime dongna skenga. Iani gimin Daud aiao inmane indine seaha:  
**"Anga nang-ni salgirangko, nang-ni jaksirangni kamrangko,  
 nang-ni tik donsogimin jajong aro askirangko chanchie nioa;  
 manda mai, na-a uko gisik ra-ara? Aro mandeni depantea mai,  
 na-a uko nirokara.?" - Gitrang 8:3,4.**



An-chingko Dakgipa Rugipade an-ching sakantinan simsaka. Na-a aro angasan Uni dakgiminde ingipa gita Ua an-chingna simsaka.

Unigimin an-ching Isolo bebera-na man-a: (1) Maina Ua an-chingko aiao inmanpile dakah. (2) Maina Uko man-jaskal an-chingni dongtogija Uko am-na skani gimin. (3) Maina an-ching Uko am-e man-ahaon Ua an-chingni pilak nanganirangko gapata!

#### **4. UARA MAIDAKGIPA ISOL?**

Mande baksa nangrimna sikgipa Isolsa An-tangni dakgimin manderangna Pagipani an-tang detangna gita An-tangko parakna sikaigen. Aro Sastro Ua An-tangkoa sawachim, aro maidakgipachim uko mesoka.

**"Aro Isol an-tangni jagring gita mandeko ong-ataha, me-asa aro me-chik dake uamangko ong-ataha." - A-bachenga 1:27.**

An·chingko Isolni jagring gita dakahani gimin an·chingni changani, gisik ra·ani ka·dongani, aro chanchina chananirang Uko teng·chakskana nanga, maina uarangko an·ching Uoniko man·a.

Isolni mongsonggipa cholonara maia?

**"Isol ka·sara ong·a." - 1 Johan 4:8.**

Isol ka·saani giminsa mande baks a nangrime dongna skaha. Ua ka·saa gride mamungkoba mandena dakja.

**5. ISOL MAIDAKGIPA ONG·A UKO JISU MAIKAI MESOKA?**

Sastroo changni changan Isol An·tangko Pagipa dake toe mesoka.

**"An·ching pilakon paa saksan ongj·ama? Isol saksan an·chingko ong·atjama?" - Malaki 2:10.**

Da·ororo namgipa pagiparangko an·ching bang·en nika. Namgijagipa, ka·saninggijagipa pagiparangba donga, indiba Isolde uandake ong·ja. Ua simsakgipa aro ma·sininggipa Pagipa ong·a. Ua An·tang dedrangrang baks a kal·grike rona sikgipa Pagipa gita ong·a.

An·chingni ka·sagipa Pagipa An·tangko parakemangmang donainade sikja. Saniba dongrimaniko ki·taprandoniko poraie u·iana bate nambate u·iani gita, ua mande ong·e a·gilsakona mande baks a dongpana re·baaha, uan Jisu ong·a.

**"Ua nikgija Isolni bimang, pilak dakgiminoni dejakra ong·a." - Kolosi 1:15**

Uandake na·a Jisuko nikahaode Isolko nikaha gita ong·a. Ua an·chingni gadangona re·bae - an·ching gita ong·paaha, indake an·ching maidake kusi ong·e dongna nangna aro Isola maidakgipa ong·a uko agane on·na man·gen. Jisuara Isolni mande ong·e re·bagimin bimang ong·a. Ua An·tangan indine agana,

"Angko nikgipa Pagipako nikaha" (Johan 14:9).

Na·a Jisuni gimin Niam Gitalni skanggipa ki·tap kingbriko poraiao an·chingni Salgini Pagipani gimin ga·subee seaniko poraiman·gen. Skia man·gijagipa na·tok rim·gipa sakbrini an·tantangni chekko gale Kristoko ja·rikna re·angani aro Uni patianiko man·na bi·sarangni re·baanirangko serika. Ua namjabatgipa papinaba ka·dimeaniko ra·baa aro an·tangko toromi changipa cha·chipilgipa mandekoba ua bamata. Ua kana ong·gipa mandeoni konchi cha·gipa manderangona sakantikon an·sengata. Uni pilak kamrangon Jisu Isolni ka·saaniko parakaha. Ua mandeni nanganina darang mandeni skango kam ka·aha aro darangkoba un somoioni Ugita ka·kuja!

Jisuni Isolko bon·kame rasong chaate mesokania Uni chisolo mesokanian ong·a.

**"Maina Isol a·gilsakna inditan ka·saaha, ua an·tangni saksa kamkam Depantekon on·jok, maikai Uo bebera·gipa sakanti gimagija jringjrotni janggiko man·gen" - Johan 3:16.**

An·chingna da·o kusiniko on·ainasan Jisu siaijaha, indiba an·chingna jringjrotni janggiko on·naba ong·aha. Bang·a chasongnan manderang Isolni gimin u·ina skaha aro Una ka·dongaha. Uamang Uni



jakni kamko salgisakoniko niah aro Uni dakgiminrangni nitoaniko sam bolrangoniko nikaha. Uni ja·mano chisolo chasongna jrip donganiko parak ong·ataha aro manderang Isolni ka·saani gunko nikaha.

Na·a Jisuni parakgiminko da·on Isolni gimin u·ie ra·na man·a. Uko nike ra·anian nang·ko "Apa, anga nang·na ka·saa" ine aganatna dakchakgen.

## Maina An-ching Sastroko Bebera-na Man-a

Mingsingako man-gipa bobil dake chakatpilgiparang jemangan Britishni jahas Bounty ko sripatahachim, uamang an-tangtangni jatni me-chikrang baksa South Pacifico Pitcairn minggipa chichango songdongeaha. Ua dolo Britishni kalasi saksku Tahitioni me-asa sakdok aro me-chik sakchikkung aro bilsi chi-bongani me-chik bi-sa saksa dongachim. Kalasirangoni saksa chu song-na changani gimin ua chichango chu pekanian gapaiaha. Uamango bilonge dakgrikanirang dongkamaiaachim.

Ua chichangona sokbachenggipa mandede sikujachim. Ua jahasoniko ra-ongipa dal-gipa bakosoniko Sastroko nikaha. Uko poraie ua gipinrangnaba Sastroo maiko seachim uko agane on-aha. Indake dakon uni janggi tangani dingtangaha aro bon-kamaao ua chichango donggipa pilakan dingtange janggi tangtokaha.

Ua chichango dongggipa manderang a-gilsakni gipin manderangkode grongna chol man-pajachim. Indiba 1808 bilsio Americani jahas Topaz minggipa ua chichangona sokeaha. Jahasni manderang ia chichangko silrorogipa biap jeon chu ringja aro so-otgrikja, patok nok dongja ine nikaha. Ia biapko Sastroan dingtangataha aro a-gilsakni norok ong-aoniko Isol a-gilsakko maidakgipa ong-atna ska uandake ua chichang ong-aha. Uandaken ua chichang da-oba ong-engkua.

Isol da-ororoba Sastrochi manderangna aganengkueng-ama? Oe. Ia kattarangko angni seengmitingo, anga saksa chingni Sastroko poraiani Dilaniko poraie aganchakani lekako nie dongengachim. Ua leka ka-mao indake sedapatachim: "Anga da-o patok noko dongenga aro angni dosni a-sel sina rai on-ako man-e so-otako man-na senge dongenga. Ia Sastroni Dilanirangko poraina skangde anga gimagimin ong-achim, indiba da-o angna maiaba ka-dongani dongaha, anga gital ka-saaniko man-aha."

Sastro manderangni janggirangko dingtangatna bilake kam ka-na man-a. Manderang Sastroko gisiko nange poraion, janggi tanganirang aiao inmanpile dingtangbaa.

### 1. ISOL SASTROCHI MAIKAI AGANA

A-gilsakni skanggipa mande Adam aro Hobako dakmanahaon uamang Isol baksa mikkangchakchak agangrikachim indiba pap ka-mano Isol uamang baksa agangrikna re-bahaon uamang maiko dakaha?

**"Aro sal ka-sino uamang bario roenggipa Jihova Isolni ku-rangko knaaha. Unon ua mande aro uni jikgipa, Jihova Isolni mikkangoni barini bolrangni gisepo dongnuaha." - A·ba. 3:8.**

Isol baksa mikkangchakchak agangrikna man-aoniko pap dontongataha.

A-gilsakona pap napani ja-mano Isol manderang maidake agangrikskaaha?



**"Beben Gitel Jihova, ua an-tangni nokol katchinikgiparangna an-tangni ning-tua mangsonganiko parakatgijade mamungkoba dakjawa" - Amos 3:7.**


An-chingni janggi tangani aro ortoko u-iatgija Isol an-chingko andalao donja - Uni katchinikgiparangchi, jekon Isol An-tangni pal manderangna aganskachina seokahachim, uamangchi Isol mandena u-iatskaaha.

## 2. SAWA SASTROKO SEAH?

Katchinikgiparangna Isol kattako sechina aro aganchina on-aha, aro uamangni simanoba uamangni seanirang dongrikengkua. Indake katchinikgiparangni seaoniko Isolni dilanichi chimongaha aro ukon an-ching Sastro ine minga.

Indiba uamangni seaniara baditana ka-dongchakna man-gipa ong-na man-a?

**"Iako u-ichengbo, Sastroni pilak katchinike agana an-tangni pe-e on-ani ong-ja. Maina katchinikani agana mandeni skachi pangnaba re-baja; indiba Gisik Rongtalgpiani dilako man-gipa manderang Isoloniko agana." - 2 Pitor 1:20, 21.**



Sastroko segiparang an-tangtangni ska gita seja, indiba Isolni gisikni dilaniko man-anichisa uamang seaha. Sastroara Isolni ki-tapan ong-a. Sastroo Isol An-tangni gimin paraka aro mandena miksonganiko u-iata. Batanggimin somoio obostarangko Isol maidake nikahachim aro mikkangchi mandena Ua maiko miksonga aro namgijaniko maikai bon-kamao bon-atsrange a-gilsakna maikai tom-tomaniko ra-bapilgen ua pilakkon parakata.

Sastroo sea gimikan Isolni kattararama?

**"Pilak Sastro Isolni dongimin ong-a, aro skiana, manengana, ga-akgiminrangko chakatatna, toromo skiana namgni ong-a, maikai Isolni mande chu-sokgimin, pilak nama kamna chu-soke tarigimin ong-na man-gen." - 2 Tim. 3:16, 17.**

Rongtalgpia Sastroo mandeko chu-gimik chinapata maina "pilak" Sastroni bakan "Isolni katta" ko serikgimin ong-a. Katchinikgiparang an-tangtangni Isoloniko knagimin aro nikgiminko kattatangchi seaha, indiba kattako uamang Isoloniko tongtong man-soachim. Uni gimin janggi tangania maiani gimin ong-engga uko na-a u-inna skode, Rongtalgpia Sastroko poraibo. Sastroko poraianian nang-ni janggi tanganiko dingtangatgen. Baditana na-a Isolo bi-e poraia, na-a gisikni tom-tomaniko man-batgen.

Je Rongtalgpia Gisikan Sastroko segipa katchinikgipa manderangko dilahachim, ua apsan Gisik Rongtalgpiaan na-a uko nang Sastro poraiao dilchina na-a okemode, ba bi-ode, nang-ko ua nang-ni poraienggipa kattarangko ma-siatna dilgen.

## 3. SASTRONI NANGRIM-MELIANI

Sastroode ki-tap king 66 ko kadima. Niam Gitchamni ki-tap king 39 ko 1450 B.C. oni 400 B.C. jolona seaha aro Niam Gital jeon ki-tap king 27 donga uko A.D. 50 aro A.D. 100 ni gisepo seaha.

Katchinikgipa Mose Sastroni skanggipa ki-tap king 5 ko 1400 B.C. jolna skang seaha. Watata Johan A.D. 95 jolo Sastroni bon-kamgipa ki-tapko seaha. Ia Sastroko seani bilsi 1500 jolni gisepo Sastroni skanggipa ki-taponi bon-kamgipako seaona uko segipa komibeoba sak 38 manderang Isolni Gisikko man-e seaha. Uamangoni mitamde bading-chiwalgpiparang, mitama mes nirikgiparang, na-tok rim-giparang, sipairang,

ojarang, skiprakgiparang, rajarang - uandake dingtang dingtang janggi tanggipa manderangsa ong-a. Indiba iano aiao inmanani donga: Jensalo ia Sastroni ki·tap king 66 jeon 1189 odhairang aro 31,173 podrang dongachim, uarangko dondimon uarang katta mingsaoni minggipin baksaa meligrika.



Chanchichipe saoba mande, nang nokona re·bae do·ga doktike marble ni bostuko ra·bae donangode aro uni ja·mano sulsul dake sak 40 manderangba marble ni bosturangko ra·bae an·tangtangni ra·baatangtangko gatgitange donangtokenga ine chanchiatbo. Bon·kamgipa mandeni donangahaon, uara marble ni made saksani bimang ong·aha ine nikna na·a aiao inmanbegen. Uni ja·mano na·a indake u·iha je, uarangko ra·bagipa manderangara saksa sakgipinko u·igrikja aro nikgrikkija. Uamangoni saobarangde South Americaoni, saobade Chinaoni, Russiaoni, Africaoni aro uandake a·gilsakni gipin bakrangoni re·baachim. Na·a maidake chanchichote dongenchim? Je saoba saksa mande ua mandeni bimangko tarigipa uamang gimikna bimangni teng·prak bosturangko on-e watataha ine na·a chanchigenchim.

Uandake Sastroba mingsa kattani gimin seani kattarangsa ong-a. Saksani gisik, uan Isolni gisik uko tariaha. Indake Sastroni aiao innane meligrianian Isolni gisikchi Dilaniong·aha ine mesokani ong-a.

#### 4. NA·A SASTROO KA·DONGCHAKNA MAN·A

(1) Sastroko ripingbana man·ania aiao inmanani ong-a. Skang Sastroko sechengarangode jakchisa segatbaahachim. Seriktimgipa·rang uarangko segate manderangna sualachim indake segatgimin·rangode king hajalni hajal da·onaba gimakuja.

Ibri ku·sikchi segipa Niam Gitcham jean Jisuna skang bils 150 ba 200 ong·genchim, uko 1947 bilsio Dead Sea ni sambaoniko man·aha. Iano indake u·ina aiao inmanani donga je, ua bils 2000 na skang segipa kattarangara da·o an·chingni chapa ka·gimin Sastro baksaa kattarang apsan ong·tokaiengkua. Ian Isolni kattao pangchakna man·ani bilko mesokani ong-a.

Niam Gitalo donggipa ki·taprangko Watatarang see uarangko Kristoni sie chakatpilani ja·mano songa man·gimin mondolirangna watatahachim. Ua Niam Gitalni bakrangko jakchi sea rokom 4500 rangnaba bate donga aro uarangko da·oba Europe aro Americani museum rango nikengpiti. Tosusae nion da·o chapa ka·gimin Sastro



ua kattarang baksaa dingtangja ine nikaha.

(2) Sastroko itihasni gita tosusae nioba, melie nikaha. A·ako cho·e am·e nigiparang Sastroo serikara ong·chongmota ine nikaha. Itihasko poraigiparang maiaba serikani aro bosturangko cho·e am·e niaoniko tosusaon, Sastroosan skango sea ba janapa donggiparanga, itihaso melibebea ine nikaha.



Mesokna gita: A·bachenga 11:31 o Abraham aro uni nokdangara "Kanaan a·songchina re·na ine Kaldearangni Ur oni ong·katangaha" ine sea donga. Sastroosan Ur a·songko janapaianini gimin saoba Sastroko poraigiparangde a·gilsako Ur minggipa a·song dongja ine chanchiahachim. Indiba Iraq ni Salgipengchi donggipa torom nok ge·saoniko cho·e am·ao silmrong ge·sao Ur ine seako man·aha.

Ja·mano uamang indake u·iaha je, Urara mande jatrangni brine dongram songjinma dal·gipa ong·achim. Da·ode uko itihasni serikao nikjaha, Sastroosan uko seaiachim. Uandake gipin sakirangko sandiode an·ching bang·en Sastroni tik ong·e serikaniko saki on·ani donga ine nika.

(3) Tik ong·e agansoani chu·sokanirangba, Sastroko ka·dongchakna man·gipa ine mesokani ong·a. Sastroo bang·a agansoanirang an·chingni mikkangon chu·sokengaha. Mikkang poraianirango an·ching ia agansoani chu·sokanirangko nikgen.

## 5. SASTROKO MAIKAI MA·SINA MAN·GEN


Isolni kattako nang·ni niangkuao iarangko gisik ra·bo:

(1) Bi·a gnangsa Sastroko poraibo. Na·a bi·achi nang ka·tong aro gisikko oa gnang poraiode uan Jisu baksa nangrimgrike donga gita ong·a (Johan 16:13, 14).

(2) Sastroko salantian poraibo. Salanti Sastroko poraianian an·chingni janggini bil ong·a (Rom 1:16).

(3) Na·a poraiengon Sastrokon an·tangko talatchina on·bo.

Indine sing·bo: ia Sastroko segipa maiko aganna miksonganachim? Miksonganiko ma·siania an·chingni da·alni jangi tanganiona gamchatbegipa skiani ong·a.



(4) Sastroko poraion bak apsan apsanko poraibo. Sastroko

Sastroni katta baksaan tosusabo. Jisuba An·tangko Messaia ine mesokna uandaken poraie skiah.

**"Unikoa Mose aro pilak katchinikgiparang intatal, pilak Sastrorango an·tangni gimin kattarangko ua uamangna agane on·tokaha." Luk 24:27.**

Sastroni talata gimikko chimongon an·ching tiktak dake ma·sianiko man·a.

(5) Kristona janggi tangna bilko man·na gitasa Sastroko poraibo.

Sastroko Ibri 4:12 o matsramgipa tonual baksa toa lan lekkani jakmangmangsan ong·aija, indiba namgijako dakgrikna tanggipa silchidareba ong·a.

(6) Sastroni kattarangchi Isolni nang·na aganengako na·a

knatimbo. Saoba Sastroni bebeko ma·sina skode uano maiko sea uko ua ja·rikna siknaba nanga (Johan 7:17). Ua an·tangni chanchiaianiko ba mondolini skanimangmangko ong·nikaiani ong·ja.

(7) Sastro nang·ni janggi tanganiko dingtangatna man·a.

**"Nang·ni kattarangko oatani seng·ako on·a; gisik nom·gipana ua ma·sianiko on·a." - Gitrang 119:130.**

Sastroko poraiania nang·ni ma·sianiko bariatgen, namgijagipa nosto ka·gipa dakbewalrangko gimaatna dakchakgen, aro nang·ko be·en bimango gisik aro toromo namdapatna dakchakani ong·gen.

Sastro mandeni ka·tongna agane on·a. Mandeni janggi tanganio chagronggipa jekai, atchiani, ka·saani, bia ka·e dongani, ma·a paa ong·ani aro sianini gimin skia. Uan mandeni pap jean mandeko ning·tubate duk man·ata uko namatna dakchaka.



Isolni ki·tapara badiaba jatsana ba chasongnasan seaianisan ong·aija. Salaram jolo uko seahaoba ua Saliram jolni manderangnaba segimin ong·a. Ua kangalgipa aro man·e cha·giparangnaba segimin ong·a. Bi·sarang uoni golporangko namnika, aro Sastrooni bilakgipa

manderang chadamberangko gisiko nangata. Sae donggiparang, sikdikdik ong-e donggiparang uo ka-dongani aro ka-dimeaniko man-a.

Sastrochi Isol kam ka-ani gimin Sastroni bil bilaka. Ka-namgijagipa ka-ting dakgipa mandeni ka-tongkoba ua nom-ata, aro uarangko ka-saanichi gapatskaa. Ra-seke ra-gipa mandeko aro ganja na nokkol ong-gipa mandeko Sastro dingtangate uamangko skiprakgipa ong-atskaanikoba an-ching nikaha. Aro an-tangko so-ote sinasienggipa mandeko, una gital ka-dongani aro janggi tanganiko on-piltanianikoba an-ching nikaha. Tol-rakgipa aro togigipa mandeko kakkete skigipa ong-naba Sastroni manderangko dilanikoba an-ching nikaha. Sastroan gaora dakgipa manderangko sontolataha, aro an-tangnasan chanchiagipa manderangko jaksramataha. Sastro an-chingko bilgrimitingo bilakata, duk ong-mitingo ka-dimeata, u-ijamiting somoio an-chingko dila aro neng-bemiting somoio an-chingko dongtoata. Uan an-chingko ka-donge janggi tangna aro kengija sina dakchaka.

Isolni ki-tap, Sastro nang-ni janggi tanganikoba dingtangatna man-gen. Ia Am-e Nibo ingipa poraiaoniko mikkang changrango rongtalbate nikroroanggen

Maina Sastroko an-chingna seaha? Jisu indine aganchaka:

**"Jisu Isolni Depante Kristo ine na-simang maikai bebera-e uni bimungo janggiko man-gen, iarangko seaha." - Johan 20:31.**

Rongtalipa Sastroko an-chingni poraina nangchongmotani a-selde Sastro an-chingna Jisu Kristoni gimin rontale talata aro an-chingna jringjrotni janggiko man-gniko agane on-a. Sastrooniko Kristoko nie an-ching dingtangataniko man-a, aro Ugita an-ching ong-roroa. Unigimin Jisu gita ong-batna man-na gita maina Isolni kattako poraina da-on a-bachengjawa?

## Maikai Angni Janggi Tangania Isolchi Bak Nangebebea



Basakoban salrangode a·gilsak namen an·senga. Na·a pringo chakato balwa ka·sin balao balwako ringope bol bijakrango sal teng·chakarangko nike katchaa. Janggi tangao baditaba somoirangkode an·ching gisik ra·tea, jekai, nang ka·sagipako wate re·nako uni mikkangko niani, nang gisik baksa meligipa gitko knao, chongipa bi·sani nang-na ka·saaniko mesoko, aro uandake.

Indiba basakobade a·gilsakara ka·namgijagipa gita ong·a. Pringo na·a songbadoniko poraie saksa bi·sa bom goao kana ong·aha ine seako nikahaon, saksa mande sakoba so·ottaiahia aro uni so·otara chikkunggipa sak ong·aha, banoba karap bilongenga, chi bana re·pakaha, banggriangaha, ba dakgrika bilongenga ine knaaniranga, mamungan a·gilsako namaan griaha ine an·chingko chanchiata.

Iarangni orto mai? Ia aiao inmanpilgipa aro namgijagipa a·gilsakko an·ching mamungba dakna man·jawahama? An·chinga da·o iano maina dongenga? Isolara angna simsakama ba angara ia dal·begipa a·gilsako maiaba chonbegipa janggi tanggipasama?

### 1. ISOL NAMGIPA A·GILSAKKON DAKHA



A·gilsako pilak chona rema aro aiao inmangiparangko Isolan Dakgipa Rugipa ong·a.

**"Jihovani kattachin salgirangko aro Uni ku·sikni ku·bibachi uarangni pilak ko·tokrangko dakaha...Maina ua aganaha unon uan ong·aha; ua ge·etaha unon uan mangrake dongaha." - Gitrang 33:6 - 9.**

Isol aganatnasnan nangaia unon Uni nangnika gita pilakan ong·baaiahia.

### 2. AN·CHINGNI A·GILSAKKO DAKNA SAL DOK

**"Maina sal doko Jihova salgi aro a·ako, sagalko aro uarango donggipa pilakkon dakaha aro snigipa salo ua neng·takaha. Unigimin Jihova neng·takani salko patiahia aro uko rongtalataha." - Re·ongkata 20:11.**

Bilakbegipa jringjrotna donggipa Dakgipa Rugipa ia a·gilsakko An·tangni ku·bibachi dikdiksanon ong·attokna man·aigenchim. Indiba iako dakna ua sal dok somoiko ra·aha. - minit dok ba second dok ba chu·ongaigenchim. A·bachenga odhai sao salprako Isol mai rasongni kamko ka·aha?

**"Aro Isol An-tangni jagring gita mandeko ong-ataha; Isolni jagring gitan uko ong-ataha, me-as aro me-chik dake uamangko ong-ataha." - A-bachenga 1:27.**



Isol mandeko An-tang gita chanchibewalna, ka-sana u-in a man-e dakna miksongaha. Sakantikon Isol An-tangni jagring gita ong-ataha.

Dokgipa salo a-gilsako sam bolrang aro matburingrangan gapaiaha. A-bachenga 2:7 o aganani gitade Bilakgipa Isol a-dimuoniko Adamni be-enko dakaha. Isol baljanggiko uni gingkolo spodapatahaon ua tanggipa mande ong-aha. Ia skanggipa mandeko Isol Adam mingaha, ua katani ortoa "mande" inesan ong-aiachim, aro skanggipa me-chikko Hoba ine mingaha. Uni ortoa "tanggiparangni ma-a" (2:20; 3:20) ine ong-a. Ka-sagipa Dakgipa Rugipa mandena ripeng nanganiko nikaha.

Isolni jakoni re-badaldal ong-e Adam aro Hoba Isolni bimangko teng-chakgiparang ong-achim. Nanga inode Isol uamangko robot rangko gita Eden bario re-roroate An-tangni knana sikgipa kattarangko uamangni ku-sikoniko gam-ate donna man-achim. Indiba iana batede Isol uamang baksa nangrimnasa sikkataha. Robotrang ka-dingsmitna aganna ba song-na channa changa, indiba uamang ka-sana u-ija.

Isol an-chingko Uni bimang gita ong-ate an-chingko chanchina, basee ra-na, gisik ra-na, ma-sina aro ka-sana change dakaha. Adam aro Hobara Isolni dedrangrang aro Uni ka-sabegiparang ong-achim.



#### **ONG-ATANI ANTI**

**Skanggipa Sal:** Seng-ani, sal aro walni a-bachengani

**Gnigipa Sal:** A-gilsakni balwa

**Gittamgipa Sal:** A-a ran-a aro sam bol

**Brigipa Sal:** Sal, ja Aski

**Bongagipa Sal:** Do-o aro Matrang

**Dokgipa Sal:** A-gao rogipa Matburingrangan aro Mandeko

**Snigipa Sal:** Neng-takani sal

### **3. NAMBEGIPA A-GILSAKNA NAMGIJA NAPAHANA**

Adam aro Hobako kusi ong-atna gita uamango pilak nanganirangan dongtokachim. Uamang be-en an-senge donge nambegipa a-gilsak aro nitobegipa bario dongengachim. (A-ba. 2:8; 1:28 - 31). Isol uamangna dedrangko patina ku-rachakaha, aro chanchina, u-in aro uamangni jakni kamo chu-ongnikaniko man-atna ku-rachakaha (A-bachenga 1: 28; 2:15). Uamang mikkangchakchak an-tangtangko Dakgipa baksa agangrikna man-achim. Uamangni katchaani salrangko nosto ka-na mamung saani aro jajrengani uamangna sokbajachim.

Maikai ia a-gilsakara duk aro saknaani ong-baskaaha? Pap maikai a-gilsakona napahachim uko A-bachenga odhai gni aro gittam talata. Nang-ni man-a somoio uarangko poraibo. Iano kan-dike agangopatenga. Nambegipa a-gilsakko dakmanani aditani ja-mano Adam aro Hobako dakmajona, Dakgipa Rugipako katta ra-atjana dakmajona Diabol Eden bariona re-baaha. Diabolni miksonganina "nama aro namgijako u-iani bol" jean barini jatchio dongachim, uachin Adam aro Hobako rim-na ine miksonganai ong-achim. Ia jiksesako ia bolni sepangchin re-angjachina aro uni biteko cha-jachina Isol mikrakatahachim. Ua bolni biteko cha-ode uamang sigenchim.



Indiba salsa Hoba saksan ua beng·gimin bolni sambachi roramangaha. Diabol rang·sanan an·tangni aganani budhiko jakkalaha. Isol uamangna tol·aha ine diabol una aganaha, aro ua bolni biteko cha·oba sijawa ine aganaha. Rasong grianichi Hoba aro ja·mano Adamba ua bolni biteko cha·e niahia - indake Isolko maniani aro ka·dongchakaniko uamang pe·aha.

Isolini Adam aro Hobana miksonganis Isolini nokkol pamong ong·e a·gilsakko "sason" ka·china aro nirok sandichinasa ong·achim (A·ba. 1:26). Indiba uamang Isolo bebera·aniko pe·e diabolnasa katta ra·bataihani gimin uamang an·tangtangni bilko gimaataha. Da·alo a·gilsakko diabol an·tangni ine kange ra·a aro uno donggipa manderangko an·tangni nokolrang dakata.

Basakobade an·ching namako dakna skoba an·tangtangko namgijako dakakosa u·iaia. Maina? An·chingni nikgijagipa bobil manderangko cholono nosto ka·na kam ka·enga.

A·bachenga odhai gittamko poraiode na·a Adam aro Hobani papni a·sel kene Isoloni dongnuaniko nikgen. Papara pilak ong·atgiminrangkon nangchapateaha. Pul bibalrang baksa bu·surangba ong·katbaaha. A·salrango chirang chu·ongjaha aro ge·a gamani kam raktbatha. Gisep gisep saa ding·arang ong·katbaaha. Mandeni jato sanalani, bobil dakani barirorobaaha. Ia pilakna bate pap baksa siani ja·chapbaaha.

#### **4. AN·CHINGNI IA A·GILSAKKO NOSTO KA·GIPA IA DIABOLARA SAWA?**

**"Ua a·bachengantalt mandeko so·otgipa aro ua bebeo chadengja, maina uo bebe gri...ua tol·gipa aro tol·ani pagipa" - Johan 8:44**

Jisuni aganani gitade diabolsa ia a·gilsakona papko ra·baa. Ua papni padot ong·a aro tol·aniba padot ong·a.

Saksa dal·begipa chanchirakgipa English mande Thomas Carlyle minggipa sakgipin mande Ralph Waldo minggipako Londonni namjabatgipa sorokjoljol Londonni salaramchipakko re·dilangengachim. Soroko ka·sne re·ange pilak namgijaniko uamang nikangengachim. Bon·chotao Carlyle Ralphko indine sing·aha, "Da·ode na·a diabol donga ine bebera·ahama?"

#### **5. ISOL DIABOLKO DAKAHAMA?**

Ong·ja! Namgipa Isol diabolko dakja. Indiba Sastroo indine agana je, diabol jemangkon ua tol·napahachim, uamang baksa salgio biapko man·jaha.

**"Aro salgio dakgrikani ong·achim, Mikael aro uni sa·grerang ua drakon baksa dakgrika; aro ua drakon aro uni sa·grerang dakgrikaha, indiba amjaha; aro uamangni biapko salgio man·jaha. Aro ua dal·gipa drakonko, chong·motan gitchamgipa chipu Diabol aro Satan minggipa, a·gilsak gimikko brangatgipako galataha; a·aona galataha, aro uni sa·grerangkoba un baksa galataha" -Parape·a 12:7 - 9.**

Maidake diabolara salgio dongepaaha?

**"Na·a to nonggimin pindapgipa cherub ong·achim; aro na·a**



**Isolni rongtalgipa a-brio dongchina anga nang-ko donaha. Wa-alni ro-ongrangni jatchio na-a re-ruraaha. Nang-ko ong-atatchengani saloni kakketgijako nang-o nikkujana kingking na-a an-tangni re-anirango chu-soksranggipa ong-achim" - Ezekiel 28:14, 15.**

Isolde diabolko dakjachim. Ua nambegipa nitogipa Luciferkosa dakahachim, aro ua Isolni singhason sambao chadengachim. Indiba ua pap ka-aha - Uo "namgijako man-aha." Ua salgioniko rikgalatako man-aha, aro ua an-tangko Adam aro Hobani ripeng dakmike mandeni dal-batgipa bobil ong-skaaha.

## 6. LUCIFER, CHU-SOKGIPA SA-GRE MAINA PAP KA-AHA?

**"Na-a mairongpile salgioni ga-akaha, O ching-gipa pringni depante! Nang-ko mairongpile a-asrek den-peaha, na-a jatrangko onatgipa! Aro nang-ni ka-tongo na-a agane inachim, Anga salgiona gakatgen. Isolni askirangni kosakona angni singhasonko anga chuatgen....Chubatgipa gita anga an-tangko dakgen" - Isaia 14:12 - 14.**

Ia diabol jean a-bachengode Lucifer ong-achim, uni ortoa salni aski ba teng-sugipa inani ong-achim. Ia sa-greni ka-tongo Isolna bamna aro Uko olakina skani pal chanchigramani aro biapna seksekaniko chanchiani ong-katskaaha. Uni gaora dal-roroe Isolni biapko man-na skani uo dongbaaha.

Gipin salgini sa-grerangko an-tangchipak ambana Lucifer raken kam ka-enggen. Isol maiaba namako an-tangnasan ra-aia ine matnanganirangko ua aganenggen ine an-ching chanchiatna man-a. Isolni niampang manina raka aro an-tangde gimikko sason ka-a daka, ua gipinrangnade simsakja ine matnangenggen. Ua ka-sagipa Isolko ong-gija agansretaha.

Ia salgio golmal ong-aniko maidake bon-ataha?

**"Nang-ni ka-tong de-doako man-aha....unigimin anga nang-ko a-ao galaha" - Ezekiel 28:17.**

Sa-grerangni padotko uni gaora dakanian diabol pil-atskaaha. Salgio tom-tomaniko donna man-na gita diabol aro un baksa chakpagipa pilak salgini bak gittamni baksa sa-grerangko salgioniko rikgalataha (Parape-a 12:4, 7 - 9).

## 7. PAPARA SANI DAITO?

Pap ka-na man-gija dake Isolara maina manderangko ong-atja? Indake ong-atode a-gilsako papan dongjawachim. Indiba Isolara orto gnange mande baksa meli-nangrimnasa skaha. Ua mandeko an-tang jagring gita dakah (A-ba. 1:27). Iani ortoa an-ching jakgitel ong-a aro an-tangtangni dakna nanggni dingtang bak donga. An-ching Isolna ka-sana ba Uko jegalna seoke ra-na man-a.

Pilak sa-grerangna aro manderangnaba Isol jekoba dakna seoke ra-ani chol ba bilko on-aha.

**"Na-simang sako manigen da-alu an-tangtangna sebo" - Joshua 24:15.**

An-tangni ong-atgimin pilak manderangna ua mandeko namako seoke ra-china agana. Isolni skako dakanian nambata ine u-ianiko Ua uamangna on-aha. Pap aro uni biteko u-ie namgijaoni an-pilchina Ua an-chingko mikrakata.

Chanchina aro seoke ra-na man-gipa manderangsa chong-motgipa ka-saaniko u-ia. Isol An-tangni cholonko ma-sie Uko ka-sae manina aro sakgipinrangnaba ka-sana changgipa manderangko ong-atna ska. Isol An-tangni ka-saaniko u-iatna skani gimin chanchina changgipa aro skatang



basee ra-na u-igipa sa-gre aro manderangko ong-atna chanchiaha. Basakobade Uni ong-atgimin manderang an-pile Una dangdike on-na an-pilgen ine Ua u-ia. Diabolsa skang namgijako dakna seoke ra-chengaha. Papni kengni obostara uonisa a-bachengaha (Johan 8:44; 1 Johan 3:8).

## 8. CHISOLCHI PAPKO NISIATNA MAN-A

Papni rog gipna skang Isolara maina Luciferko so-ote galja? Isolni sorkariko namja ine Lucifer matnangahachim. Ua Isolni gimin tol-e aganjojoaha. Isol Luciferko rang-san so-ote galahaode gipin sa-grerang Isolna ka-saachi ong-gija kenesa dangdike on-aignokchim. Unode Isol mande aro sa-grerangko ong-atani miksognai orto dongjawahachim.

Isolni kamrangan nambata ine maikai manderanga u-igen? Satanni sorkaria maidake dakskaachim uko mesokchina Isol diabolna cholko on-aha. Unigiminsa Isol Adam aro Hobako dakmajochinaba Diabolna on-aha.

Ia a-gilsakan ia songnok ge-gniko dake niram biap ong-aha. Sawa ong-a?

Bon-kamao sao ka-dongchakna man-bata? Lucifer inditan togirakgipa ong-ani gimin an-tangni kamni namgijarangkode ua manderangna u-iatja. Indiba bon-kamaode pilakan indake u-igen je "papni dormaha sia" indiba "Isolni on-ania an-chingni Gitel Jisuo jringjrotni janggi ong-a" (Rom 6:23).

Unosa pilak a-gimikni manderang indake u-igen je:

**"Dal-a aro aiao inmanani kamrang, O Gitel Isol, Bilakbatgipa; torom aro bebe Nang-ni ramarang....Sawa kenjawa aro Nang-ni bimungko rasong chaatjawa...maina pilak jatrang re-bae Nang-ni mikkango olakigen, maina Nang-ni kakket dakanirangko parak ong-ataha" - Parape-a 15:3, 4.**

Pilak manderangni papni bewal aro Satanni kamrangko mesokaniko u-iattokahaosa Satan aro papko Isol nisiatna man-gen. Uni ka-saaniko ra-chakgija Satanni on-aniko ra-chakgiparangkoba Ua nisiatgen.

Pap aro dukko Isol nisiatningna skenga, indiba an-chingni pangkame seoke ra-anina aro maidaka somoio papko ong-katatpilgija gimaatkamna man-gen ua somoina senge dongenga.

A-a aro salgiko wa-alchi nisie papko gimaatna Isol ku-rachakaha. "Uni ku-rachakani gita an-ching gital salgirang aro gital a-ako nichaksoenga, jeo toromi dongkama" (2 Pitor 3:13).

Diabol aro papko sawa bon-kame nisiatgen?

**"Unigimin dedrang an-chi aro be-enko bak man-paani gimin ua an-tangba ugitan apsanoniko bak man-paachim; maikai ua siachi siani bil gnanggipako, chong-motan Diabolko gimaatna amgen, aro janggi tanga dipet siani kenanio nokol ita man-giparangko jokattokna amgen" - Ibre 2:14, 15.**

Satanko tol-gipa, togigipa aro mande so-otgipa ine pilak ga-akkugijagipa sa-grerang aro gipin a-gilsakni manderang chisolo nikaha. Dos gri Isolni Depanteko so-otatahaon Satanni chong-motgipa cholonko mesokani ong-aha. Pilak a-gilsako donggiparang, papara badita ka-namja aro orto gri uko nikaha. Satanni miksonganirangko chisol mesoke on-aha aro Isolni diabol aro uko ja-rikgiparangko nisiaton Isolan kakketgipa one pilakan ra-chaktokgen.





Pilak manderangko Satan maiko dakna am-engachim uko Jisuni chisolo sianian paraka (Johan 12:31, 32). Chisolan Jisuko a-gilsakko Jokatgipa ineba parakaha. Golgotha a-brio ka-saani bil maikai bilna seksekgipani kosako dingtanga uko mesokaha.

Ka-saanisa Isolko Satan, pap aro papi manderangna maidake dakna nanga uko dakna didiataha ine chisol mesoka.

Isolini ka-saania diabolko amaha ine chisolan mesokani ong-aha. Da-ode a-gilsakko Satan sason ka-genma Kristoma una dakgrikani matchotaha. Uko chisolan rai on-aha. Uan Kristo ong-na nanga.

Na-a ia pangnaba ka-saani dingtanggijagipa, tona amsokgijagipa ka-saani donggipa Jokatgipa baksa nangrim-melina skie ra-ahama? A-gilsakona mande ong-e re-bae nang-ni palo sichakna, nang-ko jokatna kam ka-ahani gimin na-a maiko chanchia? Na-a da-o sko choknoke Jisuko mitele Uko nang janggi tanganiko ra-china aganjawama?

## Nang Janggi Tanganina Maia Daksogimin Chol Donga

"Angara Maina Jisuo Bebera-a?" ingipa kattani gimin pamong giljao skiprakmano saksa name gane chine re-bagipa chadambe uko nokona re-ange grongeaha. "Nang-ni skiprakanide namjok, indiba nang skiprakao Sastroonirarako na-a aganaia. Na-a iako aganchakbo: Jisu a-gilsakona re-babebbeahaode Uko maina a-gilsakni itihas (history) serika dongja?"

"Nang sing-ani nama," ine pamong aganchakaha, aro ua adita ki-taprangko badalaha. "A-gilsakni itihasrangoba Jisu Kristoni gimin serika dongaba."

"Ua serikanirangko anga an-tang nikna skachim," ine ua pante aganchakaha.

Iano Asia Minorni raja saksa Pliny The Younger minggipani 97 gipa chittiko 10 gipa ki-tapo "Letters of Pliny the Younger" ingipao seako nibo. Iano Pliny an-tangni sason ka-ani a-jao ong-a obostarangko talate chitti sea donga, lako nibo, iano ua ia gital dol Kristianrangko maidakginok uko sing-e seata. Uamangni dolni rang-san baribaani gimin aro uamang an-tangtang dilgipa Kristoni gimin git ring-anirangni gimin agana. Ia chittiko Pliny A.D. 110 jolo seaha. Pliny chittiantion Kristoni gimin aro Uni bebera-ania watatarangni somoio mai ong-ahachim uko agana.

Ua pante aiao inmane aganaha, "Angna aroba dingtangko mesokangkubo."



Pamong kinggipin ki-taponiko badale aganaha, "Sakgipin itihasko segipa Tacitus minggipaba Plinnyi somoi jolo dongachim. Uni ki-tap Annals ingipao (Book 15, chapter 44) Romko so-mitingo Nero maikai Kristianrangko mitchiahachim, aro Kristianrangara Kristo minggipa mandeoni ong-kata ine talatani donga ine agana. Jisu Kristoan Kristian toromko a-bachengatgipa aro uko Pontius Pilat Judeao sason ka-gipa Tiberius raja ong-ani somoio Jisuko so-otna hukumko on-aha ine sea. Larang gimikan Sastroo serikani baska melia.

"Pamong, angade a-gilsakni itihaso indake serikarang donga inede u-ikujachim" ine ua pante aganaha.

Pamong una indine agandapaha, "A.D. 180 jolo Celsus minggipa mande Kristianrangko a-rik sanalani gimin ki-tapo seaha aro uan ua somoide Kristianrang bilakbaaha ine mesoka. Na-a jajakuenga ong-ode Niam Gitalni skanggipa ki-tap kingbriko poraibo, uaba itihas gitan apsanaia."

A-gilsakni itihasara Sastroni itihas baska melia ine ua pante u-iahaon Jisuara a-gilsako dongbebeaha ine bebera-aha.

### 1. JISUDE SKANGONIN DONGA

Jisu namgipa mandemangmansan ong-aija. Ua Isolba ong-a. Jisu An-tangko Isol ong-a ine maikai paraka?

**"Angko na-simang u-igenchimode, indide Apakoba u-igenchim; aro da-ontatal na-simang Uko u-ia, aro Uko nikaha. .... Angko nikgipa Pagipako nikaha" - Johan 14:7-9.**




Isolara sawa, aro Ua maidake ong-a, uko u-inade Jisuko niaibo. Ua indine agana:  
**"Angmung Apa apsan" - Johan 10:30.**

Pagipa Isol aro Depante Jisu skangonin dongbaaha (Ibri 1:8). Jisu aro Isol pangnaba dingtang dongkujachim. A-gilsako janggi tangmitingo Jisu maikai ka-sae mesokaha ua apsan dake ka-sae mesokanichi Pagipa Depantena ka-saa aro simsakachim.

## 2. KRISTOAN, ITIHAS ARO KATCHINIKANI JA-PANG

Kristoni janggi tangania katchinike aganani chu-sokgiminsa ong-aiani gimin Uni janggi tanganikoa, Uni atchina skangan sesoaha. Niam Gitchamo katchinikgiparanga Kristo maidake janggi tanggen, sigen aro chakatpiltaigen uko agansoani ong-a. Niam Gitalo Uni janggi tanganiko serikania agansoani chu-sokanisan ong-aia.



Bilsi 500 aro 1500 rangna Kristoni atchina skang Niam Gitchamni katchinikgiparang Messiani janggi tanganiko chang 20 na baten agansoaha. Kristoni a-gilsako kam ka-na a-bachengaoni, Uni janggi tanganiko manderang tosusae nion uamang maidake nikaha?

**"Jeni gimin Mose niamo, aro katchinikgiparango seachim, ukon chinga man-aha, uan Josephni depante Nazarethoni Jisu" - Johan 1:45.**

An-tangni gimin mesokna gita katchinike serikao chu-sokanini gimin an-chingni Jokatgipa talataha.

**"Unikoa Mose aro pilak katchinikgiparang intaltal, pilak Sastrorango an-tangni gimin kattarangko ua uamangna agane on-tokaha" - Luk 24:27.**

Agansogiminrangni chu-sokanian Jisuan ku-rachakgimin Messia ong-a ine sakiko on-a.

## 3. KRISTONI JANGGI TANGANIAN KATCHINIKAO CHU-SOKANIKO MESOKA

Niam Gitchamo maiko katchinike agansoachim - aro uamangni chu-sokaniko Niam Gitalo maikai serika uko hai nina.

### UNI ATCHIANI BIAP

Niam Gitchamo katchinike agananio:

**"Indiba na-a Bethlehem Ephratha Judani hajalrangni gisepo ong-na chongipa, Israelo sason ka-gipa ong-na nang-oni angona saksa ong-katgen; uni ong-kataniara skangonin, skanggipa salrangoni ong-a" - Mika 5:2.**

Niam Gitalo chu-sokani:

**"Judeani Bethlehem Jisu atchiaha" - Mati 2:1.**

### ME-TRAONI ATCHIANI

Niam Gitchamo katchinike agananio:

**"Nibo, me-tra saksa oko kegen, aro depanteko ba-gen, aro uni bimungko Immanuel minggen" - Isaia 7:14.**

Niam Gitalo chu-sokani:

**"Joseph, nang-ni jikgipa Mariamko an-tangona rimbana da-ken; maina uni oko kegin Gisik Rongtalgipaoni ong-a. Ua depanteko ba-gen aro na-a Uni bimungko Jisu mingna**



nanggen, maina ua an-tang manderangko uamangni papranganiko jokatgen" - Mati 1:20, 21.

### UNI MA-KRING JUDAONI

Niam Gitchamo katchinike aganano:

"**Judaoni rajani nisan, aro uni ja-ani giseponi, pamongni gol-dik tang-jawa**" - A·ba. 49:10.

Niam Gitalo chu·sokani:

"**Maina an-chingni Gitel Judaoni ong-kataha**" - I bri 7:14.

### UKO JEGALANI

Niam Gitchamo katchinike aganano:

"**Ua manderangni mitchigimin, aro watgalgimin ong-aha**" - Isaia 53:3.

Niam Gitalo chu·sokani:

"**Ua an-tangniona re-baaha, indiba an-tang manderang uko ra-chakjachim**" -Johan 1:11.



### UKO PALANI ARO DAM

Niam Gitchamo katchinike aganano:

"**Angni ripengtang jeo anga ka-dongachim ..... angko bobil dake uni ja-pa ki-tikko de-aha**" - Git 41:9.

"**Anga uamangna aganaha, na-simang name nikode, angni dormahako angna on-bo; indiba indake ong-jaode dondikbo. Uni gimin uamang angni dormahana rupa shekel kolatchiko toaha**" - Zekaria 11:12.

Niam Gitalo chu·sokani:

"**Unon sakchi-gnioni saksa, Iskariot Judas minggipa, kamal dal-giparangona re-ange aganaha, anga na-simangna uni jakko on-ode, na-simang angna maiko on-na namnika? Unon uamang una tangka kolatchiko toaha**" - Mati 26:14, 15.

### UNI CHISOLO SIANI

Niam Gitchamo katchinike aganano

"**Uamangni angni jakrang aro ja-arangko su-pruaha**" - Git 22:16.

Niam Gitalo chu·sokani:

"**Aro uamang Skobikrok minggipa biapona sokoa, (Uko) chisolo datkapaha**" - Luk 23:33. (Johan 20:25 koba nibo).

### UNI GOPRAMONI CHAKATPILANI

Niam Gitchamo katchinike aganano:

"**Maina na-a angni janggiko a-ningna watgaljawa; aro nang-ni rongtalgipana soako nikna on-jawa**" - Git 16:10.

Niam Gitalo Chu·sokani:

"**Uko a-ningo watgaljaha aro uni be-en soako nikjaha**" - Watata 2:31, 32.

Iano saki bilaka je, Jisuni gimin adita agansoaniranga ong-gakaiani ong-ja. Uni janggi tanganiko aiao inmangipa bilchi u-isoe sesoaha. Beben, Jisuara Isolni Depante ong-a.



Ia sakirangko niani ja-mano an-ching gisiko nange Isolo bi-e an-chingni janggi tanganio sawa Gitel ong-gen uko basee ra-na nanga. Na-a an-tangko skango Gitelna on-kujaode na-a da-on an-tangko Jisuni jako on-genma?

### 4. ISOLNI DAKSOGIMIN JANGGI TANGANI

Atchina skang bilsi Ritcharangna daksogimin gita, Isolni una miskongsoani gita Jisu janggi tangaha. Iako ua gisiko ra-kame Isolni dilanina an-tangko on-kamaiaha. Kristo indine agana:

**"Aro angko watatgipa ang baksang gnang. Ua angko saksan watskuja; maina anga pangnan uni namnikgnirangko daka" - Johan 8:29.**

Jisuni atchina skangan Isol una maidake janggi tangani ong-gen uko daksoman-aha, aro uandake mandenaba Isol maidake janggi tangna nanga uko daksoman-aha. Maidake janggi tangode an-ching chu-ongnike, chu-soke janggi tangna man-gen ukoba Isolde u-isoa.



Ray minggipa saksa mande an-tangko Isolni namnika gita tangnama tangjanama jajaengachim. Indiba ua jensalo college chi re-na a-bachengahaon, maiko poraigen uko dilchina aro dakchaknina Isolo bi-aha. Bang-a salrangna ua Isolo bi-e Isolni aganchakanina senge donaha. Aditani ja-man ua dam komigipa indiba dal-begipa Universitychina re-na gisiko nangatako man-aha. Uano ua aiao inmangipa Kristian manderang baksaa dongrime bilsignini ja-mano uni janggi tangania skangoni baksade namen dingtangbeaha. Ua ua biapo Campus Crusade for Christ ba "Compoundo Donggipa Manderangko Kristoona Ambana" ine ingipa dolko chagrongahachim.

Da-alu Ray an-tangni janggi tanganiko nipilate, maiaba raka basee ra-anu dongode Isolni dilanina bi-rongaha aro "angni janggi tangario Isol cholko dake on-aha" ine ua aganrongaha.

Isol nang janggi tanganina maiko miksongenga uko na-a maikai u-igen?

### **(1) SASTRO.**

Gitko segipani aganani gitade janggi tangario dilgipa ki-tapara maia?

**"Nang-ni katta angni ja-arangna chakki aro angni ramadilna seng-anu ong-a" - Git 119:105.**

Isolni katta an-chingni gisikrangko gital dakata aro an-chingna u-iyaniko on-a (Rom 12:2; Git 119:99). An-chingni nangchongmotani-rangko u-inade salanti Isolo bi-e an-ching Sastroko poraina nanga.

### **(2) ISOLNI DONSOA OBOSTA.**

Cholrangko dake donsoachiba Isol dila. Git 23 o Uko namgipa mes nirikgipa baksaa toa. Mes nirikgipa an-tangni mesrangko a-kawe gitaba aro a-brirang gitaba moa. Ua mesrangko nangan somoio dakchakna changa. An-ching pangnan sepango donggipa Mes Nirikgipa an-ching baksaa donga.

### **(3) KA-TONGNA ISOLNI TONGTONG AGANANI.**

Isol an-chingna gisiko u-iatanichiba an-chingko dila. Isolni Gisik "ka-tongni mikronko" (Eph. 1:18) mikaoatako man-a. An-ching baditana Isol baksaa agangrikna jotton ka-a ua an-chingko nambate dilna man-a. Ua an-chingni chanchiani, bichal ka-ani bilrangko namdapata, unon maiko dako nambatgen uko an-ching u-ia.

## **5. DILANIA MELINABA NANGA**

Na-a an-tangni skako skatang dakengoba (Toe Skiani 16:25) Isolni dilaniko ja-rikenga ine na-a chanchiainaba man-a. an-chingni skaniranga Sastro baksaba melina nanga. kosako sebagipa mingittamrang apsan melijaode, uko Isolni dilenga ine aganna kenani ong-a.

Mesokna gita, Jakeni obostako chanchiate nibo. Uo nambegipa jikgipa aro dedrang sakgni donga, indiba ua sakgipin me-chikko jikburung man-engachim. "Anga iani gimin Isolo bi-beengachim, aro anga chanchia ian Isolni skani ong-engga," ine ua ripengskarangna aganengachim.

Jakeni chanchiani aro uni gisikni u-anirang uko ong-gija ramaona dilangengachim. Ua uko Isolni dilani ine chanchie Sastroo til-ekna beng-anikode nikna gualaha. Aro Sastro "niam aro saki" (Isaia 8:20) ong-a uan mandeko dilanio ong-e re-na dilani ki-tap ong-a. Sastrooni bikpilangenganiko Isolni dilani ine channa nangja.

## 6. ISOLNI DILANINA PAKWATANI

Diabol Jisuko bakrao dakkmajona re-bahaon, ua indine aganaha, "Na-a nang-ni Pagipani nang-na daksoa duk aro saknagipa boli on-aniko jegalode, anga nang-na a-gilsakko nang-ni jako on-gen - mingsingani, rasong aro janggi tangao suk mahako on-gen." Jisuko dilsretha Satan Sastrokon jakalahachim. Indiba

"sea gnang" (Mati 4:1-11) ingipao Jisu rake dongaiaha. Mingsa nambegipa kamko Jisuni janggi tangaoniko an-chingni skie ra-ania Jisuni an-tang janggi tanganiko Pagipana pakwatanian ong-a. Gethsemani bario dukni somoioba ua Pagipao indine bi-aha, "O Apa, ong-na man-ode ia ringchakani angoni chel-angchina" (Mati 26:39). Pagipani nangnika gita bilsi gittam kam ka-ani ja-mano Kristoni siango agangipa kattaranga "Matchotjok" (Johan 19:30) ine ong-aha. Jisuni indine aganani miksonganina, "Isolni miksonga gita janggi tangani da-o chu-sokaha aro matchotaha."



Isolni ku-rangko Uni kattaoniko Uni dilaniko ba nang-ni ka-tongo aganako knaon, Uni dilaniko na-a ra-chakbo. Isolni nang-na miksonganiko ja-rikanio na-a katchaaniko man-gen.

## Maikai Chu-ongnikgipa Janggi Tanganiona Kabatako Man-na Ama

Uamang uni grengko Atlantic sagalni chichango chongipa noko nikaha. Saoba uni songreao jabrina songreani gimin serikanikoba nikaha. Uko 1725 bilsio uni maiba dosna Ascension chichango dongale galangahachim. Bon-kamao ua chi ringna skako namatna ki-singni an-chirangko ringna nangaha. Uni be-enni dukara jrimachim, indiba uni serikanio gitade uni dakgimin dosna ua duk man-batengachim.



Ua duk ong-bee indine seaha, "Kakket ong-ani ramako wate, janggi tanggiparangna mairongpile dukni." la kalasini ua sikdikdikgipa chichango dal-bate duk man-aniara an-tangko Isoloniko ekatako man-anian ong-a ine nikani giminsachim. Uakosa ua bon-kamao chakna amjaha.

Manderang Adam aro Hobani beng-gimin biteko cha-ani ja-mano (A-ba. 3:8) bolgrimo dongnuaonin ka-tongtangtango konggrang dake nikaoniko namatna krengbeenga. Isolni uamangko okame re-baon Adam aro Hoba kratcha-e dos ong-e nike aro kene Isoloni kataha. Ua apsan kenanirangan da-onaba an-chingo dongengkua.

Isolko an-chingoniko maia ekataha?

**"Na-simangni namgija dakanirang na-simangko aro na-simangni Isolko ekgrikataha, aro ua knajana gita na-simangni paprang uni mikkangko na-simangoniko donnuaha" - Isaia 59:2.**



Isolko an-chingoniko ekatania Uni kam ong-ja. Isol Adam aro Hobaoni katjaha, indiba Adam aro Hobasa Isoloni kataha.

### 1. AN-CHINGNI DONGNUGIMIN OKRIATANIKO OKKATANI

Pap napna skangde Adam aro Hoba Eden bario Isol baksa kusi ong-bee nangrime dongna man-achim. Indiba rasong grie uamang Isol gita seng-gen ine Satanni togianiko bebera-e Isolo uamangni ka-dongchakaniko pe-aha (A-ba. 3).

Uamangko Eden barioniko a-rikmano Adam aro Hoba janggi tanganiko rakkate nikaha. Bi-sa ba-ani aro a-bao kam ka-aniranga da-o an-chi ding-ol aro mikchi ong-esa chu-sokatako man-aiah. Uamangni Isol baksa meli-nangrimani be-aha, duk aro skimanirang sokbaaha aro papni a-sel uamang sikdikdik ong-e nikaha.

Adam aro Hobani katta manigija dakahaonin pilak mandeni jatan ia apsan papni dolo ga-akpae papni dormaha, sianiko man-na nangtokaha.

**"Jedake mande saksachi pap a-gilsako napaha, aro papchi sia napaha; aro uandake sia pilak manderangona sokaha, maina pilakan pap ka-aha" - Rom 5:12.**



An-ching pilakan ka-tongni okkrianiko gapananiko aro an-chingko naljoke rakianiko man-na ska, jekon Isolsan- mangmang on-na man-aia. Ua okrianiko an-ching maiba kusiniko dakanichi - kam dal-a man-na susaanichi, chu ringe chio bilone sianichi ba maiaba katchaanirangko am-anichi gualatna kam ka-a.

Indiba iarang pilakan Isoloni sikdikdik ong-ani giminsa ong-aia. An-chingni janggi tanganio Isolni ka-saaniko man-pilskaode an-ching uko namatnan man-jawa.

**"Na-a angna janggini ramako mesokgen; nang-ni mikkango ka-srokani gapa gnang; nang-ni jakrao jringjrotna an-senganirang donga" - Git 16:11.**

Chu-gimik chu-ongnikanikode an-ching Isol baksa meli- nangrimatna man-ahaosa man-aigen, aro Uni sambao dongpana man-osa ong-aigen.

## 2. PAP ARO SIANI A-KUANGKO JAL-ANG CHANBATANI

Papni a-selna mandesan duk man-aijaha. Adam aro Hobani pap ka-e Isoloni katahaon, Isolni ka-tongba sapaaha. Aro Ua da-oba mandeni dukna duk man-paa. Ua an-chingni man-na skanirangko chu-sokatna aro an-chingni gisikni saknaanirangko nampilatna ske dongenga. Ua An-tangoni ekanggiparangko niwate donge kusi ong-e dongenga ong-ja. Pap aro siaoniko jal-ang kabate uamangko nampilatna Isol seoke ra-aha.

**"Maina Isol a-gilsakna inditan ka-saaha, ua an-tangni saksakamkam depantekon on-jok, maikai uo bebera-gipa sakanti gimagija jringjrotni janggiko man-gen. Maina a-gilsakko bichal ka-china, Isol An-tang Depanteko a-gil-sakona watatjachim; indiba a-gilsak maikai uachi jokna man-gen" - Johan 3:16, 17.**

Isol An-tangni Depanteko papni daiko gamna man-na gita boli dake on-aha. Uni janggi tangani, siani aro chakatpilania mandeni dal-begipa papko kema man-ate uko jokatani chol ong-aha aro uan Kristo aro Satanni cholonni dingtanggrikaniko mesokaniba ong-aha. An-chi jokenggipa Kristoni be-en, paponiko an-pilatna papirangna jal-ang chanbate on-ani gita ong-aha. Ka-saanian a-kuangko jal-ang kabatani gita ong-aha, unon Kristoo bebera-e Uko Gitel Jokatgipa dake ra-chakgiparangna jringjrotni janggiko man-atna cholko dakanii ong-aha.



## 3. JISUNI GIMIN NANG-NI U-INA NANGGIPA MINGSNIRANG

Darang a-gilsako janggi tanggipa mandeba ia Jisuni cholon mingsni gita ong-gipa dongja:

**(1) Jisu Salgioni A-aona Re-baaha**

Jisura basakonin dongengachim?

**"Abrahamni atchchina skangon anga gnang" - Johan 8:58.**

Jisu a-gilsak gimikna indine aganenga, "Anga donga". Anga skangnin dongaienga aro dongangkugen. Jisu mande me-chikoni atchiahaoba (Mati 1:22, 23) Ua Isol baksa ong-achim. Isol mandeni bimango atchigimin ong-a.

Dwight L. Moody, ritcha chi-sku chasongni Billy Graham, Jisuni mande ong-e atchianini gimin changsao indine aganaha: "Jisu mande ong-e atchie sonani palango tuatako man-ahaoba, sa-grerangchi rodila aro simsakako man-ahaoba aro sonani chamoschi cha-na man-oba, Uni salgioni re-bae a-gilsako dongania

dal·begipa on·kangani ong·kugenchedim. Indiba a·gilsakko Dakgipa Rugipa mandeni be·enko ra·e kangal ma·a pao atchie namjabatsranggipa obostarangko chagronge dal·baaha."



Jisuni atchiao sa·gre Johanna indine aganeaha:

**"Ua (Mariam) depanteko ba·gen, aro na·a uni bimungko Jisu mingna nanggen, maina ua an·tang manderangko uamangni papranganiko jokatgen" - Mati 1:21.**

Jisu a·gilsakko dakgipa (Johan 1:1-3) an·chingni a·gilsakona re·bae an·chingko pap aro siaoniko jokatna re·bana skengachim.

### (2) Jisu Pap Gri Janggi Tangaha

**"Isolni Depante Jisu ..... pap gri, pilakni gimin an·ching gita dakkajoako man·aha" - Ibri 4:14, 15.**

Pap gri janggi tanganiko Isol ku·sikchi aganmangmangaia ong·ja. Ia a·gilsako Ua mande gita janggi tange pap gri ong·e janggi tange mesokaha. Ua pilak nambatgipa skiprakanina bate Uni janggi tanganian nambate skiprakani ong·aha.

Kristoni bobil Satan, Jisuni a·gilsako kam ka·mitingo Uko pap ka·atna jotton ka·beahachim. Bakrao Uni Isolna kakket ong·aoniko bilgriatna ua raken kam ka·aha (Mati 4:1-11). Chisolo so·otako man·na skang Gethsemane bario Ua bilakbee dakkajoaniko man·aha aro an·chi ding·ol gita jokpilaha (Luk 22:44).

Indiba Kristo Diabolni pilak dakkajoaniko chakaha, aro "Ua pap ka·jahachim." Jisu An·tangan dakkajoa aro neng·nikanirangko chakangahani gimin Ua an·chingni neng·nikanirangkoba ma·sichaka. Ua an·chingni bilgriao duk man·pana (Ibri 4:15) u·ia.



Jisuna maina pap gri janggi tangania nangchongmotgipa ong·a?

**"Papko u·igijagipako ua chingni gimin papigipa dakaha. Chinga maikai Uo Isolni toromi ong·gen" - 2 Kor. 5:21.**

Jisu dakkajoako man·oba pap gri dongaiah, indakesa Ua an·chingni gitcham janggi tanganiko Uni pap gri janggi tangani baksa srena man·gen.

### (3) Papko ra·angna Jisu siaha

Badita sak manderang pap ka·aha?

**"Maina pilakan pap ka·aha, aro Isolni rasongko man·sokja" - Rom 3:23.**

Papna sastia maia?

**"Maina papni dormaha sia, indiba Isolni ka·sae on·aniara an·chingni Gitel Kristo Jisuo jrингjrotni janggi ong·a" - Rom 6:23.**

Jisu maina siaha?

**"Nibo, Isolni Mes Bi·sa, a·gilsakni papko ra·anggipa" - Johan 1:29.**

An·ching pilakan pap ka·ahani gimin sianiko man·na nangahachim, indiba Jisu an·chingni palo siaha. Ua "an·chingna pap" ong·skaaha. Ua an·chingko siatani daiko gamaha. Uni siania an·chingna indin on·ani ong·a aro ua "on·ania an·chingni Gitel Kristo Jisuo jrингjrotni janggi ong·a" (Rom 6:23).

An·chingna ka·sae on·ani gita Jisu An·tangni toromi ong·e janggi tanganiko on·skaaha. Indakgipa ka·saaniko mandeni gisik u·isokja aro Uni siani a·selsa "an·ching Isol baksa tom·tomaniko man·a" (Rom 5:1).

#### (4) Jisu Siaoni Chakatpilaha

Jisuni kamara Uni chisolo siahaon bon·eaia ong·ja. Ua sie donge an·chingni Jokatgipa ong·na man·kuja.

**"Kristo chakatatako man·kujaode na·simangni bebera·a ong·gramaia, na·simang na·simangni paprango dongpiti. Indide Kristoo sigiparangba gimaaha" - 1 Kor. 15:17, 18.**

Mohammed aro Buddha a·gilsakna adita aiao inmangipa beberangko skiazza. Uamang millionni manderangko gisiko nangataha, indiba uamang gopramo sie bon·chipaihanni gimin uamang gipinrangna janggiko on·na man·giparang ong·ja.



Siani gittamgipa salo Jisu chakatpilahani gimin Ua mai ku·rachakaniko an·chingna on·na man·aha?

**"Anga tanga, na·simangba tanggen" - Johan 14:19.**

Jisu tangenga. Ua siani kosako bil dongani gimin Ua an·chingko siaoniko jokatna ama aro bang·bee jringjrotna janggiko on·na man·a. An·ching Uko an·chingni ka·tongrangona rimnapode, Ua an·chingo donggen. An·chingni salanti nanganirangko chu·sokatna Kristo pangnan tange dongenga.

**"Nibo, sal chon·jaskal pangnan anga na·simang baksa donga" - Mati 28:20.**

A·gimikoni manderang an·tangtangni namgija bewalrangoniko Jisu maikai uamangko jokatahachim, uko gipinrangna agane on·enga.

Chingni Sastro poraiani lekkarangko poraigipa chatrorangoni saksa aganchakani lekao ia kattarangko mitele seataha: "Anga chu ringrakgipa ong·achim. Salsao anga chu peke dongmitingo na·simangni Sastro poraiani lekkarangko aganparake seaniko jaboldamo ga·ake dongengako anga nikaha. Anga uko kolame gapate wataton Kristoko u·ichongmotaniko anga man·soaha. Ua lesorangko poraiani ruutkujaon anga angni ka·tongko Isolna on·aha, aro chu ringna skani angoni gimaangaha."

Ia mandeni janggi tanganiko Kristo ra·ahon, uni chu ringna skaniko gimaatna ua bilko man·aha. Jokatgipa chakatpilgimin Kristo ong·ani gimin Uona dakchakaniko nange re·bagiparangna Ua dakchakna man·a.

#### (5) Jisu Salgichi Gadongaha

Uni chakatpilani ja·mano Jisu Pagipaona re·pilangna skang (Watata 1:9) Ua ia ku·rachakaniko Uko ja·rikgiparangna on·angaha:

**"Na·simangni ka·tongko jajrengatjachina. Isolo bebera·bo angoba bebera·bo. Apani noko dongani biap bang·a ..... Anga na·simangna biapko daksona re·nasia. Aro ..... Anga re·bapile na·simangko an·tangona rimanggen, maikai anga jeo donga uanon na·simangba dongna man·gen" - Johan 14:1-3.**

#### (6) Jisu Salgini Kamal Ong·e Kam Ka·enga

Jisu pangnan an·chingna salgio biapko on·na kam ka·enga.

**"Manderangni paprangna nangrimataniko dakna, Isolnirangni gimin ka·sachakgipa aro bebegipa Kamal Dal·gipa ong·na gita pilakni gimin jongadarang gita ong·na nangachim. Maina Ua**



**an-tangan dakmajoako man-e duk chakahani gimin dakmajoako man-giparangna dakchakna ama"**  
**- I bri 2:17, 18.**

Manderangni papna boliko on-na Jisu a-gilsakona re-baaha, aro an-chingko papni nokolrang ong-aoniko jokatna re-baaha. Papni a-sel duk, saknaa aro siaoniko Diabolni ra-bagipako gimaatna Jisu siaha.

Jisu an-chingni Kamal Dal-gipa ong-e "pilakni gimin jongadarang" gita ong-aha. Ua da-o Pagipani sambao mol-molchakna pangnan dongenga. Ia apsan Jisuan jean bi-sarangna patiaha, til-ekao rim-a man-gipa me-chikko kema watgipa, Uan an-chingni nanganirangna "dakmajoako man-giparangna" kam ka-engna.

#### **(7) Jisu Re-bapiltaigen**

Salgichi re-pilangna skang Jisu maiko ku-rachakanga?

**"Anga na-simangna biapko daksona re-nasia. Anga re-bapile na-simangko an-tangona rimanggen, maikai Anga jeo donga unon na-simangba dongna man-gen." - Johan 14:3.**

Jisuni re-bapilahaon Ua an-chingko papkoniko, saknaaoniko aro siaoniko ia a-gilsakoniko jokatgnok. Aro Ua an-chingko pangnan katchakamaigipa siani grigipa gital a-gilsakona rimchaksognok.

#### **4. CHU-SOKGIPA KA-SAANI**

Taiwan a-songo maharini bia ka-e on-na tarianini gimin golpo agana donga. Panteko U Long mingachim aro me-trako "Golden Flower" ine mingachim. Bia ka-mano me-chikni mikkangko pingopgipa ba-rako U Longni oprakate niahaon U Long namen duk man-aha. Ua me-trani mikkangara uri naani dak donge ritchech daka dongachim.

Uni ja-mano U Long jikgipako gele dongaiaha. Me-chik, segipako kusi ong-atna gita man-a dipet kam ka-aha. Indiba segipa uni kamrangna mamungkoba chanchiskajahachim.

Bia ka-e dongani bilsi chi-gnini ja-mano U Long maibakai kana ong-na a-bachengaha. Uni mikron birongko bodolna man-jaode ua kana ong-kamgnok ine doctor una aganaha. Indiba uo korosh dongjachim, aro mikron bodolna nanggipa manderang bang-beani gimin uko ruutani ja-manosa operate ka-na man-aigenchim.

Golden Flower an-tangni somoi gitchaa man-ao megapni tupirangko tarie tangka man-na palna kam ka-aha. Salsao saoba mande U Longna indine kober on-eaha je saoba accident ong-anji ja-mano an-tang mikronko on-na man-engahachim. Ua hospitalchi chaanggalgale mikronko man-eaha aro an-tang mikronna uko doctorrangko an-tangko operate ka-ate tekatskaaha. Sana nambapilani ja-mano ua an-tangko sananina tangkako jikgipani chimongahanina uko nidikesa mitelna okamataha. Jikgipani re-baahaon ua jikgipako niatna an-pilaha. Jikgipa mikron grisa segipako nitate dongeaha, aro segipara jikgipao mikron birong dongtokjaha ine nike jagokmanpilaha. Ua ka-a chakna amjae jikgipani ja-ako rim-e grapha. Aro da-osa skanggipa changna ua jikgipako ku-mituchi bimung minge okamaha: Golden Flower.



An-tang baksa nangrimgia dake gele katgipa manderang baksa Jisu nangrime dongna ske dongainga. Bon-kamao an-chingni Uko Jokatgipa ine minge ra-chakaniko Ua am-engna. Ua An-tangni ka-saaniko mesokna gita mikronmangmangko on-kangana bate be-en gimikkon an-chingna on-kangna skaha. Uni ka-saanian inditan bilakani gimin Ua papirangko jokatna a-gilsakona re-baaha (1 Timothy 1:15).

Kristoni dal-begipa ka-saanian papirangni dal-begipa a-kung nalsachi dongaoniko Kristoona nangrimataha. Ua apalbegipa a-kuangoniko nang-ko An-tang jakpongrrangona salbakna skaniko na-a u-iyahachimma? Nang-ni bi-ao na-a indake maina

aganja, "Jisu, anga Nang-na ka-saa. Nang-ni aiao inmanpilgipa on-kanganina Nang-ko mitela. Angni ka-tongona re-bae angko da-o jokatebo, angko chu-gimik pangnajolna jokatebo"?

**JISU**

Isol ong-e mandeni bimango re-baaha  
An-chingni biapo pap gri janggi tangaha.  
An-chingni paprangna siaha.  
An-chingko jokatna siaoni chakatpilaha.  
Salgio an-chingna biapko tarisona gadoangaha.  
An-chingni Kamal Dal-gipa ong-e kam ka-enga.  
An-tang baksa jringjrotna dongkamatna gita an-chingko rimna  
re-bapilenga

## Maikai Janggi Tangao Gnigipa Chang Cholko Man-taia

Janggi tangani bang-bata bilsirangna kingking Budhist toromo janggi tangbae da-ode saksa Kristian toromko ra-skagipa mandeko "Pa. Lim saksa Kristian ong-e janggi tangamung aro saksa Budhist toromko bebera-e dongamung baditana kingking dingtanggrika?" ine sing-on ua aganchake inaha, "lade altuabea, Jisuko angni jokatgipa ine ra-chakantal angni gisiko tom-tomanian gapaha."

Jisuo pangchakon an-chingni ka-tong gisiko tom-tomanian gapa.

**"Na-a chu-sokgipa tom-tomao uko rakigen, jeni gisik nang-o pangchaka, maina ua nang-o ka-dongaha" - Isaia 26:3.**

Kristian ong-e janggi tanganio chu-sokgipa tom-tomani gnang. Rakianiko chu-soke ma-siani aro name dongani gnang. Jerangan ia u-ianiko am-e man-aha uamang Jisuo janggi tanganina gnigipa chang cholko man-aha.

### 1. JOKATANI INE AGANGIPARA GIMAGIMINRANGNA MAIKO MIKSONGA

Tange dongenggiparangba gisiko sigimin ong-na man-a.

**"Na-simangkoba ua tangataha, NA-SIMANG NA-SIMANGNI NAMGIJARANGO ARO PAPRANGO SIGMIN ong-mitingo, je paprango skango ia a-gilsakni tanga gita bangbangni bilin chong-motan manigjani DEDRANGO DA-O KAM KA-GIPA GISIKNI PAMONG gita na-simang re-ruraachim" - Ephesus 2:1, 2.**

Gisiko sigimin mandeko Satan pap aro manigjani bewalo salwilwile onbatgipa gadangona ra-oe gala. Indiba nama kattao mingsa, aiao inmananide indakpile ga-akgimin mandenaba Isol ka-sakuenga. Papo sie dongenggiparangnaba Ua ka-saa aro chu-gimik naljokaniko uamangna on-engna.



**"Indiba ka-sachakao gam gnanggipa Isol, je ka-sara bang-beachi ua an-chingna ka-saaha, uani gimin, an-ching paprango sigimin ong-oba .....ua maikai re-baenga chasongrango uni ka-saani agre gamchatako Kristo Jisuo an-chingna rinok rinok dake mesokna man-gen" - Eph. 2:4-7.**

Ka-sachakako man-na kraani grimitingon Ua an-chingna ka-saaha. Uni ka-sachakanian Jisu Kristoo an-chingna gital janggiko ong-ataha. An-chingde an-tangtangko dingtangatna amja; indiba Isolde uko dakna ama. Bebera-e an-tangko Una chu-gimik on-kangsrongon Ua an-chingna gnigipa cholko indin on-taia.

### 2. MAIONI AN-CHING JOKATAKO MAN-NA NANGENGA?

**(1) An-ching paponi jokatako man-na nangenga.**

**"Maina pilakan pap ka-aha aro Isolni rasongko man-sokjaha" - Rom 3:23.**

Iako kan-dike aganode - an-chingni namani gimin u-ia gitamangba an-ching dakja. Gisiko dongtogijagipa ma-a paa bi-satangko saidate gisiko saatnaba donga. Saksa mande gari salenggipa mandeko ka-o nangbee jentensa uno chagaknesiaoni jokengnaba donga.

**"Pilak toromi ong-gijani pap ong-a" - 1 Johan 5:17.**

Pilak namgija dakkewalrangoni an-chingko jokatna nanga; jedakode - tol-a, ka-o nanga, be-enni skanirang, namnikgija dakanirang uandake aroba minggipinrang dongenga.



**"Papko ka-gipa sakantian niamkoba pe-a aro niamko pe-an pap ong-a"**  
- 1 Johan 3:4.

Uni gimin an-chingko paponikoba jokatna nanga.

**(2) Isol baksa nangrimaoniko dingtang ong-ataoniko an-chingko jokatna nanga.**

**"Indiba na-simangni namgija dakanirang na-simangko aro na-simangni Isolko ekgrikataha, ..... Na-simangni paprang uni mikkangko na-simangoniko donnuaha" - Isaia 59:2.**

Kema watako man-gijagipa paprang an-chingko Isol baksa nangrimaoniko dingtangataha. Uni gimin Isol ka-dongchakaniko on-taina miksunge Jisu ia a-gilsakona re-baa.

**(3) Papni a-sel jringjrotna gimagnioniko an-chingko jokatna nangenga.**

**"Uni gimin jedake mande saksachi a-gilsako pap napaha aro papchi sia napaha aro uandake sia pilak manderangona sokaha maina pilakan pap ka-aha" - Rom 5:12.**

**(4) Papo dongengaoniko, kusi ong-gijaoniko bangbangko janggi tangengaoniko an-chingko jokatna nangenga.**

Papi mandenade, uni janggi tangania bon-chongdikgipa ramako re-ani gitasa ong-aia.

**(5) Papan gapgipa a-gilsakoniko an-chingko jokatna nangenga.**

la papan gapketketgipa a-gilsakoniko an-chingko jokatna nangenga.

### 3. SAWA AN-CHINGKO JOKATNA AMA?

Jisu mangmansan an-chingko jokatna man-aia.

**(1) Jisu an-chingko paponiko jokatna ama.**

**"Ua depanteko ba-gen aro na-a uni bimungko Jisu mingna nanggen maina ua an-tang manderangko uamangni papranganiko jokatgen" - Mati 1:21.**

Saksa Hindu an-tangni saksa Kristian ripengna agane inaha, "Kristian toromo donggijagipa bang-a kattarangkon anga Hindu toromo nikna man-a, indiba Kristian toromo mingsa gnang, uan "Jokatgipa" ong-a. Kristian toromo mangmansan a-gilsak gimikko jokatgipa gnang.

**(2) Jisu an-chingko Isol baksa nangrimattaina ama.**

**"Na-simang maikai unsalo Kristooni dingtang ..... Indiba na-simang skango chel-beaogiparang da-o Kristo Jisuo, Kristoni an-chichi sepang ong-aha" - Ephesus 2:12, 13.**



Ripeng dake melie dongnade Jisuan nambatgipa ong-aia. Ua an-chingna pilak nambatanirangkosa ra-bana skaienga. "Kristoni an-chichi" an-chingni skangni paprangko kema wataha, aro salantio an-chingko name janggi tangna man-na gita Ua bilko on-engga, indake An-tangni chu-sokgipa janggi tanganiko on-engga. An-ching ga-aka changantian an-chingko salchrona gita Ua sepango

dongenga. An-ching Una ka-saon Uni namnika gita janggi tangna skatako man-gen.

**(3) Jringjrotna gimagnioniko Jisu an-chingko jokatna ama.**

"**Maina papni dormaha sia, indiba Isolni ka-sae on-aniara jringjrotni janggi ong-a**" - Rom 6:23.

Niamko pe-giparang ong-ahani gimin an-chingde sina nangjokchim. Maina sian papni krabatgipa sasti ong-a. Jringjrotna signioniko jokate, Jisu an-chingna jringjrotni janggiko on-skaaha.

"**Maina an-ching papi oong-engon Kristo an-chingna sichakaha**" - Rom 5:8.

Uni bon-changgija ka-saani giminisa Jisu an-chingna sichakaha. Uni siani aro papni biteko ra-ahani giminisa an-chingko Isol kema ka-na man-aha.

**(4) Papo kusini ong-gija dongaonikoba Jisu an-chingko jokatna ama.**

"**Uni gimin saoba Kristoo dongode ua gital dakgimin ong-a, gitcamrang gimaaha, nibo uarang gital ong-aha**" - 2 Kor. 5:17.

An-ching an-tangtaride paponi jokna amja ba mangsa singhoni mes bi-sa pil-skana man-gija gita an-chingba an-tangtangko dingtagatna man-ja. An-chingni skana baten papde bilakbata. Indiba Jisu Uni gisikchi an-chingko bilakatna ama. An-chingni namgija dakbewalrangko Ua ka-saa, tom-toma, katchaa, rinok rinok daka aro an-tangko bamata, iarangchi sreskana man-a



Herald Hughes an-tangko dingtagatna man-chongmotjawajok ine chanchipiljokchim. Bang-a changna kingking ua an-tangni chu ringani bewalko galsrangna jotton ka-bejokchim. Chu ringani a-selan ua an-tangni jik derangko bilsa chikkungna kingking aiao inmanpile duk ong-ataha. Salsao ua an-tangko pistolchi goe sina miksongaha. Indiba an-tangko so-otani a-selko ua Isolna aganchengna miksongaha. Bakrobee Isolo bi-mitingo ua namen ka-beaha aro an-tangko dakchakchina Isolo mol-molberaha.

Isol uni bi-aniko knachakaha aro ua sal dipetan ua chu ringako galsrangaha. Ua Sanate (USA ni Parliament House) ni saksa member ong-paaha. An-tangko dingtagatna man-gipa Jisuko ua grongaha.

**(5). Papni a-gilsakoniko Jisu an-chingko jokatna ama.**

Mikkang Dilanibrirango an-ching AM-E NIBO Dilanio iani gimin talataniko nikgen.

**4. ALTUABEGIPA GITTAM JA-KURANGKO DE-ACHI  
AN-CHING JOKATAKO MAN-NA AMA**

**Skanggipa Jaku: Nangni paprangko ra-angchina Jisuko aganbo.**

Paptangko watgalna gita an-ching maiko dakna nanga?

"**Uni gimin na-simangni paprangko kimitna amna gita gisik pil-bo aro pil-taibo**" - Watata 3:19.

Saksa mandeko maia mancha gisik pil-china didiata?

"**Isolni rinok rinok daka nang-ko gisik pil-aona dila**" - Rom 2:4.

"**Paprangna duk ong-ani nang-ko gisik pil-china didiata**" - 2 Kor. 7:9.

Batanggimin salrango ka-gimin paprangna duk ong-e pilak namgija dakbewalrangko wate uarangoni chu-gimik an-pilakon gisik pil-a ine minga. Ian sastina kene duk ong-animangmangkosan miksongaia ong-ja, indiba Jisuni an-chingni paprangni palo biapko ra-skaahani gimin aro Isolni ka-saanina an-tangtangko Una on-pilskaanisa ong-a. Pap Isolko duk ong-atani gimin an-ching papko jegalna nanga.

An-ching Kristoo gital janggi tangna a-bachengahaon, man-a dipet batanggimin salrangni paprangna kema man-na nanga (Ezekiel 33:14 - 16).

An-chingni janggi tangani gitchamko galna dakengo Isol maikai dakchaka?  
Gisik pil-ani aro kema watako man-anian Isolni an-chingna indin on-anirang ong-a.

**"Ukon gisik pil-ani aro pap wataniko Israelna on-na, Raja aro Jokatgipa ong-china (gita) Isol An-tang jakrachi chuataha" - Watata 5:31.**

Aro an-ching gisik pil-on, ka-sagipa Jokatgipa an-chingni paprangko kema ka-a aro paprandoniko an-chingko rongtalata, aro uarangko sagalni tu-achi galata.

---

#### MAIKAI AN-CHING KRISTOONIKO GITAL JANGGIKO MAN-A

1. Uko bebera-e Jokatgipa aro Gitel ine ra-chakachi.
  2. Un baksa nangrimtaiali. (Sastro porairringania namen nangchongmotgipa bak ong-a.)
  3. Unon ua an-tang Gisikchi an-chingni namgija dakbewalrangko uni namgipa gunrangchi sreskaa.
- 

**"An-ching an-tangtang paprangko ku-rachakode, an-chingni paprangko watna .... An-chingko rongtalatna ua bebegipa aro toromigipa ong-a" - 1 Johan 1:9.**

Jokatgipani chisolo sichakani bil an-chingni pilak paprangkon kema ka-na ama. Gitelo ka-dongchakgipa Uo kema mangmangkosan bi-na nangaia. Kema bi-jaode Jisuni sichaka mangmangde an-chingko jokatjawa. Ong-chongmotgipa bakde indake ong-a je, an-chingni paprangsa Uni jakrango aro ja-arango gojalrangko napprotataha. Indiba Jisuara an-chingni skengana aro u-iana baten an-chingko kema ka-na aro An-tang baksa nangrimplattaina skenga.



Nokoni katbrange dongenggipa saksa pantena uni ma-gipa sinasiengjok ine kobor sokangaha. Bang-a bilsirang batangani ja-mano ma-gipani sinakengako knaon ua gisiko duk man-beaha aro ma-gipako bon-kame grongrikna re-angaha. Ua tongtong ma-gipani turamona re-ange ma-gipao grape kema bi-aha. Uno ma-gipa depanteko gipake ku-misichi agane inaha, "Na-a kema bi-ode nang-ni re-brangani salon anga nang-ko kema kaaignokchim." Ia kattarangko agane ma-gipa janggi galaha.

Na-a Isoloni chel-e katangahaoba Ua nang-na sengsoenga. Maina ua nang-na ka-saa aro Ua nang-na sichakaha.

**Gnigipa Ja-ku - Jisuoniko gital janggiko ra-chakbo.**

Jisuoniko gital janggi tanganiko ra-chakna nang-ni dakna nanggnide Jisu nang-ko jokatbebeaha ine na-a bebera-na nanggen. Mamung kenchaka grian Jisu nang-ko kema wataha, aro nang-na gital janggi tanganiko on-aha ine bebera-bo.

**"Indiba badita mande uko ra-chakaha ua uamangna chong-motan uni bimungo bebera-giparangna Isolni de ong-china bil on-aha" - Johan 1:12.**

Isolni de ong-e na-a gital janggi tanganiko man-na kragipa ong-a. Agangimin gita na-a uko an-tangari man-na amja-uan chu-gimik salgini Paani ka-sae on-anisa ong-a! An-chingni kenchakani aro jajrenganirangoniko jakgitelatna gita Jisu an-chingna ku-rachakaha.

An-chingna gital janggiko on-anio Isolni mai bak gnang?

**"Jisu aganchake inaha, Beben anga nang-na agana, kosakoni atchijaode darangba Isolni songnokko nikna man-ja" - Johan 3:3.**

Jisuni aganani gitade bebera-gipa aro paponi an-pilgipa sakantian gital janggi tanganina atchitaigiminrang ong-a. Ian Isolni aiao inmanpile dakna amani kamsa ong-aia. Ua indine ku-rachaka:

**"Gital ka-tongko anga na-simangna on-gen aro gital gisikko anga na-simangni ning-o dongen" - Eze. 36:26.**

Jisu an-chingni ka-tongko - chanchiani aro bewalrangko dingtangata, aro an-chingo donga (Kolosi 1:27). Ia gital janggi tangania agane roe bon-atanimangmangde ong-aija, indiba ian gisikni siaoni gital janggi tangna chakatpilani ong-a.

### **Gittamgipa Jaku - Sakantian Jisunasa tangbo.**

Kristian jangi tanganio an-tangna chanchiaoni salanti an-pilani dongna nanga aro indake Jisuko an-chingni ka-sagipa ripeng dake ra-na nanga. Indake an-ching ia gital janggi tanganio Jisu baksa nangrimbatroroa. Iani ortoa, namgipa somoirangko ra-en Un baksa kakket dake nangrimani ong-a. Toromo namrorona gita Isol an-chingna mingbonga dakchakanirangko on-aha, uaranga: Sastro poraiani, Isolo bi-ani, gipin Kristianrang baksa nangrim-melian, aro an-chingni bebera-aniko gipinrangna agane on-anirangan ong-a.

Kristoo janggi tangengon an-ching dakgual-daksretgija dongna man-aha ine ong-ja. Indiba papo ja-gitoton Jisuo kema bi-e nambate dakna jotton ka-angroroa. An-ching badiabachinade mikkangangenga, aro Kristo an-ching ka-tongrango dongkama ine an-ching u-in a man-a.

### **5. GNIGIPA CHOLKO MAN-TAIANIO KATCHAANI**

Uni Sanateni saksa member ong-mitingo Herold Hughes uni namgipa member ong-ani gimin bang-a boksisrangko man-aha.

Attamsao ua Sastroko gisik nangbee poraiengachim.  
Unochachaon uni sakgni chonchongipa demechikrang uni sambao chadengeaha.

Union chonbatgipa demechik aganaha, "Baba, chinga nang-ko tusina skang ku-dimna re-baa."

Pagipa kusini mikchiko donnuna man-jaha. Ruuta somoirangonin bi-sarang pagipani an-tangtangko gipakanina senge dongaingachim. Da-o uamangni mikronrang kenani dongjaha.



Bon-kamao pagipa nokona re-bapiljok.

Jisu an-ching sakantinan gnigipa cholko on-bebeenga. Ua namjabatgipa papirangmangmangkoba ra-chaka aro uamangna gital janggi tangtaianiko on-a.

Jokatgipa an-ching sakantini nokona bon-kamao re-baaniko nangnika. Na-a Uni ka-sae okamaniko ra-chakahama? Uni kema ka-aniko ra-chakania pagipani detangko gipakna jakko badalata gita altuabea.

Na-a Jisuo ka-dongchake nikkujaode, da-on Uo ka-dongchake Uko nang-ni Jokatgipa ine ra-chake nibo, aro indake bi-bo: "Batanggimin salrango angni ka-gimin paprangna anga duk ong-a Appa, angni pal sichakchina Gitel Jisuko watatanina mitela. Jisu, ka-sapae angni paprangko kema ka-e ango dongkambo. Anga gnigipa changna cholko man-na skenga. Nang-mung dongkamna anga skenga. Aiao inmanpile angko dingtangatanina mitela, Amen." Na-a ia aiao inmanpilgipa am-e nikaniko nike ra-bo: An-ching Jisuona re-baon Ua an-chingko jokata.

## Nang-ni Mikkangchini Gimin

Doctor Patricia aro David Mrazek uamangni kam ka-anio bang-a ka-beaniko man-aha. Bi-sarangni saako sangipa doctorrang ong-e uamang bang-a bi-sarangko sanmanaha. Mitam bi-sarangara bilongbee saaoni nambapila, indiba mitam bi-saranga sianga ine uamang nikaha. Maidake indake ong-a?

Ia sing-anirangna aganchakaniko man-na uamang am-rikkitaniko dakaha. Uamangni am-e u-iania saa bilongaoni nambapilgiparangni gisepo indake nikaha je, ua bi-saranga namani gimin chanchikamaia aro ka-dongani dongkama.

Dingtanggrianide ka-dongani ong-a. Namgija obosta an-chingona sokbaon, ka-dongani an-chingna dakchaka.

Mandenjat ka-donganiko bilongen nangenga. Indiba maidake uko man-gen? Sastroni katchinike aganani gita niatjaskalde ka-donganiko a-gilsako man-na amja. Ia poraianirango niksenggipa katchinike agananirangko nigen jean bang-a manderangko bilake ka-dongna gita gisik nangataha.

### 1. AIAO IMMANGIPA SASTROO KATCHINIKE AGANANI

Kristoni atchina bils 500 mang skang Isol a-gilsakna Daniel katchinikgipachi aiao inmangipa mikkangchi ong-gniko mesokaha. Isol a-gilsakni itihaso bils 2500 ni somoio ong-gniko skangon mesokman-aha, ian Danielni somoioni an-chingni chasongona soke mesokaha. Ia katchinike aganania Babylon a-songni raja Nebukadnezzarna Isolni on-gipa jumango a-bachenga jean bils 250 mang re-angaha. Ia jumangara ia rajako gisik suk ong-atjaha indiba ua mikrakon jumangko gisik ra-jaha. Babylonni pilak gisik seng-giparang rajako uni jumangko gisik ra-na ba orto pe-na dakchakna man-jaha. Uni ja-mano rim-gittanga man-bagipa Ibri pante Daniel minggipa ua jumangko gisik ra-atna aro uni ortoko pe-na okamako man-aha jean salgini Isol pilak u-igijanirangko parakna man-a ine aganachim.

Rajani mikkango ka-donga gnang chadenge aganparakataha:  
 "O raja, na-a niengachim, aro nibo, bimang dal-begipako nikaha. Ia bimang bilakbegipa aro ching-batbegipa nang-ni mikkango chadengaha aro uni mikkang namen kenbeani ong-achim.



"Ia bimangara, uni sko namgipa sonani, uni ka-bak aro uni jaktongrang rupani, uni ok aro uni ja-pingrang rangni, uni jaktongtangranga silgrakni, uni ja-arang silgrak aro a-ste ong-achim.

**"Jakchi den-otgijagipa ro-ong dotsa ua bimangni silgrak aro a-steko dakgipa ja-ako doktonge be-kningatkujana kingking na-a niengachim. Unon ua silgrak, a-ste, rang, rupa aro sona damsan bekniningatako man-toke ding-karini mi nakramni bebu gita ong-tokaha; aro uamangni chin gripile balwa uamangko balpongangaha; aro bimangko dokgipa ro-ong a-bri dal-begipa pil-e a-gilsak gimikon gapaha" - Daniel 2:31-36.**

Ia bimangara nikchengode ia chasongrango ka-donganiko man-na gita mamung nangeani dongja gita nika, indiba sengkubo.

### 2. KATCHINIKE AGANANIKO ORTO PE-ANI

Nebukadnezar rajana uni jumango nika gita tiktak aganani ja-mano Daniel katchinikgipa indake talataha:  
**"Ia nang-na salgini Isol songnokko, bilko, aro bilakaniko aro rasongko on-aha..... Na-an ua sonani sko ong-a"- Daniel 2:36.**

SONANI SKO: Sonani skoa badia a-gilsakni bilko mesoka ine Daniel rajana agana?



**"Na-a O raja, rajrangni raja ong-a, nang-na salgini Isol songnokko, bilko, aro bilakaniko aro rasongko on-aha..... Na-an ua sonani sko ong-a"- Daniel 2:37, 38.**

A-gilsakni dal-batgipa a-songni sason ka-gipana Daniel aganengachim:  
 "Nebukadnezzar; nang-ni a-song Babylonan bimangni sonani skoko mesoka ine Isol nang-na aganenga."

KA-BAK ARO UNI JAKPONGRANG - RUPANI: Mandeni nikani gitade Babylon a-songara jringjrotna baigen ine ong-chim. Indiba katchinike aganario uni ja-mano mai ong-gen ine agana?



**"Aro nang-ni ja-mano nang-na bate onbatgipa ge-gipin songnok ong-katgen" - Daniel 2:39.**

Isolini aro agansoani gita chu-sokgen ine Nebukadnezzarni songnok Persian General, Kyrus 539 B.C. bilsio dakgrike amon be-gruaha. Uandake rupani ka-bak aro jaktongrang gipin dal-gipa songnok Medo-Persiako mesoka.



RANGNI OK ARO JA-PINGRANG  
 Ia dal-behipa bimangni ia bakrang maiko mesoka?

**"Ge-gipin songnok ...gittamgipa rangni songnok ong-katgen; uan a-gilsak gimikko sason ka-gen" - Daniel 2:39.**

Rangni ok aro ja-pingrang Greece a-songko mesoka. Alexander the Great Medo Persiako dakgrike amaha aro Greece a-songko a-gilsakni gittamgipa songnok ong-ataha. Ua a-song 331 B. C. oni 168 B. C. ona sason ka-aha.



SILGRAKNI JA-TONGRANG  
**"Aro brigipa songnok silgrak gita rakgen, maina silgrak pilakkon bnekata aro be-kningata; aro ia pilakkon be-kningatgipa silgrak gita uan bnekate be-kningatgen" - Daniel 2:40.**

Alexanderni siani ja-mano, uni songnok bilgriangaha aro bakkak dakaha. Bon-kame 168 B.C.o Pydma o dakgrikianio Rom silgrakni songnok Greece songnokko kning ripik dakataha.

Kaisar Agustus Romni songnokko sason ka-mitingo Jisu atchiahia. Unoni bils 2000 re-angaha (Luk 2:1). Kristo aro Uni Watatarang silgrakni ja-tongrangni somoio janggi tangachim.

Ia agansoani gimin mandeni chanchiani gita dikdiksa chanchiatbo. Maidake Daniel Babylonni somoio janggi tange ritchani ritcha bilsirang mikkangchi badita songnokrang ge-sani ja-mano gegipin sason ka-riken ine maikai ma-sigen? A-songni man-e cha-ani on-tisani ja-mani maidake ong-gen u-in a neng-a. Indiomangba Babylon, Medo-Persia, Greece aro Rom agansogimin gita tiktak a-songsani ja-mano a-song gimin - katta manigipa skul bi-sarangni dre dre dake chadenga gita sason ka-angaha.

Isol mikkangchi ong-gnirangko sason ka-ama? Ia dal-begipa miksonganio pangchake an-ching ka-dongna man-genma? Aganchakanide, Oe ong-chongmota!

SILGRAK ARO A-STE BAKSA BRINGIMIN JA-A ARO  
 JA-SIRANG: Bongagipa a-gilsakni bil Romni ja-mano sason ka-genma?



**"Aro na-a ja-arang aro ja-sirangko mitama indani a-ste aro mitama silgrakko nikaha gita, uan pekwatgipa songnok ong-gen; indiba silgrak aro a-steni brinako nang-ni nikgimin gita uno silgrakni bil donggen. Aro ja-ani ja-sirang mitama silgrakni aro mitama a-steni ong-a gita ua songnok adita bilaken aro adita be-ninggipa ong-gen" - Daniel 41:42.**

Katchinikgipa bongagipa a-gilsakni gimin agansoja indiba silgrakni Rom songnokni giminisa. Bimangni ja-a aro ja-sirangchi mesokani gita Rom songnok a-song dam 10 dake ra-ronako man-gen.

Iara on-bebeahama? Ong-chongmotaha. Kristian a-bachengani brigipa aro bongagipa ritcha bilsirangni somoio salgrooni ka-saninggijagipa skia pora donggijagipa dol Rom songnokni be-gruangengmitingo a-songona napdrabae dakgriktaitaiaha. Bon-kamao saliram Rom songnokni bang-batakaon jat 10 ra-aha, aro district ge 10 jakgitelgipa a-songrang dake Europe a-songni ning-o a-bachengataha. Uandake ja-sirang da-ororoni Europeni a-songrangko mesoka.

### **3. SASTROO KATCHINIKE AGANANIO AN-CHINGNI CHASONG**

Danielni katchinike agananio ia Europeni jakrang saksa sasong ka-gipani ning-o nangrimaniko dakna jotton ka-aniko dakna agansoani gnangma?

**"Aro silgrakni a-ste baksa brinako nika gita, uamang manderangni bitchriko kimgrike an-tangmangko brinatgen; indioba silgrak a-ste baksa ma-gapgiya gita uamangko ma-gapani ong-jawa" - Daniel 2:43.**

Pil-ni pil bilakgipa, wa-sagipa manderang Europko nangrimatna jotton ka-aha, indiba changantian uamangni miksonganiko chu-sokatna man-jaha. Gipinrangna bate Napoleon Europeko nangrimatanio chu-sokatna bang-jabatahachim indiba haida ia katchinikan kattako chanchienkon Waterloo o dakgrikao amako man-e katangaha, ua indine inwataha, "Isol pilakna bate dal-batgipa angna agredugaa. Kaisar Wilhelm II aro Adolf Hitler uamangni chasongo bilakbatgipa sipairangko tom-e skiah. Indiba sakantian uamangni sason ka-ani ning-o Europeko nangrimatna man-jaha. Maina? Maina Isolni katta chu-sokgija ong-jawa. "Manderang bringimin ong-gen aro nangrimjawa." A-gilsak gimikni changgni dakgrianini bitea mikkangchi ong-gnirangko Isol Uni jako rim-kepa ine mesoka. Ua bon-kame sason ka-a. Ua an-chingna ka-donganiko on-na, tom-tomani gisikko on-na aro an-chingni janggi tangani Uni miksonganiko ka-dongna chu-onga.




---

**JA-SI GE-CHIKKUNG - SALIRAM**  
**ROM SONGNOKNI MONGSONGGIPA JAT CHIKKUNG**  
 Anglo Sexons (England)  
 Franks (France)

Alamanni (Germany)  
 Lombards (Italy)  
 Ostrogoths (Ja·mano nisiako man·aha)  
 Visigoths (Spain)  
 Burgundians (Switzerland)  
 Vandals (North Africa, Ja·mano gimaaha)  
 Suevi (Portugal)  
 Heruli (Bang·gija ritcha bilsirangni ja·mano gimaaha)

---

#### 4. MIKKANGCHINIKO NIATANI

Danielni katchinike aganani mingsa bakmangmansan chu·sokgaj dongkuenga. Ua bimngni ja·ako doktonge ginchi pil·e natkninggipa ro·ongni ortoara maia jean a·bri pil·e a·gilsak gimikko gipata?

**"Aro ua rajarangni salrango salgini Isol songnok ge·sako songgen, uan jringjrotnaba nisiatoko man·jawa; aro uni raja ong·aniko gipin jatna donangjawa; indiba uan ia pilak songnokrangko be·kningatgen aro bon·atgen, aro uan jringjrotna dongkamgen" -Daniel 2:44.**

"Ua rajarang" ingipara ua bimangni ja·a aro ja·sirangchi mesokgipa rajarangko mesoka - uarangara ia chsongni Europe an·chingni chasongko mesoka. Uamang uni jakchi den·otgijagipa ro·ong ua bimangko doktonggen aro be·kningatgen aro a·gilsak gimiko gapatgen (Daniel 2:34, 35, 45). Ruutjajaan Jisu songnok ge·sako songna salgioni ong·onbagem, Uni songnokara kusini aro tom·tomani songnok ong·gen. Unikode Kristo, chasongni chasongna Rong·brak aro rajarangni Raja a·gilsakko jringjrotna sason ka·gen!

Daniel odhai 2 o agansogiminrang pilakan chu·soktokaha, bon·kamgipana agre jean bimangko ro·ongchi doktonganichim. Isolni donsogimin somoi gita an·ching da·o dal·batgipa ong·gniona sepangbaenga. Kristoni an·chingni a·gilsakona re·bapilani. Jisu Kristo, Isolni Depante, mandeni itihaso ruutgipa dakgrikaniko matchotatnasiengaha unikode Uni ka·saani jringjrotni songnokko a·bachenggen.

#### 5. RAJANI JUMANG ARO NA·A

Ia katchinikania jatrangni chakatani aro ga·akanio Isolni dila  
 ine paraka. Isol ka·tongko ma·sia, aro ia Sastroni  
 katchinikania ua mikkangchikoba rongtal en ma·sia ine  
 mesoka.

Jatrangni il·lenganiko indake che·em che·em dilode, ua  
 sakantini janggi tanganiko dilna man·gen. "Nang·ni skooni kni  
 dingantikon chanmanaha, uni gimin kennabe" (Mati 10:30,  
 31). Isolni on·gipa bebera·ani on·ani an·chingni pilak  
 jajrengani aro kennanirangna namatani ong·na ama.  
 An·chingko Uni gisiko nangatgipa ka·dongani an·chingni  
 janggirangna siltin dake ong·na man·a (Ibri 6:19).



Chi·dokgipa ritcha bilsini skia man·begipa Erasmus uni sagalo songremitingo ong·a obostako agane, je  
 obostakon uni janggi tanga gimikoba gualna man·jahachim. Uni songreenggipa jahas mikka balwa  
 ta·rakao an·chengo choangna man·jahachim. Bilakgipa chipakkorerang jahasko natpakon jahas be·na  
 a·bachengaha. Jahasko chogiparangba kenjagoktokaha. Songregiparangba kena naptokaha.  
 Bang·bataan uamangni dal·nikgipa manderangna dakchakchina chrikaha, gitrangko ring·aha ba gam·bee  
 mol·mole bi·aniko dakaha.



Erasmus saksa songregipana gisik nangaha jean gipinrangoni dingtange dakachim. Erasmus indake sea: "Chinga gimikoni tom-tom ong-batgipa aro jripjrang ong-batgipara saksa me-chikma bi-sa gipakgipa ong-achim. Ua gipinrang gita chrikjaha aro grapjaha indiba uni bi-sa bakgitchakko ja-pingo done Isolo bi-aha."

Erusmusni ma-siani gitade ia me-chikmani Isolo bi-ania uni dakronggipa bi-ani bak ong-achim. Ua an-tangko Isolna on-kangaha gita nika.

Jahas mripangna a-bachengon, ia me-chikmako bolplengo gakate bol chonako boita gita jakkalchina on-aha. ua jaksamsa bi-sako rim-e jaksachi choangaha.

Ua mamungnaba kengija choangaha. Aro ua me-chikma aro uni bi-saan a-gaona sokchengipa ong-aha.

Ka-dongchakna man-gipa Isolo ka-donganiko dingtanganiko ong-ata - a-gilsak an-chingni wilwilao be-kningangenga gita ong-oba. An-ching sagalo an-tangtang choenga ong-ja. Dal-batgipa jakan an-chingko dilenga aro rim-enga.

Na-a Kristoona chu-gimik on-kange re-baode, ua nang-na bebera-aniko on-gen jean mikka balwa ta-raka changantian nang-ko simsakgen. Jisuni ku-rachakgipa ong-rongbewalna batgipa tom-tomaniko am-e ra-bo.

**"Tom-tom donganiko anga na-simangna donanga, angni tom-tom  
donganiko anga na-simangna on-a; na-simangni ka-tong  
jajrengjachina aro kenjachina" - Johan 14:27.**

Ua tom-tomani nang-o gnangma? Nang-o gnangode nang-ko jokatgipa Jisuko mitelbo. Nang-o griode da-alu nang-ni janggi tanganina Uko okamjawama?



## Jisu Nang-na Re-baon

Bilsirangna namgija dake jakkalako man-mano Armando Valladares namen ram-beaha aro mamung kamnaba cholijaha. Ua Krismas salsa giljanoko Isolo bi-anina Castroni patok noko dongchina bils 30 na rai on-ako man-aha. Uano patoko nitimgiparang uko okumu chakataha, dokaha, indiba ua an-tangni bebera-aniko watgalna jechakaha.

Maiaba uko bilakate rakkiah: uara me-tra saksa Martha minggipana uni ku-rachakanian ong-achim. Patok noko uamang gronggrike mikcha namnikgrikaha. Martha ua mandeni bebera-anina uko namnikaha. Uamangni patok nok sarao bia ka-ani ruutkujaon Marthako Miamichina drae watatna nangani dongaha.

Uamangni watgrikanio ka-beani ong-beaha. Indiba Armando an-tangni ka-sagipana ku-rachakaniko dakna man-rikaha. Lekka galgiminko man-e ua ku-mikchetaniko indine see una on-ataha: "Anga nang-on re-anggen. A-bri joljol kosako donggipa slaio donkapgipa atte su-anirangna anga kenja."



Isolni mikkango uamang damsan ong-rimna giljanoko ku-mikchetani chu-sokgen ine ia patoko donggipa mande chanchiha. Basakobade uamang apsan dongrimtaina man-gen, "Na-a pangnan ang baks a donga," ine ua Marthana aganaha. Ia ku-rachakanian uni patoko dongmiting somoio jolgimiko uko bilakataha. Saoba gipin manderangde ua dukrangko chakna ampiljawahachim, aro ia ku-rachakanian Marthakoba bilakataha. Ua segipani obostako manderangna u-iate uko jokatna kam ka-aha. Uaba pangnaba ka-donganiko watgaljaha.

### 1. KU-RACHAKANI

Ua aiao inmangipa grongrimtaianina Kristo salgioni basakoba ong-onbabebegenma ine basakobade an-ching jajrenga gnang sing-manenga. Chinga ruutbeen ekgrikatako man-jok. Indakgipa katchae gronggrikania ong-na ampilgijani ong-a ine chanchiatmanpila. Indiba mingsani a-sel an-chingni ka-donganirang dimelja. Uara Jisuni re-bapilna ku-rachakani gimin ong-a. Sninggiparangko wate salgichi re-angna skang Jisu uamangna indine aganangaha:

**"Na-simangni ka-tongko jajrengatjachina. Isolo bebera-bo, angoba bebera-bo. Apani noko dongani biap bang-a; ong-jaode anga na-simangna agangenchim; maina anga na-simangna biapko daksona re-nasia. Aro anga re-ange na-simangna biapko daksoode, indide re-bapile na-simangko an-tangona rimanggen; maikai anga jeo donga, na-simangba unon dongna man-gen" - Johan 14:1-3.**

Salgichi gadoangna skang Ua an-tangko ja-rikgiparangna "ANGA RE-BAPILTAIGEN" ine aganangaha. An-tango ka-dongchakgipa pilak manderangko, dingtagmancha An-tangni tarisogimin biapona re-bae uamangko rimangna Ua ku-rachakaha. Uni Gnipa re-bapiltaiani gimin Sastroo chang 2500 mang ong-nasipile janaptaitaia. Bils 30 hajalgnina skang Uni a-gilsakona re-bae donganiko bebera-ani gitan Uni re-bataignio an-ching bebera-a.

Ruutbea somoirang re-angaha, Messaia re-bae mandeni namgija paprangko ua An-tango ra-gen ine Isol ku-rachaksoaha. Ua agansogimin kattarangara bang-a bebera-gijagipa manderangnade ong-na amgijani ong-aha. India Jisu re-bae chisolo siaha. Manderangni



chanchisoana bate rasong gnangbate ua kattarangara chu·sokaha. Uandake Uni re·bapilna ku·rachakaniba bebean ong·gen. An·chingna ka·sae re·bapilna ku·rachakgipao an·ching ka·dongchakna man·a, aro channa amsokgijagipa damchi bregiminrangko chimongtaignio an·ching bebera·na man·a.

Patoko dongenga gimiko Armando Marthana chittirangko aro poedorangko seatrongaha aro noksarangko salatrongaha. Maibadake uni seanirangko Martha songbadrango gatatna man·aha. Uarangan a·gimikni manderangko gisiko nangatani ong·aha. Gipin sorkarirang Castro sorkariko ua dos gri patoko donggipako jakgitel watchina draaha. French a·songni Presidentba mol·molchakaha aro bon·kamao 1982 ni October jao Armandoko Parischi bilangenggipa aeroplaneo gadoataha. Aeroplane onchokahaomangba ua an·tangko jakgitel wataha ine bebera·nan neng·pilaha - indiba bilsi kolgrikna duk chakani aro sengani ja·mano Armandoko, Marthani badalsoenggipa jakpongrangona chanapaha.

Adita jaarangni ja·mano ia kusi ong·begipa jiksesa Miamini St. Kieran gilja noko chadengaha aro an·tangtangni ku·mikchetgrikgiminko mingtaiaha. Bon·kamao uamangni nangrimpliani chu·sokaha. "Anga nang·ona re·bagen" ine ku·rachakani chu·sokaha.

Bon·chotao an·ching Kristoko mikkangchakchak nikna man·ao badita katchagen uko na·a chanchiatna man·ama? Uni rasongo re·baanian an·chingni pilak duk mikchi aro jajrenganirangko pingoptokgnok. Jisuni re·bapilanian an·chingni gisikni sikbeenganirangko chu·sokbatgnok, aro an·ching a·gilsak salgisako aiao inmanbatgipa (mande) baksa jringsrotna dongkamgnok.

Jisu bakkak re·bapilenga. Na·a Uko grongsona skengama?

## 2. JISU MAIKAI RE·BAGEN



(1) Jisu sriksrik re·bagemna?

**"Nibo anga na·simangna agansoaha. Uni gimin, nibo, ua bakrao gnang ine uamang na·simangna inode, re·ongkatnabe; nibo, ua nokdringo gnang ine inode bebera·nabe. Maina mikka riprapa jedake salaramchini ong·kata, aro saliramchina nika, uandake Mandeni Depanteni re·baoba ong·gen" - Mati 24:25-27.**

Mikka riprapako chel·bea biaprangonin nikata. Uandake Jisuni re·baaniba re·basrukani ong·gija parake re·baani ong·gen.

(2) Jisua bimangjongjong ong·e re·bataigenma?

**"Nibo, mande sakgni ba·ra bokako gane uamangni (Jisuko ja·rikgiparangni) sepango chadengaha; uamang inaha, Na·simang Galilini manderang, na·simang maina salgichiko nie chadenga? Ia Jisuan, jeko na·simangoniko salgiona rimdoangaha, jekai na·simang Uko salgiona re·angako nikaha, uandaken re·bagen" - Watata 1:10, 11.**

Uni a·gilsakoni re·angan salo sninggiparangna sa·gre sakgnini aganania, "Ia apsan Jisuan" ine ong·a. Uni gimin saoba gipin rajarangni Raja dake re·baskagen ine ong·ja. Ia apsan Jisu - jean sagiparangko an·sengataha, aro kanarangko nikataha. Ia apsan Jisu - jean til·ekao rim·a man·gipa me·chikna ka·sae aganaha. Ia apsan Jisu, jean duk ong·gipa manderangni mikchiko ipakaha aro bi·sarangko ja·pingo rimaha. Ia apsan Jisu, jean Skobikrokni chisolo sie, gopramo neng·take gittamgipa salo chakatpiltaiaha.

(3) An·chingni nikna man·e Jisu re·bapilgenma?

**"Nibo ua aramrango re·baenga; aro pilak mikron uko nikgen" - Para. 1:7.**

Denggurangba aro toromirangba Jisuni re-bao tange dongsogiparangde Jisuni re-bapilaniko niksogen. Badita sak Jisuni re-bapilaniko niksogen ine Jisu An-tangan agana?

**"Aro unon salgio Mandeni Depanten chinko nikgen; aro unon a-gilsakni ma-chongrang Una ka-ako dokgen, aro una Mandeni Depanteko bilmung aro rasong chabeamung aramo re-baako nikgen" - Mati 24:30.**

A-gilsako janggi tanggipa sakantian Jisuni re-bapilaniko niksogen.

(4) Jisuni re-baon Un baksa sawarang re-bapagen?

**"Jensalo Mandeni Depante An-tang rasongo re-bagen, aro Un baksa pilak sa-grerang re-bagen, un salo Ua An-tangni rasongni singhasono asongen" - Mati 25:31.**

"Pilak sa-grerang" baksa Jisuni re-bapilo maidake nikenchim chanchiate nibo.

(5) Jisuni re-bapilgnini tiktak salko an-ching aganson man-genma?

**"Indiba ua sal aro kontani gimin darangba u-ijsa, salgini sa-grerangba u-ijsa, Ang Pagipamangmang u-iaria ..... Unigimin na-simangba tarie dongbo, maina na-simangni chanchisogijan salo Mandeni Depante re-baa" - Mati 24:36, 44.**



Pilak mandean Jisuni re-bapilanikode niksogen indiba bang-gija manderangsan Uni re-bapilani salna tarisogiminrang ong-aigen. Na-a an-tangara Jisuni re-bapilanina tariahama?

### 3. JISU RE-BAPILTAION MAIKO DAKGEN?

(1) Jokata man-gimin (seokgimin) rangko Jisu chimonggen.

**"Aro ua singga gam-beamung An-tangni sa-grerangko watatgen aro uamang balwa dambrioni, chong-motan salgini chon-kamaoni chon-kamaona Uni segiminrangko rimchimonggen" - Mati 24:31.**

Nang-ni ka-tongo aro janggi tanganio na-a an-tangko tariatna Jisuna pakwatode, na-a Uni re-bao katchabee Uko grongsogen.

(2) Sigimin toromi manderangko Jisu chakatatgen.

**"Maina Gitel An-tangan inchroa aro pamong sa-greni ku-rang aro Isolni singga gnang salgioni ong-onbagem; unon Kristoo sigiparang skang chakatgen" - 1 Thess. 4:16.**

Gam-bee inwate Jisu salgioni ong-onbaa. Uni bilakgipa inwataniko a-gimikon knaa. Chasong jolgimikna Jisuko ra-chake sie dongsogimin toromirangni gopramrang oako man-a. Uan mairongpile katchabeeani ong-gen.

(3) Toromi sigiminrangkosan ong-aija, indiba tange dongsoenggipa toromirangko Jisu bimang dingtang ong-attokgen.

**"Unikoa an-ching tanggiparang, dongpitigiparang, bangbangko Gitelko grongna aramrango uamang baksa damsan rimdoako man-gen; aro uandake an-ching pangnan Gitel baksa ong-gen" - pod 17.**

An·chingni signi bimangoniko nitobegipa sigijagipa bimangrang dake jringjrotna dongna Kristo an·chingko dingtangatgen.



**"Nibo anga na-simangna ning-tuako agana; an·chinga pilakan tusiajawa, indiba dikdiksano, mikjapsao, chon-kamani singga sikao an·ching pilakan dingtang dakako man·gen; maina singga sikgen, aro sigimin gimagijani ong-e chakatatako man·gen, aro an·ching dingtang dakako man·gen. Maina ia gimagnigipa gimagijaniko ganna, aro ia signi sigjaniko ganna nanggen' - 1 Kor. 15:51-53.**

Jisu re·baon an·ching pilakan dingtang ong·atako man·gen. Chanchiate nibo: beholi saa dongjawaha, an·ma goka ong·ani ba cancer saba dongjawaha. Hospitalrangko chipbojok. Kristo re·baaha.

(4) Pilak toromirangko Jisu salgiona rimanggen.  
Jisu an·tangan indine ku·rachaka, "Anga re·bapile An·tangona na·simangko An·tangona rimanggen" (Johan 14:1-3 ko nibo).

Piokgiminrangni man·rikaniko salgio nang·na donsoenga ine Pitor agana (1 Pitor 1:4). An·ching Isolni aiaa inmangipa songjinma Gital Jerusalemko aro salgini Pagipako ma·sibatna man·gen.

(5) Pangnajolna duk aro namgijaniko gimaatsranggnok.  
Denggurang - jerangan Jisuni ka·sae okamaniko jegala uamang an·tangtanganan raiko on·manaha. Uamang Jisuni aramrango re·baako nitatsoon uamang an·tangtangan ni papko niate Jisuni re·baaniko nikon, chakna amja; uamang a·brirangna aro ro·ongrangna indine agangen: "Chingni kosako ga·akbo" (Para. 6:16). Pilakko nikaigipa Jisuni mikkango chadengani palde sinsa sikbataha.

Da·o uamangni knagipa kimpreta gita gam·gipa ku·ranga skango uamangk ka·sariri okamani ku·rangsachim ine uamang u·iaha. Jemangan gamma ba chubata gadangna sekseke Jisuna simsakja, uamang magnasa rikaiaha ine nikskagnok. Ian uamangna parake mesokani ong·aha. Darangba gimana nangjawachim. Isol An·tangba denggu mandeni siao katchajachim (Ezekiel 33:11). Darangni gimaanikoba nangnikgija pilakni gisik pil·aniko Ua am·achim (2 Pitor 3:9). Jisu an·chingko indine okamenga: "Pilak gamgipa aro bal jrimgiparang angona re·babu" (Mati 11:28). Indiba bebera·na ampilgija mitamde Uni okamanina knachakjawa.

#### 4. NA·A JISUNI RE·BAANINA TARISOAHAMA?

"Angni Paani noko" na an·chingko rimnapna Jisuna dam rakbeani ong·aha. ua janggitangko gamma nangaha.

**"Kristoba bang·ani paprangko ra·chakna changsan on·gimin ong·enba, ua aro changsa pap gri, una sengsogiparangna jokatanina mikkang pa·gen" - Ibre 9:28.**

Je Jisuan nang·ni paprangko ra·angna chisolo siahachim, uan gnigipa changna re·bataigen aro an·tangna sengsogiparangna Ua jokataniko ra·bagen. An·chingko jokatna gita Ua An·tangko boli ong·ataha. Indiba Jisu gngipa changna re·bajaode, chisolara magna ong·aignokchim. Kristo an·chingna naljokgipa noko An·tang baksa donganiko nangnika. Iako chu·sokatna Uko an·ching ka·tongrango sason ka·china aro an·chingni Gitel aro Jokatgipa ong·china da·on an·ching an·tangtangko Una on·na nanga.



August 16, 1945 ni pringo saksa bi-sa Shantung compound, North Chinao katjojoe an-tangni salgio aeroplane bilangako nikrikaniko aganaha. Pilak ong-katna man-gipa manderang noktangtangoni ong-katbae salgichiko nigitoattokaha. Iano dongenggipa me-asa aro me-chikranga bobil a-songni manderang ine chanako man-e patok donako man-tokengachim, aro duk, sikdikdik dakaniko chaktokengachim. Basakobade dakgrikani bon-gnok ine ka-donganisan uamangko tange rakaiengachim. Ia aeroplaneara uamangan re-baenga ine u-iahaon ua sak 1500 manderangni gisikrango goera godapa gita ong-tokaha. Aeroplane sepangona bilbahaon, saoba inwatataha, "Nibo, Americani nisanko ua aeroplaneni sambengo noksa sala donga." Bebera-na ampilgija uamang nie dongmitingo saoba inwatatskaaha, "Nibo, uamang an-chingna jak ripripatenga, an-chingko uamang u-iatenga. Uamang an-chingko rimna re-baaha."

Ia somoio uamangni gisikara chakna amana bate ding-dobataha. Uamangni chrik a-boka agreeaha. Uamang katwilwila, jakrangko wingwangaha aro grapaha.



Rang-sanan uamang jrip dakaha. Aeroplaneni do-ga oe uoni parachutrango manderang bilonbaaha. Uamangko jokatmnasigiparang basakoba re-baenga ong-ja, uamang da-alon re-baa, aro da-on, uamangni mikkangon ong-engaha!

Uamang compoundni do-gacholchina katangtokaha. Nok chu-giparangoni slaiko nisan ka-e donggiparangni giminde darangba chanchijaha aro kenjaha. Uamang parachuto bolinbagipa manderangona chimongbatokaha. Dakgrikani matchotaha. Jakgitelani sokbaaha. A-gilsak gital ong-piltaiaha.

Ruutgijan an-chingni Isol, an-chingni Jokatgipa, an-chingko jokatna salgioni ong-onbagen. Mandeni namgijani katta aro duk bon-kamao bon-gnok. Un salo katchae inchroanirangko knagen: "Ua sepang re-baengaha. Sa-grerangni singga sikako anga nikitenga." Gam-a barirorobaaha aro rasongni teng-sua teng-batroroa indiba an-ching jrip donge nitataina man-ja: "Ua angko niatenga, Ua angko u-ia." Aganna changpilgija katchaanichi an-ching inwatgen, "Ia angni Isol, Ua angona basakoba re-bagen ong-ja, indiba da-alon, da-on re-baa."

Rajako Uni pilak rasongo rimchaksona na-a tariama? Tarikujaode nang janggi tangaona na-a da-o Jisuko okambo. Jisuni a-gilsakona re-baania a-gilsako neng-nikan dong-anirangko gimaatani gita nang janggi tangano Uni dongania nang-nia da-o neng-nikanirangko Ua gimaatgen. Ua dal-gipa neng-nikaniko namatgipa nang-ko papni dos aro bojaoniko jokate nang-na jringjrotni janggiko on-gen.

Jisu re-bao a-gilsakko maikai dingtangatgen uandake Jisu nang-ni janggi tanganikoba dingtangatgen. Na-a Jisuo ka-dongchakna man-a. Ua An-tangni re-baani nang-ko tariatgen, aro jringjrotni katchaani janggi tanganiko nang-na on-gen.

## Salgiogipa Nang-ni Nok

Marco Polo jensalo a-songtang Venice ona bang-a bilsirangni ja-mano re-bapilon rama chel-ako re-bana nangahani gimin ua goka ong-atako man-aha ine uni ripeng saksa chanchichipaha. Ua bang-bea golporangko ku-tipgija agana amachim.

Marco sona aro rupaan gapaigipa songona songreangaha. Am-bol gita kamna man-gipa ran-gimin jekon darangba koela ine bimungko agankujachim uko ua nikaha. Wal-sarechi galsruatoba kamgijagipa ba-ra, jekon asbestos ine mingachim ukoba ua nikbaaha. Ua dal-begipa chipu, ku-ango an-tangni changroani baksa apsanpilgipani giminba aro mandeni sko gita dal-begipa bitchil aro a-ningona ong-katbaenggipa, jekon chakki ba lamp so-na namgipa chikoba nikbaaha ine ua aganrongachim. Ua somojolo darangba gorialko, narikelko aro kerosineko darangba nikkujachim. Ia golporangko knaon songtangni manderang bilongen ka-dingnapaha. Adita bilsirangni ja-mano, Marco Poloni sina skang saksa mande uni tuanggipa palangsamo donge, nang-ni bokbokgimin golporangni gimin na-a kema bi-chongmotbo ine didibeaha. Indiba Marco jechake aganaha: "Ua pilakan kakket aro bebe ong-a. Chong-mote, anga angni nikbagiminoniko adhakosan agankuaienga.



Sastroo segipa katchinikgiparang salgini gimin Marco Poloni agana gitasan aganengpiti. Uamangna mesokgimin salgini nama aro nitoaniko mande ku-chil aro srechi talatna amgipa kattarangan dongjachim. Marco Poloni nikbagimin goloprangni ripeng saksani chanchia gitasan ong-paia. An-chingba Marco Polini agangipa gorial aro narikelrangni gimin gisiko chanchichipe niate nina jotton ka-giparang ong-na nanggen, maina salgide chongipa aramrango asonge knalrangko kal-e kusini giminsan Sastroo aganaija.

### 1. SALGIA DONGBEBEAMA?

Jisu an-chingna biap chong-motan salgio tarisoenga.

**"Na-simangni ka-tongko jajrengatjachina. Isolo bebera-bo, angoba bebera-bo. Apani noko dongani biap bang-a; ong-jaode anga na-simangna agangenachim; maina anga na-simangna biapko daksona re-nasia. Aro anga re-ange na-simangna biapko daksoode, indide re-bapile na-simangko an-tangona rimanggen; maikai anga jeo donga, na-simangba uanon dongna man-gen" - Johan 14:1-3.**

Jisu changsatai gnigipa changna re-bapile, nitobegipa Gital Jerusalem songjinmao donsogimin biapona an-chingko rimoanggen. Hajalsa bilsirangni ja-mano Kristo nitobegipa salgini nokko ia a-gilsakona ra-onbagen. Gital Jerusalemko ra-onbaani somoio, a-gilsak wa-alchi rongtalatako man-gen. Rongtalatgimin a-gilsak toromirangni dongchakram biap ong-skagen (Para. 20:7-15. Dilani20 iani gimin talbate poraianggen).



**"Aro anga salgi gitalko aro a-a gitalko nikaha; maina skanggipa salgi aro skanggipa a-a re-angaha; aro sagal dongjajok. Aro anga rongtalgipa songjinma, Jerusalem gitalko, Isolni salgioni ong-onako nikaha; ua setangna tarisogimin namchik gita tarisoa. Aro anga ua singhasononi gam-bee indina ku-rangko knaaha, "Nibo, manderang baks a Isolni dongchakani aro Ua uamang baks a donggen, aro uamang Uni manderang ong-gen, aro Isol An-tangan uamang baks a ong-gen aro Uamagni Isol ong-gen" - Para. 21:1-3.**

Wa-alchi rongtalatani ja-mano sawrang gital a-gilsako donggen ine Jisu agana?

**"Sontolgiparang an-senga, maina uamang a-ako man-rikgen" - Mati 5:5. Para. 21:7 koba nibo.**

Kristo a-gilsakko changesatai Eden gita ong-attaigen aro sontolgipa uko man-rikgen ine Jisu ku-rachaka.

## **2. BE-EN BIMANG ASOLON AN-CHING SALGIO ONG-GENMA?**

Jisuni chakatpilani ja-mano, sninggiparangna mikkang pa-ani somoio maidake ong-a ine agana?



**"Angni jakrangko aro angni ja-arangko nibo, anga an-tangan ong-a; angko rim-dape nibo, maina ango dongako na-simangni nika gita me-mangni be-en aro grengrang dongja" - Luk 24:39.**

Jisu manggittangan ong-pilaha; Ua Thomasko An-tangko dangtape nichina aganaha (Johan 20:27). Ia somoio Jisu nok chong-moto nape, manderang baks a golpo agane, cha-aniko cha-paaha (Luk 24:43). Salgide me-mangrangni songdongram (Balpakram) ong-ja, indiba rongtalgipa toromirangni dongrampa.

**"Maina an-chingni songpangni salgio; aro unoni Jokatgipa Gitel Jisu Kristoko an-chig nisengsoenga; ua je kamko ka-e pilakon an-tangna batmatna ama, uandake ua an-chingni onani be-enko rasongtangni be-en gita bimang dingtang dakgen" - Philip 3:20, 21.**

Kristo maikai chakatpilan somoio be-entango gitachim uandake an-chingba ong-gen. An-chingni ripeng aro ba-rimarrangko ma-sigrikgen.

**"Maina da-o an-chinga janerachi, aganmitapao nika; indiba unon mikkangchakgike nikgen. Da-o angni u-ia chong-diksasan ong-a; indiba unon angko u-iaha gita anga u-igen" - 1 Kor. 13:12.**

Salgio an-ching chu-gimikan ma-sigen. Ia a-gilsako ma-siana batpilen saksa sakgipinko ma-sigen aro namnikgen. Sninggiparang Jisuko nikon ma-sia, maina Kristo apsan bimangon ong-a (Luk 24:36-43). Mariamba gopramo Jisuni ku-rangko ma-sia, maina ua knaronga. Emmausni sakgni sninggiparang uni dakkewalrangon ma-sia. Uni bi-rongbeachin uamang Uko ma-sia (Luk 24:13-35; Johan 20:14-16). Jokgiminrang salgio mikkangchake gronggrikani donggen. Nang-ni ka-sara jik, ba se ba saoba bewaltango ka-dingsmitako nikon, mairongpile kusinian gapgen, aro knaronggipa ku-rangko knana aro bewalrangko nikna mairongpile katchabeani ong-gen!

## **3. SALGIO AN-CHING MAI DAKGEN?**

Salgio an-chingna bang-bea kamrang donggen. Nang-ni miksonga nokko rikna chanchianiranga?

**"Aro uamang nokrangko rike uarango dongkamgen; aro uamang draka barirangko gee uarangni biteko cha-gen. Uamangni rikanio sakgipin uno dongkamjawa; uamangni ge-ako sakgipin**

**cha-jawa; maina bolni salrang gita angni manderangni salrang ong·gen, aro angni mikchagiminrang an·tangtang jakni kamko jaroē jakalgen" - Isaia 65:17-22.**

Jisu an-chingna Rongtalgipta songjinmao, Gital Jerusalemo nokrangko tarisoenga (Johan 14:1-3; Para. 21). Ia podrango janapani gitade, an-chingba nokrangko jaktangchi rikarangba donggen, haida, nambegipa biaprangko seoke, baga barirangko dakgen. Isolni songnoko mai aiao inmanpilgipa cholrang sengsoenga an-ching agansokja. Chasong gitalni changa sapanide, bi-sarangni kal-e roani gitasan ong-aigen.

Na-a nitobegipa chidareko, sikdikdikgipa bakrako, chatbegipa bolgrimrangko, aro nitobegipa bibalrangko namnikama?

**"Maina Jihova Zionko ka-dimeataha, uni pilak gimaatgimin biaprangko ua ka-dimeataha, aro uni bakrako Eden gita, aro uni a-gisiko Jihovani bari gita dakaha; katchaani aro ka-srokaniko aro mitelani aro knatogipa ring·ani ku·rangrangko uano man·gen" - (Isaia 51:3).**

Isol ia a-gilsak gitalko Eden ong-attaigen. Toni nisiarang, wal-kuni gisimarang, aro a-a a-gisi ong-anirang dongjawaha, chibolrang rongtale grike dongaigen, bolrang aro a-brirang ong-siani dongjawajok.

A-gilsakni nitoanisan ong-aijawa, indiba an-chingni u-iarangko kusi ong-aniba baridapgen. Bilongbee, jaroe saani ja·mano sam bolrangko skanggipa changna nikna man-taia gita chacha ong·gen. Na-a gital bosturango, skie ra-anirango katchagipa ong·ama? Uano, tangbanggipa gisikrangni gimin chanchiringgen. Pilak ma-siani aro changa sapani gitaba bariatako man·gen. Ma-sianirang chong·diksa ong·ani aro ma-sisokna amgijanirang dongjawaha. Uano nambat-chubata gadangona skie ra-anirang chotchanggija gital nika-nianirangko man-e kakket aro bebe ong·ani gimin skie ra·gen. Pilak ong-atgiminrange donnugimin gamsengrangni gimin jokgiminrang oprake poraia gita ma·sigen" - G. C. jak 677.



#### **4. PAP DSALGIKO JINGJENGATTAIGENMA?**

**"Aro pilak mrang, aro mitchiani aro tol·ako dakgipa unona mamung dakeba napjawa; Mes Bi·sani janggini ki·tapo segiminrangsang napgen" - Para. 21:27).**

Isol pilak pap aro papni biterangko gimaatsranggen aro mamung dakeba dongtaijawaha. Jisuni re-bapilon an-chingna ugitan ong-pagen (1 Johan 3:2). Namjija kamrangna skani gisik baksa dakgrikani palde, Isolni ka-sachakanina daarigiparang ong-skagen.

**"Aro ua uamangni mikrononi mikchiko u·sitgen aro siani dongjawaha, aro kalimani, aro chrikani aro saknaani dongjawaha. Skango ong·giparn re·angaha" - Parape-a 21:4.**

Sianiko darangba cha-tottaijawaha. Salgini songo pilakan chadamba gita ong·gen, aro budepa ba buchuma ong-aniko darangba cha-totjawaha. Salgi papni bitekosan bon·ataija: Salgi chu-sokaniko ong·ata. Ja·kora, jakkora aro kanarangni gimin chanchiatbo, maikai uamang chu-gimik an-senganiko man·pilgen!

**"Unon mikgrirangni mikronrangko mikaoatgen, aro nagokrangrangni nachilrangko peng·aniko ogen. Unosa ja·koragipa mande matchok gita bilchrokgen aro ku·magipani sre git ring·gen; maina bakrao chirang aro a-gisio chibimarang nagen" - Isaia 35:5, 6.**

## 5. SALGIO NAMBATGIPA MAIA ONG-GEN?

Salgi-a-sakni Gitelko mikkangchakchak nikna man-gnini gimin chanchiatbo.

**"....., Nibo, manderang baks Isolni dongchakani, aro ua uamang baks donggen, aro uamang uni manderang ong-gen aro Isol an-tang uamang baks ong-gen aro uamangni Isol ong-gen" - Para. 21:3.**



Bilakgipa Isolan an-chingni ripeng aro skigipa ong-gen. Un baks ong-na mairongpile ka-srokbeani ong-gen. Dok-na dam-na aro sika moanirangko changgiparang mairongpile skiako man-dapna ma-srokani ong-begen. Aro pilak changa sapanini gimin mingsing minggamako man-gipa manderang baks ong-e u-ie ra-na chol mairongpile nambegipa ong-gen.

Chanchiate nibo, pilak changa sapani aro sika moani aro gisik a-ning bitgiparangni nokgipa baks golpo alape rona aro talbate ma-sie ra-na man-ani cholranga mairongpile gamchatbegipa chol ong-gen. Un baks olakirimanirang aro ma-sina man-ania aiao inmanani ong-gen.

**"Aro indake ong-gen, ja gital changsaoni changsaona, aro neng-takan salsaoni salgipinona pilak be-en angni mikkangona olakina re-bagen ine Jihova agana" - Isaia 66:23.**

Songjinmani jatchio rongtalbegipa Isolni singhason gnangchim. Uan nitobegipa sundarechi duulachim, aro uni mikkang salni teng-brapa gitachim. Aro uni ja-kokkimani ga-chakgipara nikjagringgipa tom-tomgipa sagalni chi gitachim. Ia rongtalgipa nikjagringgipa nokkrao Uni rasongni teng-suchakani gnangchim, aro jokatako man-giminrangni de-mitelanian gapaiachim.

**"Aro Jihovani naljokgiminrang re-bapilgen; aro git ring-e Zionona re-bapilgen; aro uamangni skorangni kambeo jrungjrot ka-srokani donggen; uamang katchaaniko aro ka-srokani man-gen, aro kalimani aro skimani batanggen" - Isaia 35:40.**

Iano saoba ka-saningbegipako nikna man-a. Uni pilak kakket aro bebe ong-ani, chakchikani aro ka-sachakbegipa ong-ani pangnaba chotchangja. Uni rongtalgipa bimungna mitelbo!

## 6. AN-CHINGBA UANO ONG-PANA NANGA!

Jisu ua gronggrikanina nichaksoenga. Uni giminsa Ua nang-ko je cholchiba paponiko jokatna an-tangkon on-kangaha. Ua on-gimin cholko na-a an-tangan gimaatgija ra-chakna nanga. na-a Jisu Kristona nang-ni Gitel aro Jokatgipa ine on-kangna nanga. Na-a chisolo ong-atgimin pap wataniko nanga. Maina:

**"Aro pilak marang aro mitchiani aro tol-ako dakgipa unona mamung dakeba napjawa; Mes Bi-sani janggini ki-tapo segiminrangsang napgen" - Para. 21:27.**

Jisu an-chingko paponiko naljoka. Uni bilchi pilak marang aro rongtaljianirangko wate an-ching Uona re-bana nanga. Jisuan an-chingni Uni songnokona napani rama ong-a.

Aro ua songnokni a-bachengani da-alu nang-ni ka-tongan ong-na man-a. jensalo Kristo an-chingko paponiko naljokon,



ua chongipa salgini gunko ong·ata. Ua an·chingni pilak ka·o nangani, mikbuani, kenani aro pilak jajrenganirangko galna dakchakna ama. Salgina ka·dongsoanio an·chingni pilak neng·nikanirangoniko jokatja beben, indiba chaktogipa gisikko ong·ata. Dake nianio indake nika je, "siani ja·mano tangpiltaina ka·dongsogiparangni janggi tangani an·saobata aro gipinrango ka·dongchakna man·bata" ine nikna man·a.

Kristo baksa janggi tangrimachisan na·a dingtang ong·ataniko man·na ama. Bebeo janggi tanganichi maiko ong·atna ama Pitor maidake agana niatbo -  
**"Una na-simang nikjahaoba ka·sara; da·o nikjaoba uo bebera·a, na·simangni bebera·ani bon·kama chong·motan janggirangko jokataniko man·e, aganna amgijani aro rasong chagimin katchaa na·simang ka·sroka" - 1 Pitor 1:8, 9.**

Kristo mai janggi tangani bewalko cha·tote nikatna nangnika na·a ma·siahama? Uni ka·srokkipa ku·rangchi okamaoni na·a an·pilangnabe.

**"Aro gisik aro namchik agana, Re·babu, aro knagipa aganchina, Re·babu; aro ringna sikgipa indinari chijanggiko ra·china" - Para. 22:17.**

Jisu nang baksa da·o gnang, segimin kattarangchi nang·ni ka·tongo aganenga. Ua nang·ko re·bachina okamenga. "Re·babu." "Rebabu." Iana badepilede Ua nang·ko okamchajawa. Na·a an·tangko Una on·kangkujaode, ia somoion na·a Uni ku·rangna aganchakbo.

Indin on·na ku·rachakaniko anga ra·chaka aro jringjrotna Un baksa ong·pana ska ine aganchakbo. Nang·ni Una ka·saani giminba aganbo. Uni nang·na pilak dakanirangna Uko mitelbo. Nang·ni aro Isolni gisepo maiba donggenchimode, uarangko chanjachina aganbo. Da·alo, na·a Uni ku·rangko knaode, nang·ni ka·tongko ra·chakani dongengmitingon, chu·gimikan an·tangko Una on·kangsrangbo. Sko choknoke aganbo: "Jisu, angni Gitel, anga Nang·ona re·baa. Anga pilakkon Nang·na on·kanga. Pangnajolnan anga Nang·nin ong·kamgen.

## Badita Ta·rake Jisu Re·bagé

An·ching bang·bataan mikkangchini gimin am·drae nina ska. Nalsachi maia donga uko an·ching u·ina ska. Indiba tiktakde an·ching mamungkon u·sona man·ja. An·ching knalo mikka wagenma wajawama ukon tiktakde agansona man·rongja.

Indiba, Saoba donga je Uni mikkangchini gimin agansoanide pangnan kakket ong·aia. Jisu Kristo An·tangni kattao, mikkangchini gimin an·chingna agana. Uo an·ching ka·dongchakna man·a. Ia poraianio Ua An·tangni re·bapilgnini gimin maiko an·chingna agangni donga uko nigen. Maina chengo a·gilsakko dakgipana agre sawa a·gilsak bon·gnini gimin agansona man·bata?

### 1. AN·CHINGNI SALO JISUNI RE·BAANI CHINRANG

Ia a·gilsakona Ua gnigipa changna re·bataigen ine sninggiparangna aganon (Mati 23:39) uamang Jisuo maiko sing·aha?

**"Uni sninggiparang unona mitino re·bae aganaha, larang basako ong·gen aro nang·ni re·baani chinrang aro a·gilsak bon·ani chin mai? larangko chingna aganbo" - Mati 24:3.**

Jisu namen rongtale aganaha, Mati odhai 24 aro Luk odhai 21 rango Uni re·bapilna skang maia chinrang ong·gen uko Jisu sakina gita agansoaha. Sastroni gipin bakrangoba Kristoni re·bapilna skang a·gilsako mai obostarang ong·gen uko agana. Ua agansoanirang an·chingni nikaon chu·sokengahani gimin Kristoni re·bapilnia sepangbeaha ine mesoka.



Salgioni rama dakanggipao ramajoljol maia chinrangko nika aro uko da·ororo re·enggiparang maiko nike sing·enga, hai ua Sastroni katchinikao agangipa chin ming 10 ko an·ching niatna.

### Chin 1 - Duk! Kenani! Aro Jajrengani!

Bils 1900 bilsirang batangaha, janggi tanganio mai ong·gen uko Jisu agansoaha:

**"Aro salo, aro jao, aro askirango, chinrang ong·gen; aro a·ao jatrangni duk, aro sagalni aro chi pokpekaní gam·ani gimin gisik bilding bildang ong·gen; aro a·gilsako ong·gnirangko nichaksoa, aro kenani gimin, manderang sibokgen; maina salgini bilrang rimgrenggen. Aro union uamang Mandeni Depanteko, bilmung aro rasong chabeamung aramo re·baako nikgen. Indiba iarang ong·bachengon na·simang nichaobo, sko de·chaobo; maina na·simangni piokani sepangjok" - Luk 21:25-28.**

 Da·alni obostako niate nibo, ia agansoana mai kakketbatgijaniko an·ching nikenga. Manderang kene nom·boka aro a·gilsak mai ong·gen ine kensoa. Mai, saoba nuclear dakrikaniko a·bachengatode?

Ia so·so jengjeng chasongo Jisu ka·donganiko on·a. Ia a·gilsakni jingjenganiranga Jisuni bakbak re·bagnini chinrang ong·enga. Mitam manderang duk aro jajrengbee, "Nibo, a·gilsakde maiasa ong·angsrangengjok" ine skima. Indiba Sastroo katchinikaniko

poraigipade ka-dongbee indine inwatsona man-aigen, "Nibo, sawa a-gilsakona re-baenga."

### **Chin 2 - A-gilsako A-sel Kotonarang**

Bon-kaman salo indake ong-gen ine agansoanirang da-ororo chu-sokengahama?

**"Aro banggribearang ong-gen, banoba banoba karap aro sabisi ong-gen; aro salgioni kenbeani aro dal-gipa chinrang ong-gen. Uandakeba na-simangba iarangni ong-baengako nikon Isolni songnok sepangaha ine u-ibo" - Luk 21:11, 31.**

Karap ong-anini gimin adita chanchiate nibo. Bi-sarangni okkrie ram-sisi ram-dengdeng dakarangko songbado gatatarangko an-ching nika. Jajongchi mandeko watdoatna man-pilgipa a-gilsak, mandetanganan alsokjaenga ine u-inara aiao inmanani ong-jawama? A-gilsako karap ong-gen aro manderang an-tangtangnasan chanchiaigen ine Jisude u-isoa.

Banggriani mai rokom? Bils 1999 ni World Almanac o seani gitade indake agana je bils Ritchapranki gisepon banggrianirang bariorobaenga. Ritcha chi-chet somoiode, dal-begipa banggriani chang 6 san. Ritcha chi-sku chasongode, dam 7 aro ritcha kolgrik chasongode, dam 100 batjok. Uni gimin ia chinrangara Jisuni re-baani sepangbatrorosrangaha ine mesokanisan ong-aia. "Isolni songnok sepangaha." la an-chingni 21 gipa ritcha chasongara ritchani ritcha banggrianirangko aro rajarangni Rajani re-baaniko ong-atgenma?



### **Chin 3 - Gam Chimongani**

Saoba bang-gija manderangni gam bang-roro bang-bata manderangni kangan ong-roroani ortoa maia?

**"Bon-kaman salrango na-simang gam chimongaha" - Jakob 5:3.**

Tangka paisao pilakkon nambatatna ine sorkario kamko ka-oba man-e cha-gipade man-e cha-batangenga aro kangan mandede kangalsa ong-roroangenga. Kror pati ong-anggiparangan Gitelni re-baaniko sepangjok ine agansoani chinni bak ong-a (pod 8).



### **Chin 4 - Manderangni Jingjengani**

Dormahana kam ka-gipa manderang maina indita jingjengenga?

**"Nibo, na-simangni a-bako ragipa gamgiparangni dormaha, jekon na-simang tol-nape rakia, uan chrika; aro ragiparangni ku-rang kotokni Gitelni nachikolo napeaha. Na-simangba chakchikbo; ka-tongtangtangko mangrakatbo; maina Gitelni re-baa sepangaha" - Jakob 5:4, 8.**

Gamko manderangni chimongmitingo mande ba kam ka-giparangni jingjengenini gimin Jakob agansoa. Donggiparangba aro donggijagiparangba ji-jaa. Ian Gitelni re-baani chinrangoni mingsa ong-a.

### **Chin 5 - Manderangni Cholon Namgijani**

**"Indiba iako u-ibo, bon-kamani salrango dukni salrang ong-gen. Maina manderang an-tangtangna ka-sagipa, tangkana ka-sagipa, an-tangtangko de-mitelgipa, gaora de-gipa, kal-stapgipa, ma-a paako manigijagipa, ka-sapilgijagipa, toromi ong-gijagipa, ka-sara grigipa, kema ka-gijagipa, mitakgipa, an-tangtangko rakigijagipa, namana ka-sagijagipa, nampinike on-gipa, chanchisogijagipa, gangbinggipa, Isolna bate sukna ka-sagipa, olakiani bimangko man-gipa,**

**indiba uni bilko jechakgipa ong·gen; aro iamangko janggilatbo. Indiba namgijagipa manderang aro brangatgiparang, brangate aro brangatako man-e, namjaroroanggen" - 2 Timothy 3:1-5, 13.**



A·gilsakni manderangni saoba talbate aganna man·genma? Camerako jechiba mikkange ka·ataibo, maiaba obosta namgijakosa na·a photo ka·manataigen. Bang·a chadamberangni sason gri namgija dakanirangko na·a pilakchikon nikataigen, bi·sarangan da·ode mande so·otengjok! larang pilakan Jisuni re·baani sepangaha ine u·iatsoanisa ong·a.

#### **Chin 6 - Tol·e Skigiparangni Bariani**

An·ching da·ororo maina bang·bate tol·e skianirangko nikbatenga?

**"Maina Kristo dakgiparang aro katchinika dakgiparang ong·kate dal-a chinrang aro aiao inmananirangko mesokgen; maikai ong·na man·ode, segiminrangkoba brangatgen" - Mati 24:24.**

Ian a·gilsako aiao inmanani chinrang donggniko agansoani ong·a. Me·mang muni pianirang, mejik peleki dakachi manderangko muni nangatanirang pilakchin gipaha. Tol·gipa chinrangko mesokani aro aiao inmananirangko dakani silbatbaroroenga. Larang pilakan Jisuni re·bana skang ong·gen ine Jisuan agansoaha, aro iarang ong·ania Jisun re·baani sepangaha ine mesoksoani ong·a.

#### **Chin 7 - A·gilsak Mikraka**

A·gilsak mikraka inani ortoa maia - Africani mikrakbaani, Middle East aro Far East a·songrangni mikrakbaa inani ortoa maia?

**"Jatrang an·tangtangna chakate ..... jatrangko bichal ka·na asonggen. Na·simang atchiliko on·bo, maina mi minaha; maina uamangni enggu dakani namen dal·bea. ..... maina rae on·ani a·kongdapo Jihovani sal sepangaha" - Joel 3:12-14.**

Da·alo an·ching a·songrang jekai Asia, Africa, Europe, Soviet Union aro ua gita a·songrangni mikrakbaaniko nika aro iarangan "Gitelni sal sepangaha" ine mesokani ong·a.



#### **Chin 8 - Tom·tomanina Miksongani aro Dakgrikna Tarianirang**

An·ching ong·ronggijagipa a·gilsako janggi tangenga. An·ching pilakan tom·tome dongon namgen ine ina. An·ching tom·tomanini gimin aganoba, batanggimin bils 100 kattarangni gimin janape kajia ong·bataitaia. Mika aro Joel katchinikgiparang indine agansoa je, manderangni tom·tomanini gimin aganengo, (Mika 4:1-3) a·songsa a·song gipin baksa ka·dongchakgrikjae, dakgrikna tarianirangko taria (Joel 3:9-13).

Skangonin Sastroo indake dakgrikanirang donggnirangko agana aro baikamgipa tom·tomanide Jisuni a·gilsakona re·bae pangnajol sason ka·aniosa chu·sokaignok.

#### **Chin 9 - Da·ororoni Namroroani**

Maina da·o mandeni itihaso namroroani, nambate songre songgabatani aro a·songrangko sepangbatatani dongaha?

**"Bang·aan ichi uchi daairuragen aro u·iani bang·rorogen" - Daniel 12:4.**

Daniel iano indake miksunge agana je, uni katchinike agananirangko ma·siani barirorogen. Indiba ia agansoani a·gilsako mamungni giminan u·iani barigen ineba ong·a. La bang·gija bilsirangni gisepon

manderangni changa sapanirang namen baribaaha. Batanggimin bils 2000 o dingtangani bariana bate batanggimin bils 50 ni gisepo dingtanganirang bataha.

"Bang·aan ichi uchi daariange, aro u·iani barigen." Bils 1850 jolode manderang pilakchinan gureosa songreachim. Da·ode aeroplanerang pilakchinan bilengjok.

Bang·bate manderangni songreani aro bikotanirang bang·ania "a·gilsak bon·nasiaha" ine mesokani ong·a.

### **Chin 10 - A·gimiknan Nama Katta**

Uni re·bapilna skang a·gimikonan nama kattako skiprakgen ine Jisu agansoa.

**"Aro darang jatnan saki ong·china songnokni ia nama kattako a·gimiko aganprakgen aro unon chon·kamani ong·gen" - Mati 24:14.**



Bang·a bilsirangna a·gilsako nama kattako skiprakna beng·anirang dongachim aro uarangchi nama kattako skiprakna napnan man·jachim. Bilakgipa Soviet bilni bon·ahaon Berlini pakma be·aha. Unon a·gilsakni paksa jolgimik nama kattana oako man·aha. Nama kattam skangna bate a·gimikchi gipangengaha. Radio aro TV rangchi a·gilsakna nama kattako skiengaha. "Ia nama kattako a·gimiko aganprakgen, aro unon chon·kamani ong·gen ine Jisuni agansogipa somoio an·ching janggi tangengaha.

### **2. BADITA TA·RAKE JISU RE·BAPILGEN?**

A·gilsako ong·gnirangni gimin Jisuni agantokmano Ua indine agane matchotata:

**"Beben anga na·simangna agana, la pilak ong·kujana kingking ia chasong bon·angjawa" - Mati 24:34.**

Bon·kamani sokbachongmotgen, ukode u·iaenga, aro a·gilsak Jisuni gnigipa re·bataianiko niksochongmotgen. Uni pap aro dukko gimaate An·tangni jringjrotni songnokko songna Ua ruutjawaha. Jisu indine mikrakata, "Darangba ua sal aro kontako u·ija" (pod 36).

Jisu indine agana:

**"Uni gimin na·simangba tarie dongbo, maina na·simangni chanchisogian salo Mandeni Depante re·baa" - Mati 24:44.**



### **3. A·GILSAKNA KA·DONGANIDE JISUOSAN**

A·gilsakni papko Jisusaan gimaatna man·aiani gimin Uasan a·gilsakni ka·donganide. Pilak mandena jokaniko on·na aro namgijako chena Jisu Skobokrok a·brio siaha.



**"Pap ka·gipa Diaboloni ong·a; maina Diabol chengonin pap ka·ronga. Iani giminan Isolni Depanteko parape·ataha, chong·motan Diabolni kamrangko gimaatna ine" - 1 Johan 3:8.**

Ia be·angenggipa a·gilsako Jisu An·tangni be·enko jal·ang chanbate an·chingna on·aha. Ia apsan Jisuan jean salsaao a·gilsakoniko papko rongtalatgen, Uan nang janggioni papkoba da·on gimaatna man·a. Jajrengaoni jokna aro paponi jokna na·a Jisuni gnigipa re·baaona sengna

nangja. Ia somoion Jisu nang-na An-tangni tom-tomaniko on-na ske dongenga.

Toromni tom-ani damsaoна re-angpaon saksa me-chik skiprakanina namen gisiko nangbeaha. Ua Jisuni bakkak re-bapilgnini kattako knahaon namen ong-nikbebeaha. Ua kusini katchaani tom-tomaniko badiaba ong-gija biaprangonikosa an-tangni am-enganiko ma-siaha. Jisuan uni nangenggipako on-na man-na nanga.

Salgipino pamong aro uko dakchakgipani ua me-chikni nokona re-angahaon ua an-tang janggi tanganio duknirarako agane on-aha. Ua chuni nokol ong-aha aro an-tang be-enko palesa an-tangna korosh man-paengachim. Ua me-chik grape aganaha, "Nang mejal attamo skiprakania angnasa skiaijok." Indiba ong-chongmotade Isolni ku-rangsa uni ka-tongo nangeahachim aro Isol una ka-sae ka-sne aganengachim. Ua janggi tangao Kristoko ra-chakaha aro da-o ua Uni bakkak re-bapilanina ka-donge dongsoenga.

Ua somoini adita antirangni ja-mano, uni kena aro jajrenganirang gimaangaha ine ua nikaha. Skangde ua an-tangni dukko chu ringachisa gimaatna jotton ka-achim, indiba da-o ua Jisu baksa agangrikna somoiko ra-e tom-tomaniko man-bataha ine nikaha.

Ua banga-bea paprangko ka-aha, indiba Uni kratcha-ana batede Kristoni ka-saani aro kema ka-anian bilakbata ine ua nikaha.

Cha-ugipa mandeni chisolo maikai Jisu baksa agangrikaha, uana ua me-chik namen gisiko nangbeaha. Uni bon-kamgipa janggi tangani somoio Ua Dos Gri dakchakgipachi an-pile mol-molaha, Jisu, Nang-ni songnokona re-baon angko gisik ra-bo" (Luk 23:42).

Rang-sanan Jisu Una Isolni songnoko biapko una on-na ku-rachakaha (pod 43). Ua apsan Jisu jean ua cha-uko kema ka-aha, uan nang-naba jokataniko, kemako aro gisikna tom-tomaniko on-eng. Iako na-a an-tang am-e nie ra-bo.

Na-a ia sinasienggipa cha-u gita bi-pana man-a: Jisu, nang songnokona re-baon, angkoba gisik ra-pabo. Union Jisu nang-na indine aganchakgen, "Anga re-bataigen, aro na-a ang baksa salgio ong-pagen."

## Maia Angni Janggi Tanganio U-in Amsokgijagipa Bil

1929 bilsio Frank Morris Switzerland a-songchi re-gipa jahaso gakataha. Ua adita somoina skangan ia songreanina nichaksoengachim. Indiba ia songreania an-tangko onatani obostako chagrongaha. Jahaso uko simsakna donggipa mande Frankko uni kuturio walantian tala teke donaha. Ta-rake mepring cha-anja-mano Frank bilakatna ranta (exercise) ka-na dikdiksa man-achim indiba bangbanggipa biapo sildeng gnang uko simsakgipa mande re-biton achakni siliting gnang re-bita gita nikmanpilaha. Unikode uko simsakgipa Frankko chokkio asongate donaha. Jensalo ua ripeng meligipa songrerimskako grunge rona okamon uko simsakgipa mande uko name nitimna nanga ine agane on-jaha.



Frank dal-gimin ong-rongbewalni nina skani aro dal-gimin mandeni nangnikanirang gnangchim. Indiba ua nikania mikkana ong-achim. Ua an-tangko simsakna changjawa ine uko simsakgipa chanchiachim. Frankko jitruna nanggipa maiba katom gita jakkalachim.

Indiba Switzerland Frankni janggi tangania namen dingtangaha. Uno dongmitingo mikkannerangko dilrurana skigimin achakrangni gimin ua knaaha. German Shepherd ingipa achakni jat jekon Buddy mingachim, uko Americaona ra-range Frank "Mikron Nikna" a-bachengaha, jean a-gilak gimik dol kagimin (organization) ong-achim.

Da-ode Buddy uni sambao ong-e Frank pilakchin, je somoioba, je baksaba re-na man-aha. Bon-kamao ua an-tangko jakgitele nikaha. New York songjinmani gari bang-gipa soroko dolsa songbad segiparangni mikkango dake mesokanio, Buddy uni giteltangko gari jakchakgija re-wlwatao sorok dilsaoni dilgipinona changbee re-dilaha. Ua Buddyo ka-dongchakani gimin Frank altuaen nalsachina ga-batna man-aha. Nie dongenggipa songbad setimgiparangsa man-dikbataha; saksade gariosa sorok dilgipinona re-angsrangeaha.

Ia bang-gija jakrango an-ching Gisik Rongtalipani gimin skie ra-gen, je Dilgipaan an-chingko an-chingni janggirangko Uni jako donaniko nangnika. An-ching pilakan apsan mandeni bewalchi apsandake nangchongmotgipana mikkana ong-anichi bilgriatako (handicap) man-aha. Janggi tanganio inditan ta-raka, basakobade skang skang ong-gija ja-man ja-mansa an-tangtangni ja-rikaniko nikaisha. Indiomangba an-chingni Dilgipana an-chingni janggirangko ka-dongchake chu-gimik on-na an-ching jechaka. Indiba an-chingni am-e man-anide indake ong-gen: an-chingni janggi tanga gimiko an-chingko dilchina Gisik Rongtalipao pangchakanichisa chong-motgipa jakgitelani aro bilko an-ching man-gen.

### 1. KRISTONI PALO A-GILSAKO ONG-GIPA

Jensalo Kristo salgichina gadoangna skang mangmang Ua Uni sningiparangna gamchatbegipa on-aniko ku-rachakaha.

**"Indiba anga bebekon na-simangna agana, angni re-angao na-simangna namgni ong-a; maina anga re-angjaode UA KA-DIMEATGIPA na-simangona re-bajawa, indiba re-angode, anga uko na-simangona watatgen ..... ua BEBENI GISIK re-bao UA NA-SIMANGKO pilak bebeña DILGEN ..... UA ANGKO RASONG CHAATGEN, maina ua angoniko ra-e na-simangna aganprakgen" - Johan 16:7, 13, 14.**

Isolni miksonganio Jisu Isolni singhason mikkango "an-chingni a-sel Isolni mikkango mikkang pa-na ine (Ibri 9:24) salgichi re-angna nangaha.



An·chingni a·sel chisolo datkapa man·gipa Gitel an·chingni palo salgio ong·engon, an·chingba ia a·gilsako Gisik Rongtalgipa an·chingni KA·DIMEATGIPA aro DILGIPA ong·e donga. Uan Jisuni palo ong·gipa ong·a.

Jisu iano ong·mitingo mandeni bimango ong·e pilakchi ong·na man·ja. Indiba Gisik Rongtalgipa indake ong·ani gri; Ua channa amsokpilgija manderangna bang·a biaprangon apsan somoio paltangni ka·dimeatgipa aro Dilgipa ong·na ama. Gisik Rongtalgipachi Kristo an·chingni nanganirangko on·na ama.

## **2. GISIK RONGTALGIPARA SAWA?**

A·gilsako ka·sabatgipa aro simsakbatgipa pagipa dake chanchichipe an·chingni Pagipa Isol baksa an·ching meli-nangrimma man·gen. Depante Jisuko an·ching gisiko nikatna man·a maina ua bimang chongchong an·chingni gisepo dongangaha. Indiba Gisik Rongtalgipakode gisiko nikate nangrimaniko dakna man·dikbata. Altuagipa mandeni biddingo tosusana an·chingo dongja. Indiomangba Sastroo Gisik Rongtalgipani gimin dingtangmancha talataniko on·a:

Bimang Ong·ani. Jisu Gisik Rongtalgipako bimang gnanggipa dake Isolgrimni bak, Pagipa Isol, aro Depante Isol baksa janapa.

**"Na-simang re·ange pilak jatrangko sningga dakbo, aro PAGIPANI, ARO DEGIPANI, ARO GISIK RONGTALGIPANI bimungo uamangko baptize ka·atbo" - Mati 28:19.**

Gisik Rongtalgipao bimang dongani cholon bewalrang gnang: chanchiani gisik (Rom 2:27); ning·tuanirangko ma·siani (1 Kor. 2:10); an·chingna ka·saani (Rom 15:30); an·chingni pap ka·o jajrenga ba duk ong·a (Eph. 4:30); an·chingna skina man·ani (Nehemia 9:20); aro an·chingko dilna bil gnang.

A·gilsakko Ong·atanio Bak Ra·ani. An·chingni a·gilsakko ong·atanio Pagipa aro Depante baksa Gisik Rongtalgipa bak ra·aha.

**"Chengon Isol salgi aro a·ako ong·ataha ..... Aro ISOLNI JANGGI chiko ganggopengachim" - A·ba. 1:1, 2.**

## **3. GISIK RONGTALGIPANI KAMRANG**



### **(1) Mandeni ka·tongko dingtangatani.**

Uni Nikodemusko grongao Jisu mandeni ka·tongko dingtangatnio gisik Rongtalgipani kamko talata.

**"Beben anga nang·na agana, chionimung GISIKONI ATCHIJAODE saksaba Isolni songnoko napna amja" - Johan 3:5.**

"Gisikoni atchiani" ortoa Gisik Rongtalgipa an·chingna gital a·bachenganiko on·a. An·chingni bewalko dingtangataan nambata. Gisik Rongtalgipa an·chingko ning·oniko a·palona dingtangate "Gital ka·tongkoba anga na·simangna on·gen" (Eze. 36:26) ingipa

ku·rachakaniko chu·sokata.

**(2) Namjija dakaniko an·chingna ma·siatna aro rongtalna skaniko on·a.**

**"Ua (Gisik Rongtalgipa) re·baoa, ua PAP aro bichalni gimin a·gilsakna namgijako U·IATGEN" - (Johan 16:8).**

Jensalo na-a saniba namgija janggi tangaoni Isolona an-pile kakketgipa segipa aro dedrangna simsakgipa ma-a paa ong-baako nikon, uan Gisik Rongtalipani gisik on-anichi ong-aha ine gisik ra-bo.

### (3) An-chingi Kristian janggi tangao re-dilani.

Kristo an-chingna Gisik Rongtalipani "ka-singipa chongipa ku-rang" chi aganenga.

**"Na-simang jakrachi re-ekangon ba jakasichi re-ekangon, lakai rama, na-simang iako re-bo ine nang-ni janggilchi kattako nang-ni nachilrang knagen" - (Isaia 30:21).**

Satelite gita T. V. Programmeko watatanichi a-song damsaoi noksarangko an-chingni noko man-soenga. Gisik Rongtalipara Isolni satelite gita Kristoni dongpaaniko salgioni a-gilsakona an-chingni nangchongmotan somoio sepangona ra-baate kam ka-a (Johan 14:15-20).

### (4) An-chingni Salanti Bi-e Janggi Tanganio Dakchaka.

**"Maina nanga gita maiko bi-na nanga uko an-ching u-ija; indiba GISIK AN-TANGAN aganna amgia skimachi AN-CHINGNA MOL-MOLCHAKA ..... Isolni nangnika gita" - (Rom 8:26, 27).**

An-ching Isolo bi-o katta am-on man-kujaomangba an-chingni palo Gisik Rongtalipipa bi-chakenga. An-ching inditan duk ong-e katta aganna man-gija Isolona ma-amatamangkoba, an-chingni dakchakanina grapsijosijo dakamangkoba Gisik Rongtalipipa bilakgipa bi-ani gita Isolni singhason mikkangona sokangatgen jeon Jisu da-o dangdike on-engna.

### (5) Kristianni Bewal Aro Cholonko Namdapatan.

Gisikni bidingo bite grigipa manderangkomangba a-sal gnanggipa aro chae rokom rokom bite nanggipa bol gita ong-ata.

**"INDIBA GISIKNI BITERANG IARANG, ka-sara, katchaa, tom-toma, chakchika, rinok rinok daka, nama, bebera-a, sontol daka, an-tangtangko bamata" - (Gal. 5:22, 23).**

Gisikni biterang an-chingo donganian, an-ching chong-motgipa draka budu, Jisuo (Johan 15:5) nangrimaha ine mesoka. Jisu Uni chu-sokgipa janggi tanganiko an-chingo Gisik Rongtalipachi tangatna man-a.

### (6) An-chingko Sakkirang Dake Tariani.

Jisu indine ku-rachaka:

**"Indiba GISIK RONGTALGIPANI NASIMANGONA RE-BAON na-simang bilko man-gen; ..... aro a-kitikona kingking na-simang ANGNI SAKKIRANG ONG-GEN" - (Watata 1:8).**

Skani gisik donggipa pilakkon Gisik Rongtalipipa sakkirang ong-atna man-a. Pilak sing-anirangna an-chingo aganchakanirang dongjanaba gnang, indiba Gisik Rongtalipipa manderangni ka-tong aro gisikrangko moatgipa golporangko an-chingna on-na ama - Jisu chakatpilaoni sotbongagipa salna skangde watatarangba agangrikianio neng-nikaniko man-achim indiba uamangni kosakona Gisik Rongtalipipa re-baani ja-mano uamang Kristoni gimin inditan bil gnange aganprakaha, uamang a-gilsakko biling bildangataha" (Watata 17:6).

## 4. GISIKNI ON-ANIRANG

Sastroo bebera-gipa sakantina Kristian janggi tangao chegipa ong-e janggi tangna Isolni on-gipa Gisik Rongtalipipa aro bebera-gipa sakantina Isolna chu-soke dingtang dingtang bewalo dangdike on-na man-na gita on-gipa dingtang dingtang Gisikni on-anirangni gisepo dingtanggrikaniko mesoka.

**" 'Ua (Kristo) kosakchi gakatenba ua rim-gittangako rim-aha, aro manderangna ON-ANIRANGKO ON-AHA' Isolna chu-sokatna, dangdike on-ani kamna WATATARANG, mitama**

**KATCHINIKIPARANG, mitama NAMA KATTAKO AGANPRAKGIPARANG, mitama NITIMGIPARANG aro SKIGIPARANG ong-china ua on-aha" - (Eph. 4:8, 11-12).**



Kristian sakantide pilak on-anirangko man-ja, mitamde gipinrangna bate man-panaba donga; Gisik an-tangni ska gita sakantinan suala" (1 Kor. 12:11). Bebera-gipa sakantikon Gisikan Isolni donsogimin kamko ka-na taria. Ua on-anirangko Uni manderangna aro Uni mondolina basako aro bano on-ode patiani ong-batgen Isolan ma-sia.

Minggipin sulsul segimin gisikni on-anirangko 1 Korinthirangna 12:8-10 o nikna man-a, jeon gisik seng-ani, u-iani katta, bebera-ani, a-sengatani, katchinikani, ma-manti ku-sikrangko, aro ku-sikrangko pe-e agananirangko man-chapa.

Paul an-chingko "nambatgipa ka-sae on-anirangna bimchipchina" didia aro bon-kame "anga na-simangna bate nambata ramako mesoka" (1 Kor. 12:31) ine agandapaha. Ia podrangni ja-mano ka-saani odhaio (1 Kor. Odhai 13) "nambata rama"ra ka-saani ong-a ine mesoka. Aro ka-saania Gisini bitean ong-a (Gal. 5:22).

An-chingni dakna nanganide Gisikni biteko on-ani ong-a unikode Gisikan Uni on-anirangko an-chingna "an-tangni ska gita sakantinan sualchina" (1 Kor. 12:11).

## 5. KRISTONI CHAKATPILAONI SOTBONGAGIPA SALO GISIKNI CHU-SOKANI



Kristoni chakatpilaoni sotbongagipa salo (Pentecost) Gisikko tona amsokpilgija rudapaha aro Jisuni ku-rachakaniko chu-sokataha.

**"Indiba Gisik Rongtalgipani na-simangona re-baon na-simang bilko man-gen; aro Jerusalemo aro Judeao aro Samaria gimikon aro a-kitikona kingking na-simang angni saki ong-gen" - (Watata 1:8).**

Pentecostni salo "salgini ning-o pilak jatrangoni" (Watata 3:3-6) manderangni ku-siko nama kattako skiprakna Gisikan Watatarangna bil on-aha.

Mitam Sastroni chatrorang Gisikni ong-onbaako Palestine a-songni skanggipa a-rakni mikka aro ja-mangipa mikka baksa toa (Joel 2:23). Pentecostni salo Gisikni ga-akania a-rak karini "skanggipa mikka" gita ong-a jean bitchilko bimik nana dakchaka aro Kristian mondolini a-bachengmitingo gisikni bidingo bilakatani ong-aha.

## 6. GISIKNI JA-MANGIPA MIKKA

Sastroo katchinike aganario Isolni Gisikko mondolio rудape mondolini memberrangko saki on-na bilakatani gimin janapani gnang (Joel 2:28, 29). Ritchani ritcha bilsirang batangaha aro jokatani nama katta a-gilsakni bang-a bakrangchin gipangaha. Miko minate rana namna gita "ja-mangipa mikkana" somoi da-o ong-aha.

Kristoni gnigipa re-bana skang mangmang itihas bon-chotaniona sokbaon, Isol Uni Gisikko bang-bee rudapatanichi kakkete bebera-gipa sakantikon salgina tarisogen. Da-o na-a Gisikni "skanggipa mikkako" chagrongengama jean mondoliko Gisikni "ja-mangipa mika"na tarienga? Na-a Gisikchi gapatako man-gipa janggi tanganiko tangengama? Na-a Gisikchi bilakatako man-e Isolni ka-saani aro Uni bakkak re-bapilani nama kattako gipatna Isolna an-tangko jakkalna on-genma?

## 7. GISIK RONGTALGIPAKO MAN-NA NANGNI OBOSTARANG

Pentecostni salo nama kattako knagipa manderangko, "Jongadarang, chinga maiko dakgen?" (Watata 2:37) ine aganna gita Gisik Rongtalgipta gisikko on-e dilaha.

**"Unon Pitor uamangna aganaha, Na-simangni paprangko watchina na-simang salantian gisik pil-bo aro Jisu Kristoni bimungo baptize ka-ako man-tokbo; unon na-simang, Gisik Rongtalgipto on-ako man-gen" - (Watata 2:38).**

Gisik pil-ani - papo janggi tangaoni an-pile Kristoona re-baani ong-a - Gisikni on-aniko man-na gita indakgipa obostako chagrongna nanga. Gisik Rongtalgipto an-chingo rudapako man-na gita an-ching skang gisik pil-na nanga aro an-chingni janggi tanganiko Kristona on-kangna nanga. Gisik Rongtalgiptoni on-aniko man-na gita dakna nanggnirangoni mingsara Jisuko ja-rikna skani dongna nanggen aro Uko manina nanggen ine changni chang Jisu skiaha (Johan 14:15-17).



## 8. GISIKCHI GAPATAKO MAN-GIPA JANGGI TANGANI

A-gilsakko watangna skang Jisu Uni sninggiparangko indake aganangaha:

**"Jerusalemko watgija Pagipani ku-rachakanina sengbo, ..... maina Jihande chio baptize ka-ataha; indiba na-simang sal bang-gijaan Gisik Rongtalgiptoni baptize ka-ako man-gen" - (Watata 1:4, 5).**

Kristianrang "Gisik Rongtalgipto gapatako man-na nanga (Watata 2:4; 4:8; 4:31; 6:5; 7:55; 9:17; 13:9, 52; 19:6) ine pilni pil Sastroo mesoka. Gisik Rongtalgipta Kristianni janggi tanganiko chu-sokgipa aro nitogipa ong-ata maina Gisikchi gapatako man-gipa janggi tangani Kristoni an-chingna dongimin nisanona sokata.

Gisikchi gapatako man-gipa Kristian janggi tanganiko talatengon Paul ia bi-aniko bebera-gipa sakantina bi-aha:

**"Maikai Uni rasongni gamchata gita, Uni gisikni ning-ni mando, bilo bilakatako man-na na-simangna on-gen; bebera-achi Kristo maikai na-simangni ka-tongo donggen; ..... Da-o an-chingo kam ka-gipa bil gita an-chingi pilak bi-ani aro chanchianina bate namen bang-en dakna amgipana" -(Eph. 3:16, 17, 20).**

Frank Morrisni uni kakketgipa a-chak Buddy gita an-chingba Gisik Rongtalgiptoni dilanichi skangna bate dakna man-gen. Gital skanirang aro gital change sapanirang baksa an-ching janggi tangao neng-nikaniko chagrongna jotton ka-ani palo an-ching ka-donge mikkangchi re-mikkangna bilakatako man-a.



Ia Gisikchi gapatako man-aniko salantian Isolo bi-anichi aro Sastroo poraianichi gital daktaina nanga. Isolo bi-ani an-chingko Kristo baksa nangrime rakia aro Isolni kattako poraiania an-chingko Uni patianirango miksonganiko rakia. Uarang Kristo aro an-chingni gisepo donggipa dongpenganiko be-ata jean Uni gamchatbegipa Gisikni On-aniko rudapataoniko champengani ong-naba donga. Indake an-ching dal-roroa aro namgijagipa bewalrang aro chanchianirangko namgipa bewalrang baksa srea.

Romrangna odhai 8 - o Gisikchi gapatako man·gipa janggi tangani gimin ga·suprete talata. Uko poraie badita chang Paul "Gisik" ko Kristian janggi tanganio bilakbatsranggipa bil dake mesoka nibo.

Na·a Gisik Rongtalgpachi gapatako man·gipa janggi tanganiko aiao inmangipa am·e man·ani dakahama? Nang·ni janggi tanganio Gisikni dongpaaniko ma·siahama? Na·a Uni janggi sikatgipa bilko chagrongahama? A·gilsak-salgisak gimiko dal·batgipa bilna nang·ni janggi tanganiko oprakbo.

## Dongkamjringaigipa Jokatgipako



Jensalo Scotland a-songni pante saksa Pitor minggipa pangsu- grimo andalbegipa walo gimaahaon, Isol uko bimung minge okamaha: "Pitor!"

Jensalo salgini ku·rang okamtaion Pitor uni re-ako dontongaha aro nionaha, unon ua galchipgimin rong·chun cho-a a·kolo ga·tuangna ja·kusasanahachim.

An-ching sakantian Isolni an-chingni bimungko minge okamako knana man·ode namjawachimma? Indake an-chingni ripeng meligipa ong·ode namjawachimma - an-ching damsan asongrime an-chingni krenganirangni gimin aro jumang niksamsoanirangni gimin agangrikna man·ode namjawachimma?

### 1. SIMA ARI GRIPILE JISUKO GRONGANI CHOL

Na·simang bebera·ama ra·jama, Jisu an-ching baksa mikkang chongchong dongaona bate da·on an-ching Uona sepangbate re-bana man·gen.

An-chingni songjinmarango Kristoko bimang chongchong dongatna man·ode aiao inmanpile nambegenchim indiba uko nina mande jinmani sikchepchepbaani gimin chanchiate nibo. Uni somoiko bon·atani gimin chanchibo. Janggi tanga gimiko dikdiksana Un baksa mikangchakrike agangrikna man·ode an-chingna nambegenchim.

An-ching sakanti baksa Kristo nangrimgrikaniko dakna skenga. Uan ia a-gilsakoni re·angani a·selrangoni mingsa ong·a. Unode ua salgio dingtangmancha kam ka·na man·gen jedakode Ua salantian an-chingni sambaona re-bana man·gen. Jisuni a-gilsako dongmitingo somoisano biap damsao mangmang ong·na man·na gita ong·gija Gisik Rongtalipani jakchi dilaniko man·na sikgipa sakantini sepango ua ong·a.

Uni salgichi gadoangna skang mangmang maia ka·dongatani ku·rachakaniko Jisu on·a?

**"Sal chon-jaskal PANGNAN ANGA NA·SIMANG BAKSA DONGA" - Mati 28:20.**

An-ching baksa "pangnan" dongna man·na gita Kristo salgio maiko dakenga?

**"Indiba salgirangko batanggipa, Isolni Depante Jisu, an-chingni Kamal Dal·gipa ong·ani gimin an-ching ku·rachakako kimkim rim·na hai. Maina an-chingni Kamal Dal·gipa an-chingni bilgrirangna duk man·pana amgijagipa ong·ja, indiba pap gri pilakni gimi an-ching gita dakmajoako man·aha. Uni gimin an-ching ka·saani singhasonona kenmangija sepangna hai maikai an-ching ka·sachakako man·gen aro nangani salo dakchakna ka·saako man·gen" - Ibrirangna 4:14 - 16.**

Jisu an-chingni palo salgio ong·na ka·songataniko nibo: "pilakni gimin an-ching gita dakmajoako man·aha." "An-chingni bilgrianirangna ka·sachaka." "An-chingni nangani somoio an-chingna dakchaka." Jisu an-chingni Kamal Dal·gipa ong·e an-ching chel·begipa salgioni den·sotako ba chempenganiko man·jaha; Kristo an-chingko Isolni mikkangona rimangna man·gen. Iani giminan an-chingko "ka·saani singhasonona kenmangija sepangangchina" didia.

Jisu salgio maidakgipa biapko ra·a?

**"Índiba uan paprangni a-sel boli mingsanko on-enba, jringjrotna Isolni jakrao asongaha" - Iibri 10:12.**

Tanggipa Kristo - jean ma-sininggipa ong-a - uan singhasono "Isolni jakrao" an-ching sakantini palo asongaha.

Maidake Jisuni janggi tangania Uko an-chingni Kamal ong-na taria?

**"Uni gimin manderangni paprangna nangrimataniko dakna, Isolnirangni gimin ka-sachakgipa Kamal Dal-gipa ong-na gita, pilakni gimin jongadarang gita ong-na nangachim. Maina Ua an-tangan dakmajoako man-e duk chakahani gimin, dakmajoako man-giparangna dakchakna ama"**  
- Iibri 2:17, 18

An-chingni "adagipa" jean an-ching gita mandeni bimango ong-achim Uaba an-ching gita dakmajoako man-aha aro da-ode an-chingni Kamal Dal-gipa ong-e Pagipani jakrao asonga. "An-ching ong-atako man-e," an-chingni duk sukrangko ma-sia. Ua okkrianiko, ringna skaniko, dakmajoaniko aro neng-skimaniko chagrongaha. Ma-siningani aro ka-sachakaniko nanganiko Ua ma-siaha.

Indiba pilakna bateba Jisu an-chingni Kamal Dal-gpa ong-na gita kraaniko man-aha maina an-chingni paprangna "nangrimaniko" dakna gita sichakaha. An-chingni biapo sichake an-chingni paprangna Ua damko on-aha. Pilak mandeni jatna, pilakchinan aro pilak somoionan Namgipa Kober ong-a.

An-chingni Sabbath Skul Directorrangoni saksa ia chagronganiko suala: "Jensalo chingni chonbatgipa demechik bilsil gittam ong-engon tem-na man-gipa chokki (folding chair) depa man-e greng bnekatako man-aha. Uko doctorona rimangmitingo uni saknae grapania chingni ka-tongrangko ka-beataha. Aro dingtangmancha chingni bilsibonga ong-gipa demechikko nangchakeaha. Nogipani mata bu-ako doctorni simsakani ja-mano uni agana kattarangko anga pangnaba gualjawa. Ua indine grapaha, "O baba, ua angni jaksi ong-osamung!"

Jensalo pilak mandeni jat papchi bnekatako man-e jringjrotna sina jegalako man-on, Jisu inaha, "O Apa, uamangni biapo anga ong-osamung." Pagipa Uni skako chisolo chu-sokatna Jisuna on-aha. An-chingni Jokatgipa an-chingni chagronggimin aro una bateba pilak saknaanirangkon chagrongaha.

## 2. NIAM GITCHAMO DONGGIPA NAMA KATTA



Israelni manderangni Sinai a-brini ja-pao a-tip dakmitingo "a-brio mesokgimin gita" (Re-ongkata 25:40) jituruana man-gipa torom tambuko Isolko olakichakna rikchina Isol Moseko ge-etaha. Bilsil 500 mangni ja-mano solomon rajani dal-begipa ro-ongni torom nok jituruana man-gipa torom tambuni biapko ra-skaaha. Aro ua torom nokara jituruana man-gipa torom tambu gitan apsan miksonganio rikaha.

Jensalo Isol Mosena torom tambuko rikchina ge-eton Uni gisiko maia dingtangmancha miksonganai gnang?

**"Aro uamang angna torom tambuko dakchina, maikai anga uamangni gisepo dongna man-gen" - Re-o. 25:8.**

Pap mande aro uko Ong-atgipani gisepo ekgrikataniko ong-ata. Torom tambuan Isol an-chingni gisepo dongna man-a ine Isolni mesokani ong-a. Niam Gitchamni somoio torom tambuan aro ja-mano torom nokan toromo janggi tangani aro Isolko olakianini pangchakani ong-a. Pringanti aro attamanti manderang

torom tambuko wilwile tom-dake Isolo bi-e Isolni gronggrikna ku-rachakaniko dabie (Re-o. 30:6) Isol baksa nangrimgrikaniko dakna man-a (Luk 1:9, 10).

Niam Gitchamoba Niam Gitalni apsan jokatani nama kattako skia. Ia minggnion Jisuni an-chingna siani aro salgini torom noko Kamal Dal-gipani kamko ka-e an-chingna dangdike on-aniko skia.

### **3. JISUNI AN-CHINGNA DANGDIKE ON-ANIKO TOROM NOKO PARAPE-ANI**

Jisuni da-o salgini torom noko kam ka-ani aro an-chingni salanti janggi tangao dilanina aro mangrakatna Uni kam ka-aniko torom tambuo olakiani bewalrang paraka.

A-gilsakni torom nokara salgio donggipa torom nokni bimango rikahani gimin uan Kristoni da-o dangdike on-enggipa salgini torom nokni jagring ong-a. Re-ongkata odhai 25:40 o bakrao donggipa torom tambuo kam ka-anirang aro manianirang che-em che-em talata. Torom nokni ning-ni bakrangko Niam Gitalo kan-dike talata.



**"Indide skanggipa niamoba olakiani dakbewal dongachim dongade, aro torom biap, indiba a-gilsakni .... skanggipa dring, jeo gasa aro mej aro donsoani pita, ukon rongtalgpia minga. Aro gnigipa ba-ara dongpengani nalsachi dringko rongtalbatsranggipa minga. Uno sonani cha-chat so-chakani, aro pilakchin, sonako rupripa niam sunduk gnangchim, jeo .....aro niamni rong-plengrang gnangchim: [jeon Isol ge-eta mingchikkungko seaha (Re-o. 10:1-5)]. .....niamni rong-plengrang gnangchim; aro uni kosako pap watram salakim dakgipa rasongni kiruprang gnangchim" - Ibri 9:1-5.**

Torom noko kuturi gni gnang, Rongtalgpia biap aro Rongtalbatsranggipa biap. Torom nokni mikkango sara donachim.

Sarao pitolni ganchi dongachim jeon kamalrang bolirangko on-a aro pitolni su-srangchakani jeon kamalrang jaksua.

Pitolni ganchio on-gipa bolirangara Jisuko mesokachim jean Uni chisolo sianichi "Isolni Mes Bi-sa, a-gilsakni papko ra-anggipa" (Johan 1:29) ong-aha. Jensalo gisik pil-gipa papi uni boli on-ani baksa ganchiona re-bae uni paprangko ku-rachakon, ua kema ka-ako aro rongtalatako man-a. Uandake da-aloba Jisuni an-chichi ua papi kema ka-ani aro rongtalataniko man-a (1 Johan 1:9).

Skanggipa kuturio ba Rongtalgpia Biapo ching-kamaienggipa gasa bolsnia Jisuko mesoka jean bon-changgijagipa "a-gilsakni seng-a" (Johan 8:12) ong-a. On-kanggimin pitako donchakani mej ba tableara Uni an-chingni be-enni aro gisikni okkrianiko chu-ongnikatkamaigipa "janggini cha-ani" (Johan 6:35) ong-a. Cha-chat so-ani sonani ganchia Isolni mikkango Jisuni an-chingna bi-aniko mesoka (Para. 8:3, 4).



Gnigipa kuturi ba Rongtalbatsranggipa Biapo sonachi rupripgimin ku-monggrikani niamni sunduk donga. Ian Isolni singhasonko mesoka. Nangrimgrikaniko pindapani ba pap watramara Kristoni mol-molchakaniko mesoka, an-chingni Kamal Dal-gipa, Isolni niamko pe-gipa papi manderangni palo mol-molchakani. Rong-pleng dotgni jeon Isol ge-eta Mingchikkungko seaha, uko pap watramni kokkimao dona. Sonaniko tarigipa rasongni kiruprang niam sundukni samtangtangoni pap watramko salakimdapachim. Ia Kerupni bimang ge-grnini giseponi rasongarigipa teng-ani teng-baachim, jean Isol An-tangni dongani chin ong-achim.

Kamalrangni manderangna torom tambuni sarao kam ka-e on-engmitingo manderangni Rongtalgipa Biapko nikaoniko porda dongpengachim. Gnigipa porda Rongtalbatsranggipa Biapni mikkango donga jean kamalrangni Rongtalgipa Biapona napbao Rongtalbatsranggipa Biapchiko niataoniko champenga.

Jensalo Jisu chisolo sion porda mai ong-a?



**"Torom nokni ba-ra dongpenggipako kosakoni ning-on a chitgni grinataha" - Mati 27:51.**

Jensalo Jisu sion Rongtalgipa Biapko dongpenggipa porda kikgalako man-a. Jisuni siani ja-mano rongtalgipa Isol aro kakketgipa bebera-gipani gisepo mamung pordaba dongpengna man-jal an-chingni Kamal Dal-gipa an-chingko Isolni mikkangona rimnapa (Ibri 10:19 - 22). Salgini singhasanona an-ching napna man-a maina Jisuan Isolni jakrao an-chingni Kamal Dal-gipa ong-enga. Isolni mikkangona - Pagipani ka-saani jatchiona an-chingko Jisu napbana man-ataha. Uni gimin "hai an-ching sambaona re-bana."

#### 4. KRISTONI AN-CHINGKO JOKATNA SIANIKO PARAPE-ANI

Jedake a-gilsakni torom nokara salgini torom nok jeon Jisu da-o an-chingna dangdike on-enga. Uni chonbegipa bimango dakjagrangani ong-a, a-gilsakni torom noko ka-gipa kamrangara "salginirangniko dake mesokani aro jagring" (Ibri 8:5) ong-a. Indiba niksengbegipa dingtangani gnang: a-gilsakni torom noko dangdike on-gipa kamalrang an-tangtangde pap kema watna man-ja, indiba chisolo Jisu "da-o sastirang matchotahaon ua changsanon an-tangko boli on-achi paprangko gimaatna mikkangpaaha" (Ibri 9:26).

Niam Gitchamni Levirangni ki-tapo torom noko ka-ani kamrangko che-em che-em talata. Olakianio maniani niamrangko bakgni dake suala: salanti dakani aro bilsio changprak dakani . (Dilani 13 o bilsio changprak dakani kamrangni gimin man-a.)

Salanti dakgni kamrangara, kamalrang sakprakprakna aro mande gimikna boli on-a. Jensalo mande pap dakon ua ong-sia grigipa matburingko papni bolina ra-bagen, "an-tangni jakko papna on-anini skoni kosako dondapchina, aro homni biapo papna on-aniko ua so-otchina" (Levi 4:29). Pap ka-gipani dosko dos grigipa matburingona pap ku-rachakanichi aro pap dakgipani jakko matburingni skoni kosako dondapanichi watatna nanga. Ian Sko Bikrok a-brio Kristoni an-chingni dos dakaniko ra-angako mesoka; pap grigipako "chingni gimin papigipa dakaha" (2 Kor. 5:21). Boli on-ani matburingko so-ote an-chi ong-atna nangaha maina uan chisolo Kristoni dal-begipa sastiko chakaniko mesoksoa.

#### 5. MAINA AN-CHI?

"An-chi ong-gijade pap wata ong-ja" (Ibri 9:22). Niam Gitchamni torom noko ong-a obosta Kristoni dal-begipa jokatani kamko mesoksoa. An-chingni papni gimin simane, Ua rongtalgipa biaprango nape, "changsanon rongtalarangniona nape jringsirotna piokako man-aha" (pod 7). Jensalo Jisuni an-chi an-chingni paprangna chisolo ong-on, "torom nokni ba-ra dongpenggipako kosakoni ning-on a chirgni grinataha" (Mati 27:51). Chisolo Jisuni an-tangko boli on-ani a-sel matburingko boli on-na nangjaha.



Jensalo Jisu Uni an-chiko chisoloni pakon, Ua Uni chu-sokgipa katta manie janggi tanganiko an-chingni chu-sokagijanirangni palo on-engachim. Jensalo Pagipa aro Depante Sko Bikrok A-brio ekgrikatako man-on, Pagipa duk ong-a gnang an-pilaha aro Depante ka-tong be-e siaha. Depante Isol An-tango papni chu-gimik biteko ra-na aro namgija dakania baditana kingking duk

ong-atani ong-a uko mesokna itihasona ga-napaha. Unikode Ua papko ramram dake nikatgija papirangko kema ka-na man-gen. Kristo "Uni chisolni an-chichi tom-tomaniko" dakaha (Kol. 1:20).

## 6. JISUNI AN-CHINGKO JOKATNA JANGGI TANGANIKO PARAPE-ANI

Salgini torom noko salantini Jisuni kamara maia?

**"Uni giminba uchiko Isolona sepangbagiparangko jokatsrangna ama, maina ua uamangni a-sel mol-molchakna jringjring tanga" - I bri 7:25.**

Jisu da-o an-chingni palo Uni an-chiko, Uni boliko on-na "tanga." Da-o Ua mande sakantiko papni obostaoniko jokatna bimchipe kam ka-enga. Mitam manderangde Jisu salgio an-chingni baltichakgipa ong-e kema ka-na sikgijagipa Isolo an-chingko kema ka-china mol-molenga ine chanchisretenga. Batesa an-chingni palo Uni Depanteni boli on-aniko Isol kusi ong-e ra-chaka.

Salgio an-chingni Kamal Dal-gipa ong-e Kristo mandeni jatko mol-mola.  
 Ua gisik nanggijagiparangko gnigipa changna Isolni ka-saako  
 niattaichina dakchaka. Kaa-beenggipa papirangko nama kattao  
 ka-donganiko rim-kepchina dakchakna aro bebera-giparangko Isolni  
 kattaoniko bang-a man-na aro Isolo bi-aoniko bil bang-e man-na  
 dakchakna Ua kam ka-a. Isolni ge-etanirang baksa nangrime Jisu  
 an-chingni janggi tanganirangko nol-e bimang daka aro an-chingni  
 cholon bewalko namdapatna dakchaka, jedakode dake nianio kimkime  
 chadengna man-gen.



Ia a-gilsako atchigipa sakantinan Isol Uni janggiko on-aha. Aro da-o Kamal Dal-gipa ba Mol-molchakgipa ong-e, "Manderangni papna Uni sichakaniko ra-chakna dilna Ua jring jring tanga." Ua An-tang baksa pilak papo ga-akgipa papirangko chisolo nangrimatahaoba, an-ching Uni ka-saako ra-chakjaskalde Ua an-chingko jokatna man-ja. Uamang papirang ong-ani gimin manderang gimaatako man-jawa indiba Jisuni on-gipa kema ka-aniko ra-chakna jechakani giminsa gimaatako man-gen.

Adam aro Hobani Isol baksa nangrimaniko pap nosto ka-aha. Indiba Jisu, Isolni Mes Bi-sa ong-e, pilak mandeni jatko paponiko jakgitelatna aro gimagimin nangrikgrikaniko namatpilna siaha. Na-a Uko nang-ni Kamal Dal-gipa ong-a ine ma-siahama, jean Isol baksa nang-ni nangrimgrikaniko tange aro mangrake rakina jringjring tanga?

Kristoni sichakania dingtangmanchagipa ong-a. Kristoni salgio dangdike on-ania tosusana amsokgijagipa ong-a. Kristosan mangmang Isolko an-chingni sepangona rimbana man-aia. Kristosan mangmang Gisik Ringtalipako an-chingni ka-tongo dongatna man-a. Ua an-chingko gam gnangatna gita Ua an-tangko gam griataha. Ia apsan on-kanganikon Ua an-chingoniko dabia. Hai an-chinga Uko an-chingni janggi tangario Jokatgipa aro Gitel dake chu-gimik ra-chakna.

## Dos Dakgipa Papioni Kema Watako Man-gipa Toromi Ong-na Man-aniko

Jaksini chinrang dongjachim. Mamung silchidarekoba am-e man-jaha. Darangba mande so-otgipani doctorni officeo napako nikjachim. Darangba slai goani gam-ako knajachim. Indiba doctorni uni officeni table nalsao ja-bra jakbra dake siako nikaha. Uni cholako guli rongbongachi napongatako nikaha. Chu-soksranggipa niam pe-ani gita nika. Police a-bachengode ja-dil-ja-pangkon man-jachim. Indiba uamang doctorni tableo donggipa pencil donchakanio chonbegipa silitingko nikaha. Ua silitingara ua tableni drawerona srtingangachim jeon tape recorder donga. Ua pencil donchakanini ning-o microphone dongachim jechin doctor uona re-bagipa sagiparang baksa agangrikani aro ku-patianirangko record ka-rongachim.



Mande so-otaniko sandigiparang ta-rake tapeko a-bachengaona wenate a-bachengaoni kal-taina a-bachengaha, aro maidake mande so-otani obosta ong-aha pilakkon tapeo knaaha. Saksa mande Anthony minggipa doctorni kuturiona napbae doctor baksa ka-o nange jegrikna a-bachengaha. Slai goani gam-ako knaaha aro doctorni ma-ame siahaon tape bon-aha. Doctor a-o ga-ake dongengachim. Pilak jegrikanirangko che-em che-em record ka-aha. Mande so-otgipa uni namgija daka kamko jringsirotnan donnuna man-gen ine chanchiachim. Uni kamni mamung ja-dilko man-jana gita ua simsakbeachim. Indiba tapeni golpoan gimikko parakaha.

Ia dilanio an-ching Isolni bon-kamgipa bichalni gimin skie ra-nasienggipa jeon manderangko "ua ki-taprango segiminoni, kamtangtang gita, bichal ka-ako man-aha" (Para. 20:12). Jemangan Kristoko uamangni jokatgipa dake ra-chakkuja uamangnade kober namjawa. Indiba Kristoo naljokaniko man-giparangnade bichalara aiao inmangipa kober ong-a.

### 1. MAIKAI BICHALO KENGIJA NA-A MIKKANG PA-GEN?

Sawa a-gilsakko bichal ka-gen?

**"Maina Pagipa darangkoba bichal ka-ja, indiba pilak bichal ka-ako Depantena on-aha" - Johan 5:22.**

Maidake chisolara Kristoko an-chingko bichal ka-gipa ong-na tariaha?

**"Bebera-achi uni an-chio, Isolni chakchikanio skang ong-gimin paprangko watchangani gimin uni toromko mesokna .....maikai ua Jisuo bebera-giparangko toromi ineba an-tangan kakketgipa ong-gen" - Rom 3:25, 26.**



An-chingni palo Kristoni sianichi Uko kakketgipa bichal ka-gipa aro ka-sachakgipa ong-e toromi ine mingna man-gipa ong-e jean gisik pil-gipa papiko kema ka-naba man-gen. Jensalo nie dongenggipa ia sing-aniko sing-on, "Maidake mikkang nigija bichal ka-gipa dos dakgipa mandeko dos gri ine aganna man-gen? "Kristo Uni jakrango donggipa papirangko mesoke aganchakna man-gen. Ua an-chingni paprangna kragipa sastiko An-tangni be-eno man-aha. Salgini ki-taprango sakantini janggi tangani gimin serikanirang gnang aro ia see rakianiko bichalni somoio jakalgen (Para. 20:12). Jemangan an-tangtangni donnugimin paprang aro namgija dakanirang uamangona sokbapiljawaha ine chanchigiparangna ian namgijagipa kober ong-a.

Indiba jemangan Kristoko salgio uamangni baltigipa dake chakchikgiparangna aiao inmanpile nambegipa kober gnang." Jisuni an-chi pilak paprantoniko an-chingko rongtalata" - 1 Johan 1:7.

Papo an-chingni janggi tangani baksa srena maiko Jisu an-chingna on-a?

**"Papko u-igijagipako (Jisu) ua chingni gimin papigipa dakaha, chinga maikai uo Isolni torom ong-gen" - 2 Kor. 5:21.**

An-chingni paparigipa janggi tanganiko Kristoni chu-sokgipa toromigipa janggi tangani baksa sreaha. Jisuni pap grigipa janggi tangani aro siani a-sel Isol an-chingko kema ka-na aro pangnaba pap ka-kuja gitा channa man-a.

Maia Jisuko an-chngna Baltigipa aro Bichal Ka-gipa ong-na kragipa ong-ata?

## 2. KRISTO SOMOI GITA SOKBAA

Uni nabolao Jisu Gisik Rongtalgpachi to nongako man-aha:

**"Unon Jisu baptize ka-atako man-e chioni Bakan gakataha; aro nibo, una salgirangko oaha, aro ua Isolni Gisik paroa gita ong-onbaako aro an-tangni kosakona re-baako nikaha. Aro nibo, lan angni ka-sara Depante, iano anga namnikbea ine salgioni ku-rangko knaaha" - Mati 3:16, 17.**

Uni nabolao Jisuko Gisik Rongtalgpachi to nongako man-ani ja-mano sninggiparang indake aganprakaha:

**"Chinga Messaiako man-aha, jeko aganskaode Kristo ong-a" Johan 1:41.**

Ibri katta "Messiah" aro Greek katta "Kristo", ia minggnian "to nongako man-gipa" ine orto ong-a ine Jisuni sninggiparang ma-siachim. Luk, Jisuni sninggiparangoni saksa , Jisuko Messaia ong-na to nongani bilsiko "Tiberius kaisarni raja ong-ani chi-bongagipa bilsi" (Luk 3:1) ine serika. An-chingnade ua bilsira AD 27 ong-gen.



Jisuni atchina bils 500 skang Daniel katchinikgipa Jisuko AD 27 bilsio Messiah ong-na to nongako man-gen ine agansoaha.

**"Jerusalemko nampilatna aro rikna ge-etani ong-katangaoni nonggiminona chong-motan pamongona, antisni ong-gen, aro anti sotdokgni" - Daniel 9:25.**

Anti sni aro anti sotdokgnia chu-gimik anti sotdoksku ba 483 salrang ( $7 \times 69 = 483$  salrang). Sastroo katchinike agananio salsaara bilsisako mesoka (Ezekiel 4:6; Chanani 14:34), uni gimin 483 salrangara 483 bilsirangmung apsan ong-a. Jerusalemko nampilatna aro rikna ge-etani donggen ine Daniel agansoa aro ia ge-etania bils 483 tiktak ja-mano Messiah ong-katgen.

Donsogimin somoio Jisuara Messiah ong-e jakatahama? Jerusalemko rikpiltaina Artaxerxes raja ge-etaniko 457 BC o on-aha (Ezra 7:7-26). 483 bilsirangara AD 27 o bon-ea ( $457 \text{ BC} + AD 27 = 483$ ). 457 BC o Jerusalemko rikpiltaina ge-etaniko on-aha aro Kristoko AD 27 o to nongaha, ia bilsirangara sampraksanchim uni gimin somoiara bils 483 ong-a.

Donsoa somoi tiktakon AD 27 o Jisu "sal chu-sokaha" (Mark 1:15) ingipa nama katta baksa nakataha. Ia Sastroni katchinike aganani tiktak chu-sokania Nazarethni Jisuan Messiah ong-a ine mesoka, jean mandeni bimango Isol ong-ani.

Ku·rachakako kakket ong·a ine mesokna Jisu badita ruute nanga?

**"Aro antisana ua bang·a baksə bilakgipa ku·monggrikaniko (ku·rachakaniko) dakgen" - Daniel 9:27,**  
skanggipa bak.

Jensalo an·ching salsa salsara ong·ani niamko ra·gaton, ia "antisa" de bilsisni ong·gen. Uni gimin bilsisni AD 27 oni AD 34 ona Jisu "bilakgipa ku·monggrikaniko dakgen" ba ku·rachakan, Ua Adam aro Hoba baksə uamangni pap ka·ani ruutgijaan daka. An·chingni paprangna sichakgnigipa jekon Ua watatgenchim Uni sianichi mandeni jatko paponiko Ua jokatgen ine Isol ku·monggrikaniko ba ku·rachakaniko daka (A·ba. 3:15).

Sotsnigipa antini bijatchio maia ong·genchim?

**"Antini samsana ua hom aro bolirangko bon·atgen" - Daniel 9:27,** bon·kamgipa bak.



Jisuko AD 31 bilsio chisolo datkapaha jean "antini samsa" o ong·achim. Kristoni siani somoio Isol "torom nokni ba·ra dongpenggipako kosakoni ning·ona chitgni grinataha" (Mati 27:51. Boli on·ani mes bi·sa (Jisuko mesoka jean "Isolni mes bi·sa" jekon so·otnasiengachim, kamalni jakoni jokangaha. Ian Isolni mandeni jatni matburingko boli on·aniko nangnikjaha ine mesokani chin ong·achim. Katchinike agananini tiktak chu·sokani gimin Jisu boli on·angkuaniko bon·ataha. Kristoni sianichi manderang matburingko boli on·anichi aro mande ong·gipa kamalrangchi Isolona sokna man·ja indiba Messaiachi jean Isolni Mes Bi·sa aro an·chingni Kamal Dal·gipa ong·a.

### 3. PAPKO KEMA WATANINI GIMIN KA·DONGATANI

Danielni katchinike agananini gita maina Jisu siaha?

**"To nonggimin den·sotako man·gen aro uni pilakba ong·jawa" - Daniel 9:26.**

Chisolo Uni sion Jisu "den·sotako man·aha." Ua siaha, indiba An·tangna ong·ja. Ua An·tangni papna sasti ong·ja, indiba a·gilsak gimikni paprangna sastiko ra·chakna.

An·chingni pilak paprangko Isol kema ka·aha ine an·ching maikai ma·sigen?

**"Pilak bebera·giparangna Jisu Kristoko bebera·achi Isolni toromko .... Pilakan pap ka·aha ..... uamang Jisu Kristoo gnanggipa piokachi indinari uni ka·saachi toromi inako man·a ..... Bebera·achi uni an·chio" - Rom 3:22-25.**

Ia podrango mongsonggipa u·ina nanggnirangara: An·ching "pilakan pap ka·aha" indiba Isolni ka·saachi pilakan "toromi" inako man·a jemangan Kristoni rongtalatani bil gnanggipa "an·chio bebera·achi." Jensalo an·ching toromi ine chanako man·ahaon Isol an·chingni batanggimin paprangni dosko ra·ange an·chingko dos gri ine agangen. Aro Isol an·chigko toromi one chana: "Jisu Kristoko bebera·achi Isolni toromi ong·ani an·chingona sokbaa.

An·ching pilakan jemangan an·ching an·tangtang namgipa ong·na jotton ka·e neng·skimaniko man·giparang Kristoni ka·sae ra·chakanio chong·motgipa neng·takaniko man·gen. Ua ku·rachaka, "Pilak gamgipa aro bal jrimgiparang angona re·babu, anga na·simangko neng·takatgen" (Mati



11:28). An-ching pilakan jemangan batanggiminrangni parichi aro chu-onngnikgijanichi aro kratcha-anichi saknaatako man-e bal jrimatako man-giparang Kristoo tom-tomaniko man-gen.

#### **4. BICHAL A-BACHENGANI SOMOI**

Daniel odhai 8 sa-gre Danielna mikkangchi ong-gnirangni gimin parakaha. Danielni nikanirang: (1) Mes bipa (2) Do-bok bipa aro (3) Do-bok bipani grongrangni ge-sa "chongipa grong ge-sa .... Namen dal-rooangaha (Daniel 8:8, 9); iani chinrang: (1) Medo - Persia (2) Greek aro (3) Rom (Daniel 8:1-12, 20-26).

Katchinike agananai brigipa bakara maia?

**"Dondikgija on-ani .... Nikaniara basakona kingking ong-gen? Aro Ua angna aganaha, Hajalgni aro ritchagittam attamrang aro pringrangpna kingking; unon rongtalgpia biap namatako man-pilgen" - Daniel 8:13, 14.**

Hajalgni ritchagittam salrangni gimin katchinike agananiko sa-greni talate on-na skang Daniel sibokaha aro Daniel odhai 8 uani ortoko pe-ani gri bon-ataha. Indiba ja-mano sa-gre mikkang pa-tiae aganaha: **"Kattako gisik nangbo aro nikaniko ma-sibo. Niam pe-aniko matchotatna aro papko bon-atna aro dosni gimin nangrimpil-atna aro jringjrotna bon-gijagipa kakket ong-aniko ong-atna aro .....nang-ni manderangni kosako aro nang-ni rongtalgpia songjinmani kosako anti sotsniko tik donmanaha" - Daniel 9:22-24.**

Hajalgni ritchagittam salrangara 2,300 bilsirang ong-a, salsara katchinike agansoaniode bilsida ong-a (Ezekiel 4:6). Anti sotsni ba 490 bilsirangara 2,300 bilsirangni gimin katchinike agananini skanggipa bak ong-a. Ia bilsirangara 457 B.C. oni a-bachenga jensalo Persia "Jerusalemko namatpilna aro rikna ge-etaniko" on-aha. 2,300 bilsirangoniko 490 bilsirangko changalo 1,810 bilsirang dongkua. 1810 bilsirangko A.D. 34 na chandime, jensalo 490 bilsirang bon-a, an-ching A.D. 1844 ko man-a.

#### **5. SALGINI TOROM NOKKO RONGTALATA - (BICHAL)**

Sa-gre Danielna aganaha je, 1844 bilsio 2,300 bilsirangni bon-o, "rongtalgpia biap (torom nok) namatako man-pilgen" (Daniel 8:14). Indiba iani ortoara maia? A.D. 70 bilsioni intal jensalo Romerang Jerusalemo donggipa torom nokko nisiaha, Isolni manderangna a-gilsako torom nok dongjaha. Uni gimin 1844 bilsioni a-bachenge rongtalatna nanggipa torom nokara salgini torom nokan ong-na nanga jeni jagringan a-gilsakni torom nok ong-achim.

Salgini torom nokko rongtalatani ortoara maia? Skang chasongni Israelrangde a-gilsakni torom nokko rongtalataniko Yom Kippur ba Nangrimatani Sal ine minga. Uan bichalni sal ong-chongmotachim.



Dilani 12 o am-e man-ani gita torom noko Kristoni kam ka-ania rokomgnii gnang: (1) Salanti boli on-ani, ian kamalni torom nokni skanggipa kuturio kam ka-ani, uan Rongtalgpia Biap. (2) Bilsio changprak boli on-ani, ian kamal dal-gipani torom nokni gnigipa kuturio kam ka-ani, uan Rongtalbatgipa Biap).

A-gilsakni torom noko manderang salanti uamangni paprangko ku-rachakon, so-otgimin matburingni an-chiko ganchini noksiko satkikia unikode Rongtalgpia Biapona ra-anga (Levi odhai 4 aro 6). Uandake salanti ku-rachakgimin paprangko torom nokona ra-ange dona.

Unikode bilsiantian Nangrimatani Salo torom nokoni batanggimin bilsi gimikni chimonggimin ku-rachakgimin paprangko rongtalata (Levi odhai 16). Ia rogtalataniko chu-sokatna Kamal Dal-gipa Isolna on-kanggimin do-bokko dingtangmancha boli on-aniko daka. Unikode ua an-chiko Rongtalbatsranggipa Biapona ra-ange pap watramko kosako ia an-chiko satkikia ian Jisu, re-baenggipa Piokgipa papni sastiko ra-gen ine mesokani ong-a. Kamal Dal-gipa unikode pap ku-rachakgiparangko torom nokoniko ra-ongkate manggipin do-bokni skoo dona jekon bakrao sichina dilanga (Levi 16:20-22).

Ia Nangrimatani Sal, bilsio changsa manianian torom nokko paponiko rongtalata. Manderang ia salko bichal ka-ani sal dake ra-a maina jemangan uamangni paprangko ku-rachakna jechaka uamangko kakketgijagipa ine chana aro uamangko Isolni manderagoniko galatako man-a" (Levi 23:29).



Jeko Kamal Dal-gipa chinna gita bilsio changsa daka, uko Jisu, an-chingna Kamal Dal-gipa changsa dake pilak chasongrangna bon-a (Ibri 9:6-12). Dal-gipa bichalni salo Uko uamangni Jokatgipa dake ra-chakgiparangni ku-rachakgimin paprangko Ua torom nokoniko ra-gala. An-ching an-chingni paprangko ku-rachakahaode, ua somoion Ua jringjrotna an-chingni paprangko serikaoniko kimitgen (Watata 3:19). Ia kaman bichal ka-anikam ong-a jekon Jisu 1844 bilsio a-bachengaha.

Ritchachi-chet sotbribri bilsio Isolni bichalni somoi salgio a-bachengon, bichalni somoini gimin nama kattako a-gilsak gimiko skiprakna a-bachengaha (Para. 14:6-7). Mikkangchi poraianio ia nama kattani gimin an-ching man-anggen.

## 6. BICHALO SERIKANIKO MIKKANG CHAKANI

Ritcha chi-chet bilsi intal Kristo, Bichal Ka-gipa ong-e a-gilsako atchigipa sakantini janggi tanganiko serikaoniko am-rikkitenga jedakode Jisu re-baon sawa sawa jokatako man-gen u-ini gita. An-chingko bichal ka-gipa ong-e, Jisu kakket dakgiparangni pilak paprangko salgio uamangni janggi tanga gimiko serikgipaoniko "kimitgen" (Watata 3:19).



Na-a Kristoko nang-ni palo aganchakgipa dake ra-chakahaode, jensalo nang-ni bimung bichalo nakaton nang-ni janggi tanganiko serikaniko mikkangchakna altugen. Jensalo toromirangko bichal ka-a matchoton, Jisu uamangna on-aniko on-na a-gilsakona re-bapilgen (Para. 22:12, 14).

Jisuni re-baanina na-a tariahama? Ma na-a Uoniko maikoba donnukuengama? Indake (ka-mao mesokatenggipa gita) ku-rachakgipa baksa mamung donnuan gri kakket ong-e nangrimgrikani nang-o gnangma?

**"An-ching an-tangtang paprangko ku-rachakode, an-chingni paprangko watna aro pilak toromi ong-gijanirangoniko an-chingko rongtalatna ua bebegipa aro toromigipa ong-a" - 1 Johan 1:9.**

An-chingni paprangko ku-rachakaniko ortoara an-chingni paprangko mikkang chakna ku-rachakani, Isolni kema ka-aniko ra-chakani aro Isolni bil aro ka-saaniko an-chingni nanganiko ku-rachakani ong-a.

Potsdamo donggipa patok nokko niengmitingo Raja Frederick William I kema ka-china mol-molanirangko knatimaha. Pilak koedirangan, kragija chanchichipe bichal ka-giparangni a-sel tol-e saki on-gipa sakirangni a-sel ba tik ong-gijagipa ukilrangni a-sel uamang patoko donatako man-aha ine mikchettokaha.

Kuturisaoni kuturisaona apsan golpokon knaaha. Indiba kuturisaode saksa koediara mamungkoba aganjaha. Aiao inmane Frederick kal-ake inaha, "Anga chanchia na·aba dos dongjaenggen mo?" "Ong·ja Maharaj, anga dos dakaha aro man·na kraa gita anga man·enga."

Raja nitimgipaona an·pile gam·e okamataha, "Re·babu, ia dos grigipa jinmako ong·siatna skang ia kakketgijagipa koediko ta·rake jakgitele watatbo."

Maidake an·ching bichalna tarienga? Kristoni re·baanina maidake an·ching taria? Kakketko kakket ong·e ku·rachakanichi: angni paprangna siani sastiko anga man·na krabeachim, indiba sakgipinsa angni biapko ra·e angna aiao inmangipa kema ka·aniko on·aha. Je a·sel ong·oba na·a Kristo baksa kakket ong·e nangrimgrikaniko dakgen ine da·on on·kanganiko dakbo.

## Isolo Bi-anina Aganchakaniko Man-ani Cholko Am-e Nibo



Russiani ki-tap segipa aro itihasni gimin ma-sibegipa Anatoli Levitin minggipa Seberiani Gulag o bang-a bilsirangko re-ataha, jean uni Isolo bi-anirangko tin-kapilaha gita nikahachim. Indiba ua gisikni bidingo bilakataniko man-e re-bapilaha. "Pilak aiao inmanani kamrangna bate dal-batgipade Isolo bi-anian ong-a" ine ua ki-tapo seaha. "Anga angni chanchianichi mangmang Isolona an-pilna nangaia unikode banoniba bilko angni janggiona, angni be-en gimikona rudapata gita ma-sia. Uara maia? Ang gita choligijagipa budepa mande, janggi tangani gimin be-ekgipa baoniko ia bilko anga man-gen, jean gital daktaie aro a-gilsakni kosakona chuate angko jokata? Ian angni a-palonii re-baa - aro uko warachaksona a-gilsako bil dongja.

An-ching maikai Isolo bi-ania Isol bak nangrimgrikaniko aro Kristian janggi tanganiko bilakatna man-gen ia poraianio nigen.

### 1. ISOL BAKSA AGANGRIKANI

An-ching Isolo bi-on Isol an-chingni bi-ako knaa ine an-ching maikai ma-sigen?

**"Aro na-simang angko okamgen, aro na-simang re-ange angko bi-gen aro anga na-simangna knachakgen. Aro na-simang an-tangtangni ka-tong gimikchi angko am-on, na-simang angko am-e nikgen" - Jeremia 29:12, 13.**

An-chingni bi-anirangko Ua knachakgen aro aganchakgen ine maia ka-dongataniko Jisu on-a?

**"Aro anga na-simangko agana, Bi-bo, unon na-simangna on-gen; am-bo, unon na-simang nikgen; doktikbo, unon na-simangna do-ga osogen" - Luk 11:9.**

Isolo bi-ania cholgni ramachi agangrikani ogn-a. Iakon Jisu ku-rachaka:  
**"Nibo, anga do-gacholo chadenge doktika; saoba angni ku-rangko knae do-ga oode, anga uona napanggen aro anga un baksa, aro uaba ang baksa cha-gen" - Para. 3:20.**

Maidake Jisu baksa meattam cha-e agangrikan man-gen? Skanggipa, an-chingni ka-tongo donga gimikko Isolo bi-ao Una agananichi. Gnigipa, name knatimanichi. An-ching ning-tue chanchie Isolo bi-on Isol an-ching baksa agangrikna man-a. An-ching Isolo bi-a gnang Isolni kattako poraion, poraiani gita Isol an-chingna agangen.

Isolo bi-ania Kristianrangni janggi tanganio bewal ong-bana man-a.

**"Dondikgija bi-bo. Pilakkon mitelbo, maina na-simangni gimin ian Kristo Jisuo Isolni namnika ong-a" - 1 Thess. 5:16-18.**

Maikai an-ching "dondikgija" bi-na man-gen? An-chingara ja-sku dipankamna nangama ba olakiani ba mol-molani kattarangko mingjringe dongna nangama? Indakede ong-ja. Indiba an-ching Jisu baksa chapchap janggi tangna nanga aro Un baksa je somoioba aro je biapoba jakgittele agangrikna man-na nanga.



"Mande bang-gipa sorokrango, bremiting palmitingo, Isolona mol-molanirangko watatna man-a, aro Isolni dilanina bi-na man-a..... An-ching an-chingni ka-tongni do-gacholko oe donjringna nanga aro an-chingni okamaniko watdoatna nanga jedakode Jisu re-bae salgini sokgipa ong-e an-chingni janggi dongna man-gen" - Steps To Christ, jak 99.

Indakgipa ning-tugipa nangrimgrikaniko ong-atani nambatgipa cholrangoni mingsade ning-tue chanchie Isolo bi-anian ong-a.

**"Angni chanchibewala Uni namnikani ong-china. Anga Jihovao ka-srokgen" - Git 104:34.**

Isolo bi-o nang-ni mol-molanirangko sulsul mingrongrongainabe. Sengbo. Knatimbo. Bi-a gnang ning-tue chanchiani nang-ni Isol baksa nangrimgrikaniko bilakathna man-gen.

**"Isolni sepangbo, unon ua na-simangni sepanggen" - Jakob 4:8.**

Badita sepangge an-ching Jisuona re-baa, inditaan an-ching Uni donganiko ma-sina man-gen. Uni gimin Jisu baksa agangrikna sepangon dongbo aro kragipa kattani aganani giminde jajrengnabe. Kakketko aro parake ra-rikani gri aganaibo. Pilakni giminan aganbo. Ua nang-ni nangrimbegipa ripeng ong-na gita saknae, satengtoe sianiko chagrongman-aha.

## 2. MAIDAKE BI-GEN

Jensalo an-ching Isolo bi-on, an-ching Gitelni Bi-aniko mesokaniko ja-rikna man-gen, jean "chingna bi-na skibo" ine mol-molanina Jisuni Uni sningiparangna ja-rikna gita mesokani bi-ani ong-a.



**"O salgio donggipa chingni Paa, Nang-ni bimungko rongtala intokchina. Nang-ni songnok on-bachina. Salgio maikai, uandake a-oba Nang-ni namnika chu-sokchina. Chingni cha-na nangako da-alu chingna on-bo. Aro chingna gro nanggiparangko chinga wataha gitau chingni grorangko watbo. Aro chingko dakmajaona rimnapnabe, indiba namgijaoniko chingko jokatbo. Maina nang-ni songnok, aro bil aro rasong jringjrotua nang-nin ong-china, Amen" - Mati 6:9-13.**

Gitelni bi-anio Jisuni mesokani gitade an-chingara Isolona salgio donggipa Pagipa dake re-bana nanga. Salgini pilak bakon Uni ska ong-a gita an-chingni ka-tongoba Uni ska ong-china bi-na nanga. An-chingni be-enni nanganirangna, kema ka-anina aro kema ka-ani gnanggipa gisikna Uo an-ching am-na nanga. An-ching papko warachakna bilko Isolonikosan man-a ine gisik ra-na nanga. Kristoni bi-aniara de-mitelanichi matchotata.

Changgipin somoio Jisu Uni sningiparangko Pagipana "angni bimungo" bi-china skia (Johan 16:23) - uan Jisuni on-gimin niamrango pangchake bi-china agana. Uani giminisa Kristianrang pangnan Isolo bi-o "Jisuni bimungo bi-a, Amen" ine bon-kamao bi-a. Amen ingipa kattara Iibri ku-sik ong-a jean "Indaken ong-china" ine orto ong-achim.

Gitelni bi-ania maidake bi-na nanga dilaniko on-genchimoba an-chingni Isol baksa agangrikaniara an-tangari ka-tongoni ong-katbagipa miksonganirang ba chanchianirang ong-na nanga.

An-ching pilakni giminan Isolo bi-na man-a. An-tangni paprangko kema ka-ani gimin bi-china Isol agana (1 Johan 1:9), bebera-aniko bariatani gimin (Mark 9:24), janggi tangao nangchongmotanirangni gimin (Mati 6:11), saknaani aro saa biatirangoni an-sengtani gimin (Jakob 5:15), aro Gisik Rongtalipako rudapani

gimin (Zek. 10:1). An-chingni pilak nanganirangkon Uona ra-angna man-a; mamungni giminba bi-na chondugaa ong-ja ine Jisu an-chingna ka-donganiko on-a.

**"Na-simangni pilak sinteaniko Uni kosako donbo, maina Ua na-simangni gimin simsaka" - 1 Pitor 5:7.**

An-chingni Jokatgipa an-chingni janggi tanganio pilakni gimin che-em che-em u-in a gisik nanga. Jensalo an-chingni ka-tongrang Uona ka-saao aro bebera-ao sokangon Uni ka-tong jaksrama.

### 3. MITINO BI-ANI



An-chingoni bang-bataan an-chingni sepangbatgipa ripengrangmangmangnaba u-iatna sikgijagipa obostarang gnang. Uni gimin Isol an-chingko an-chingni bojarangko mitino bi-anio ong-atchina agana. Un baksa saksangrik. Ian uani gimin u-in a nanga indake ong-ja. Dal-batgipa ong-e Ua an-chingni donnugipa kenanirangko, donnugimin miksonganirangko aro galchipgimin ka-ao nanganirangko an-ching an-tangtangna baten ma-sibata. Indiba an-chingni gimin ning-tue u-igipa aro tona amsokpilgija ka-sagipana an-chingni ka-tongrangko oprakna nanga. Jensalo Jisu an-chingni parirangko dangtapna man-on an-sengatani a-bachengna man-gen.

Jensalo an-ching bi-on, Jisu an-chingni Kamal Dal-gipa an-chingko dakchakna sepangon ong-a:-

**"Maina an-chingni Kamal Dal-gipa an-chingni bilgriarangna duk man-pana amgijagipa ong-ja, indiba pap gri pilakni gimin an-ching gita dakmajoako man-aha. Uni gimin ka-saani singhasonona kenmangija sepangna hai, maikai an-ching ka-sachakako man-gen aro nangani salo dakchakna ka-saako man-gen" - I bri 4:15, 16.**

Na-a jajrengengama, sinjetako man-engama, dos gnangma? Gitelni mikkango donbo. Unode Ua an-chingni pilak nanganiko on-na man-gen.

An-chingara mitingo bi-na gita dingtangmancha biap dongna nangenma?

**"Indiba na-a bian salo an-tang nokdringo napbo aro do-ga chipchange dongnue donggipa nang-ni Paao bi-bo; unon dongnuao nikgipa nang-ni Paa nang-na on-skagen" - Mati 6:6.**

Isolo bi-a baksanaba songjinmani soroko ring-mitingo, kam ka-mitingo, ba jinmao tom-dake kusi ong-engmitingo Kristian sakantian salantio an-tang Isolo bi-na aro Sastro poraina somoi donna nanga. Salanti Isol baksa somoi re-atna somoi tik ka-e donbo je somoion na-a gisik sranga aro gisik dingchike chanchina man-a.

### 4. JINMAO BI-ANI



Jinma baksa damsan Isolo bi-ania dingtangmancha karimaniko ong-ata aro dingtangmancha Isolni bilko bi-ani ong-a.

**"Maina jeo sakgni sakgittam angni bimungo tom-a, uon anga uamangni gisepo gnang" - Mati 18:20.**

An-chingni dakna man-gipa dal-batgiparangoni mingsade nokdang ong-e damsan Isolo bi-jringani ong-a. Na-simangni dedrangni an-chingni nanganirangko Isolona bi-achi ra-angna man-a ine mesokna man-gen. An-chingni salanti janggi tanganio maiba chonbegipa bosturangni gimin bi-anina Isolni aganchakaoniko uamang nikon Isolo

bi-anini gimin gisik nangbegen. Nokdango bi-aniko dakon kusi ong-e an-tangtangini chagronganiko sualgriki somoi dakbo.

## 5. BI-ANINA AGANCHAKANI MINGSNI JA-PANGRANG

Jensalo Mose Isolo bi-on Sagal Gitchak bakgni dakaha. Jensalo Elija Isolo bi-on, salgioni wa-al ga-akonbaaha. Danielni Isolo bi-on saksa sa-gre re-baon chikrakgipa singhorangni ku-sikrangko ku-kipataha. Sastroo bang-a gisik nangatgipa bi-anina aganchakaniko serikanirang gnang. Isolni aiao inmangipa bilko man-na gita Isolo bi-aniko chol rama dake jakalchina Sastroo ku-patia. Jisu indake ku-rachaka:

**"Angni bimungchi na-simang maikoba bi-ode, uko angan dakgen" - Johan 14:14.**

Indiba mitam bi-anirangkode knachakja gita niha. Maina? Iano mingsni niamrang gnang jeko ja-rikon nang-ni bi-aniko mangrakbatatna gita dakchakgen.

### (1) Kristoni sepango dongbo.

**"Na-simang ango dongkamode, aro angni katta na-simango dongkamode, indide jeko ska ukon bi-bo, unon ua na-simangna on-gen" - Johan 15:7.**

Jensalo an-ching Isol baksa nangrimrikaniko skang dakon aro Un baksa nangrimaniko dakjringon an-chingni bi-anirangna aganchakanirangko am-e, knarime dongjringgen, jekon indake dakjaode ma-sirkjanaba donga.

### (2) Isolo ka-donge dongjringbo.

**"Aro bi-on bebera-e jekon bi-gen, pilakkon man-gen" - Mati 21:22.**

Bebera-ani ba ka-dongani ortoa an-chingni an-chingni pilak nanganirangko on-china an-ching an-chingni salgini Pagipaoniko bi-chongmotgen? Na-a bebera-ani dongjani gimin neng-nikaniko man-ode gisik ra-bo, an-chingni Jokatgipa ka-dongani gri ong-e mol-molgipana aiao inmangipa kamko dakaha.

**"Anga bebera-a, angni bebera-gijako dakchakbo" - Mark 9:24.**

Nang-o je bebera-ani gnang ukon jakaljringbo; nango bebera-ani giminde simbranabe.

### (3) Isolni skanina an-tangko tom-tome on-kangbo.

**"Aro an-chingo gnanggipa Una ka-donga ian; an-ching maikoba Uni namnika bi-ode, ua an-chingna nachil songa" - 1 Johan 5:14.**

Gisik ra-bo, Isol bi-anichi an-chingna skiskaa, aro patianirangko uchin on-na ska. Uni gimin basakobade "man-jawa" ine Ua agana. Basakobade Ua rama cholgipin gita an-chingna on-pila. Isolo bi-aniara Isolni skani baksa sepangbatroroe nangrimani chol ong-a. Isolni aganchakanirangko u-ininggipa ong-na nanga aro uarangoniko skie ra-na nanga. Dingtagmancha mol-mole bi-anirangko sandijringode aro ua mol-molanina aganchakania mai ong-a uko ma-siode uan dal-begipa dakchakani ong-gen. Gisik Rongtalgipta tiktak biapona dilgen: "Gisik ..... Isolni namnika gita rongtalgiparangna mol-molchaka" (Rom 8:27). Gisik ra-bo, Uni nika gita an-ching nikna man-ode an-chingni skania pangnan Uni skani baksa apsan ong-na man-gen.



**(4) Isolo chakchike sengbo.**

"**Anga Jihovana chakchike sengsoaha; aro ua angchi so-onchokaha, aro angni grapako knachakaha**" - Git 40:1.

Iani mongsonggipa u-inna nanganide nang-ni miksonganiko Isolo donani ong-a. Uni chu-sokatanio miksongbo. Isolni dakchakaniko dikdiksa am-e unikode ruttgijaan nang-ni neng-nikanirangko a-gilsakni suknirangko am-anio sripatna jotton ka-nabe. Jihovao chakchike sengsoani bewalko an-ching namen nangenga.

**(5) Mamung papoba dongnabe.**

"**Angni ka-tongo anga namgija dakaniko nie chanchiode, Gitel kanchakjawa**" - Git 66:18.

An-chingni janggi tangao u-ironggipa papko rakiode, Isolni bilko gimaatgen (Isaia 59:1, 2). Na-a jaksamsachi papo dingdee jaksamgipinch Isolni dakchakanina jak snilatna man-ja. Ka-tong gisik gimikchi dakgualaniko ku-rachake gisik pil-ode neng-nikanirangko namatna man-gen.

An-ching namgija chanchiaoni, namgija kattarangoni, aro namgija kamrangoni an-tangko jakgitel ong-atna Isolna on-na sikjaode an-chingni bi-anirang bil gnanggipa ong-jawa.

"**Na-simang bi-a indiba man-ja, maina an-tangtang namnikarango chon-atna ine na-simang namgija bi-a**" - Jakob 4:3.

An-tangnirangna chanchie bi-anirangna "de on-gen" ine Isol aganchakjawa. Isolni niamo aro Uni skanina nang-ni nachilrangko songe rakibo, unon Ua Uni nachilrangko nang-ni bi-anirangna sone rakigen.

"**Niamko knatimna an-tangni nachilko songijagipa uni bi-aniba mitchiani**" - Toe Skiani 28:9.

**(6) Isolko nangnikaniko ma-sibo.**

Jemangan uamangni janggi tanganio Uni donganiko aro bilko bi-a uamangna Isol aganchaka.

"**Toromna okkrigipa aro ringna sikgiparang an-senga; maina uamangko okaatgen**" (Mati 5:6).

**(7) Isolo bi-anio jotking dakbo.**

An-chingni bi-anirango jotking dakna nangani gimin Jisu jotking dakgipa segri me-chikni gimin golpo agane mesoka jean bichal ka-gipaona an-tangni mol-molani baksa re-barongachim. Gisik ding-atako man-e bon-kamao bichal ka-gipa indake aganaha:

"**la segri angko duk on-engani gimin anga una kakketko dakgen.**" Bon-kamao Jisu indake agana:  
**"Indide Isol An-tangni segimin, wal sal ue grapgiparangna kakket dakjawama aro uamangni gimin chakchikgenma?"** (Luk 18:5-7).

Nang-ni pilak nanganirang, ka-donganirang aro niksamsoanirangko Isol baksa chanchirimaniko dakbo. Dingtangmangkanagipa patianirangko, nangmitingkoba na-a skie ra-kujana kingking sing-e dongkamaibo aro knatime dongkamaibo.

## 6. BI-GIPARANGNI NANGANIRANGNA SA-GRERANG DANGDIKE ON-A

Sa-grerangni dangdike on-anirangchi uni bi-anirangna aganchakanina gitko segipa kusi ong-a:

"**Anga Jihovako am-aha aro ua angna knachakaha. Aro angni pilak kenanirangoniko angko jokataha. .... Jihovani sa-gre una kengiparangni pilakchin a-tip daka aro uamangko jokata**" - Git 34:4-7.



An-ching Isolo bi-on, an-chingni bi-anirangna aganchakna Isol sa-grerangko watata (Ibri 1:14). Kristian sakanti baksaan nitimgipa sa-gre gnang:

**"la chongiparangoni saksako na-simang maikai chonnikjawa, indake gisik rakbo; maina anga na-simangna agana, Salgio uamangni sa-grerang pangnan salgio donggipa angni paani mikkangko nika" - Mati 18:10.**

An-chingni bi-anirangni a-sel:

**"Gitel sepangon. Mamungnaba sintenabe, indiba mitelan baksa bi-achi aro mol-molachi Isolna pilakni gimin na-simangni man-na nanganirangko u-iatbo. Unon na-simangni ka-tongrang aro chanchianirangko rakigen" - Phil. 4:5-7.**

## 7. KRISTIAN JANGGI TANGANI BEWAL

Sastroo dingtangmancha Kristianrangna janggi tangani bewalko talata. Ephesurangna 4:22-24 o seani gitade Kristianrangko "tol-napani skarang" oni ong-bagipa gitcham janggi tangani bewalko "galna" aro gital janggi tangani bewal jean "Isol gita daka" ko "ganna" nanga ine agana. Sastroo aro dilani 6 o an-ching am-e man-aha je, gital atchianio Kristoo dingtang ong-na gita an-ching "ong-attaianiko" man-a.

Ia dilanio aro iani ja-mano dilani ge-doko Kristian janggi tangani bewalko talata: iarang kusi ong-e Kristian janggi tangani donnuaniko paraka. Iarang nang-ko Kristo baksa bilakbate nangrimaniko dakna dakchakgen jean dingtangmanchagipa Kristian janggi tangani ong-gen. Uni gimin nang-ni mikronrangko da-alu Jisuo miksongbo aro na-a Kristoni tom-tomani sason ka-ao bon-kamgipa cheaniko maniani bak ong-na man-gen.

## Kusi Ong·ani Cholko

Ritcha chi·sku sotbrigitam bilsio, Japanni sipairang ritchani ritcha America aro Europe a·songrangni "bobil ong·gipa jatrang" ko China a·songni Shantung Province o patokona watataha. Uamang bang·a jaarangna neng·nikani, ka·donga gri ong·ani, mande bang·dugaani neng·anikani, aro kenaniko chakna nangaha. Dakgrianirang, jegrianirang bang·roroaha.

Indiba saksa mande gnangchim, uko patoko donggiparangoni saksa indake talata: "Ua mandean patoko donggiparangni namnikbatgipa, mande ra·batgipa aro ka·saako man·batgipa ong·achim." Uan Eric Liddel Scotlandni Missionary ong·achim.

Patoko donggipa Russiani me·chik ja·mano Liddelko an·tangni nangani somoio dam gri dakchakbegipa ine agana. Uni patokona re·bachengon ua saksanchim indiba Liddelan re·bae una nangarangko dakeaha.

Sakgipin koedi Lidelni gimin, Uo sontol ong·gipa aro ka·ting dakgipa manderangko ka·dingatani bewal gnang" ine agana.

Changsa koedirangni tom·anio ka·o nangan gapachim. Chadamberangni sengnapgija dake golmal ong·enganiko saoba namatbo ine manderangni aganon Liddel namataniko dakna a·bachengaha. Ua kal·susaanirangko, rata tetani classko bi·sarangna a·bachengaha aro attam·attamode ua an·tangba uamang baksa dongpaaha.



Ritcha chi·sku kolgrikbri bilsini Olympic kal·susaanio Liddel 400 metre katanio gold medalko man·e an·tangna migsinganiko aro rasongko man·aha. Indiba ua patok nokomangba an·tangko a·gilsakni gita re·giparangchi de·mitelako man·ate Kristian katsusaanio chegipa ong·a ine mesokaha.

Maia uko dingtangmarchagipa ong·ataha? Uko dingtangmarchagipa ong·ataniko salantian pringni 6 bajio nikna man·genchim. Ua somoio uni ripengrangni tusimitingo chongipa lampko so·e tableo note book aro Sastroko ra·e porairongachim. Isolni kattaoniko salanti Eric Liddel ka·saaniko aro bilko am·rongachim.

### 1. KRISTIANNI JANGGI TANGANINA DILGIPA KI·TAP



Kristianrangna dilgipa ki·tap dake Sastroko seaha. An·ching gita mande chong·motni golporangan gapaigipa jemangan an·chingni salanti janggi tanganio chagronggiparangkon uamangba chagrongahachim. Sastroni manderangko ma·siani, uamangni katchaani aro dukrang, uamangni neng·nikanirang aro cholrang an·chingko brigimin Kristianrang ong·na gita dakchaka.

Gitko segipa Daud an·chingni salanti Isolni kattao pangchakaniko chaki baksa toe mesoka.

**"Nang·ni katta angni ja·arangna chaki, aro angni ramadilna seng·ani ong·a" - Git 119:105.**

Sastrooniko salanti an·chingni man·enggipa seng·ania an·chingni janggi tanganio nanggipa gisikni dal·rooraniko rongtale mesoka. Pilakna bateba Sastro an·chingna Jisu, A·gilsakna Seng·aniko on·a. Janggi tanganio Jisu teng·suosa orto gnangata.

## 2. DINGTANG ONG·ATGIPA RIPENG MELIANI



Ripeng melibegipani chitti maikai chongmot ong·a ugita chacha Kristo Sastroko an·chingna chong·mot ong·atna nangnika.

**"Anga na·simangko ripeng ine inaha, maina Apaoniko angni pilak knaako anga na·simangna u·iataha" - Johan 15:15.**

Jisu an·chingna nambatakosa nangnika. Uni katta an·chingko Isolni sepangona sokangata; jeon ka-dongchaka aro jenan Ua An·tang skia.

**"Maikai na·simang angon tom·tom donganiko man·gen, uni gimin anga iarangko na·simangna aganaha" - Johan 16:33.**

Ia tom·tomaniko ma·sina, Kristo baksa naljoke nangrimaniko man·na, Uni an·chingna seatgipa chittirangko an·ching poraina nanga. Sastroan ua salgini chittirang ong·a. ua chittirangko kuligija donna nangja. Nang·ni nangenggipa dingtang ong·atgipa nama katta ua kattaon ong·a.

Sastroni bilni gimin iano mingsa saki gnang: ·Anga dakchakaniko nangengachim aro anga uko Jisuo man·aha. Pilak nanganirangko on·aha, angni janggini okkrianiko okkaataha; angnade Sastroara Kristoni gimin parape·ani ong·a. Anga Jisuo bebera·a maina Ua angnade Jokatgipa ong·a. Anga Sastroo bebera·a maina uan angni janggina Isolni ki·rang ong·a ine anga nikaha" - Ministry of Healing, jak 461.

## 3. SASTRO GITA ARO NIAM MINGCHIKKUNG GITA JANGGI TANGNA RAMA MESOKANI

Dikdiksana Niam Mingchikkungko niaton, tangna nangchongmotgipa pangchakani ine an·chingna ma·sina dakchakgen.

Ge·etanirangko bagni dakna man·a. Skanggipa mingbri an·chingni Isol baksa nangrimaniko mesokna, aro bon·kamgipa mingdok an·chingni gipin manderang baksa nangrimaniko mesoka.Uarangko Re·ongkata 20:3 - 17 o man·a.

*Skanggipa minggni ge·etaniara an·chingni Isol baksa aro Uko olakianio nangrimaniko mesoka.*

- I. Angana agre nang·ni gipin isolrang dongjachina."
- II.Na·a an·tangna kitgimin mite dakaniko ..... daknabe .....na·a an·tangko uarangni mikkango tuchikopathnabe."



**Gittamgipa aro brigipa ge·etanirang an·chingna Isolni bimung aro Uni rongtalgi sal baksa nangrimani gimin mesoka.**

- III. "Na·a Jihova nang·ni Isoln bimungko indinari ra·nabe ....."
- IV. "Uko rongtala ine rakina neng·takani salko gisik ra·bo. Saldok na·a gambo aro nang·ni pilak kamko ka·bo; indiba snigipa sal Jihova nang·ni Isolna neng·takani ong·a ....."

**Bongagipa aro snigipa ge·etanirang nokdangni kaako chel·chaka.**

- V. "Nang·ni ma·ako aro nang·ni paako mandera·bo....."
- VI. "Na·a til·eknabe."

**Dokgipa, chetgipa, skugipa aro chikkunggipa ge·etani, songsal baksa nangrimgrikario an·chingko chelchaka.**

- VII. "Na·a mande so·otnabe."

VIII. Na-a cha-unabe."

IX. "Na-a nang-ni songsulna tol-e saki on-nabe."

X. "Na-a nang-ani songsulni jikgipana ... ba nang-ni songsulni mamungnaba mikboknabe."

Niam Mingchikkungara an-chingni Isol baks aro nangrimaniko mesoka. Uarangan Kristian janggi tanganio mesoke dilgipa krongrang ong-a.

#### **4. NIAM MINGCHIKKUNGNI GIMIN JISU MAIKO AGANA**

Salsao Jisuni skiengmitingo, saksa gisik nangbegipa pante Uona sketange sing-aha, "O Skigipa, anga jringjrotni janggiko man-na ine mai namako dakgen" (Mati 19:16). Ua uni gamni bidingo neng-nikaniko chagrongenga ine Kristo nikaha, uni gimin uni gamko wate, "ge-etanirangko manibo" (pod 17) ine ku-ptaiaha. Ua pante Kristoni uni neng-nikaniko ma-sianiko gelna jotton ka-e badia ge-etanirangko Ua miksongenga ine sing-aha. Ge-eta mingchikkungoniko Ua adita sulsul aganangaha (pod 18, 19).



Bon-kamaoa ua "gam bang-gipa" pante an-pile duk ong-e re-angaha (pod 20-22). Ge-eta mingchikkungko ra-chakna man-a indiba uni janggi tangao an-tangnasan chanchiani bewalko galani niamni miksonganiko manina man-jawa.

Niam Mingchikkungara an-chingna sima-ari ko mesoka jeni ning-o Isol baks aro saksa sakgipin baks aro nangrimgrikani dal-rorona man-gen. Niamko maniania chong-motgipa kusi ong-aniona rama ine Jisu mesoka.

**"Na-simang angni ge-etanirangko maniode, na-simang angni ka-saon dongkamgen; anga maikai Apani ge-etanirangko maniaha, aro Uni ka-saon dongkama. Angni katcha-a maikai na-simangon ong-gen aro na-simangni katcha-a maikai chu-sokgen, uni gimin angna na-simangna iarangko aganaha" - Johan 15:10, 11.**

#### **5. KUSI ONG-GIPA JANGGI TANGANIONA DILGIPA**

Aganprakani ki-tapara Solomonni kusiniko am-ani gimin aganani ong-a. A-gilsakni gam jinoniko kusiniko am-ani gimin ua see rakia: Nambegipa nokrang, bite nanggipa draka barirang, nitobegipa barirang, cha-tobegipa biterangni barirang, chakol-nokolrangko bang-e rakiah. Mandeni man-na ska pilakan uo gnangchim. Indiba kusinirang uko gelangaha.

**"Unon anga an-tangni jakrangni ka-gimin pilak kamrangko, aro chu-sokatna kam ka-gimin angni kam ka-ako nipilaha; aro nibo, pilakan ong-gramaia, aro balwana tikelanisan" - Aganprakgipa 2:11.**

Unikode Solomon kusiniko man-na ka-donge a-gilsakni sukko am-na an-pilaha. Ua chuchi, me-chikchi aro gitchi togia man-aha. Uni pilakni gimin ma-siman-e bon-kamgipa chanchianiko dakania:

**"Ong-gramaianirangi ong-gramaia piakan ong-gramaia" - Aganpakgipa 12:8.**

Jihova nama ine Solomon changsao nikmanaha aro cha-tote nimanahachim. A-bachengo uni Isolko manie janggi tanganiko a-gilsakni paponiko katchaaniko uni am-chichianiko tosusaani ja-mano uni nikania:

**"Kattani bon-kamara ian, ..... Isolna kenbo aro uni ge-etanirangko manibo; maina ian pilak mandeni dakna nanggni" - Aganprakgipa 12:13.**

A-gilsakni bewal gita janggi tanganio kusiniko seng-sota bewalchi Solomon man-na ka-dongachim. Uni janggi tangani bon-achibara ua an-tangni dakgualaniko ku-rachakna ka-donganiko man-aha. Apsan

dakgualaoniko gipinrangko jokatna, ua indake seaha,  
**"Niamko rakigipa uan kusi ong-gipa" - Toe Skiani 29:18.**

## 6. NIAM MINGCHIKKUNGAN NANGCHONGMOTGIPA NIAM GITALNI DILGIPA ONG-A


Niam Gitalo Jakob indake saki on-a:

**"Maina saoba niam gimikko manie mingsao ja-gitote, pilakni  
 gimin gro nanggipa ong-aha. Maina Til-eknabe ine ingipa, Mande  
 so-otnabe ine inaba inaha. Indide na-a til-ekja, indiba mande  
 so-otode,na-a niamko pe-gipa ong-aha. Jakgitelni niamchi bichal  
 ka-ako man-nasigiparang gita, na-simang indaken aganbo aro  
 indaken dakbo" - Jakob 2:10-12.**

Charles Spurgeon, mingsinggipa Baptist mondolini skiprakgipa indake agana: Isolni niamara rongtalgipa, salgionigipa, chu-soksranggipa ong-a ..... uano bang-dugae ge-etani gri; uano komidugaaba ong-ja, indiba inditan tosusasa man-gijagipa ong-a. Uani chu-soksranggipa ong-anian Isoloni ong-a ine mesoka.

John Wesley, Methodist mondoliko a-bachengdilgiparangoni saksa, niamni baikamani gimin indake sea: "Niam Mingchikkungko ..... Ua (Kristo) ra-angjaha ..... la niamni pilak akan pilak mandeni jatna pilak chasongan ong-a" - Sermons, Vol. 1, jak 221, 222.

Billi Graham, a-gilsako mandera-ako man-batgipa skiprakgipa Ge-eta Mingchikkungko inditan dal-e ra-a ua uarangni Kristianrangna nangchongmotani ong-ani gimin ki-tap kingsako seaha.



## 7. NIAMKO MANINA BIL

Sastro aro Ge-eta Mingchikkungara kusi ong-e janggi tanganina dingtanggijagipa nangchongmotgipa, chu-sokgipa dilgipa ong-a. Indiomangba ka-tongrango meligrigjanirang dongkuenga. Saksa iani gimin indake agana: "Ge-eta Mingchikkungko manina nangkuenga ine anga bebera-a, uarangko manion kusi ong-aniona dilgen ine ma-sia. Anga niamko manina jotton ka-aha, indiba anga man-chongmotja. Darangba niamko manina man-jawa ine bebera-na anga a-bachengaha."

Manden ong-rongbewal skanide Isolni ge-etanirangko manie janggi tanganian ong-achim. Indiba indake jotton ka-nioni changni chang papigipa ka-tongoni re-bagipa duk ong-e aganchakania, "Anga manina amja!" ine ong-a. Maina?

A-selde:

**"Maina be-enni chanchianiara Isolna bobil ong-ani ong-a; maina  
 ua Isolni niamna bamja, aro amaba amja" - Rom 8:7.**



Niam Mingchikkungni miksonganiara maia?

**"Maina niamchi paprangko u-iani ong-a" - Rom 3:20.**

An-chingara ka-donga grigipa ong-e Jokatgipako nangenggipa gimagimin papirang ine tale ma-sianiona dilanian niamni kam ong-a.

**"Indake an-ching bebera-achi toromi inako man-china Kristoona niam an-chingna rodilgipa ong-aha" Galati 3:24.**

Jisuan aganchakani ong-a! Jensalo an-ching kusi ong-e Jisuuni ja-o ong-on, bebera-achi an-ching an-chingni paprangna kema ka-aniko man-na aro Uni ge-etanirangko manina Uni bilko man-gen.

## 8. GE-ETA MINGCHIKKUNGKO KA-SAE MANIANI

Maniania ka-saani bite ine Jisu an-chingna agana.

**"Angna ka-saode, indide na-simang angni ge-etanirangko manibo" - Johan 14:15.**

An-ching Isolna ka-saode, an-ching skanggipa mingbrigipa ge-etanirangko manigen jean an-chingni Isol baksa nangrimaniko paraka; aro an-ching manderangna ka-saode an-ching bon-kamgipa mingdok ge-etanirangko manigen jean gipinrang baksa an-chingni nangrimaniko paraka.

Je mandean ge-eta Niam Mingchikkungko ga-belbela ua pap ka-a.



**"Papko ka-gipa sakantian niamkoba pe-a, aro niamko pe-an pap ong-a" - 1 Johan 3:4.**

Indiba Isolko mitelbo, an-chingo Jokatgipa gnang jean ia a-gilsakona re-baaha aro siaha, chakatpilaha aro da-o mingsa miksonganina tangna:  
**"Aro paprangko ra-angna ine uko parape-ataha ine na-simang u-ia" 1  
Johan 3:5.**

An-chingni Jokatgipa kema ka-a aro an-chingni paprangko wata (1 Johan 1:9). Unikode ua an-chingna Uni ka-saako an-chingna ka-sachakaha gita on-na ku-rachaka - an-tangna chanchie janggi tangani aro namatani sam.

**"Maina an-chingna on-gimin Gisik Rongtalgpachi Isolni ka-saako an-chingni ka-tongrango rudapaha" - Rom 5:5.**

Isolni niamko rakina an-ching an-tangtango bil gri. "Isolni ka-saako an-chingni ka-tongrango rudapa" nian an-chingni ka-dongani ong-a.

## 9. ISOLNI KA-SAANI ARO NIAMKO MANIANI

Jokania on-ani ong-a. An-ching uko man-na amja. An-ching uko bebera-achi mangmang ra-chakna man-a. An-ching toromi ine chanako boksis dake Isolni ka-saani giminsan bebera-achi man-a.

**"Maina ka-sao bebera-achi na-simangko jokataha, aro ua na-simangoni ong-ja, Isolni on-asa" - Ephesus 2:8.**

An-ching an-tangtangni kamrangchi - jotton ka-anichi an-ching ge-etanirangko rakina man-ja. Jokatako man-na gita an-ching ge-etanirangko manina man-ja. Indiba jensalo an-ching bebera-achi; aro on-kanga gnang Jisuona re-baon aro jokatako man-on Uni ka-saa an-chingni ka-tongrangko gapata. Ia Isolni ka-saani aro ra-chakani a-sel an-ching Uko ja-rikna aro an-chingni ka-tongo donggipa Uni ka-saani bilchi Uko manina ska (Rom 5:5).



Manden bilni namgni gri ong-aniko Paul dingchike agana aro jokaniko man-na niamni ning-o ong-ja indiba "ka-saani ning-o ong-a" ine agana.

**"Niamni ning-o ong-gija ka-saani ning-o ong-ani gimin an-ching pap ka-genma? Ong-jachina" - Rom 6:15.**

Maini a-sel? Maina ka-saachi didiatako man-gipa ka-tong ka-sae mangipa janggi tanganiko ong-ata! (Rom 13:10). Kristona ka-saania Uko maniani ong-a:

**"Angni ge-etanirangko manie uarnagko manigipa uan angna ka-sara" - Johan 14:21.**

Obostarangni namjabatgipa somoiomangba je mandean bil baksa nangrimaniko man-e, chu-ongnike, katta manie janggi tanganiko tangna man-a ine Eric Liddel mesokaha. Dukni aro kenani somoio namnikatgipa ka-saaniko Liddel mesokaha. Uni Kristona ka-saa gnang nangrimgrikanian Gisik Rongtalgpipak uko bilakataha aro "niamni ge-etako chu-sokatna" man-ataha (Rom 8:1-4). Chisolo datkapako man-gipa aro chakatpilgipa Jokatgipa baksa ka-sae nangrimgrikania namgipa janggi tanganiko ong-ata.

Na-a ia cholko an-tangna am-e man-ahama? Jisuni nang-na ka-saani Uko Uni janggiko nang-ni papna on-chakna dilaha. Uni ka-saani baksa nang-ni pilak nangrimgrikanirangko Ua bilakatna, "Uni namnikako dakchina ..... na-simangko pilak namaon chu-sokatchina" (Ibri 13;21) Ua bilko on-a. Nang-ni aganchakani maidake ong-gen?

## Salgini Neng-takani Cholko

Bang-gija bilsirangsan re-angaienga, jakkalna chang-pilgija agitchaa somoiko an-ching man-gen ine mitam manderang aganoengachim. Ka-dongbee aganoanina namgipa a-selrang gnangchim. A-gilsak songjinmarango computerrang jasani kamko secondsa nanggijaan matchotatengachim. Aro dal-dalgipa karkanarango dal-dalgipa kamrangko robotrangchi kam ka-atengachim.

Computerrang kam bang-ako mikjapsano matchotomangba an-ching skangona batemangba rang-spenan man-kuja. Pilakna bateba nokdangni manderangba somoikon chu-onngatjaenga. Segiparang aro jikgiparang an-tangtangni bi-sarang baksas somoi re-athan man-jaenga, an-tangtang baksade kombatsranga.

Chongipa gittimoniko am-rikkite nianio nikani gitade pagipani bi-sarang baksas somoi re-ataniko sandie nion salprako second 37 sanchim! Nokdangrango somoi dongja, gronggrikna man-ja.

Maidake an-ching chu-onga gita sket bakket dakgija gronggrikna man-gen?

### 1. GISIK DING-E JANGGI TANGANIKO NAMATANI

Nokdangrangni neng-nikani, jajrenganirangko Jisu ma-sia. Aro gisikni bidingo neng-takania namgipa janggi tangani bak ong-a ine an-chingni ma-sianiko Ua nangnika:

**"Pilak gamgipa aro bal jrimgiparang angona re-babo, anga na-simangko neng-takatgen. Angni pakrieko an-tangtangni gitoko gatbo aro ango skibo; maina anga sontol aro gisiko ongipa; unon na-simang an-tangtangni janggina neng-takaniko man-gen" - Mati 11:28, 29.**

Sastroo ku-patiani gitade an-ching indakgipa neng-takaniko rokomgni cholrangchi man-gen: Salantio aro anti antio Kristoona re-baanichi.

### 2. SALANTI JISU BAKSA NANGRIMANI

Mande jinma Jisuni gisik on-aniko man-na chrikrongachim. Indiba Kristoa tom-tome Uni sepango donggiparangnasa skirongachim. Maidake? Ua salantian Uni salgini Pagipa baksas agangrikrongachim. Janggi tangani ra-bianirangko mikkangchakna An-tangni Pagipao pangnan nanganirangna pangchakrongachim (Johan 6:57).

Uni sikkidkdgipa, ka-dongan gappipa janggi tangani gita an-ching janggi tangna gitade pangnan Jisuo pangchakna nanggen - Uni katta aro Gisikchi an-chingo gapatna an-chingko bimang ong-atna nanggen. An-chingni janggi tangao an-chingko bon-atna tikkelenggipa bilrang; an-chingni nokdangrangko gugraatna jotton ka-ani bilko wearachakna nambatgipa chol ramade Kristo baksas bang-e somoi re-atanian ong-a. Ua an-chingna agana:

**"Angon dongkambo, aro anga na-simangon dongkamgen ..... Angan agre na-simang mamungkoba dakna amja" - Johan 15:4, 5.**

An-chingni chasongni dal-batgipa nanganirangko salanti Jisu baksas nangrimaniko dake man-anian ong-achim. An-chingni Kristo baksas nangrimrikanio mingsa nangchongmotgipade chisolo Uni matchotgimin kam ong-a. Uni siangengmitingo "Matchotjok" (Johan 19:30) ine chrikania Jisu dal-begipa



chu·sokaniko miksongachim. Ia dal·begipa chu·sokani gimin mangmangsan chong·motgipa neng·takani aro naljokaniko man·na ama. "Matchotjok" ingipa kattani ortoa Uni an·chingko piokani kamko matchotaha ine ong·achim.

**"Ua changsanon an·tangko boli on·achi paprangko gimaatna mikkang pa·aha" - I bri 9:26.**

Jensalo Jisu sion, Ua "paprangko gimaataha." Uni giminsa je bebera·gipaan an·tang paprangko ku·rachakaha ua Kristoni matchotgimin kamo "neng·takna" man·gen. An·ching ra·chakako man·aha.

Da·alo an·chingni janggi tangani ja·kuantion dos donge nikani gnang. Indiba Jisu dos donge nikani neng·nikaniko changsanon pilakna chisolo namataha. Jisuni matchotjok ine chrikianian Uni "Anga na·simangko neng·takatgen" ine ku·rachakaniko kakket ong·a ine mohor su·aha. Skobikrok a·brio an·chingko piokani kamko Kristo matchotaha (Titus 2:14), unikode Sabbath salo Ua gopramo neng·takaha aro Robibar pringo pap aro siani kosako chegipa ong·e gopramoni chakataha. Kristoni matchotgimin kamo neng·takana agre dal·bata ka·dongani Kristianrangna gri.

**"An·ching bebegipa ka·tongchi bebera·srangao sepangbana hai ..... an·ching ka·dongani ku·rachakaniko il·engatgija kimkim rim·na hai; maina ku·rachakgipa bebegipa ong·a" - I bri 10:22, 23.**

"Ku·rachakgipa bebegipa ong·a" ni gimin Jisuni ku·rachakgipa jokatani neng·takanio an·ching napna man·gen. Salanti Jisuo an·chingni chagrongenggipa kimkimani, tom·tomani aro neng·takania an·chingni maikoba dakani bite ong·ja indiba Uni chisolo kam ka·ahani bitesa.

An·ching Kristoo neng·takna man·a maina an·chingni jokanina ka·dongatako man·aha. Ua ka·dongatani an·chingko salanti Kristo baksa somoi ra·e Uni kattako cha·na aro Isolo bi·anio salgini balwako ringopna didiata. Jisu baksa gronganian gisik ding·an gapgipa janggi tanganiko tom·tomatgipa aro miksonganian gapgipa janggi tanganiko tom·tomgipa aro miksonganian gapgipa janggi tangani ong·atna dakchaka.

### 3. ANTI-ANTI JISU BAKSA NANGRIMANI



Kristo a·gilsakko saldoko ong·atani ja·mano (Kol. 1:16, 17) ua neng·takani salko on·aha. Iano Un baksa an·chingni antiprako nangrimgrianiko dakani namgipa chol ong·a.

**"Aro Isol an·tangni dakgiminko nitokaha, aro nibo, nambejok. Aro attam aro pring ong·ahaon saldok ong·aha. Indake salgi aro a·a, aro uarangni kotokko matchotaha. Aro salsnini salo Isol an·tangni dakgimin kamko chon·aha; aro ua salsnini salo Ua an·tangni pilak dakgimin kamoni neng·takaha. Aro ua salsnini salko patie rongtalataha; maina ua salo Isol an·tangni ong·ate dakgimin pilak kamrangoni neng·takaha" - A·ba. 1:31- 2:3.**

Uamangko ong·atgipa ong·e Jisu Adam aro Hobana skanggipa Sabbatho "neng·takaha" aro ua Sabbath salko "patiaha" aro "rongtalataha." Isol antisao salsni ong·gipako ong·aton An·tangni namgnina ong·atjaha, indiba Adam aro Hobana aro da·ororo an·chingni namgnina ong·ataha. Uni ong·atgipa mandena Ua inditan simsakani gimin snigipa sal antio uamangni janggi tanga gimiko Uni dongpaaniko am·anina on·kangchina miksongaha. Sabbath changantian Uni aganani gita be·enni neng·takaniko aro gisikko gital dakani sal ong·achim. An·chingni a·gilsakona papni napbaanichi Sabbathko nanganiko gamchatbatataha.

Apsan Jokatgipa jean Jean Adam aro Hobana "neng·takaniko ku·rachakaha, hajalgni bilsirangni ja·mano Sinai a·brio Mosena niamko on·aha (1 Kor. 10:1-4). Jisu Sabbathni gimin ge·etaniko Ge·eta Niam

Mingchikkungni jatchio donna gita Jisu seokaha. Brigipa ge-etani indake agana:  
**"Uko rongtala ine rakina neng-takani salko gisik ra-bo. Saldok na-a gambo, aro nang-ni pilak kamko ka-bo; indiba snigipa sal Jihova nang-ni Isolna neng-takani ong-a; uno na-a mamung kamkoba ka-nabe, na-a, aro nang-ni depante, aro nang-ni demechik, nang-ni nokol me-as-a aro nang-ni nokol me-chik, aro nang-ni jilanirang, aro nang-ni guareni do-garangni ning-oni mande a-gital; maina saldo Jihova salgi aro a-ako, sagalko aro uarnago donggipa pilakkon dakaha, aro snigipa salo Ua neng-takaha; uni gimin Jihova neng-takani salko patiaha, aro uko rongtalataha" - Re-ongkata 20:8-11.**

Iso neng-takani salko salgi aro a-gilsakko dakgipa Jihovako gisik ra-na dakaha. Neng-takani salara antiprakprako an-chingko Ong-atgipa baksal nangrimata jean ia salko patiaha aro rongtalataha.

Jisuni a-gilsako dongmitingo Ua chol mingantikon Pagipa baksal nangrimaniko dakna jakalah. Neng-takani salo Isolko olakie ua namgniko man-aha. Lukni agana gita:  
**"Aro ua an-tangko dal-atram Nazarethona re-baaha; aro an-tang dakbewal gita, neng-takan salo gilja noko nape poraina chadengaha" - Luk 4:16.**

Isol-mande pil-gipa Jisuan neng-takani salo Pagipani mikkango neng-takna nangode, an-ching mande ong-e baditan nangbatgen. Neng-takani salo Isolko olakianio Jihudirang dingtang niamrangko donaniko Jisu satprake gale (Mati 12:1-12) neng-takani salko manderangna namgni ong-china Isol dakaha ine mesokaha.

**"Aro ua uamangna aganaha, Neng-takani sal mandena ong-aha, indiba mande neng-takani salna ong-jachim. Uni gimin Mandeni Depante neng-takani salniba nokgipa ong-a" - Mark 2:27, 28.**

Neng-takani salni nangchongmotaniko Jisu Uni sianioba mesoka. Ua Sukrobar salo sia, "ua sachisoani sal, aro neng-takani sal a-bachengbaengachim" (Luk 23:54). Ua somoion Ua "Matchotjok" ine agana, uni ortode Uni a-gilsakona re-bae mandeni jatni palo sichakani kam matchotaha (Johan 19:30; 4:34; 5:30). Unikode Uni matchotaniko manina gita Jisu gopramo Neng-takani salo neng-takaha.

Jedake Kristo ong-atani kamko dokgipa salo matchote snigipa salo neng-takaha uandake chisolo sianichi Ua Uni piokani kamko dokgipa salo matchotaha unikode snigipa  
salo neng-takaha.

Robibar pringo Jisu chea man-gipa Jokatgipa ong-e gopramoni ong-katbaaha (Luk 24:1-7). Uni chakatpilani ja-manomangba Ua Uni sninggiparangko Neng-takani salko manichina aganahachim. Jerusalemko nisiatani gimin aganon, jean Uni siani bilsi sotbrimangni ja-mano ong-aha. Ua Uni sninggiparangko indake ge-etaha:

**"Aro na-simangni katanga sin-kario, ba neng-takani salo maikai ong-jagen, uni gimin bi-bo" - Mati 24:20.**



An-chingni Jokatgipa Uni sninggiparangko aro uamangni janggi ambagiparangko Uni uamangna skigiminrangko ja-rikaniko nangnika (Johan 15:15, 16). Ua uamangni jokatanini neng-takani aro Sabbathni neng-takaniko chagonganiko nangnika. Uamang Uko duk ong-atjaha. Kristoni siani ja-manomangba sninggiparang Neng-takani salko manikuengachim (Luk 23:54-56; Watata 13:14; 14:16; 13; 17:2; 18:1-4).

Ka-saako man-gipa Watata Johan Neng-takani salo Kristo baksal nangrimaniko daka. Adita bilsirangni ja-mano ua indake sea: "Anga Gitelni salo Gisiko ong-engachim" (Para. 1:10). Jisuni aganani gitade, "Gitelni salara Neng-takani salan ong-achim." "Manden Depante Neng-takani salni nokgipa ong-a" (Mati 12:8).

Neng-takani salo an-cing Isolni minggni dal-batgipa an-chingni palo chu-sokanirangko mania, uarangara: an-chingko ong-atani aro jokatani. Neng-takani salko maniania salgio dongangkugen:

**"Maina angni dakgnigipa gital salgirang aro gital a-gilsak maikai angni mikkango dongkamgen ..... neng-takani salsaoni neng-takani salgipinona pilak be-en angni mikkangona olakina re-bagen ine Jihova agana" - Isaia 66:22, 23.**

#### 4. NENG-TAKANI SALNI NAMGNIRANG

Da-ororoni manderang uamangni janggi tanganio gisik ding-anichi saksa sakcipino ja-gitotenga. Manderang bon-angenga. Nokdangrang be-grua. Indiba Isol Neng-takani salko name janggi tangani chol rama dake on-aha.

Neng-takani salo neng-takanini mitam dingtangmanchagipa namgnirangko niate nina:

(1) Neng-takani salara ong-ataniko gisik ra-ani ong-a aro uko rongtale rakianichi an-chingni ong-atcipana gisik ra-aniko songdoani ong-a. Ia salni rongtalgpipa somoirangara Isolni ong-atgiminoniko an-chingni ja-dilrangko sandiani aiao inmangipa chol ong-a. na-aba nang-ni nokdang bolgrim rama ba rong-brakni chirinngi nitowaniko jripjranggipa biapo bon-kame somoi re-atania basakochim? Jisu baksa somoi re-atna aro Uni an-chingna dakgimin aiao inmangiparangko niatna Neng-takani sal an-chingna chol aro somoiko on-a.

(2) Neng-takani salo Isolko olakie aro gipin Kristianrang baksaa nangrimgrike an-ching katchaaniko man-a. Gipin olakirimskarang baksaa Isolko de-mitelanio namgniko man-a. Neng-takani sal an-chingna mondoli ong-e tom-dake an-chingni gisikni batteryrangko charge ka-na ba bilakatna dingtangmancha somoiko on-a.

(3) Neng-takani sal chanchibewale ka-saani kamrangko ka-na cholrangko on-a. Antini gisepo nang-ni grongena somoi dongjamitingo nang-ni noksul saenggenchimma? Jensalo ripeng saksa segipa sie ka-dimeataniko nangmitingo salantini kamrangchi uko gronge ka-dimeani kattarangko aganena jakchakjachimma? Jisu indake ku-patia: "Neng-takani salo namgniko dakkala" (Mati 12:12).



(4) Neng-takani salara nokdangni nangrimgrianiko bilakdapatani sal og-a. Neng-takanin salo mamung kamkoba ka-nabe" (Re-ongkata 20:10) ine Kristo ge-eton kam ka-na gong-begipa pagiparang aro jakchakgija gisik ding-atako man-gipa ma-giparangna iana bate nambata ku-patianiko on-na man-jawachim. Neng-takani salara dal-begipa DONTONGBO ine nokdangrangna see donani ong-achim. Nangchongmotbatgipa kamrangchi nangchongmotgipa dakgnirangko champenganiko dontongatani ong-a. Neng-takani salara, sinjetaniko bi-ani baksaa, kam ka-aniko ka-dingani baksaa, jakchakgijaniko jripjrang biapo chanchie somoi re-atani baksaa sregrikani sal ong-a. Neng-takani salo neng-takania nokdangni mande gimiknan Kristo baksaa nangrimaniko dakna somoi on-a aro Uni gisikni bilko man-ani somoi ong-a.

(5) Neng-takani salara dingtangmancha Jisuni sambao re-baani somoi ong-a. Pilak nangrimanirangan somoi bang-e nanga uandake an-chingni Jisu baksaa nangrimaniba apsan ong-a. Antiprako salsa gimikko Kristona on-kangania an-chingni Un baksaa ripeng ong-aniko gital dake aro gisik nange rakiani dal-gipa chol ong-a. Neng-takani sal an-chingna Sastro poraina aro Isolo bi-na bang-bate somoiko on-a, jripjranggipa biapo Isol baksaa saksan ong-na aro knatimna somoi bang-bate on-a.

Uni donganina ku-rachake Jisu "neng-takani salko patiaha aro rongtalataha (A-ba. 2:3). Sonibar sal, antini snigipa salko neng-takani sal dake manina maina nangchongmota na-a ma-sigen maina ia salko Kristo a-gilsakko ong-atmitingo dingtangmancha an-ching baksaa agangrina dingtang dake donaha.

Kristo Neng-takani salko ong-aton dingtangmancha an-chingni chasongko gisiko chanchie dakah a gita nika. Ia gita tiktakan an-chingni gisik ding-an gappipa chasongo an-ching nanga:- uan pilakni ma-eksranggipa sal Isolko olakiani sal, ong-atgimin baksa nangrimtaiani sal, aro bosturangni pal nangrimanio ning-tuao chanchiani sal ong-a.

## 5. SALGINI NENG-TAKANIKO CHA-TOTANI

Jisu baksa salanti aro anti-anti gronggrike nangrimaniko dakani namgniko an-ching dondrimna man-a - uan neng-takani. "Neng-takani sal" ba "Sabbath" ara Ibri kattaoni ong-baa, uani ortoara neng-takani, uni gimin Sastroo snigipa salko "Neng-takani sal" inon aiao inmanani ong-ja (Levi 23:3).

**"Maina sal snini gimin ua banoba indake aganaha, Aro Isol ua sal snini salo an-tang pilak kamrangoni neng-takaha .... Isolni manderangna neng-takani sal dongenga ..... Uni gimin ua neng-akanio napna an-ching gisik nangna" - Ibri 4:4-11.**

Salgini chu-soksranggipa neng-takaniko an-chingni Neng-takani salo neng-takaniko chagrongania katchaaniko chagronggnini antio changprak cha-totaniko on-a. Ia neng-takania kam ka-gipa mangmang dongani ong-ja, ia naljokaniko, tom-tomani aro an-seng baljoke donganiko miksonga, jean chong-motgipa chu-soke janggi tangani pangchakanio donga. Indakgipa gisikni neng-takaniko chagronganichisa mangmang gamchatako ma-sina man-a. Jokatan neng-takaniko aro Neng-takani salni neng-takaniko chagronggiparangni saki on-nania pilakchi ong-a. Salanti aro anti antio Un baksa nangrimanichi na-a Jisuni neng-takanio nape, na-a janggi tangao dal-batgipa katchaaniko am-e man-gen.



Uni neng-takaniko on-anina na-a Jisuko mitelna sikgenchimma? Salanti janggi tangao ra-bianirangko warachakna gita jokatanini neng-takaniko ku-rachakanina aro antiprako Un baksa nang-ni nangrimaniko mangrakatna neng-takani salni neng-takaniko ku-rachakanina na-a Uko sikjawama? Na-a indake pangnaba dakkua ong-ode, Uni on-enggipa jokaniko ra-chakna sikgenchimma? Antiprakprakon Uni Neng-takani salko na-a rkina sak ine Una agnna sikgenma? "Oe Gitel! Nang-ni dongimin salo katchaaniko man-na anga ska" ine na-a aganna sikgenma? Indakgipa on-kanganiko maina da-o dakja?

[Na-a iarangko u-inia sikhnaba gnang: Sawa Neng-takani salko Sonibar, antini snigipa saloni, Robibar, antini skanggipa salona dingtangataha? Dingtangataniko basako ong-ataha? Dingtangatna Isolan bilko on-ama? Ia sing-anirangko Dilani 21 o aganchakgen.]

## Sualgrikanichi Dal·roroanina (Donnugimin Gun) Cholko Am-e Nibo

Japanni chaako ringe aro mioniko tarigimin cha-anirangko cha-joljole Larry Komorini noko gipin ripengrangmung an-senge agangrike roengmitingon uni gipin ripengrang Bible koldingdange uamangna Sastroni gimin skie on-china aganaha. Larry chaa ringa gipikna am-pile maikon agangen jajaaha maina uade kusi ong-e rotokengasa ine chanchiachim.

Larry bang-a changon Japano Christian English Schoolo Bible Classrangko ra-rongachim. Indiba uarangkoara tarisamsoesa ra-achim. Sastroni gimin agane on-ainade altuaen man-a indiba Isolni gimin skiprakjololaniara namen dingtanga.

Sastroni golporangko Larry bi-samitingon knatokmanaha. Indiba uni bini janggi tanganide bang-e dingtanganiko ra-bajachim. Isolni nikario namja ine u-iakomangba uara dakaengachim. Maidake Isolni gimin an-tangan name u-ijaoara gipinrangna agane on-gnok?

Da-o gipinrangni biko nitate uni agananina senge dogtokengon uade gisikan bingbranggangpilengjok. Indake kenjagokani somoio ua Gisik Rongtalipaan manderangni mikkango saki on-na gita kattarangko on-gen ingipa podko gisik ra-ataha (Luk 12:12). Ua gisiko nangbee Isolo bi-aha aro altuabate uni gisik ra-na nanggipa golpoko - Branggipa Depanteni gimin aganna a-bachengaha.

Maidake Isol An-tangni katbranggipa mandena ka-saachim uko talatengon ua an-tangni ka-tongoni ia kattarangko aganenga ine nikaha. Uni agana kattaranga gipinrangnaba chinapangengachim. Uni janggi tanganio skanggipa changna Larry baditana Isol una ka-saachim uko ma-siaha.

Un walo Larry an-tangni turamona re-angon, Isolna an-tangni janggiko on-kange ja-sku dipane bi-aha. Isolni kattako sualanichi ua uni janggi tanganio ramram golpo ine ra-aigija una aiao inmangipa katta ong-baaha.



### 1. SUALANICHI DAL-ROROCHINA GITA JISU AN-CHINGKO RA-BIA

Bilsi gittam adhana sninggiparang Jisuni kam aro kattarangko aro bon-kamao Uni siani aro chakatpilanikoba ra-chakaha. Jensalo ua salgichi gadoangpilengon sninggiparangko Una saki on-gipa ong-china indake aganangaha:

**"Gisik Rongtalipani na-simangona re-baon na-simang bilko man-gen ..... aro a-kitikona kingking na-simang angni saki ong-gen" - Watata 1:8.**

Jensalo Kristoni sninggiparang mamung salrika gri an-tangtangni ka-tongko Una Pentecosto on-kangahaon, chakatpilgipa Kristo Gisikni bilchi uamangni janggirangko dingtangataha. Kristoni be-enni chakatpilani aro salgichi gadoangpilani giminsan ong-aigija uamangni janggirangko dingtangatna amgipa Uni chakatpilani bilni giminba saki on-giparang ong-aha.

An-chingba Kristianrang ong-e Jisuni chakatpilanina saki on-giparang ong-a, maina an-chingni janggi tanganio Uni gital dakpiltaina man-ani bilko an-chingba chagrongaha.

**"Indiba ka-sachakao gam gnanggipa Isol, je ka-sara bang-beachi ua an-chingna ka-saaha, uani gimin, an-ching paprango sigimin ong-oba, ua an-chingko Kristo baksa tangchaataha - ka-saachin**

**na-simang jokatako man-aha, aro Kristo Jisuo an-chingko un baksa chakatataha ..... maikai re-baenga chasongrango uni ka-saani agre gamchatako Kristo Jisuo an-chingna rinok rinok dake mesokna man-gen" - Ephesus 2:4-7.**



An-ching Kristo baksa tangatako man-aha, uni gimin uni ka-saani agre gamchatako ..... mesokna man-gen." Aro manderangni janggi tanganio Uni dakna amani namgipa koborko a-gilsak gimikonan sokatchina gita Ua an-chingko agana, aro iako dakengon ua an-ching baksa dongpagen ine ku-rachaka (Mati 28:19-20).

Voice of Prophecy radiochi skiprakaniko a-bachengatgipa HMS Richards indine saki on-a: "Kristoni nama kattako knatimgiparangni ka-tong dingtang ong-aniko anga nikaha. Uni mondolini nama katako ra-angkuja dipet Isolni aro Kristoni gimin knakugijagipa a-songrangchi anga songreangaha. Ia manderangni mitchigipa obostaoni rongtale

janggi tanganiko, sabisirangoni an-senganiona aro namgijagipa gisikrangna kenanioni kusi ong-gipa ong-e Kristian janggi tanganiko anga nikaha. Anga u-ia, "Kristoni nama katta ..... janggi jokaniona Isolni bil ong-a" (Rom 1:16). Anga u-ia, jensalo mondoli ia nama kattako skiprakon bang-a manderangni ka-tongrangko aro nokdangrango dingtangani sokbaa aro okamaniko knachakgipa manderangni janggi tanganio iarangko nikna man-a."

Isol an-ching gita bilgrigipa mandeni jatna ia dingtangmanchangipa kamko ka-china on-aha, maina an-chingni dal-roroanina sualgrikania nangchongmotgipa ong-a. An-chingni bebera-aniko mangrake rakina gita iako dakna nanga. Larry an-tangni obostao iako u-ie ra-aha gita, an-chingni bebera-aniko sualaniara an-chingko bebera-ao mangrakata aro dal·ronona dakchaka.

## 2. AN-CHINGNI JANGGI TANGANI BEWALCHIN KRISTOKO SUALPAANI ONG-A

Saksa pante jean nokdango dekdo on-aniko man-e dal·baachim indake agana: "Anga angni ma-a paani dakmesokaniko niaton uamang angna Isolni gimin ong-gija ma-sianikosa on-a. Bigil gnanggiparangoni angna ka-sae dakmesokaniko anga nangpajaha." An-chingni wilwilao donggiparang Isolni gimin nama dakmesokaniko on-gipa manderangko namen nangenga. Uamang saoba "bigil gnanggiparangoni" Isolni nama gunrangko dakmesokgiparangko nanga. Bang-bata changon an-chingni bilakbatgipa skiprakanide an-chingni janggi tangani bewalan ong-a. Manderang na-a badita u-iani gnang una simsakna skang na-a manderangna badita simsaka uko u-ichengna nanga. Pitor indine agana:

**"Gipin jatrangni gisepo an-tangtangni dakanriangko nama ong-atbo; ..... na-simangni nama kamrangko nikani gimin sandiani salo Isolko rasong chaatgen. ..... maina Kristoba .....na-simang uni ja-kolko ja-rikchina na-simangna dake mesokangaha" - 1 Pitor 2:12, 21.**

Skobikroko Kristo an-chingna duk chakahani gimin, an-chingni sepangon on-kanggipa ka-saai dakmesokaniko an-ching nika. Ia ka-saaniko an-chingni janggi tanganio mesokna man-ode bebera-kugijagiparangko Kristoni jakona dilbana bilakbegipa ostro ong-gen.



## 3. AN-CHINGNI CHANCHIANI GITAN AN-CHING KRISTOKO SUALA

Jensalo Diabol Jisuko bakrao cha-anichi, gaora de-anichi aro chanchichipsoanirangchi dakmajoe chadrapahaon Jisu Sastroo sea gnang kattarangchi warachaksoaha (Mati 4:4, 7, 10). Sastroni kattarang uni chanchianio gapani Kristo tarisogimin ong-aha.

An-chingni gisikon dakgrikaniko chea ba gimaata.

**"Maina gisiktango uni chanchia gian ua ong-a" - Toe Skiani 23:7.**

Dal-roroenggipa Kristianrang salgichina miksonga. Uamang nama kbewalrangko man-na gita chanchijringa.

**"Gitelo pangnan katchabo ....indiba mitelan baks bi-achi aro mol-molachi Isolna pilakni gimin na-simangni man-na nanganirangko u-iatbo. Unon pilak u-iama batgipa Isoln tom-toma Kristo Jisuo na-simangni ka-tongrang aro chanchianirangko rakigen. Ja-manni katta ian, jongadarang, jerang bebe ong-a, jerang mikchikima, jerang kakket, jerang rongtala, jerang namnikani, jerang nama inani, maiba namani ong-ode, maiba mitelani ong-ode, iarangko chanchibo ..... Unon tom-tomani Isol na-simang baks ong-gen" - Philippi 4:4-9.**

An-chingni gisikona maiko ra-baa uan an-chingko dingtangata. Jabolko ra-baode, jabolan ong-katgen. Isolni kattako ra-baode, Isolni gita janggi tangani ong-katgen.

#### **4. AN-CHINGKO JEDAKE NIKA UANDAKEN KRISTOKO MESOKA**

Kristona chadenggiparang ong-e Kristianrang uamangko nikani ba nianinaba krakra dake pilak dugaanirangko gelgen.

**"Saoba katako manijaode, ..... rongtalgipa dakanirangko nike, katta gri uamangni dakanirangchi rimbaako man-gen. Uamangni tariani, a-palni tariani, kni sakani aro sonanirangko ganani, aro ba-rarangko ganani ong-jachina. Indiba ka-tongni donnua mande, Isolni mikkango gamchatbegipa sontol aro tom-tomgipa gisikni sogijani tarianio on-china. Maina uandake skango Isolo ka-donggipa rongtalgipa me-chikrangba .....an-tangtangko tariaha" - 1 Pitor 3:1-5.**

Tarianio aro gana chinanio krae dakaniera Kristo gita ong-aniko mesokani ong-a. Chong-motan, gipinrang Kristianrangni rokomari gana chinanichi ong-gija an-chingni janggi tanganiko niesa Jisuona salbaako man-gen.



#### **5. AN-CHINGNI DAKA KAMRANGCHI KRISTOKO SUALANI**

Itihasko segipa Edward Gibbon an-chingna indake sea, jensalo Persiarangni a-tipko Galerius chadrape ra-seke ra-engon, saksa sipai, gamchatgipa muktani ro-ongrangan gappipa ching-chetgipa bigilni monako man-aha.Ua uni ning-o donggipa gamchatgipa ro-ongrangkode pakrurue galatenba ua nitobegipa monakosa simsakbee rakiahine agana.

Je manderangna a-gilsakni on-gipa a-palni katchaanirangkosa dal-nika, uamangde gamchatbegipa damni mukta - Jisuko jegalanichi ia ra-seke ra-gipa sipainamangba namjabata. An-chingni jakoni gamchatbegipa gamsan jokangaigen ong-ja, indiba jringjrotna jokatanian. Uni gimin Sastro agana:

**"Na-simang a-gilsakna aro a-gilsaknirangnaba ka-sanade. Saoba a-gilsakna ka-saode, Pagipana ka-sara uko gri; maina a-gilsakoni pilakan, be-enni ska, aro mikronni ska aro janggi tanganina gangbinga, pagipaoni ong-ja, indiba a-gilsakonin - Aro a-gilsak aro uni ska re-angenga; indiba Isolni namnikako dakgipa jringjrotna dongkama" - 1 Johan 2:15-17.**



Nisiatgnigipa paprangko aro namjabatgipa dakbewalrangko sonachi rupripdapna gita Satan rakbee kam ka-enga. Pekatgipa ringanirangko palna u-iparakatanirango nitogipa bimchipgipa aro namen kusi ong-gipa chadambe manderangkosa mesokatenga. Mamung dakeba chu ringe gitilgropna

am-enggipa mandeni chu dokanoni chuko bree ong-katbaenggipa noksarangchi mesokparakaniko nikjawa.

Ripeng dakanirango Kristian ong-ani gunrangko watgaljana gita an-ching simsakna nanga (2 Kor. 6:14). Beben Kristo an-chingko Kristian ong-kugijagipa ripengrangonaba re-anganiko nangnika. Ripeng dakanichisan an-chingni bebera-aniko sualna man-a. Indiba nang-ni ripengrangchi nang-ni gitcham bewalona salangako man-na on-nabe.

An-chingni janggi tanganioba an-ching maiko ra-gata, jekai kusi ong-e rona nianirangmangko, an-chingni gisikni gita, janggi tanganiko dingtangata. An-chingni gisikna an-ching maiko alduenga una simsakna nanga.

### **"Angni mikkango anga mamung ong-sigipako donjawa" - Git 101:3.**

An-chingni janggina an-ching nambatakosa alduode, namjabatgiparang an-chingko ona gadangona salonangna amjawa. Chugipa gadangrangkosa an-chingni nokdangona aro gisikrangona ra-baode, an-chingni janggi tanganiko salonjawa. Kristian ong-e kusi ong-atani pilakna bateba gnang.

### **"Nang-ni mikkango ka-srokani gapa gnang; nang-ni jakrao jringjrotna an-senganirang donga" - Git 16:11.**

## **6. AN-CHINGNI ON-ANI BEWALCHIBA KRISTOKO SUALA**



Pator H.M.S. Richards sagi, bebera-gital saksako napbolatna dakengon, uni jepo tangka katom gnang re-baako nike, "nang-ni tangkarangko donbana gualakon" ine uo sing-aha. "Angaba aro angni tangkaba napbolgen" ine ua aganchakaha. Ia mande chong-motgipa Kristian ong-ani gisikko man-aha jechin ua gipinrangko dakchakskana skachim. Kristianrang on-anichi dal-roroa, aro uni giminisa Jisuba agana: "Man-ana bate on-aan kusi ong-batani ong-a" (Watata 20:35).

Isolni songnokko bariatna an-chingni on-aniara jringjrotnan gamchate baia.

**"Na-simang a-gilsako an-tangtangna gam chimongnabe, jeo jo-on aro maram gimaata, aro jeo cha-ugiparang cho-ponge cha-ua. Indiba salgio an-tangtangna gam chimongbo .... Maina jeo nang-ni gam, unon nang-ni ka-tongba ong-gen" - Mati 6:19-21.**

Na-a on-engon iako gisik ra-bo: "A-a Jihovanin ong-a, .....aro uano donggiparang" (Git 24:1, sona aro ruparangba (Hagai 2:8). An-ching an-tangtangba Isolnin ong-a, maina Ua an-chingko ong-atahaaro an-tangni an-chitangko on-en an-chingko damna breaha (1 Kor. 6:19-20). An-chingni pilak gnang Isolnin ong-a "maina uan gamko man-china nang-na bilko on-a" (Deut. 8:18).

Baditana kingking an-chingna sichakgipa aro chakatpilgipa Gitel Un baksa nama kattako gipinrangna sualpachina an-chingko okama?

**"Mande Isoloniko togie ra-genma? Indiba na-simang angoniko togie ra-aha. Indiba na-simang agana; chinga nang-oniko maikai togie ra-aha? "BAKCHIKKUNGNI BAKRANGO ARO ON-ANIRANGO. .... Na-simang bak chikkungni baksani gimikko bandalona ra-babo, maikai angni noko cha-ani donggen. Da-o iachi angko dake nibo ine kotokrangni Jihova agana, Anga na-simangna salgini kelkirangko oe, na-simangna patianiko chakjapile rudapgenma rudapjawa" - Malaki 3:8-10.**

Ian an-chingni "man-dapaoni" "bakchikkungni baks" (Deut. 14:22; A·ba. 28:22). Game cha·gipa ba badinggipanade koros ka-aniko changalman-e nang·ni man-dapgipa chakkri ka·gipanade nang·ni chu·gimik dormahaoni. Bakchikkungni baksako on·aniara an·chingna Isolni niam ong·a maina ian an·chingni cholono nangea. Iako on·jaode Isolko togie ra·a ong·a. Bakchikkungni baks Isolni ong·a aro uko Kristoni kamko ka·nasan mangmang jakalna nanga (1 Kor. 9:14) aro a·gilsako Uni kamko matchotatna jedakode ua re·bapilna man·gen (Mati 24:14).

Jensalo Jisu an·ching baks dongna re·baon, Niam Gitalni somoio bakchikkungni baksako on·anikoba ua ra·chaka (Mati 23:23).

On-anirangkoara badita on·gen? On-anirangde sakprakprakni miksongan gitasan ong·a. Sakantian "ka-tongtangtango mangsonga gita on·china" (2 Kor. 9:5-7). Isolnade on·badena man·ja:

**"On-bo, unon na-simangna on·gen; uamang nama toanio sikjetjete, morekreke, suake, na-simangni ka-bako on·gen" - Luk 6:38.**

H.M.S. Richards changsao ia ong·a obostako agana:

"Janggi tanga gimik joa kal·gipa mande angni Los Angeleso tom·aniona re·bae tom·ram biapni ki·sangchi re·bae saksan ang baks agangrikako anga gualnan man·java. Ua an·tangni jeponi tangka dol·ako bikote \$ 500 angna on·e aganaha, "Ian angni skanggipa bak chingchikkungni baks." La mande an·sengaengachim, aro ua mamungkoba dakgija bili 30 ba 40 mangna joa kal·simsimaiachim, uni gimin anga sing·aha, "Na·a maikai janggi tanggen?"

Ua aganchakaha, "Ango dollar bonga ba dok mangsan dongaiah, indiba uade Isolnin ong·a."

Unon anga sing·taiaha, "Na·a maiko dakginok?"

"Anga u·ija, indiba angni bakchikkungni baksako anga Isolna on·na nanga aro Uan angna simsakgen" ine ua aganchakaha.

Aro Isol uandaken dakbebeaha. La mandeni gisik pil·aniara kakket ong·a. Ua an·tangni miksonganiko kakketen ra·aha aro uni Kristian janggi tanganio kusi ong·e janggi tangangaha. Aro uni janggi tanga dipet Isol una patiaha. Kakket ong·e bebera·gipa sakantiko Isol man·e cha·atgen ine ku·rachakja. Indiba an·chingko Ong·atgipa an·chingni janggina nanganirangko on·gen ine ka·dongatani gnang.

Kristo an·chingni gimikkon on·jok. Hai an·ching an·chingni ka·tong gimikkon Una da·on on·na. Hai an·chingni janggi tanganichi, nianichi, chanchianichi, kam ka·anichi aro on·anichi an·chingara gipinrangna Kristoko sualgiparang ong·na. Hai Kristoko gipinrangna sualanichi ka·srokaniko am·e nikna aro Uni aiao inmangipa ka·saanio dal·rorona.



## An-senge Janggi Tangani Cholko

Da-ororoni sandianiko dakgiparang jotton ka-anichi bebeko seaha jeko skangon Sastro mangrakataha je: Mandeara nangrimgrikjipa chu-gimik bimang ong-a, Jekon an-ching be-en, gisik aro janggini gimin chanchianirang ine mandeko bak dakachim, iarang pilakan bakatna man-gijagipa nangrimgrika ine nikaha. An-chingni janggi tanganini gimin chanchiani bewalrang be-enni bakrangoba nangchakea.

An-chinga gimikko man-gopesa mande chu-gimik ong-a.



Toatna gita, Scienzeni gita sandie am-giparang, kusian gape ka-dinganio mandeni be-eno saanirangko chel-chakna amani bil namen baribata ine nikaha. Bebeko aganode nang-ni kusi ong-e janggit anganichi sabisirangko chel-chaksona nang-ni be-en ambatgen. Ia sandie niani maikai gisikni chanchiani aro be-enni bakrang damsan kam ka-a uko mesoka.

Hajalni hajal bilsirangna skangan Isolni katta, gisik aro be-enni gisepo ia nangrimgrikaniko mesokahachim jekon a-gilsak da-o ruutkugija salosa ra-chakaha.

**"Ka-srokjipa ka-tong an-sengatani ong-a; indiba be-gimin gisik grengrangko ran-ata" - Toe Skiani 17:22.**

Watata Johanni agana gita baditana an-chingni gisik, be-en aro janggi sepange nangrimgrika?

**"Ka-sara, nang-ni janggini namroroa gitan, na-a pilakni gimin namrorochina aro an-sengchina anga bi-a" - 3 Johan 2.**

An-chingko Ong-atgipa an-chingni "an-sengnario katchachina" nangnika. Isolni katta an-chingni an-seng baljokanina aro jringsrotni janggina chumik gita ong-a.

Be-en, gisik aro janggini an-seng baljokani apsan apsan re-rimani gimin watata Paul ia mol-molaniko daka:

**"Uni gimin na-simang cha-oba, ringoba, jeko dakoba, pilakkon Isolni rasongna dakbo" - 1 Kor. 10:31.**

Nama kattao be-enni aro gisikni ia mingniko nampilatanikon man-gopa. An-seng baljoke janggi tangani kusi ong-gipa Kristian ong-na gita dakchaka.

Na-a an-sengbate aro chu-sokbate janggi tangna skode iano mingchet ja-rikna nanggipa niamrang gnang:

### 1. RONTALGIPA BALWA

Rontalgipa, gitalgipa balwako an-seng baljokanina nanga. Salo aro walo tusimitingo an-chingni noko aro kam ka-ram biapo balwa napbaanirang dongode an-chingni an-chirang be-en gimikonan oxygen balwako sokatanggen. Pringo re-ramarango ning-tue rang-sitode an-chingni be-erangona oxygenko bang-e sokatna ama.

Maidaka balwako an-ching rang-sita iaba namen gamchata. Maiba u-igija biaponi wal-kurang, bibarang ba bacteria donggipa balwarangna namen simsakbena nanga. Wal-kurang balwako da-ororo namen nosto ka-a aro a-gilsako dal-batgipa so-otgipa ong-engna. Scienzeni gita sandie nianio ta-maku aro ka-sopni induria (cancer) pari, emphysema, aro ka-tongni sabisirang re-chapa ine nikaha. Mandeni be-eno

cigarette donggipa nicotineni (bisi) a-sel ringna sikdraatani bewalko pe-na rakbatgipa ong-a. Da-oni kri kri bilsianti apsan bewalo manderang ringangkuode, 2020 bilsio sak 12,000,000 manderangko bilsiprakon siatgen.

## 2. SALNI TENG-SUA

"Salni teng-suaoniko namgniko man-an i bang-a:

(1) Salanti pringo ba attamo minute 15 oni 30 mangna salni teng-suaoniko namgniko man-an i bang-a: donggenchimode mandeni be-eno bigilna nangchong-motgipa vitamin D ko man-ata. Vitamin D ara grengko rikgipa tarigipa calcium aro phosphorusko ong-katatna gita an-china dakchaka.

(2) Salni teng-suaniera bacteriarangko so-otna ba chel-chakna gita kam ka-a.

(3) Salni teng-suaniera sam bolrangna chi aro carbondi-oxideoniko carbohydraterangko bikotatatna bilko on-a. Ia ong-jagenchimode manderang aro matburungrang okumu chake sigenchim.

(4) Salni teng-ania mandena walni kamrangko ka-anio meliatna dakchaka aro andalgipa salrangna gisikni dukrangko ritchengata.



"Mikrakatani kattade: Salni teng-suanio kengniba gnang. Ruutdugae sal chakode bigilrangko kama, bigilni parirangko (cancer) ong-katataniba chol gnang, budepa ong-ningata, mikronko nosto ka-e mikgurirangko ong-atnaba ama." - Look Up and Live: a Guide to Health oniko segatgimin.

## 3. NENG-TAKANI

Be-en, an-tangko taripilna gita neng-takaniko nanga. An-chingni kamna neng-sikimarangoni aro nokdangni kamko ka-arangoni olgrokatako man-na gita a-palchi re-ongkate bal an-seng ringna aro neng-takna somoiko nanga. Chu-onga gita neng-takaniko man-jaode manderang gisik dongtogijani, simbraani aro ka-o nangrakanirangko man-a. Landakgipa gisikni neng-gokanirang saanirangona dila, jean an-chingko be-enni ruuta somoina nangenggipa neng-takaniko ra-na draata.

Walo namgipa tusianina mamung gipin sreani dongja. Salantio an-chingni gisikni batterirangko bilakataianiba an-chingni be-ena nangchongmotgipa ong-a. Kristian mande sakantini salantio Isol baksa somoi ra-e bi-ani aro Sastro poraiani gisik aro janggiko an-sengatasan ong-aigija, be-ennaba an-senganiko on-gen. An-chingni salantini kamranganiba anti anti neng-takani salko, bilsiprako ba bilsnini samsaprako re-ongkate an-saoatani somoirangkoba nanga.



## 4. BE-ENNI RANTA KA-ANI

Be-enko ranta ka-ani (exercise) an-seng baljokanina nangchongmotgipa ong-a.  
 (1) Be-enko ranta ka-aniara an-chi su-pekanirangko srongata.

(2) Be-enko ranta ka-aniara be-enni pilak bakrangonan an-chiko sokate ja-a jakrangko ding-ata.

(3) Ben-enko ranta ka-anichi be-enni aro gisikni neng-skimanirangko chel-ate janggi tangniko nambate nikna dakchaka. Be-en ranta ka-anian jajrengani aro simbraanirangna nambatgipa an-sengatani ong-a

(4) Be-en ranta ka-aniara tapingna aro u-iani ja-dilrangna karrentni bilko on-a. Be-enna warachaksoani bilrangko on-e an-senganiko on-a. Jensalo be-enko ranta ka-anichi an-senge rakion gisikrangba nambate chanchina aro kam ka-na man-a.  
Nang-ni bigilrangko rinoke be-enko sronge rakina dakchaka.

(5) Be-enko ranta ka-ania nangkoba bil gnangbatate be-enni aro gisikni neng-gokgnioniko ruutbate rakina amata.

(6) Uan tapingo rokomsa bostuko ong-katake an-seng baljokbate nikatna dakchake saknaanirangko chaknaba ambatata."

Na-a be-enko ranta ka-aniko dakkuaengode, ka-sine aro onti onti bariroroe dakna a-bachengbo. A-bachengna skang nang-ni doctorni ku-patianiko ra-chengode nambatgen. Nang-ni nisanara, antiprako salbri ba salbongasa mile sako minute 15 prako re-na man-na gita hisape joton ka-bo.

## 5. CHI

An-chingni be-enni pilak bakrangnan chiko nangani gimin bang-e chiko ringna nanga.

(1) Jrimani gitade an-chingni be-eno chian ritchasaoni bak 70 mang ong-a.

(2) An-chingni be-en salgimiko chi litar gitammangko salgimikni kamna nanga. Ia kamranga, an-chiko jokruraatna, jabolrangko galna, cha-anirangko sualatna aro cha-aniko hojom ka-na nanga.

(3) Mande saksao billion 15 oni billion 40 tapingni cellrang gnang. Ua bakrango ritchapralo 0 oni 85de chian ong-a. Ia cellrangna chu-onga gita chiko on-genchimode nang-ni chanchianirangko mikrakatbate aro duk sinjetanirangko chel-chaksoe rakina amgen.

(4) Nang-ni chi ringasan nangchongmotaia ong-ja. Ka-sina ba bo-om bo-om dakachi sal sal auaniba nang-ni be-eno an-chi jokanirangko nambatate aro be-enko aro gisikko bilakatbatgen. Chi rudapani ba auanichi dongtogiagipa ja-dilrangko dongtoate saanirangko chel-chakatgipa bilrangko dakchake an-sengbate rakkigen. Auaniara be-eno rongtaljianirangko talata aro be-en ding-anirangkoba komiata."



## 6. KRAA CHA-ANI



Ong-atani somoio Isol Adam aro Hobana bite aro bitchri gnanggiparangko cha-china ona-ha (A-ba. 1:29). Adam aro Hobani pap ka-ani ja-mano me-su samjakrangkoba cha-achina on-dapaha (A-ba. 3:18). Chi dubiani ja-mano Ong-atgipaan "rongtaljipa" matburungni be-enko cha-china on-aha (A-ba. 7:2-3, 9:1-6).

Matburungrangni be-enrango tin-kagipa mitim aro an-chi jokaniko champengatgipa bosturang gnang, jean an-chi ditpeke saani, gitilkrope saani, ka-tongni sabisi, induria, mildugaani, be-en dite saani, aro gipin gipin sabisirangko ong-katata. Da-ororo bang-a sana bangiparangan be-en cha-giparangna mitim gri be-enrarako, name mine song-gimin be-enko aro na-tokrangko komibeesan cha-china ku-patia.

Me-su samjakrangkosan cha-aigiparangan an-sengbate aro rutbate janggi tangani gimin cha-a ringani bidingo u-igiparang skango Isolni on-chenggipa cha-ani biterang aro bitchilrangko, unbaksana me-su samjakrangko cha-aniona re-bapilchina didienga.

Na-a me-su samjakrangko cha-aniona re-bapilna miksongode skanggipa be-en gri cha-anio maikai kraa gita be-enna nanganirangko nang-ni cha-anio man-gen uko u-ie ra-chengna nanga. Salantian rokomanti biterang, bitchilrang, dalrang aro me-su samjakrangko man-na nanga. Tangsekkipa aro rimitgipa me-su samjakrang aro mesengchita gnanggipa biterangko namen nangchongmota. Chu-gimik bnekatgimin ginchipirang (ata aro uni rokomrang) aro bokdugae su-gija gitchaksria gnanggipa merongrangan nambata. Salantio nang-ni cha-gipa matburungrangoniko man-gipa mitim ba torangni pal (butter, cream aro cheeserang) me-su samjakoniko bikotgipa torangko jakalskabo).

Koako janapgipa cha-anirangan be-en griba matchu dutrangko jakalode chu-ongbea.

Jerangan be-enko uamangni cha-ani bak dake ra-gatna skode Sastroo rongtalgipa aro mandeni cha-na kragipa ine segiparangkosan cha-china. Jensalo Isol chidubiani ja-mano cha-china be-enko on-on (A-ba. 7:2-3; Levi. 11:47), Ua badia be-enrang 'rongtala' aro 'rongtalja' uko janapa.

Levirang odhai 11 aro Deuteronomy odhai 14 o do-drangrang, matburungrang aro na-tokrangoniko marang gnanggiparangko mesokaha. Ia odhairango gitade matburungrango ja-sikep pekgni dakna aro el-bue chobaigipa ong-na nanggen. Rongtalgipa na-tokrango gangchingrang aro bisingkaprang dongna nanggen. Jabolrang ba manggisirangko cha-gipa do-orangko gelna nanga.

Marang gnanggipa matburungrangni giseponeko wakko dingtangmancha janapa aro jegala (Deut. 14:8). Bang-a manderangni siani a-selko sandina be-enko nianio Trichinae ingipa jo-ongni a-sel ine nikaha. Ia chonbegipa jo-ongrangkoara mandeona wakni be-enko cha-oni re-bara. Da-ororo Scienenci gita sandie nianio maina mitam be-enrangko Isol rongtalja ine inachim, uarangni a-selko bang-bate nikrorobaenga. Mingsa a-selde sabisirangna kengnini a-sel, jekai wakni be-enoniko 'Trichina' jo-ongko man-a gita. Minggipin a-selara mandeni cha-aniko hojom ka-ani ramarango tin-kagipa mitimrangni a-selba ong-gen.

## 7. SAKNAATNASIGIPA BOSTURANGKO GELBO

Pekatgipa ringanirangni gimin Sastro mai mikrakataniko on-a?

**"Chu ka-dingstekgipa aro pekgipani ringani aganwatwatgipa, Aro uchi pekkatako man-gipa pilakan gisik gnanggipa ong-ja." - Toe Skiani 20:1.**

**"Ba cha-ugiparang, ba mikbokgiparang, ba pekgiparang, ba saigiparang, ba cha-bokgiparnag Isolni songnokko man-rikjawa." - 1 Kor. 6:10.**

Chuara be-enni bakrangoni iarangko ong-siata:

(1) Sabisiko champengsoani bakrang - Chuara an-chini grikgipa bakrang jean sabisiko dakrikchaksoachim uko bilgriata, uandake pneumonia, tuberculosis, hepatitis aro gipin parini sabisirangko altuae man-sona kengni gnang.

(2) Bi-sa ba-ani bakrang: - Salo glass sa ba glass gni chu ringaniba bi-sa ba-galani, bi-sa sie atchiani ba somoina skang atchianirangna kengni baribata.

(3) An-chi jokrurani bakrang: - chuko jakalanio ka-tongni sabisiko altuae man-ani cholko bariata, an-chio donggipa chianiko komiata, an-chini mitimrangko bariata, an-chi ditpekaniko bariata aro gisikko ding-doatani baria.



(4) Cha-aniko hojom ka-ani bakrang - Chuara okko dongtoatja, jean gastric an-chi jokaniko ong-katata. Chuko jakaljringani bewal dongahaon bikao mitim dakani, holdiasop saani aro bika sikrepanirangkoba ra-baani kengni gnang.

Chuan bang-a an-tangtangko so-ote sianirangko, gario sianirangko, bi-sarangko nosto ka-anirangko aro nokdango kajiarangko ra-bagipa ong-a.

## **8. ISOLNI BILO KA-DONGANI**

Je mandean dostangni ba kenanichi rim-kepako man-enga, uade iano janapgipa an-seng baljokanina ranta ka-aoniko chu-gimik namgniko man-jawa. Indiba Isolo bebera-e katchagiparangsa ia an-seng baljokaniko man-na amgen.

**"Jihova namchina inbo, O angni janggi, aro Uni pilak namgnirangko gualnabe; ua nang-ni pilak namgijarangko wata; ua nang-ni pilak saarangko namata; ua gimaataoniko nang-ni janggiko pioka." - Git. 103:2-4.**



David Larson, United Statesni National Institute of Mental Healthni ku-pattigipa, torom aro an-sengbaljokani nangrimgrikaniko sandie poraianiko dakaha. Uni sandianio Kristian on-kanganai aro an-seng baljokani baksa namen nangrimgrikaniko gnang ine mesoka. Ua iako nikna gita aiaoi inmanaha: jerangan giljachi re-ronga, uamang re-ronggijarangna bate ruutbate janggi tanga. Giljachi re-ronggiparang ka-tong sae nom-anirang, an-chi ja-dilrangni rakanganirang, an-chi ditpeke saanirang aro gipin sabisirangba kombata. Je manderangan Isolo bebera-a, uamang nambate janggi tanga maina uamang duk ong-anirangko man-breja.

Chu pekgiparang ong-ja, dosna jelo chipatako man-ja ba bia ka-e donganio kusi ong-gijaona salangako man-rongbreja. Isolni bilo pangchakania mandeni an-senge aro kusi ong-e janggi tanganina chabi gita ong-a.

Bilsa kolatchini gisepo California a-songomangmang sak 50,000 Seventh-day Adventist strangni gisepo porai-sandianiko dakaha. Iano indake nikaha je, ramram manderangna bate Adventist me-asarang bilsa 8.9 bate janggi tanga, aro me-chikranga bilsa 7.5 bate janggi tanga. Uandake Hollando, Norwayo aro Pollando donggipa Adventist strangni giminba apsan apsan nikaniko man-aha. Iako porai-sandie nigiparang Adventist strangni bakrobate janggi tangniko iano janapgipa mingchet a-selrangni gimin ong-na nanga ine agana. Ia niamrangko jakkalgipa manderang ruutbate janggi tangasan ong-aija indiba nambata janggi tanganikoba man-a.

Sastroni gita niate an-chingni janggi tanganirangko dingtang dingtang dakbewalrangchi ja-rikataode a-gilsakni toromrangni gisepo Kristian toroman kragipa aro ja-rikna nambatgipa ine nike ra-chakna altuagipa ong-a. Ian manderangko uamangni chanchianio aro uamangni kamo aro uamangni janggi tanganai bewalo dingtangata.

Uni gimin gisikmung be-enmung aro chanchianirangmung sepangbegipa nangrimgrikaniko dongani gimin Isolni Katta gita janggi tanggipa Kristianrang Jisu Kristoni gnigipa re-baanina tarisoengon, an-sengbaljoke janggi tangani bewalrangko rakina sikgen (1 Johan 3:1-3). Kristo Uni re-bapiko an-chingni tarie dongsoanikosan nangaia ong-ja, indiba da-o an-chingni janggi tangani obostakoba nambatatna skani ong-a. Isolni on-a an-sengbaljokani niamrangko ja-rike, hai an-chingba Un baksa ku-mongrimna.

Uni "an-chingo kam ka-gipa bilchi" pilak ong-siatgipa bewalrangoniko an-chingko naljokatna Jisu ku-rachaka (Ephesus 3:20). Na-a an-tang be-enko nosto ka-enggipa bewalrangko, chong-motan sada ringani ba chu ringani bewalrangko galna joton ka-engon chu-sokgijanirango bon-chongdikronga. Indiba

nang-o kam ka-enggipa Isolni bilko ra-genchimode Ua Isol nang-na chena gita bilko on-gen. Isolni katta indake ku-rachaka: "angko bilakatgipao anga pilakkon dakna ama." (Philippi 4:13).

## Kristian Janggi Tanganiona Napaniko Am-e Nibo

Africa Bible Skulni mande saksani nambee segimin chittiko iano nikgen.

Bilsibongana skang, patoko dongenggipa saksa Bible Skulni chatro grongechina mol-molani chittiko anga Voice of Prophecyoniko man-soaha. Patokko nirokkiparangna ia mol-molaniko aganon uamang angko knachakaha. Ia chittio Sastroko ma-sie ra-na gisik nangani gimin anga uko grongejringaha.

Uko grongechengaoni jadokni ja-mano, napbole mondolio bakrimpana gita ua ango bi-aha. patok ning-on napbolataniko dakna gita patok nokgiparang biaprangko tarie on-aha. Angni napbolatanirangoni gispeo ia ka-tongo nangatbatgipa napbolataniko nina gita patoko donggiparang aro nirokkiparangba re-batokaha.

Ruutgijaan, ia chatro patokoni jokani somoi sokkujaomangba ua watako man-aha. maidake jokaha ine angni sing-on, uni janggi tanganio aiao inmanpile dingtanganiko nikaha, aro Jokatgipana aro toromna kakketgipa saki ong-ahani gimin, ua koedi ine chanako man-na aro patoko dongna krajaha ine u-inia man-aha.

Ia mande nokdang baksa nangrimattaiako man-e, da-ode dal-gipa mondoli ge-sani dilgipa ong-skaaha.

### 1. NAPBOLANI ORTOARA MAIA?

Ia koedi Kristian ong-ahaon aro uni janggi tanganio chu-gimik dingtanganai ong-ahaon, unara maina napbolaniara nangchongmotgipa ong-a? Nikodimus, saksa songsarni dilgipa jean Jisuona walo re-bae, baksa agangrikonio, napbolna nangchongmotani aro uni ortoko Jisu u-iataha:

**"Kosakoni atchijaode, darangba Isolni songnokko nikna man-ja. Chionimung Gisikoni atchijaode saksaba Isolni songnoko napna amja" - Johan 3:3, 5.**



Jisuni aganani gitade, an-ching "chionimung aro Gisikonimung atchitaina nanga." "Gisikoni atchia" ra gisiko aro ka-tongo gital ong-e janggi tanganiko miksonga. Maina Isolni songnoko napnade gital ong-atako man-na nanga, gitcham cholon bewalko pa-daptaiani ong-ja, ukosa atchitaia ina. Chio sim-bolara ning-achi dingtanganiko a-palo parakani chin ong-a.



Bible Skulo ka-gipa mande, ia koedi Kristoko ra-chake Gisik Rongtalipani uko kam ka-e dingtanganiko ra-baaha ine ra-chakani chin gita uko napbolata.

### 2. ANGARA MAINA NAPBOLNA NANGA?

An-chingko jokataniara, Kristoni dal·begipa kam minggittamo pangchaka:

**"Sastroni gitade Kristo an-chingni paprangna sichakaha ..... ua gopako man·aha ..... Sastroni  
gita Ua gittamgipa salo chakatatako man·aha" - 1 Kor. 15:3, 4.**

Sichakachi, gopako man·achi aro chakatatako man·achi Kristo jokataniko ra·baaha.

**"An-ching badita Kristo Jisuna baptize ka·a man·aha, an-ching Uni siana baptize ka·a man·aha ine  
na·simang u·ijama? Uni gimin Uni siana baptize ka·achi an-ching Un baksa gopako man·aha,  
jedake Kristo Pagipani rasongchi sigiminrangoni chakatpilako man·aha, uandake an-chingba  
maikai janggini gital ong·ao re·ruragen" - Rom 3:3, 4.**

Kristo an-chingni paprangna sichakaha. Ua gopako man·aha, unikode an-chingna rongtalgi pita gital janggiko on-na gita gopramoni chakatpilaha. Napbolachi an-ching Jisuni sianio, gopa man·anio aro chakatpilario bak ra·paa. Napbolani ortoara Kristo baksa papna sipaani, pap gnanggipa gitcham janggiko Kristo baksa gopani aro Kristo baksa gital ong·e tangna chakatpilani ong·a. Kristoni siani aro chakatpilaniara an-chingni siani aro chakatpilani ong·a. An-chingko chisolo datkapaha gitan Isol an-chingko papna siatna man·a. An-chingko siaoni chakatpilaha gita Gisikrango gita tangatpilnaba man·a.



Napbolanian be·enni gita gisik pil·na ja·ku de·aniko mesoka. Skanggipa, chiona onata unikode chu·gimik sim·bola jekai sigimin mandeko a·kolona dingonate uko pindapa. Ian an-chingni Kristo baksa sie gitcham janggi tanganiko gope galna skaniko paraka. Napbolania sigiminko gope galani, janggi tangao papan gapgipa ong·aniko watatani kam ong·a. Unikode, an-ching napbolatgipachi chioniko salchroako man·a, jekai mande gopramoni chakatpila. Ian an-chingara "gital ong·atgimin," "gital janggi tangna" Isol chu·gimik on·aha ine u·iatani ong·a.

Sim·bolachisa mangmang napbolani - siani, gopani aro atchitaiani ortoko talatna man·a. Chiko satkikie napbolatachide atchitaiani chinko tik ong·e mesokja.

Kristo baksa sianiara maiko miksongchongmota?

**"An-ching maikai papni nokol ong·jawaha, papni be·enko gimaatna ine, an-chingni mande gitcham  
un baksa chisolo datkapako man·aha ine an-ching u·ia" - Rom 6:6.**

Napbolaniara mandeni gisiko mai ong·engachim, chong·motan Jisuna on·kanganiko manderangna mesokani ong·a. An-ching Isoloniko maikoba ra·rikode, "papni nokol" ong·e donggen. An-ching an·tangtangko chu·gimik Kristona on·kangon, an-chingni namgija skanirang bilgrigen aro unon gisik dingtangatako man·na a·bachenggen.

Dingtangatako man·nara sani kam ong·a?

**"Kristo baksa anga chisolo datkapako man·aha; ..... aro da·o be·eno angni janggi tanga  
bebera·ao, chong·motan angna ka·sae angni gimin an·tangko on·gipa Isolni Depanteko bebera·ao  
janggi tanga" - Galati 2:20.**

Jensalo anga napbolachi Kristoni chisolo sichakani baksa an·tangko chapaton, anga bilakgipa bilko an·tangona ra·bana on·a - "Kristo ango tangaha."

Nang·ni janggi tanganiko Kristoni jako chu·gimik pakwatna gitade skanggipa Kristoni chisolo sianiko niatchengbo. Nang·ko kenjagokatenggipa paprangko niatnabe; aro nang·ni gitcham kamrangko niate

ma-amnabe; indiba Jisuchiko niatbo. Kristoni ka-sabee aro ka-dongbee Skobikroko sianiko nikaton, Ua baksa nang-ni dongpaaniko indake mesokna man-gen: "Chisolni bilo anga angna gitcham bewalrangoni sijok aro Isolni okamanina re-baenga. Anga Kristo baksa damsan chadenga. Da-ontal dipet anga angna ka-sagipa aro an-tangko on-chakgipa Isolni Depanteo bebera-e tanggen."

An-ching Kristoni sichakani aro chakatpilani bilo pangchakon, an-chingni gitcham bewalrangni pal Uni nama gunrangko bate bate nikna man-gen.

**"Uni gimin saoba Kristoo dongode ua gital dakgimin ong-a; gitchamrang gimaaha; nibo, uarang gital ong-aha" - 2 Kor. 5:17.**

Napbolanichi an-ching Kristo baksa janggi tangna aro gital, nambata janggi tanganiko Kristoo man-na ine an-chingni skaniko mesokani ong-a. Jisu an-ching an-tangtangni dakna amgijako chu-sokatna ama. An-ching chioni gital ong-atgimin ong-e chakata; Ua an-chingna gital janggiko tangna gita bilko on-a.

### 3. MAINA JISU NAPBOLAH?

Sal sotbongani salo an-tangtangni dosrangna olgokataniko am-enggiparangna Pitor "gisik pil-e napbolatako man-bo" unon Kristo "na-simangni paprangko" kema ka-gen ine aganaha (Watata 2:38). Jisu pap mingsakoba dakkujani gimin, maina Ua an-tangko maina Ua an-tangko napbolatna on-aha?



**"Unon Johanni jakchi baptize ka-atako man-na ine Jisu galilionna uni mikkangona, Jordanona re-baa .....maina indake drang toromko chu-sokatan an-chingna kraa" - Mati 3:13, 15.**

Jisu pap grichim. Uo pap ingipana gisik nanganian gri..... Ua "darang toromkon chu-sokatna" gitasa napbolaha. Napbolatako man-anichi Jisu an-ching bilgrigipa aro papigipa mandeni jatna nama dakmesokaniko on`aha. Kristo An-tangni sninggaiparangko Uni sokkugijagipachinade re-angchina mamung dakeba ge-etja. Uni gimin jensalo bebera-giparang chio sim-bole napbolatako man-on, uamang Gitelni ja-kurangkosa ja-rikengachim.

Kristo an-chingna sichakahani gimin, Ua Uni toromi ong-aniko on-na man-a.

**"Papko u-igijagipako ua chingni gimin papigipa dakaha, chinga maikai Uo Isolni torom ong-gen" - 2 Kor. 5:21.**

Isolni nikario papigiparangoniko toromigiparang pilakan an-ching ua rongtalanio dal-roroa, aro uandake an-ching Kristoo gital janggi tanga.

### 4. MAINA ANGA SIM-BOLAKO MAN-NA NANGA?

Kristoba Uni napbolao sim-bolako man-achim; Ua chichi satkikidapako man-jaha. Johan Uko Jordan chibimaosa napbolataha "maina uano chi bang-achim" (Johan 3:23). Jensalo Jisu napbolahaon, Ua chiona ong-onangaha, aro Jisu baptize ka-atako (Greek ku-sikode sim-bola) man-ahaon, Ua chioni gadobaaha (Mati 3:16).


Jensalo an-ching napbolani chon-mot miksonganiko ma-sion, maidaka bewalo napbolata uko altuae ma-sichakna man-a. "Baptize" ka-a ingipa katta Greek katta baptizo ingipaoni re-baa, jeni ortoan sim-bola ba ning-o dona inani orto ong-a.

John Wesleyni americaona 1737 bilsio re·baon mondolini sak 34 manderang uni Mr. Parkerni bi·sako sim·bolgijade napbolatna jechakahani gimin, ong·ronggija bichal ka·aha. Methodistrangni padotba bebera·giparangko sim·bolesa napbolata ine mesoka.

Nampilataniko dakgipa John Calvin indake agana: Skangni mondolini dakkewalde sim·bolesa napbolata ine u·ichongmota. - Institutes of the Christian Religion, Bk. 4, Chap. 15, Sec. 19.

Skangni mondolini itihaso napbolanian sim·bolachisa ie rongtalen mesoka. Church of Englandni Dean Stenley minggipa mande saksa indake sea: "Skanggipa ritchagittam bilsirangnade, a·gimikchin napbolaniko ja·rikania Niam Gitalo poraiani gitan apsan ong·achim, jean "baptize" ingipa kattani miksongan gita napbolgipa sakantiko chio sripata, sim·bola, napsrimata. - Christian Institutes, jak 21.

Brigipa aro chi·brigipa ritcha bilsirango Europe aro Asiao rikgipa gilja nokrang; jekai Pisa, Italyo aro Romo rikgipa Johnni Cathedral jean dal·batgipa gilja nok ong·achim uarangoba sim·bole napbolatna tarigimin napbolchakram biaprang gnang.



Ritcha chi·bonga bilsini a·bachengachibara Council of Ravennako tom·kujana kingking Catholic mondolib satkikie napbolatako aro sim·bole napbolatakoba apsan dake ra·chakkuengachim. Mondolini dakkewalrangko sandirikitgija an·ching Kristoni aro Uni watatarangni skianikosa ja·rikna nanga.

Bang·a kakketgipa Kristianrangan dakkewal gita bi·sako napbolataniko ja·rika, aro an·chingni bi·sarangko a·bachengaoni Isolna on·kanganira kragipa ong·a. Indiba Sastroo rongtalen agana je, napbolna skang mandeko janggi jokani ramani gimin skie on·chengna nanga (Mati 28:19, 20), napbolana skang je mandeba Jisuo bebera·chengna nanga (Watata 8:35-38), aro napbolatna skang manderang, uamangni paprangoni gisik pil·na aro kema watako man·na nanga (Watata 2:38). Bi·sa bakgitchakde bebera·na, gisik pil·na ba ku·rachakna man·ja, jerangkon napbolatna skangsa dakna nangachim.

## 5. NAPBOLANIARA MAINA NANGCHONGMOTGIPA ONG·A?

Jisuni aganani gitade, salgichi re·na sikgipa sakantian napbolna nanga.

**"Chionimung Gisikoni atchijaode, saksaba Isolni songnoko napna amja" - Johan 3:5.**

Jisu mingsakosan watchanggalaha. Chisolsako sigipa cha·u gisikoni atchitaiaha. Indiba ua chisoloni ong·one uni ka·tongoni dingtanganiko mesokna gita chio sim·bolataniko man·jaha. Aro Jisu Uni songnokona re·baon An·tang baksa ong·pagen ine una ku·rachakaha (Luk 23:42, 43). Ia cha·unade "chionimung gisikoni atchitaianira" uni paprangna Jisuni jokanggipa an·chian mesokskaengachim. Augustine indake agana, "Siani turamo gisik pil·ani gimin mingsasan serikani gnang, uan gisik pil·gipa cha·uni gimin, je, darangba ka·bena nangja; aro mingsa je, darangba chu·ongnikaina nangja."



Jisu An·tangan ia mikrakatanio on·aha:

**"Je mande bebera·a aro baptize ka·atako man·a, uako jokatgen; indiba je mande bebera·ja, una sastiko agangen" - Mark 16:16.**

Skobikroko an·chingni pal sichakanichi Jisu mande jinma Uni an·chingna ka·saaniko mesokaha. An·chingba napbolatanichi mande jinmani mikkangon kracha·a gri an·chingni Kristona

on-kanganiko mesokna nanga. Na-a Kristoo gital janggi tangahama aro mikkangchi napbolna gita tarijawama?

## 6. NAPBOLANIARA A·BACHENGANISAN ONG·A

Napbolaniara Kristian janggi tanganina an-chingni on-kanganiko mesoka. Indiba napbolao an-chingni on-kangani janggi tanga gimiknan chu·ongaignok indake ong·ja.

Jensalo bi·sa atchion kusi ong·e alanide ong·rongbewal ong·a. Atchiani sal badeahaode, katchaanai salrang dingtang ong·aha. Bi·sa bakgitchakna salanti alduna nanga, salanti auatna nanga, aro salantian una simsakna nanga. Uandake napbolaniba apsan ong·a. Paul an·tangni gimin indake agana, "Anga salanti sia" - 1 Kor. 15:31. Salantio an·tangnasan chanchiaiarangoni an·pile, an·ching Kristoona Uni okamanina bate bate knachaka.



Napbolani niamara bia ka·ata gitan aiao inmanpilgipa ka·sagrikani dal·roroani a·bachenganiko mesokata gita ong·a. An·ching dontonggija dal·rorona gita an·tangtangko Kristona salanti on·kangna nanggen aro bi·anichi, Sastro poraianichi salanti gital janggi tanganiko ra·chakna nanggen.

## 7. KA·SROKANI KAM

Napbolanina namen katchabena kraa, maina Jisu Kristoo bebera·giparangna jringjrotni janggiko ku·rachakani gnang, "Je mande bebera·a aro baptize ka·atako man·a, uako jokatgen" (Mark 16:16). Jensalo an·ching napbolahaon an·ching jringjrotni kusi ong·ani ramao gadoangenga.

Napbolaniara Kristo baksa da·o kusi ong·rimaniko mesokaniba ong·a. Ua brena amsokgijagipa Gisik Rongtalgpako napbolgiparangna ku·rachaka (Watata 2:38). Ia Gisik baksana "Gisikni Biterang" - "Ka·sara," jean janggi tanganio "chakchika, ka·sara, namani, kakketani, sontol dakani aro an·tangko rakianirangchi gapata" (Galati 5:22, 23). Uni Gisik Rongtalgpachi Jisu an·chingo dongon, an·chingna chu·ongnikaniko on·a. Maina Gisik Rongtalgpipa an·chingko Isolni depanterang ong·a ine saki on·a (Rom 8:15, 16).

Ia naljokgipa Isol baksa nangrimania an·chingna bang·a namgnirangko ra·baa, indiba neng·nikani gri janggi tanganikode ku·rachakja. Bebeko aganode, Kristona on·kanganiko dakdaldalgipa manderangna bobil neng·nikbatgipa obostarango galonna jotton ka·a. Indiba an·ching Isolni jako ong·ahaon, an·chingona nama ba namgija, je obosta sokbaoba an·chingni dal·rorgni aro skanina ong·a ine u·ina nanga (Rom 8:28 ko nibo).

Saksa me·chikma dambe an·tangni segipa uko wate galna am·omangba Kristona an·tngni janggiko on·e napbolna miksongaha. Segipa uni gital bebera·anio mamung bak ra·pana sikjaha, indiba ua Jisuko ra·chake skangna bate nambagipa jikgipa ong·na jotton ka·aha. Dikdiksa somoinade uni segipa nokdangona neng·nikanirangko ra·baaha. Indiba bon·chotao uni jechakna man·gijagipachi chong·motan uni jikgipani dingtangbegimin janggi tanganichi salbaako man·aha. Ia mandeba an·tangni janggiko Kristona on·kange napbolatako man·aha.

Je obostaoba Kristoko rim·kingkingako watgaljaode an·ching Uni jako bilakgipa ostrorang ong·na man·a. An·ching Una on·kanganio mamung rakirika grian on·kangna man·a maina uaba mamung ra·rika grian an·chingni paprangna chisolo damko on·aha. an·chingni ka·saaniko aro Una pakwataniko mande jinmani mikkango mesokna mairongpile nambegipa chol ong·a! Na·a iako dakuja ong·ode, maina nang·ni

ka-tongko Kristona on-kangja? Gisik Rongtalgipachi nang-o gital janggi tanganiko on-china Uo bi-bo aro Kristona baptize ka-atako man-bo.

## Nangrimgrike Dongachi Dal-roroaniko Am-e Nibo

1960 bilsio Hollandoni mande, Brother Andrew uni VW gario Sastro katomrangko sruk sruk Communist sipairangni gisep gita Romanian simako ra-batangaha. Ua hotelo nape namgipa Kirstian dolrangona dilchina gita Isolo bi-aha, jerangan ia Sastrorangko name jakkalgenchim.

Ua antini bon-achi Andrew hotelni seriktmipaona re-ange, bano gilja donga uko sing-aha. Ia seriktmipa on-tisa jajrenga gnang uko nie aganchakaha, "Chingode indakgiparangde bang-e dongja ine na-an u-ia, un baksanaba na-ara uamangni ku-sikko ma-sijawa."

"Na-a u-ijama?" ine Andrew aganchakaha, "Kristianrangde rokomsa a-gimikni ku-sikko agana."

"O mai ku-sikko?"

"Uko Agape minga."

Ia seriktmipa pangnaba iako knakujachim. Indiba Andrew una aganaha, "ian a-gilsako knatobatgipa ku-sik ong-a."

Andrew ua jolo adita dolrangko sandie man-aha, aro torom ge-sani President aro Secretary baksatong-aniko ong-atna tik ka-e donaha.

Rasong grianichi andrew aro ia manderang adita Europeni ku-sikrangko u-iahaoba, saksa sakgipinni u-inaman-gipa ku-sikon man-jaha. Uandake uamang saksa sakgipinko nitatgrikaiaha. Andrew indita gamchatgipa bosturangko ra-e bang-a kenbegnigipa ramarangko songrebajok. Indiba da-o iamangara kakketgipa Kristianrangma, ma Governmentni nirikkigipa manderangsama, uko u-iani cholkon man-jaha gita nikpilaha.

Bon-kamao, ua Romanian Bible kingsako office tebil kosakon nikaha. Andrew an-tangni jeponiko Dutch Bibleko bikotaha. Ua 1 Korintirangna 16:20 ko badale, ki-tapni bimungko mesoke on-aha. Rang-sanan uamangni mikkangrang ching-baaha. Uamang Romanian Sastroko rang-san badale apsan odai aro podko poraiah: "Pilak jongadarang na-simangna salam on-ata, Na-simang rongtala ku-dimachi saksa sakgipinko salam ka-grikbo."

Ia manderang Andrewko kusi ong-bee niah. Uamangoni saksa an-tangtangni Sastroko badale Toe Skiani 25:25 ko mesokaha.

Andrewba ua podko nika poraiah: "Chel-gipa a-songoni namgipa kattarang neng-gipa janggina ka-singipa chi gita ong-a."

Ia manderang adha kantamangna Sastroko badalanichi saksa sakgipin baksu sualgrike somoi re-ataha.

Ia nangrimgrikanio pilak jatni dingtanggrikanirangko guale uamangni mikronrangona mikchirang ong-katpile kusi ong-bee ka-dingaha.



Andrew an-tangni jongadarangko grongaha ine u-iaha. Jensalo ua an-tangni ra-bagipa Biblerangko uamangna mesokon, Romanian manderang jagokmanpilaha aro uamang gipakgriktaiaaha.

Un attamo hotelni seriktimgipa Andrewona re-bae aganaha, "Nibo anga dictionaryoniko agape ingipako am-aha. Ua bimungchide mamung ku-sikba dongja. Uara Greek ku-siko ka-saa inanisan ong-aia."

Andrew aganchakaha, "Uan tik ong-a. Anga ia attam gimikan ua ku-sikchi agangrikaha."

Na-simangba ua knatogipa ku-sikko am-e nikahama? la dilanio Isol maikkai Uni dal-begipa ka-saani ning-on a an-chingko rimbana ama, uko skie ra-gen.

## 1. MONDOLIKO NANGRIMGRIKE DONGCHINA ONG-ATAHA

Mandena nangchongmotgipa alduani aro pangchakgrikaniko on-na gita Jisu mondoliko songe donaha. An-ching pilakan nanganirang gnang. Ianasmondolini miksongani ong-a. Ia biapona an-ching nangrimgrikaniko aro dakchakgrikaniko man-a re-ara. Sastroo an-chingna ching-chagipa watatarangni mondoliko paraka jean me-a aro me-chikrangko kusi ong-gipa nangrimgrikaniona okama, jean Bilakbatsranggipaonaba sokanga.

**"Jeko chinga nikaha aro knaaha, uko na-simangnaba chinga aganata, maikai na-simangba ching baksa bak man-pagen; aro chingni bak man-paode Pagipa baksa, aro Uni Depante Jisu Kristo baksa gnang. Aro iarangko chinga seaha, maikai an-chingni katchaa chu-sokgen." - 1 Johan 1:3,4.**

Jisu baksa aro saksa sakgipin baksa nangrimanichi ka-tongrangko kadimgimin dolsa 'kusi' ong-aniko chu-gimik man-na amgen. Uamangara mingsa ku-sikko, chong-motan ka-saani ku-sikko agangen.

Kristianrang jorarikrikgipa nokdangni bak ong-a. Uamang Kristoo jongada aro noabirang ong-baa maina uamango jongadani gisik gnang. Badita bebera-anio apalbata nangrimani gnang, inditan uamangni Kristian nangrimgrikanil bilakbata.

Jisuni Watatarangni rikgipa mondolini memberrang uamangni apsan apsan bebera-anirangchi, Isolna ka-saanichi, aro Una dangdike on-na aro a-gilsakna Uni ka-saaniko sualna sikanichi apsan karimako man-a. Ia apsan nangrimanichi kaako man-on ia bilgrigipa aro bang-gijagipa dol, a-rik sanalako man-oba a-gilsak gimikkon bikpilatna man-aha.

## 2. MONDOLIKO KRISTO SONGAHA

Kristoo mondoli dongama? Ma ia toromni dol dakaniara mandeni banaianisama? Jisu aganchaka:  
**"Ia ro-ongni kosako anga angni mondoliko rikgen, aro uko a-ningni do-garang amjawa" - Mati 16:18.**



Jisuan kaprikgipa Rong-brak, Uni Mondolini Noksikni ro-ong. Badia dol pangchakgipa bakrang ong-a?

**"Aro Watatarang aro katchinikgiparngni pangchake donani kosako na-simang rikako man-aha, Kristo Jisu uni ki-tikni skotong ro-ong ong-a" - Ephesus 2:20.**

Jensalo Nama Katako skiprakon Gitel maiko chu-sokata?

**"Aro Gitel uamang baksa jokna man-enggiparangko salanti chapatachim" - Watata 2:47.**

Jensalo Jisu mondoliko songahaon, "a-ningni do-garangba uko ona amjawa" ine ku-rachaka." (Mati 16:18), aro Kristian Mondoli tangkuaenga. Una bilakgipa bobilrang nakataha - romni rajarangoni Communist sason ka-dragiparangona - indiba so-ota man-giparangni an-chi bilakbate

dal·roronasa dakchakaha. Jensalo saksa Kristianko wa·alo so·e ba singhoni a·kolona galon, bang·bata gipinrang uni biapko ra·na chakatbaska. Bebera·gija ka·dingstekgiparang Kristian mondoliko uamangni katachi gimaatna gita an·tangtangni ama gita joton ka·aha. Indiba Kristianrangni bebe kata Scienceni ba songsalni chasongomangba rongtalbate agansusakuaenga.

Mondolina dal·batgipa ra·bianide Romni sorkarini a·songni torom ine ra·chakani ja·manon a·bachengbaaha. Mondoli silrorobaaha - aro ka·sine ong·siroroaha. Andalgipa chasongo gisikni gita sigimin ong·a gita nikpilaha. Indiba Gitel kakketgipa aro ka·donggipa bebera·giparangko pangnan ripinga, jerangan dimelgipa aro neng·begipa somoirango jajong grigipa walo teng·sugipa askirang gita teng·suaha.

Paul, Kristoni Uni mondoli baksaa nangrimaniko segipani jikgipana rinoka aro ganggopani gnang nangrimgrika baksaa toata (Ephesus 5:23-25). Mondoliara nokdang ong·a, jeon member saksa sakgipin baksaa nangrimgrikaniko mangrakata aro sakgipinni name donganina simsakgrika (Ephesus 2:19).

Paul mondoliko tanggipa be·en baksaa toata, jeni skotong Kristo an·tangan ong·a (Kolosi. 1:18).

Jensalo an·ching napbolahaon, an·chingni Jisuo bebera·aniko aro ua be·enni ba mondolini bakrang ong·paa ine paraka.

### **"Maina an·ching ... pilakan Gisik saksano be·en an·sanna baptize ka·ako man·aha" - 1 Kor. 12:13.**

Parape·ani ki·tapo chakatpilgipa Kristoko mondolirangni gisepo re·roroengako agane, Uni simsakaniko mesoka (Para. 1:20,12,13). Kristo an·tangni manderangko pangnaba watgaliku aro ua mamung dakeba watgaljawa.

### **3. MIKSONGA GNANGGIPA MONDOLI**

Giljachi re·aniara Kristian mandena nangchongmotgipa ong·a. an·ching gipinrangni dakchakaniko an·chingni bebera·aniko rakina aro dal·rorona gita nanga.

Mondoli gipin minggitam mongsonggipa kamrango bakko ra·paa!

(1) Mondoli bebeko simsake rakia.

"Bebeni krong aro pangchakani" ong·e (1 tim. 3:15), mondoli Isolni bebeko a·gilsakni mikkango de·doa aro chelchake rakia. An·ching gipin bebera·rimskarangni dondima gisik seng·aniko, Sastroni nangchongmotgipa beberangko niatna gita, nanga.

(2) Isolni ka·saani papirangna maiko dakna man·achim uko mondoli dakmesokgipa ong·a. Bebera·giparangni janggi tanganio dingtangataniko ra·bagipa Kristo "uni aiao inmangipa seng·aniona okamgipa Isolna rasongko on·a (1 Pitor 2:9).

(3) Nangenggipa a·gilsakna Isolni manderang Una sakki on·giparang ong·a. Ua salgichina re·angna skang, Uni snienggiparangna Jisu ku·rachakaniko daka:

**"Indiba Gisik Rongtalginani na·simangona re·baon na·simang bilko man·gen; aro Jerusalemo aro Judeao aro Samaria gimikon aro a·kitikona kingking na·simang angni sakki ong·gen" - Watata 1:8.**

Isolni suapkila ka·saaniko a·gilsak gimikchina sualniara maikai mondolina nambegipa chol ong·a?



#### 4. BILAKANINA DOL DAKAHA

Kristoni songgimin mondolia miksongani gnangsa dol dakaha. Sakoba bakrimatna man-a, ba sakoba a-pal galna nanga (Mti 18:15-18). Isolni mondoli dilgiparangko songa aro a-gimikni skotong aro songo tom-ram biaprangba gnang (Watata. 8:14; 14:23; 15:2; 1 Tim. 3:1-13). Jensalo uamang napbolahaon bebera-giparang nangrime dol dake dongaha (Watata 2:41 aro 47).

Mondoli saksa sakgipin didigrikna gita dongenga.

**"Aro mitamni dakronga gita ong-gija an-chingde chimonggrikako wtgalgija mol-molgrike ka-saana aro nama kamna didina saksa sakgipinko nigrikna; aro salni sepangbaengako badita nika indita bate mol-molna hai" - Iibri 10:24,25.**



Ian an-seng mangrake donggipa mondolini dakgni ong-a. Uni memberrang saksa sakgipinko bebeo rika ro didigrika. Isol an-tangni manderangko bilakatna ro a-gilsakna dangdike on-na gita mondoliko songaha. An-ching sakprak sakprak dake kam ka-ana bate apsan nangrime bang-bata kamrangko chu-sokatna man-gen. Mingsako toatna gita ra-na: Seventh-day Adventist Mondoli. An-ching a-gilsak gimikchin sana banani kamko apalen ra-a - songjinmarango garirangchi sana bananiko dakaoni diltugipa South Pacific chichangrango clinicrangko kuliaona kingking. An-chingni poraiani biaprango hajalni hajal chadamberangko Kristoo nambate janggi tangna u-iatna - Loma Linda Universityo, ka-tong gitalko on-jotna dakdilaoni Africani ning-tubatgipa biaprango chongipa mission skulrangko kulianiona kam ka-aha. An-ching akal karap ong-ani aro duk kotona ong-anirango ADRA ni jakchi dakchakaniko on-a. Songni mondolirang kangan aro nokgrirangna gana chinani aro cha-anirangko hajalni hajal Songo Dangdike On-ram biaprango dakchakaniko on-a. Aro Adventist bebera-giparang dam 200 songnokrangna baten janggi jokani nama ktako sualenga. Name doldake on-kange ka-gipa Kristianrangsang mangmang indake a-gimikchin gipsokatna ama.

Kristo aro watatarang mondoliko be-enni bakrang baksatua, aro pilak be-enni bakrangkon nanga ine mesoka (1 Kor. 12:21-28). Pilak be-enni bakrangan tiktak apsande ong-ja, indioba pilakan nangchongmotgipa ong-a aro pilakan kam ka-na nanga. Mikron be-enni a-pal ong-ahaode nikna man-ja. den-sotgimin jaksima, jeba ong-ja maina, an-ching an-tangaride Kristona jakde gamchata dongja. An-chingara mikronma, jakma ba chu-sokgipa ong-e ka-na man-ja. Mondoli baksatua bak ong-ania, gipin be-enni bakrang baksatua ku-mong nangrimania, an-ching Kristianrangko mangrakatgen.

#### 5. OLAKIANIO KATCHAANI

An-chingni ka-tongni ning-onin Isolko olakina skani gnang, aro uko an-ching chu-sokatna man-jaode ua skani dimelangnaba gnang. Gitrangko segipa olakiram biapchi re-angani gimin maiko chanchia?

**"An-ching Jihovani nokona re-angna, hai ine angna aganon anga katchaaha" - Git. 122:1.**

Sika moanirang jinma olakianio mai bak gnang?

**"Ka-sroke Jihovana dangdike on-bo, ring-ani gnang uni mikkangona re-bab." - Git 100:2.**

Isolko olakianio bak gita on-anirangko ra-baaniara kragipa ong-a ine Sastroo an-chingna agana.



**"On-aniko ra-bae Uni sararango napabo. Rongtalgipa gananirango Jihovako olakibo" -Git. 96:8-9.**

Mande jinmao olakianio bi-aniba nangchongmotgipa ong-a.

**Re-babo, an-ching olakina aro tugopna hai; Jihova an-chingko Dakgipani mikkango an-ching ja-sku dipanna hai" - Git 95:6.**

Niam Gitalni olakiao, Sastroko skiani aro skiprakanian mongsongbatgipa ong-a. Watata odai 2-o Pitorni sal sotbongagipao a-broni skiprakao a-bachenge, aro Protestant Namdapatgiparangni somoioni da-alona, toromni bidingo mikrakatna skigiparang pilakan Sastroo pangchake skiaha. Maini gimin? Maina, Isolni kata tanga aro bimchipa. Matsramgipa pilak tonualna bate matbata." (Ibri 4:12-13).

## **6. MONDOLINARA MAIA KRAA?**

Mondolio namgijagipa manderangan gapa ine mitam mandeang matnanga. Henry Ward Beecherni agana kattarangan kakket ong-a: "Mondlide mingsinggipa Kristianrangko mesokna tom-chakram ong-ja, indiba chu-sokgijaparangna skie ra-chakram biapsa ong-a."

An-ching sakantian chu-sokgiparang ong-jani gimin, mondolibia chu-sokgipa ong-na man-jawa. Jisu Uni toe aganao namgipa mi baksa maran chabrinani golpoko aganaha (Mati 13:24-30 ).

Niam gitalo Paulni segimin chitirangko poraion, Watatarangni mondlio dal-a golmalrang gnang ine an-ching nikatna man-a. Uandake da-aloba mondolio bang-a ong-sianirang dongronga. Indiba iako gisik ra-na, mondolini dal-gipa pangchakgipa ro-ong Jisu Kristoko darang ong-sigipa mondoli ba dolba nosto ka-na ba golmal ka-na man-jawa. Uni gimin chu-sokgijagipa mondolirang an-chingna dangdike on-gipa Jokatgipachiniko niatkame dongna nanga. Ong-sia gnangoba mondoliara Unin ong-a, uni gimin Kristochiko niatjringbo.

**"Kristoba mondlina ka-saaha, aro uani gimin an-tangko on-aha; ua maikai, simteka aro sicheparang ba indakarang donggija, torom aro matnanga gri ong-china, rongchinge mondoliko an-tangan an-tangni mikkango donna man-na gita, uko katao chichi auatachi rongtalatenba torom ong-atna man-gen" - Ephesusrangna 5:25-27.**

Mondoliara Jisuna inditan gamchatani gimin Ua Uni sichakachi sakprakpraknan aro mondoli dol gimiknan an-tangkon on-aha. Uni gimin mondlini member ong-aniara nang-naba nangchongmotgipa ong-a. Na-ara Kirstoni bak ba member ong-ama?

## **7. MONDOLIKO SANDIANI**

A-gilsako Jisu Kristoara badita kakketgipa bebe ra-anirangko donaha?

**"Be-en an-san ong-a, aro Gisik saksan ... Gitel saksan, bebera-a mingsan, baptize ka-a mingsan" Ephesus 4:4-6.**

Kristo bebera-a mingsan ong-aiani gimin badia ong-a uko an-ching maikai u-igen? Jisu an-chingna u-iani chinko on-aha:

**Saoba Uni namnikako dakna skode, indide ua skia Isoloni ong-ama, ma an-tangoniko aganana, iako ua u-igen" - Johan 7:17** (Johan 8:31, 32 koba nibo).



Jensalo an-ching Isolni skako dakna on-kangahaon, ua skianirangara Isolonia ma mandeni dakritingasama uko nikna gita dakchakgen. Mondoliko am-e nikna gita mingsa cholde uni Isolni kattana mande ra-aniko aro on-kangniko sandianichi man-gen. Chong-motgipa

nangrimgrikanide Sastroosa pangchake rika, saoba dilna changipa ba dal·gipa dolo pangchakede ong·ja.

Ia dilanirangoniko am·e nianiko dakangkue, Sastrooniko Isolni nang·ni parape·ani seng·ao re·rurabo, aro uan uni nang·na miksonganiko oprake on·gen. Dal·rorogipa Kristianara an·tangni ka·tongko oprake aro Uni kattaoniko Isolni parape·gimin bebeko ra·chakna sikgipa gisik ong·gen.

## Mande Bang-batgipa Dol Sretna Man-ama?

Dilani 16 gipao an-ching am-e nikaha je, Sabbathko rakianiara da-ororo simbrae janggi tangania nangchongmotgipa sam ong-a. Isol an-chingni pilak nanganirangko u-iani gimin be-enna neng-takani aro gisikko mikelatanina snigipa sal changantiko ua mangrakate donaha. An-chingni a-gilsakko saldokna ong-ani ja-mano Ua snigipa salo "neng-takaha," "patiaha" aro "rongtalataha" (A-ba. 2:1-3).

Jensalo Isol An-tangni manderangna, Israelna, Ge-etani Mingchikkungko on-on, Ua snigipa sal, neng-takani salko manichina ge-etaniko, Uni niamni jatchion donaha (Re-ongkata 20:8-11). Ia ge-etani gitade Neng-takani salara Isolni ong-atani bilko gisik ra-ani, dikdiksa neng-take Uni ong-atani aiao immangipa kamrangko aro nitoaniko chanchiatna salsa ja-nengtake Ong-atgipani sambaona re-bana aro an-chingni Un baksa nangrimani ning-tuaniko nipilatani ong-a.



Jisuni a-gilsako tangmitingo Uaba neng-takani salko rakiah (Luk 14:16). Aro ia salo Kristianrangna namgniko ra-bagipa ong-a ine ra-chakaha (Mark 2:27, 28). Watatarangni ki-taponi adita podrang Kristoni sniggiparangba Uni chakatpilani somoio neng-takan salo olakiahine rongtalen mesoka (Watata 13:14; 16:13; 17:22; 15:1-4, 11).

### 1. JAJAATGIPA SING-ANI

Bang-a manderangni jajagipa chanchianiona da-o an-ching sokbaaha. A-gilsako Kristian dolrang adita somoina dingtang dingtang sal minggniko manibaenga. Mingsara bang-bata Kristianrangan gisiko nangbee antini skanggipa sal Robibar salko Kristoni chakatpilani salko gisik ra-ani sal ine bebera-e ine manibaenga. Aro minggipinara, bang-a Kristianrang dolrangan apsan gisik nanga gnang Sastroo snigipa sal neng-takani salkosa mandera-a aro darangba Robibarni rongtalaniko janapa dongja.

Indide badia salko neng-takani sal ine manianio maiba dingtangani dongama? Kakketgipa aro bimchipgipa bebeko u-ina sikgipa manderang an-tangtango indake sing-na nanggen: Jisuara maia ong-a? Angkoara Jisu maidakako nangnika?

Iani gimin miksonganiko daknade adita ma-sie ra-chenganirangko dakna nanggen: Sawa neng-takani sal, Sonibar sal, antini snigipa saloniko Robibar, antini skanggipa salona dingtangataha? Sastroara indake dingtangatna bil on-ama? Indake ong-ode Isolara, Kristoara ba Watataranga dingtangataniko dakahama?

An-ching iarang pilakkon niangkuna.

### 2. ISOLAN SALKO DINGTANGATAHAMA?

Neng-takani salo snigipa saloniko antini skanggipa salona dingtangataha ine Isolni agangimin banoba dongama?

Bang-bata Kristianrangan Ge-eta Mingchikkungko janggi tanganio pangchakani dake ra-chaka. Maina uarangara Isolni dingtangmancha mandeni jatna segimin ong-a. ua rong-pilengo jaktangchi seahani gimin (Re-ongkata 31:18) uarang namen gamchata.



Brigipa ge·etanio Isol an·chingna indake ge·eta: "

**"Uko rongtala ine rakina neng·takani salko gisik ra·bo. Saldok na-a gambo aro nang·ni pilak kamko ka·bo; indiba SNIGIPA SAL JIHOVA NANG·NI ISOLNA NENG·TAKANI ONG·A; uno na-a mamung kamkoba ka·nabe ... maina saldoko Jihova salgi aro a·ako sagalko aro uarango donggipa pilakkon dakaha, aro snigipa salo Ua NENG·TAKAHA; uni gimin jihova neng·takani salko PATIAHA aro uko RONGTALATAHA" - Re·oangkata 20:8-11.**

Isol ge·eta mingchikkungko Uni manderangna on·ahaon Uni rongtalipa ku·sikchi ge·etgiminrangko darang mandeba sedapjachina ba dingtagatjachina gita aganaha.

**"Maikai na·simang angni na·simangna ge·etgimin na·simangni Isol Jihovani ge·etanirangko rakina man·gen, na·simang angni na·simangna ge·etgimin kattana ON·DAPNA BA UONIKO KOMIATNA NANGJA" - Deut. 4:2.**

Isol an·tangba an·tangni ge·etgiminrangko dingtagatjana ku·rachaka.

**"Angni songgikaniko anga RAMRAM DAKJAWA, aro angni KU·CHIKRANGONI ONG·KATGIPAKO ANGA DINGTANG DAKJAWA" - Git 89:34.**

Neng·takani salo antini skanggipa saloni skanggipa salona dingtagatja ine Sastroo rontalen mesoka.

### 3. NENG·TAKANI SALKO JISU DINGTANGATAHAMA?



Jisuni aganani gitade Ge·eta Mingchikkungko dingtagatna man·ja: "**Anga niamko aro katchinikgiparangni kattako gimaatna re·baaha ine daa chanchi; gimaatna re·baja, indiba chu·sokatna. Maina beben anga na·simangna agana, a·a aro salgi gimajana kingking pilakan ong·jaskal niamoni on·ti min·tiba gimjawa" - Mati 5:17, 18.**

Neng·takani salo gilja noko nape olakiara Jisuni dakbewal ong·a ine an·ching Dilani 16 gipao nikbaaha (Luk 4:16). Aro Jisu An·tangni sninggiparangko kusi aro ka·srokaniko man·na gita Neng·takani salko kakkete rakkiangkuaniko nangnika (Mati 24:20).

Jisuni skiani aro dakmesokanirangan Neng·takani salkoara neng·takna, gisik olgrokatna aro Isol baksu somoi ra·na gita nangkuenga ine talata.

### 4. NENG·TAKANI SALKO WATATARANG DINGTANGATAHAMA?

Jakob, skanggipa Kristian mondolini dilgipa, Ge·eta Mingchikkungni gimin indine sea:

**"Maina saoba niam gimikko manie mingsao ja·gidote pilakni gimin gro nanggipa ong·aha. Maina til·eknabe ine ingipa, mande so·otnabe inaba inaha, indide na·a til·ekja indiba mande so·otode na·a niamko pe·gipa ong·aha" - Jakob 2:10, 11.**

Luk, saksa sangipa bangipa aro skanggipa mondolio skiprakgipa indine agana,

**"Neng·takan salo cholgugani a·palchina chibimani rikamona, jeo bi·ani biap donga ine chanchiachim uchina re·angaha; aro chinga asonge tom·dakgipa me·chikrangna aganaha" - Watata 16:13.**



Niam Gitalni ki·tap, Watatarango Kristoni ja·rikgiparang Neng·takan salko maniaha ine chang 84 na janapa, uarang pilakan Jisuni chakatpeltaian bilis 14 mang batangpilaoni ong·a: Sabbath changgni Antioko (Watata 13:14, 42, 44); Philippio changsa (Watata 16:13); Thessalonikao changgittam (Watata 17:2, 3); Korinthio chang 78 (Watata 18:4, 11).

Johan, sninggipa sak 12 oni bon·kame segipa, Sabbathko rakiah. Ua indake sea:  
**"Anga Gitelni salo Gisiko ong-e, angni janggilchi singga sika gita gam·bea kurangko knaaha" - Parape-a 1:10.**

Jisuni katta gitade Gitelni salara Sabbath ong·a.

**"Maina Mandeni Dapante Neng·takan salni nokgipa ong·a" - Mati 12:8.**

Sastroni sakirangko sandie nianio Watatarang Isolni Neng·takan salko snigipa saloniko antini skanggipa salona dingtagatna jotton ka·jaha ine mesoka. Niam Gitalo antini skanggipa salko chang 8 san janapaia. larang pilakon antini skanggipa rongtalgipta sal ine aganja ba ua salko olakiani sal inemangba mesokna jotton ka·ani dongja. Namedake ia mingchet podrangko sandie antini skanggipa sal Robibarni gimin indake nikgen:

- (1) Me·chikrang antini skanggipa salo gopramona re·baa (Mati 28:1).
- (2) "Neng·takan ssal badeango" me·chikrang antini skanggipa salo salarini kamrangko ka·na a·bachengaha (Mark 16:1, 2).
- (3) Jisu Magdaleneni Mariamna antini skanggipa salo mikkang pa·chengaha (Mark 16:9).
- (4) Jisuni sninggiparang antini skanggipa salo salarini kamrangko ka·na a·bachengaha (Luk 24:1).
- (5) Mariam antini skanggipa salo Jisuni gopramona re·ange gopram konggrang ong·a ine nikeaha (Johan 20:1).
- (6) Sninggiparang antini skanggipa salo Jihudirangna kene (olakina ong·ja) tom·dakaha (Johan 20:19).
- (7) Paul mondolini memberrangko antini skanggipa salo uamangni chimonggipa tangkarangko chane Jerusdalemchi kangalrangna dingtag ma·eke donchina agana (1 Kor. 16:1, 2). Ia podo mamung toromni tom·dakani gimin janapja.
- (8) Watatarang 20:7 o Paulni antini skanggipa salo watgriknasiengani gimin skiprakaniko janapa. Beben Paul salantian skipraka aro salantian pita pe·a (Watata 2:46).

Ia pilaka Sastroni pilak bakrongan Watatarang snigipa sal Neng·takan salko mania dontongna miksongani gnang ine mesokani gri. Watatarang Neng·takan salko antini snigipa saloniko antini skanggipa salona dingtagatahani gimin janapja. Niam Gitalo, Neng·takan salko antini snigipa sal Sonibaroniko antini skanggipa sal Robibarona dingtagata dongja ine rongtalbeen mesoka. Dingtagatani Jisuni aro Watatarangni ja·manosa re·baaha Aro maidake basako maidake dingtagatani sokbaaha uko itihasoniko niatna nanggen.

## 5. BANONI ROBIBAR SAL RE·BAAN?

Niam Gitalni Kristianrangni skiaoni mitam Kristianrangde branganggen ine Watatarang "Uni gimin ..... mikrakbo" ine mikrakataniko on·a (Wat. 20:29-31). Aro uandaken ong·bebeaha. Ka·dongchakna man·gipa itihasko segiparang maikai Kristianrang Watatarangni rongtala skiarangoni brangangachim uko rongtalen serika. Dakritinganirang aro skianirang jekon Paul, Pitor aro gipin Kristian mondoliko a·bachengdilgiparang ra·chakjachim uarangba mondolio ka·sine napbaaha.

Neng·takan salko maniaoni Robibar salko maniaona Niam Gitalko sea matchotahaosa aro pilak Watatarangan sie bon·ahaosa a·bachengbaaha. Itihaso serikani gnang je Kristianrang ka·sin ka·sin snigipa salo maniani pal antini skanggipa salosa neng·takna aro olakina re·baskaaha. Indiba



bebera-giparang rang-sande snigipa salko Robibar salko Gitelni sal ine manina dontongaijaha. Seng-gnangbatgipa name serika donge Robibar salko Kristianrangni manichengbaanidde Itallyo Jisuni siani ja-mano bils 250 mang a-bachengaha. Uni ja-mano ruuta somoinan Kristianrang salgnikon maniachim, indiomangba mitamrang Neng-takan salkon rakiah.



March 7, 321 AD o, Constantine raja dal-gipa, Romni songnok gimikon, game cha-giparangna agre, pilak manderangkon draate, Robibar salko maniani niamko dakaha. Ian baksana gipin mingbonga a-songni niamrang baksa Constantineni niam dakanichi Robibarko maniani niam da-on a kingking cholko ra-baaha. Brigipa Ritcha chasongo Laodikiani Council Kristianrangni Neng-takan salo kam ka-china aro Robibar salo man-a dipet kam ka-jachina gita niamko dakaha.

Itihas indake mesoka je, Robibarko olakiani sal dake ra-ania mandeni ong-atanisa ong-a. Brigipa Ge-etanio antini snigipa salko galatna gita Sastroo mamung bil on-ani dongja. Kristianrangni chasongo tol-pinapgipa bil Isolni niamko dingtangatna jotton ka-gen ine Daniel katchinikgipa agansoaha (Daniel 7:25).

## 6. SAWA DINGTANGATAHA?

Sawa parake Neng-takan salko antini snigipa saloniko antini skanggipa salona dingtangataha? Catholic Mondoli iako dakaha ine ku-rachaka. Be-ruruangenggipa Romni songnokko rakirikna, nama miksongani gnang mondolini dilgiparang bebeko watgale olakiani salko Sonibaroniko Robibarona dingtangatna jotton ka-aha.

Roman Catholic sea:

"Sing-ani: Badia Neng-takan sal?

"Aganchakani: Sonibar, Neng-takan sal ong-a.

"Sing-ani: Indide maina Sonibarni pal Robibarko an-ching maniskaa?

"Aganchakani: An-ching Sonibarni pal Robibarko mania maina Catholic

Mondoli Sonibaro maniaoniko Robibarona dingtangataha" - Peter

Geermann, The Converts Cathecism of Catholic Doctrine (1957 edition), jak 50.

Catholic Mondolini rasonggragra mondoliko dilgipa manderangsa ia dingtangataniko dakaha ine aganparaka.



"Rongtalgi sal, Neng-takan salko Sonibaroniko Robibarona dingtangatnia ..... Sastroni mamung dilaniko man-e ong-ja indiba mondoli an-tangni bilo pangchakesa ..... Je manderangan Sastrosan mangmang pangchakani ong-na nanga ine chanchichipgiparang katta gita re-ode Seventh-day Adventistong ong-na nanga, aro Sonibarko rongtale rakigen. - Cardinal Maida, Archbishop of Detroit, Saint Catherine Catholic Church Sentinel, Algonac, Michigan, May 21, 1995.

## 7. MITAM PROTESTANT MONDOLIRANG MAIKO AGANA?

Adita Protestant dolrangni bebera-anirangko serikani gitade uamangba Robibarko manianina Sastroo mamung bilkoba nikja ine ku-rachaka.

Marthin Luther, Lutheran Mondoliko a-bachengdilgipa, Augsburg Confessiono, Artick 28, paragraph 9 gipao indake sea:

"Uamang (Roman Catholicrang) Neng-takan saloniko, Gitelni sal, Robibar salona, Niam Mingchikkung

gita ong·gija dingtangataha ine kanga. .... Neng·takani salko dingtangatana agre uamangni gaora de·ani gipin nambata dakmesokani gri. Ge·eta Mingchikkungoni mingsako galatahanai gimin, mondolini bil aro bilakani dal·a ine uamang agana."

Methodist theologianrang, Amos Binney aro Daniel Steele agana:

"Beben, bi·sa bakgitchakko nappolatna mamung ge·eta dongja ..... ba antini skanggipa salko rongtale rakianiba dongja." - Theologian Compound (New York: Methodist Book Concern, 1902), jak 180, 181.

Dr. N. Summerbell, Disciples of Christ ba Christian Chirchni itihasko segipa indake sea:

Roman mondoli chu·gimikan brangangaha ..... Isolni kattani Neng·takani salko pe·gale Robibarko rongtalgipta sal dake songaniara Brigipa Ge·etanikon bikpilataha. - A True History of the Christian and the Christian Church, jak 417, 418.

## 8. ONG·CHONGMOTARA MAIASA?

Ian an·chingna mikkangchakchak sing·aniko ra·baa. Sastroni hukum gri maina bang·a Kristianrang Robibarko mania? Iana bate nangchongmotania, angara badita salko rakigen? Antini gisepo salsako jekoba maniaioba ong·aia ine ingiparangko anga ja·rikpagenma? Ba a·gilsakko Jisuni manipbaaniko dakbagipa, aro ge·eta Niam Mingchikkung o "Snigipa Sal ..... Neng·takani Sal" ingipako ja·rikgenma?

Iani an·ching ramram manie roaiani giminde aganjaenga indiba Sastro gita badia ong·a uko sandiani ong·enga. Nangchongmotgipa bakde Jisuko manina nanganian ong·a. An·chingni Dakgipa Rugipa antini snigipa salko "rongtalgipta sal" dake donaha, aro ua salo an·ching an·chingni nokdangni manderang baksa aro Un baksa sepangbate dongna man·e bilakbatatna aro gisik ka·srokbatna man·a. Angara sako manigen? Isolni Depante Kristoko manigenma mandeni dakbewalko? Seoke ra·anide rongtala: manderangni skianikoma Isolni ge·etaniko. Manderangni kattakoma Isolni kattako. Mandeni donjegiminkoma Isolni ge·etaniko.



Dongimin somoi aro niamrangko dingtangatna (Daniel 7:25) jotton ka·gnini gimin Daniel katchinikgipa mikrakatsoa. Isol An·tangni manderangko katta manie dongchina okampiltokenga. Una kakket ong·ani aro ka·saaniko mesokani gita Neng·takani salko manichina Ua okamenga.

Jisu indine agana, "Angna ka·saode angni ge·etanirangko manibo" (Johan 14:15). Una ka·sae Uni ge·etanirangko maniode uamangni kusi ong·ani gapgen ine Ua ku·rachaka (Johan 15:9-11). An·chingko aiao inmanpilgipa Jokatgipa donga. An·chingko Ua An·tangni ka·saaniko chu·gimik mesokna skenga. Katta manigipa ka·tongan Ua ka·saaniko rimnapna dal·bee do·ga osoani ong·a.

Gethsemane bario chisol aro a·gilsakni papni boja uko sinjetengoba An·tangni Pagipani skana Kristo chu·gimik on·kangaha. Ua Isolna indine inaha, "la ringchakaniko angoniko ra·angbo." Ua mol·molengon, bama gnangsa indine aganaha, "Indiba angni namnika ong·ja, nang·ni namnikasa" (Mark 14:36).

Chu·gimik bame on·kange janggi tanganio chu·sokaniko an·chingko man·atna Kristo skenga. Aro Neng·takani salo neng·take katchaaniko man·atnaba skenga. Pilak janggi tangani saomoirangon an·chingko An·tango ka·dongchakaniko Ua nangnikenga. Na·a Isolni okamanina aro Uni ge·etanirangko manina ku·rachakode Jisuni katchaanua "nang·o" aro nang·ni katchaanua "chu·sokgen" (Johan 15:11) ine Ua ku·rachaka.

## Isol Kakketchimma, Am-e Nibo

Sonjinmani jatchio, noko home work dakenggipa me-a bi-sa tang-brangbagipa slai guli nange so-otako man-aha.

Songsaoni ma-gipa saksa, an-chi on-chakaniko man-e uni degipa AIDS sabisiko man-aha ine ma-siaha.

Duknirang uandaken a-gilsako gapaiaha. An-ching pilakan iarangna aganchakaniko nangnika. Ia orto gri a-gilsako, indakgipa obostao Isolara bano? A-gilsako Isolni ka-saan gapaia ine Daud Gitrang 33:5 - o janapa. Indake ong·genchimode, maini giminsa Isolara duknirangko bon·atja? Parape-a odhai 20 - o Isol maikai aro basako indongarangko bon·kimitatgen an·chingna mesokaha.



### 1. HAJALSA BILSIRANGNI GIMIN TALATA

Johan hajalsa bilsirangni gimin aganon, Kristoni gnigipa re-bapilani somoionin a-bachenggen ine Parape-a odhai 20 - o janapa. Pap a-gilsako napantal Satanni Kristo baksa bobil dakaniba hajalsa bilsirangni a-bachengahaosa matchotgen.

Ia bobil dingania salgio Luciferi Kristoni kosako mikbue salgini rongtalgipa sa-grerang baksa dakgrikani ja-mano, a-gilsakona galonataha. Ia bobil dingania a-gilsakoba Eden bario a-bachengaha aro Kristoko a-gilsakni manderangni jakchi chisolo datkapdilaha. Ia dukni golpoko Dilani 3 oniko niatpiltaina man·gen. Ia bobil dingania hajalsa bilsirangni bon·ao aro a-gilsakko wa-alchi rongtalatosa matchotgen. Ia 1000 bilsikoa rokomgni chakatpilanichi ma-eke mesoka.



Skanggipa chakatpilario sawarang bakko man·gen?

**"Skanggipa chakatpilario bakko man·giparang rongtala aro an·senga. Gnigipa siani iamangni kosako bil man·ja, indiba uamag Isolni aro Kristoni kamalrang ong·gen aro bili hajalsana Un baksa raja ong·gen."** (Parape-a 20:6). (Iano on·gimin Sastroni odhai podranga NIV - oni ong·a).

"Rongtala aro an·senga," iamanga Jisuko an·tangtangni Jokatgipa ine ra·chake, "skanggipa chakatpilario" bakko man·giparang ong·a. Toromirang Jisu baksa bili 1000 - na "sason ka·genchimode," uamang skanggipa chakatpilario, chong·motan hajalsa bilsini a-bachengao chakatgiparang ong·na nanga.

Hajalsa bilsirangni bon·ao sawarangsa gnigipa chakatpilario bakko man·pagen?

**"Dongpitigipa sigiminrang bili hajalsa matchotkujana kingking janggi tangatako man·jaha,"** ine Parape-a 20:5 - o janapa.

"Bang·a sigiminrang" ingipa papi sigiminrangna agre gipin dongja, maina toromi sigiminrangde "rongtala aro an·senga" dolde bili 1000 a-bachengantal chakatatako man·manjok.

Unigimin, 1000 bilsirangni a-bachenga aro bon-kamaniko rokomgni chakatilanichi ma-teke mesoka, chong-motan toromirangni aro papirangni chakatilanichi ong-a.

## 2. KRISTONI RE-BAPILAO CHAKATGIPA

Skanggipa chakatilan, toromirangna, Kristoni gnigipa re-bapilano ong-a.



**"Maina Gitel an-tangan inchroa aro pamong sa-greni ku-rang, aro Isolni singga gnang salgioni ong-onbagem, unon KRISTOO SIGIMINRANG SKANG CHAKATGEN. Unikoa AN-CHING TANGGIPA DONGPITIGIPARANG BANGBANGO GITELKO GRONGNA ARAMRANGO UAMANG BAKSA DAMSAN RIMDOAKO MAN-GEN, aro uandake an-ching pangnan Gitel baksa ong-gen." 1 Thess. 4:16, 17.**

Jisu ia a-gilsakona re-bataion, Kristoo sigiparangko chakatate, tangenggipa toromirang baksa salgiona rimdoanggen. Papirangde papni ramakon watna amja maina, uamang Rongtalgipa Isolni nikao tangna amja, aro uamang pilakan Kristoni rasongchi so-otako man-gen.

## 3. SATAN 1000 BILSINA A-GILSAKO KAAKO MAN-A

Jensalo 1000 bilsa a-bachengon, toromirangde salgichi dongmanjok aro papiranga sitokaha. Ia 1000 bilsirangna a-gilsak maidake ong-gen?

**"Aro anga salgioni sa-gre ong-onbaako nikaha, uo tu-beani chabi, aro uni jako dal-gipa siliting gnangchim. Aro ua drakon, chong-motan gitchamgipa chipu, Diabol ba Satan ong-gipako rim-e bilsa hajalsana uko kaaha, aro tu-beaona uko galataha aro chipe uni kosako mohor su-aha, maikai hajalsa bilsa matchotkujana kingking jatrangko brangatjawaha. Larangni ja-mano dikdiksana uko engna nanggen" - (Para. 20:1-3).**

Jisuni re-bapilani somoio Satan kaako man-aha aro hajalsa bilsa matchotkujana kaako man-gen. Satanara bano chipkete donako man-a? Ki-tikbri tu-beao donako man-aha. A-gilsak ong-kugijamitingo maikai ong-achim, ua ong-a obostako Greek ku-sikode, "tu-begipa, ba najokagni tu-begipa" ine miksongachi a-gilsakni obostako Isolni ong-atna skangde ong-achim ine janapa. An-chingni a-gilsakan tu-begipa biap jeon Satanko donnasienggipa ong-achim.



Sastroode Satanko dal-begipa silitingchi kagniko agansoa. Iara siliting asolko miksongama? Ong-ja, uan obostani silitingchi kagnikosa miksonga. Satan an-tangni tol-pinapani kamko 1000 bilsirangni somoioba dakangkina namnikbegenchim. Indiba ua darang toromi mandeko majona gita man-jawaha, maina uamang pilakan salgiosa ong-gen. Aro darang otoromi (papi) manderangba uamangko dilna man-jawajok, maina uamang pilakan sitokginok; ua darangkoba majona ba rurana man-jae, uni kamchi ong-siatgimin sikdikdikgipa a-gilsako re-rorona draatako man-aha.

## 4. TOROMIRANG PAPIRANGKO BICHAL KA-GEN

Hajalsa bilsini somoion bichal ka-ani somoiba ong-gen. Indiba iako gisiko ra-bo, bichal rokombri gadangrang donggen:-

- (1)Kristoni gnigipa re-bapilna skang toromirangko sandichengani bichal donggen.
- (2)Kristoni gnigipa re-bapilano toromirangna man-gni donggen.
- (3)Hajalsa bilsini somoirangon papirangko bichal ka-ani ong-gen.

(4) Satan aro papirang bichalni ja·mano man·gniko man·gen.  
(lani gimin talbatna skode Dilani 13 o talatgipa, sandie bichal ka·anini gimin nipultaibo).

Kristoni gnigipa re·bapilani somoion sigimin toromirang aro tange dongenggipa toromirangde rimdoako man·ginok. Uamang hajalsa bilsina salgio ong·gen. Uamanga ua somoimitingo maiko dakgen?

**"Rongtalgipa (jokgimin) a·gilsakko bichal ka·gen ine na·simang u·ijama? ..... An·ching sa·grerangko bichal ka·gen ine u·ijama?" - (1 Kor. 6:2-3).**

**"Aro anga singhasonrangko nikaha, aro uarango asonggiparangna bichal ka·aniko on·aha. .... aro uamang hajalsa bilsirangna Kristo naksa tange raja ong·aha" - (Para. 20:4).**



Hajalsa bilsirangni somoio, papirang, ga·akgimin sa·grerang aro uamangni diligipa Satanni giminba uamangni kamrangni gimin nipultaigen. Mairongpile papirangni kosako Isolni bichalni gimin so·ota man·giparang, cheako man·giparang aro nama kattako skiana doka sata man·giparangni gimin nipilate nina chol ong·pagen.

Isol jokgimin manderangna Uni papirangni kosako bichalni gimin ma·sie ra·na on·anian uni ka·sachakbeaniko nikani chol ong·gen. Indakgipa bang·bea sing·anirang dongnaba donga; "Maini giminisa angni adeara salgio ong·na man·pajaha? Uko angade nama inesa chanchiachim." Sa·grerangni serikgimin ki·taponiko niate nie, Isolni bichalni gimin niaton, uamangni kamni kri bichal kakketan ong·aha ine an·ching ma·sigen. Rongtalgipa Gisik maikai uamangko Isolona dilahachim an·ching ukoba ma·sigen.

## 5. HAJALSA BILSINI BON·AO SATANKO WATA

Bilsi hajalsani bon·anini gimin Sastroo janapa:

**"Aro anga salgiogipa rongtalgipa gital Jerusalemko, Isolni ong·onbaako nikaha; ua setangna tarisogimin namchik gita tarisoa" (Para. 21:2).**

Ia aiao inmanpilgipa songjinmara toromirangni 1000 bilsirangna dongchakbagipa nokan ong·achim. Jokgiminrang baksa salgioniko a·aona ra·onbaaha. Satanara ia 1000 bilsini bon·ao maiko dakgen?

**"Aro bilsi 1000 matchoto Satanko uni patokoniko enggen; aro ua a·ani ki·tikbrini jatrangko, Gog aro magogko brangatna, aro uamangko dakgrikaniona chimongna ong·katgen. Uamangni bang·a sagalni an·cheng gitachim. Aro uamang a·ani apalako re·sotangaha. Aro rongtaliparangni a·tipko aro Isolni namnikgipa songjinmako dulaha" (Para. 20:7-9).**

Sigimin papirang 1000 bilsini matchoto chakatatako man·tokgen. Toromirangko Rongtalgipa songjinma baksa rimonbaon aro sigimin papirangko chakatatahaon, Satan dikdiksana jakgitelaniko man·gen. Toromirangni kosako chakatna Satan changsatai papirangko diltaigen. Somoiko gimaatgijaan, dikdiksani somoion Satan bang·bea kotok sipairangko chimonggen. Satan ua songjinmako chadrape ra·sekna hukumko on·gen. Gital Jerusalemko chadrape ra·sekna re·mikkangon uamang jringjrotna gimaaniona ga·akaha ine ma·sitokgen.

## 6. BON·KAMGIPA BICHAL

Ia somoion skanggipa changna pilak mande jatrangan mikkangchrak gronggriktokgen. Songjinmaogipa jokgimin toromirangko Jisu An·tangan



dilgen. Songjinmani a-palogipa papi kotok jinmako Satan dilskagen. Ia bijatchi somoion Isol bon-kamgipa bichalko ong-atgen aro papirang uamangni man-gniko un salo man-gen.

**"Aro anga dal-gipa, bokgipa singhasonko, aro uno asonggipako nikaha, uni mikkangoni a-a aro salgi katangaha, aro uarangna biap man-jaha. Aro anga sigiminrangko, dal-a aro chona singhasonni mikkango chadengako nikaha. Aro ki-taprangko oaha. .... aro sigiminrang ua ki-taprango segimin gita, uamangni kamrangni kri bichal ka-ako man-aha" (Para. 20:11, 12).**

Papirang bichalni mikkango chadengon, uamangni pilak donnugimin kamrangan parak ong-aha. ga-akgimin me-a, me-chik aro sa-grerangna maikai Jisu kamko ka-achim, salgini ki-tapo serikgimin gita parak ong-e golpoko mesokaha.



Salgi a-sak pilakan gisik nangbee niah. Isolni singhasonni mikkango chadenge Jisu An-tangni papirangna naljokani kamni gimin nikatna gita sakpraknan on-aha. Gimagiminrangko sandie jokatna Ua re-baaha ine Ua parakaha. Mandeni rokomo Ua a-gilsakona re-baaha, majoa aro ruraarangko ame pap gri tangaha, aro chisolo sichake da-o Uan salgio kamal ong-e an-chingna baltichakenga. Bon-kame, jensalo Kristo duk ong-bee Uni ka-saaniko ra-chaktelgijarangna raiko on-ani ong-ahaon, pilak salgi-a-sakni rongtalgpiparang kakket bichal ka-aniko namnikpagan.

**"Maina an-ching pilakan Isolni bichal ka-ramni mikkango chadenggen. Maina sea gnang, Gitel agana, Angni tangbanggipa ong-ani gita, pilakan Angna tubamgen, aro pilak srean Isolni ku-rachakgen" - (Rom 14:10-11).**

**"Maikai salgi aro a-ao aro a-ningo pilakni ja-skuan Jisuni bimungna tubamgen, aro Jisu Kristoan Gitel ine Pagipa Isolni rasongna pilak srean ku-rachakgen" - (Philip 2:10, 11).**

Pap a-bachengantal, Satan Isolni bewalko chonikaha aro kakketgijagipa ine mingaha. Indiba pilak chanchichipani aganchaka aro kenchakanirangko parak ong-ataha. Salgi-a-sak pilakan Jisu, Isolni Mes Bi-sana ka-sana aro Uko olakina kraa ine ma-siaha. Isolni pilak miksonga aro kamrang parak ong-atako man-e Isolni bewal aro cholon kakketgipa ong-a ine mesokaha.

Jokgiminrangsan ong-aigija, Satan aro uni sa-grerangba, Satanan dilsretaha, Isol kakketgipa ong-a ine ku-rachakgen. Pilakan namgijani aro mikbuania dukni aro bon-chongdikanionasan dilaia ine nikaha.

## 7. PAP BON-CHONGDIKA

Satan aro bang-bea namgijagipa manderang, Isolan kakketgipa ong-a ine ma-sigenchimoba, uamangni ka-tongde dingtang ong-atako man-jachim, aro uamangni bewalranga apsanon ong-engpitichim. Aro bichalni raiko man-manoa:

**"Aro uamang rongtalgpiparangni a-tipko aro ka-sara songjinmako ra-sekna a-ani apalako doange changdulaha. Unon salgioni wa-al ga-akonba-e uamangko minokaha. Aro uamangko brangatgipa Diabolko gondokni wa-alona galsruataha..... Aro siani aro norokkoba wa-alona galonataha. Wa-alni wario nisiatanian gnigipa siani ong-a. Aro jemangni bimungrangan janggini ki-tapo napjachim, wa-alni wariona galatako man-aha" - (Para. 20: 9-15).**

Bon-kamgipa bichalni ja-mano, pap aro papko rim-kingkinge donggiparangko jringjrotni Isolni wa-alchi gimaatako man-gen. Satan aro pilak gimagniogiparang ia "gnigipa sianio" bakko man-giparang chakattaiplani chol gri jringjrotna sichotginok. Uamangni bobil dakani gisik



papirangna kusini griata, aro uamanga Satan aro uni sa-grerang baksaa gimaatako man·aha. Papchi ong·siatgimin a·gilsak salgini wa·alchi rongtalatako man·ahaon, papchi mamung dakeba ong·siatako man·taijawaha. Nama aro namgija, Kristo aro Satan baksaa dakgrikani matchotginok aro Kristo sason ka·ginok. Pap aro uni kamrang bon·atako man·e, jringjrotna bon·changgijagipa rasongarigipa a·gilsaksa ong·skaginok.

## 8. A·GILSAK RONGTALATAKO MAN·E GITAL ONG·ATA

Kamchetchetgimin a·gilsakoniko Isol gital a·gilsakko ong·atgen:

**"Unikoa anga gital salgi aro gital a·gislakko nikaha, maina skanggipa salgi aro a·gilsak gimaatako man·aha. .... Anga Rongtalgipa, gital Jerusalemko Isoloni ong·onbaako nikaha. .... Isolni dongram manderang baksaan ong·gen aro uamang baksaa dongkamgen; Nibo, manderang baksaa Isolni dongchakani, aro ua uamang baksaa donggen, aro uamang uni manderang ong·gen, aro Isol An·tangan uamang baksaa ong·gen aro uamangni Isol ong·gen" - (Para. 21:1-5).**



Ong·chengao gita nitobegipa a·gilsak jokgiminrangni jringjrotna dongchakram biap ong·skaginok. Mikbokanirangoni jakgitelaniko man·e, ong·atgiminrang a·gilsak gimikko nikna aro Jisuni ja·o damsan asonge knatimna, skie ra·na aro Una ka·sana man·gen. (Chu·gimik Gital A·gilsakni gimin talbatna skode Dilani 9 ko poraitaibo).

Na·ara ua somoimitingo bano ong·gen? Na·aba rongtalgiparangni songjinmao Kristo baksaa ong·pana miksongahama? Ma, na·ara jringjrotna Kristo gri songjinmani a·palosa ong·skagenma? Na·a nang·ni janggiko Jisuni jako on·manahaode, na·a mamung saloba jringjrotna gimagni aro kenbegnig ga·akjawa. Na·a je rokomo janggi tanggenchimoba, na·a da·o Jisuni jako on·genchimode, na·aba Kristo baksaa aro jokgimin toromirang baksaa songjinmani ning·o ong·pana man·gen. Na·a on·kujaode, na·a da·alo nang·ni ka·tongko Kristona on·bo, Ua nang·ko kema ka·e ka·saachi ganggpsogen. Ian nang·na chol. Da·alan nang·na jokatani sal ong·a.

## Noroka Maia Aro Bano?

Skulchi re·angenggipa bi·sarangko mande saksa an·tangni slaichi gorimrimataha aro bang·a bi·sarangan so·otako man·aha. Kam wata man·gipa an·tangni officerni dringona napange uko slaichi goe so·otaha. Ma·gipa saksa an·tangni bi·sa sakgniko gario asongate chibolona rongrongataha.

A·song damgnio, dakgrikachi bang·a hajalrang siah. Ritcha bilsirangni gisepo, dolgni ba bang·a dolrangchi todonggrikanirang ong·aha. Manderang, me·chikmarang, bi·sarang aro bakgitchak awarangba so·otako man·aha, doka satako man·aha aro mitam me·chikrangde drae kal·ako man·aha.



Ka·namgija kamrangna uamangni kosako sastirangni gimin aganon, saobade manggittang so·otaniko namniktokaha. Dolgipinranga, indakgipa sastide kraja, songsarekni bewalsa ine aganaha. Aro ia denggu manderangnara naljokani chol dongjahama ine sing·aha.

Namgijagipa manderangna kragipa raia maia namgen? Bijolini chokkima? Saobarangde, sam bisiko biji su·e siaton uamangna saknaaniko man·jawa ine aganaha. Gipinrang aganaha, pasi on·on uamang dikdiksani somoion sigen.

Indiba uamangni sastina agangrikanio, darangba dongkuengipa so·otani cholkode agankujachim. Ka·sachaka gri so·otrakgipa manderangko satengtobatgipa cholchi sastiko on·esa uamangko so·otaan krabataigen ine agangipa darangba dongkujachim. Darangba ua so·otrakgipa manderangko ka·sine wa·alchi so·retrete siataan uamangna kraa ine agankujachim.

Bang·a kakketgipa Kristianrangan salgini Isolde uana badepilen sasti on·gen ine chanchiachim. Uamang indake agangenichim, uamangni paprangna krae, satengtobeachi sasti on·na nanga. Isolni ka·o nangani sastide pangnajolna kamretretatde uamangko sasti on·gen ine mitam Kristianrang aganachim.

Papirangna maidake ong·chongmotgen? Ka·sagipa Isol aro Uni bichal maidake papirangni kosako ong·gen? Sastro maidake aganchaka hai niatna.

### 1. JISUNI BON·KAMGIPA KA·BEANI

Hajaldok bilsirangna a·gilsakni manderang baksa mol·molchaengachim:

**"Angni tanga gita, Tangbanggipa Gitel agana, Anga saksa denggu mandeni sianinaba kusi ong·ja, indiba uamangni an·pile janggi tangaosa" - (Eze. 33:11) NIV.**



Chisolan ga·akgimin mandeko jokatna Isol baditana gisiko nangnike dongachim mesoka. Jensalo Jisu chrikwate, "Apa, uamangko kema watbo, maina uamang maiko dakenga ma·sija." Ua An·tangkon on·kangaha( Luk 23:34). Kattako chrikwatani ja·mantapan, Ua janggi galaha, saobarangde, Ua ka·beani giminsa siahia ine bebera·a (Johan 19:30, 34). Rongtala ka·saachi bil gnangbee parape·genchimoba bang·a manderangan Jisuona an·pilbakuja. Pap a·gilsakko sason ka·kuenga dipetde, duknirang bariroroangkugen. Uni gimin pap nisiatoko man·na nanga. Isol maikai papko nisiatna miksongani donga?

**"Gitelni sal sokbaaon ..... Salgi il-ilari bon-anggen aro dakgiminrang kame jronggen aro a-a aro uano donggipa kamrangko kamgen" - (2 Pitor 3:10).**

Papko ma-kimae, Isol a-gilsakko chu-gimik rongtalatna nanga. Jerangan papo dongkamachim. Satan aro uni sa-grerangna tarisogimin wa-alchi nisiatako man-gen. Jokataniko ra-chakgijagiparangko wa-alchi nisiatako nikon mairongpile Jisu ka-begenchim.

## **2. NOROKA BANO ARO BASAKO KAMGEN?**

Mitam manderangni chanchichipsoani gita, Isol kamenggipa NOROK - ko biap gipino da-o donsojaenga. Norok, ian jensalo a-gilsakko wa-alchi rongtalatani somoio ong-gen. 1000 bilsini bon-aosa Isol denggu manderangko nisiatna senge dongenga. (Para. 20:9-15).



**"Dukrantoniko Gitel rongtalgiparangko ripinga aro papirangko bichalni salona rakia" - (2 Pitor 2:9).**

Ua an-chingni a-gilsakko rongtalatgipa wa-alchi rongtalata.

Rongtalatani wa-alchi Ua a-gilsakkoba rongtalata. **"Ia salgi aro a-gilsakko wa-alna rakiaha aro rongtalgijagiparangko bichal aro gimaaniona rakienga" - (2 Pitor 3:7).**

Isol mamung dakeba, darangkoba norokni wa-allo galna miksongsoa dongja. Indiba jensalo manderang Satanoni ma-ekna jechake paptango rim-kingkote donggiparang, uamangni seoke ra-ani biteko bon-kame man-gen.

Unon Ua Uni jakasio donggiparangna ingen, **"Na-simang saoko man-giminrang, Satan aro uni sa-grerangna donsogimin jringjrotni wa-alona angoni re-angbo" - (Mat. 25:41).**

Jisuni aganani kride, norokni wa-al basako kamgen?

**Uni gimin maikai maranko chimonge wa-allo so-a, uandake a-gilsak bon-kamao ong-gen. Mandeni Depante An-tangni sa-grerangko watatgen, aro uamang uni songnokniko pilak ja-gitotanirangko aro namgija dakgiparangko chimonge wa-alni chankolo (noroko) uamangko galgen; unon grapa aro wagam chikmijilani ong-gen" - (Mat. 13:40-42).**



Tol-pinapanirang, denggugiparang, a-gilsak bon-aosa kamako man-gen. Salgini Isolan kakket aro bebe ong-a ine a-gilsak gimikan nikmanahaosa ua indakgipa raiko on-gen. Dilani 22 - o talatani gita, Kristo aro Satan baksa dakrikanio Satanara, papni (rama) bewalan nambatgipa ong-a ine mesokna jotton ka-engga, aro Jisuara bamanian an-saobatgipa janggi tanganina Isolsa ong-a ine dakmesokenga. Ia dakmesokanide 1000 bilsini bon-ao Satan, uni sa-grerangni kosako bichal ka-manosa bon-chongdikgen. Sakprakni gimin serikani ki-tapko oe parakani ja-manosa, Isol Satanko, siako aro gopram (norok) ko aro jerangni bimungkon janggi ki-tapo sea dongjachim, wa-allo galako man-gen (Para. 20:14-15). Minggipin podo janapa gita, Isol a-gilsakni papko wa-alchi rongtalatmanosa, Ua gital salgi aro gital a-gilsakko-ong-attaigen.

## **3. NOROK BADITANA RUUTE KAMGEN?**

Bang-bea manderangan norokde jringjrotoni jringjrotona kame, chotchanggija sastiko on-gen ine bebera-a. An-ching hai simsakbee, pap aro papirangko Isol maidake dakgen ine Sastroo talata nie nina.

**"Maina Isolko u-igijagiparang aro an-chingni Gitel Jisuni Nama Kattako manigijagiparangna jakbikpilaniko on-e wal-sareni wa-alu ..... Uamang Gitelni mikkangoni aro Uni bilni rasongoni sastiko, chong-motan jringjrotna gimaako man-gen" (2 Thess. 1:6-9).**

Iakon gisik ra-bo, "Jringjrotna gimaatani" ingipade mamung saloba, "Jringjrotna sasti" inede ong-ja. Ia miksonganide jringjrotna gimaatoko man-aha. Bichalni sal aro papirangni gimaani gimin Pitor, (2 Pitor 3:7) o talata.

Mati 10:28 o, Jisu indake agana, "Indiba be-enkomung janggiko noroko nisiatna amgipana kenbo." A-brio skiprakao, "Apchongipa rama janggiona dila" aro apalgipa rama gimaaniona dila" ine skia (Mati 7:13, 14). Johan 3:16 o, Jisu indake talata je, "Isol An-tangni saksakamkam Depantekon on-jok, je dakode Uo bebera-gipa, gimagija jringjrotni janggiko man-gen." Jringjrotna tangani, ba gimaani giminisa Jisu agana, jringjrotna kamani giminide aganja. Uni gimin, -Norok- bon-chongdikani donga, uan denggurangni sie gimaaniko agana.

Sastro gimiko janapaan, denggurangni giminisa aganaia. "Denggurang bon-atako man-gen" (Git 37:28), "Uamang gImagen" (2 Pitor 2:12), "Wal-ku gita uamang bon-anggen" (Git 37:20), "Wa-al uamangko tappra changatgen" (Malaki 4:1-3), "Papni dormaha sia ong-a," noroko jringjrotna tanggniko aganja; indiba, "Isolni on-a jringjrotni janggi ong-a" (Rom 6:23). Norokni wa-alchi bon-kame gimaataniara paparigipa a-gilsakko, gital ong-attaiani ja-mano jringjrotna pap gri ong-na chu-gimik nisiatgen. An-tangko chisolo datkapgiparangko kema watna amgipa Kristoa papirangko jringjrotna noroko kamretretako nikna namen chaktogijani ong-genchim.



Norok jringjrotna ong-a. 1000 bilsirangni matchotao, Satan aro uni sa-grerangko aro denggu manderangko salgioni wa-alni gondrokchi chu-gimik nisiatgen. "Salgioni wa-al ga-akonbae uamangko minoka" (Para. 20:9).

Ia wa-alkon Jisu "kimitna amgijagipa" ine minga (Mati 3:12). Mamung cholchiba ia wa-alko kimitna amjawa, ua kamchone an-tangan bon-jaskal.

Ia rongtalgipa wa-alni ja-mano Isol gital a-gilsakko ong-atgen, aro duknirang dongjawaha ine Isolni ku-rachaka donga, "Uano darangni grap-mikoani ku-rangkoba knajawaha" (Isa. 65:16-19).

Uan mairongpilgipa ong-gen! Pilak ka-beanirangan dongjawajok. Pilakni ka-tongrangonikon papni dakrangko Isol kimitsranggen, aro chu-gimik kusinian gapaiginok.


#### 4. SASTROO PANGNAJOLNA INGIPA

(Mati 25:41) o Jisu, Satan aro uni sa-grerangna tarigimin "jringjrotni wa-al" ine janapa. Noroka jringjrotna ine ong-ama (Juda 7). Juda, jringjrotni wa-al maidake ong-genchim, Sodom aro Gomorrahna ong-a bewalko mesoke agana. Ua Sodom aro Gomorrah songjinmarangko da-alu kamajajok. Indiba wa-al jringjrotni kamkon ka-jok, maina Sodom aro Gomorroah jringjrotna gimaatoko man-jok.

(2 Pitor 2:6) oba Pitor jringjrotni wa-alni gimin janapa. Pitorba Sodom aro Gomorrahko tappra change kamate, otoromirangko wa-alchi nisigen ine mesokani ong-china so-aha inesa rongtalbee janapa. Da-alona kingking Sodom aro Gomorroahni otoromirang wa-alni kamana satengtoengako man-jajok. Uamang tappra change kame bon-angaha. Beben, uamangko kamgipa wa-alko jringjrotna

kamchonataha. Jringjrotna ingipa kattade, jringjrotna sasti on-chaaniko miksongja, jringjrotna gimaanikosa.

Parape-an iki-tapo indakgipa kattachi jakale mesokahani gimin, mitam manderang ma-sisretaha. Mesokna gita, gimagiminrangni gimin (Para. 14:11) o agana, "Uamangko kamani wal-ku chotchanggija chadoaha. Jringjrotna sastini gimin aganenga gita nikbebea. Indiba Sastroni kattako Sastroan pe-china.




(Re-ongkata 21:6) o aganani gita, nokol me-chik ba me-asani nachilko jringjrotna chin ong-china kolpuchina agana. Jringjrotna ingipa kattade, nokkol me-chik ba me-asani sikkujana kingking. Jonah, na-tokni okningo sal gittam wal gittam ong-a ine (Mati 12:40) ine janapa, aro Jonah jringjrotna ine aganskaa (Jonah 2:6). Beben, rimilbegipa na-tokni okningo sal gittam wal gittamna ong-ania jringjrotna ong-aha gitan ong-nikbebeenggen.

Sastroo jakalgipa kattaranga mai miksongani bewalo ba poedoni bewaloma uarangko ma-sina simsakbee niatna nanga. Chankolni wal-ku jringjrotna chadoangania jringjrotna kamchonaniko mesokna jakalgimin kattasan ong-a. (Para. 21:8) o aganani gita, wa-alni gondrokchi kamane, gnigipa sianiko ong-atgen. Norok pangkamgipa ong-ja. Papirang kamchonako man-gen; uamang chu-gimik gimaatako man-gen.

## 5. MAINI GIMIN NOROK DONGNA NANGA?

Isol a-gilsakko chu-sokbeen a-bachengon ong-atahachim. Indiba pap, gimaani aro sia-bon-aniko a-gilsakona ra-baaha. Nang-ni nokona cha-urang nape nokko pe-giminko nikeon na-a uandaken dongkamaigenma? Ong-ja. na-a jabolrangko itroke-saroke gale rongtalatgen. Isolba indaken dakgen. Ua papchi ong-siatgimin a-gilsakko rongtalate jringjrotna dona gita, gital ong-attaina Isolni miksongani ong-a.



Indiba Isolni nengnikani mingsa donga, pap a-gilsakkasan ong-siataijaha, manderangkoba pap ong-siataha. Pap an-chingni Isol baksa nangrimaniko aro mandeska baksa nangrimanikoba ekataha. Mandeni jatrang, rokomanti duknirangko, tom-tomgijanirangko aro mitchigni kamrangko dakangkuenga. Papko Isol changsaode gimaatna nangchongmotgen, maina pap manderangko gimaatenga. Isolni neng-nikanide maikai papni bisringko a-gilsakoniko bon-atgen aro mai cholchi papo ga-akgimin manderangko jokatgen? Uni mingsa cholde, papni bisiko An-tangan chile, chisolo papni biatiko gimaatanian ong-a. Ia cholni gimin:

**An-ching, an-chingni paprangko ku-rachakgenchimode, ua an-chingni paprangko kema watgen aro an-chingni pilak rongtalgijanirangko rongtalatgen" (1 Johan 1:9).**

Paponi jakgitel ong-anina Isol pilaknan chol on-engga. Indiba, dukni katta ian, mitamrangde papni sabision dongangkuna namnikkuenga. Aro Isol darangkoba jringjrotni janggiko man-na basechina drajawa. Jemangan Uni naljokani cholko jegalachim uamang papchi cha-minokako man-gen. Norokko donsoanide ian:

**"Nibo anga okamahachim, indiba na-a knachakjaha, anga aganachim, indiba na-a nachil songja. Angni nikario na-a namgijako dakaha aro angni namnikgijako dakna na-a baseaha" (Isa. 65:12).**

An-tangtangni namnikako dakanichi papirang Jisuoni ekatako man-gen aro jringjrotna siana agre mamung chol dongjaha ine uamang ma-sigen.

## 6. GIMAANIA MAIA?



Norokni wa-alchi chotchanggija sastini gimin Sastroo aganjagenchimoba, gimaania namen kenbegnigipa chagrongani ong-gen ine nikatna man-a. Kakketgijagiparang jringjrotni janggik gimaatgen. Chasongni chasongna Isol baksaa dongrime an-saoaniko jaktuataha ine ma-sion uamangna kenjagokani gapgen. A-gilsakni papni a-sel chisolo Kristo dingdeako man-miting somoio Ua Paani mikkangoni dingtangatako man-e, jringjrotna gimaania maikai ong-gen cha-tote nikmanaha. Papirang jringjrotna gimaaniko nikatsoahaon, andalmitmat ong-anikosan nikataiaha. Gnipa chakatpilanina ka-dongsoani gri uamang sina nanggen. Aro uamang Kristoni ka-saaniko changni chang ra-chakgija jegalaniko gisik ra-ataha. Aro bon-kame Isolni bichal aro Uni ka-saanian bebe aro kakket ong-achim ine uamang tubame ku-chake parakgen (Philip 2:10, 11).

Sastro segiparang an-chingna basee ra-anini gimin aro Kristoni kange ra-anini gimin agana.

**"Isolni ka-sachakaniko indinari ra-chaknabe ine chinga na-simangko mol-mola. Maina ua agana, Ra-chakani salo anga nang-ko knaaha aro jokatani salo nang-ko dakchakaha; nibo, da-o ra-chakani sal; nibo, da-o jokatani sal" (2 Kor. 6:1, 2).**

Angni chanchiani gitade, Jisuni dam gri jokatna on-chakaniko jegale, gimaani ramako basee ra-anian dal-batgipa duk ong-aiginok. An-chingko jringjrotna gimaani, ba jringjrotna Kristo baksaa ong-aoni, aro Isolni mikkangoni ekanian ong-a. Na-a maiko basee ra-a? Maina Kristo baksaa re-ruraaniko da-alon am-e nije?

## Saoba Sijokon Una Mai Ong-a?

Siara mai chong-mot ine bi-sani sing-on an-ching aganchakna jajaa. Nokdangoni saoba siani gimin agannade kusi ong-ja. Siara pilakchin pilaknan ramramgipa manderangni bobil ong-a. Siani gimin sing-anina mai aganchaknirang donga? Siani ja-mano janggi dongrikkuama? Ka-sara sigiminrangko an-ching niktaikugenma?

### 1. SIANINA KENGIJANI

An-ching pilaknan ka-sara ba ripengrang wate re-angon an-chingni oko konggrang ong-e sikdik ong-aniko janggi watangon ong-rikronga.

Ia nangchongmotgipa, gisik ka-tongko rim-gipa, siani gimin, baoniko maidake siani ja-mano ong-chongmota talna man-gen? Rasong gnangbee, Kristoni a-gilsako ong-mitingo sianina kenbeanichi rim-grepako man-giparangna jakgitelaniko on-aha (Ibri 2:15). Sastroo, Jisu ka-dimeani kattarangko mesokaha aro rongtalbee an-chingni kenchakanirangna aganchakaha.



### 2. ISOL AN-CHINGKO MAIKAI DAKAH?

Sastrooniko chong-mot siani gimin ma-sie ra-na, hai a-bachengo Isol maikai ong-ataha nichengna.

**Gitel Isol mandeko Adam, Ibri ku-siko) a-ani (adamah, Ibri ku-siko) a-dimuoniko ra-e dakaha, aro (mandeni) gingkolo baljanggiko rang-sitdapataha aro mande TANGGIPA (janggi, Ibri ku-siko) ong-aha" - (A·ba. 2:7).**



Ong-atchengon Isol Adamko a-ani a-dimuoniko dakaha. Ua chanchina changgipa ong-na gita taping donga; an-chi jokna gita ja-dilrang dongaha. Unikode, Isol "baljanggiko" rang-sitdapataha aro Adam tanggipa (Ibrirang - janggi gnanggipa) ong-aha. Simsakbee chanchie nibo, Sastroo Adam janggiko man-aha ine ong-ja, indiba tanggipa ba janggi gnanggipa ong-aha. Isolni rang-sitdapaton, mande il-engani ba janggi tanganiko Isoloniko man-soaha. Be-en aro baljanggiko dondime adam ·tanggipa· ba ·janggi gnanggipa· ong-aha. Uni gimin mandeko dakanini gimin indake see mesokna man-gen:

"A-ani a-dimu" + "Baljanggi = Janggi gnanggipa: Tanggipa.

Manggisi be-en + Isoloni baljanggi = Tanggipa ong-a.

An-ching sakprakan be-en aro chanchiani gisik donga. Rang-sitenga dipetde an-ching tangenggipa ong-a.

### 3. SIJOKON MANDENA MAI ONG-A?

Sijokon mande maikai a-aniko dakchengo janggi gri, apsan bewalon ong-a: (A·ba. 2:7).

**"Aro a-dimu skang gitan a-aona pil-angkujana. Aro janggi (baljanggi) an-tangko on-gipa Isolona pil-angkujana kingking gisik ra-bo" - (Aganprakgipa 12:7).**

Sastroo "rang-sita" aro "janggi" ia katta minggniko Ibri ku-siko apsan jakkalaia. Jensalo mande siahaon, be-en "a-mang" ong-piltaia, aro janggi (baljanggi jekon Isol mandeni gingkolo rang-sitdapatatachim) Isolonan, (baljanggini nokgipa) re-angpila.

**"Gitel Jihova indine agana, Angni tanga gita, ..... Nibo, pilak janggirangan angnin, ..... Pap ka-gipa mande sigen" - (Eze. 18:3, 4).**

Janggi sia! Pangkamgipa ong-ja, gimagipasan ong-aia.

Uni gimin A-ba. 2:7 o janapgipa arithmetic gita, jensalo Isol mandeko a-oniko dakachim, unionan ong-angpilaia.

"A-ani a-dimu" - "Baljanggi" = Sigimin mande (manggisi).  
 "Il-enggijagipa Bimang" - "Isolni Ku-biba" = "Manggisi."

Siara janggi griani ong-a. Bimang sojrongon a-mang pil-a. Isolni ku-biba (janggi) Isolonan sokangpila. An-chinga il-enggipa janggi gnanggipa ong-a, indiba sijokon, il-engna amgijagipa bimang, manggisi ong-a. Uni gimin sijokon mamung ma-siani dongjaha. Jensalo Isol on-gimin baljanggiko ra-pilahaon, mande sia. Indiba ia poraianio janapani gitade, Kristoo an-chingna ka-dongani gnang.

#### **4. SIGIMIN MANDE BADITANA MA-SIA**

Mande sijokon, taningba sojronga; ua (taning) mamung ma-siani aro gisik ra-ani dongajok. Siao pilak mandeni bewalrangba bon-a.

**"Aroba uamangni mitchia, aro mikbua aro uamangni ka-saaba gimasomanaha" - (Aganprakgipa 9:6).**

Siao ma-siani dongja, uni gimin mai ong-engachim uamang ma-sija. Tangenggipa baksa mamung mingsa cholchiba ma-si - meligrikani dongja.

**"Maina uamang sigen ine tangenggiparang u-ia; indiba sigiminrang mamungkoba u-ija" - (Aganprakgipa 9:5).**

Siade jumang gri tusia gitasan ong-aia - Sastroode, siakoa "tusia" inesa chang 54 na janapani gnang. Jisude siako tusia inesa aganaia. Ua sninggiparangna indine agana:

**"An-chingni ripeng Lazarus tusidapaha, indiba Anga uko de-mesana re-enga. Uni sninggiparang aganchake inaha, "Gitel ua tusiode, una nambatgen." Jisuara uni (Lazarusni) siani giminsa aganengachim, indiba sninggiparang tusibebeakosa chanchiatskaaha. Uni gimin Ua aganchake inaha, "Lazarus siaha" - (Johan 11:11-14).**



Lazarusara Jisuni re-angna skangan salbrina sisoman-aha. Indiba Jisu uni gopramona sokeon, tusienggipa ripengko de-mesaenga gitasa, sigimin mandeko tangchaatna Isolna mamung neng-nikani gri ine mesokaha.

Ian dal-begipa ka-dimeani katta an-chingna u-in a nangani, an-chingni ka-sarang Kristoo tom-tome neng-takenga. An-chingba salsaode, siani nokkimao tom-tome tusigen.

#### **5. SIAO TUSIGIPA MANDEKO ISOL GUALAMA?**

Siao tusigipa golpode bon-kuja. Gopramo, Jisu Lazarusni abigipa Marthana aganaha, **"Angan chakatpila aro janggi, ua sigenchimoba, Ango bebera-genchimode ua tanggen"** - (Johan 11:25).

Kristoo sigiparang gopramo tusia - indiba mikkangchi dal-a ka-dongani dongengpiti. An-chingni skoni kniko channa amgipa an-chingko gualjawa. An-ching sie a-dimu pil-naba donga, indiba Ua sakprakni bimangkon An-tangni gisiko rongtalen rakiah. Jensalo Jisu re-bapilon, Ua Lazarusko gopramoniko de-mesae okama gita, toromi sigiminrangko chakatpilgen.

**"Tusigiparangni gimin na-simang u-igija dongchina chinga sikja, jongadarang; na-simang maikai ka-donga grigipa gipinrang gita duk man-jawa. Maina Gitel An-tangan, inchroa aro pamong sa-greni ku-rang, aro Isolni singga gnang, salgioni ong-onbagen; unon Kristoo sigiparang skang chakatgen. Unikoa an-ching tangenggiparang, dongpitigiparang, bangbangko Gitelko grongna aramrango uamang baksa damsan rimdoako man-gen, aro uandake an-ching pangnan Gitel baksa ong-gen. Uni gimin ia kattarangchi saksa sakgipinko ka-dimeatgrikbo"** - (1 Thess. 4:13, 16-18).

Chakatpilani salo, sigiminrang dikdiksa neng-takani gitasan nikaigen. Sigiminrang somoini re-angani giminde ma-siani dongja. Jemangan Kristoko jokatgipa ine ra-chakachim, Uni aiao inmanpilgipa ku-rangna a-ani gopramo tusienggiparang chakatgen.

Chakatpilanina ka-donganio man-gni gnang. Salgini nokna ka-dongani jeon Isol An-tangan donga, aro pilak mikrononi mikchirangko u-sitgen. Uano siani ba kalimani, ba grapani, ba saknaani griwaha" (Para. 21:4). Isolna ka-sagiparangde sianina kenna nangja. Isol baksa jringsjrotina tangrimanian jokgiminrangna ong-a. Jisuan siani chabi gnanggipa ong-a (Para. 1:18). Kristo gride, sianina agre mamung gipin chol dongja, indiba Kristo baksa mikkangchi janggi tangangkuna ka-dongani dongengpiti.



## 6. DA-O AN-CHINGNA TANGBANGGIPA ONG-AMA?

Adam aro Hobako ong-aton, tangbanggipa ong-china dakako man-ja. Isolna bamao uamang janggi tanggenchimode sijawachim. Uamang pap ka-ahaon, janggi tangangkugniko ra-chakjaha. Gitokreng rakanichi uamang siaonasa re-angaha. Uamangni papni a-sel pilak mandeni jatrangan papni sabisiko man-riktokaha, aro pilakan pap ka-ahani gimin siaonasa ong-tokaiah (Rom 5:12). Sastroo darangoba siani ja-mano janggide tangkuenga ingipa kattaan dongja.



Siani ja-mano, janggi tangkamgipa ong-skaa ine Sastroo janapanian dongja. Ibri aro Greek ku-siko janggi (soul), janggi (spirit) aro balwa ba rang-sita ine jakala kattarang chang 1700 Sastroo janapa. Changsamangba mandeni janggi ba gisik ba rang-sita tangbanggipa ong-a ine mesoka dongja.

**"Isolsan mangmang jringsjrotori jringsjrotona tangkamgipa ong-aia. "Uosan sigijani gnang"** - (1 Tim. 6:15, 16).

Sastroo rongtalen mandoe sigijani dongja ine agana. Indiba jensalo Jisu gnigipa changna re-baon, an-chingni bewal dingtangataniko man-gen.

**"Nibo, anga na-simangna ning-tuako agana, an-ching pilakan tusijawa, indiba dikdiksano, mikjapsano, chon-kamani singga sikao, an-ching pilakan dingtang dakako man-gen, maina singga**

**sikgen aro sigiminrang gimagijani ong-e chakatatako man·gen, aro an·ching dingtang dakako man·gen" - (1 Kor. 15:51-53).**

An·chinga mandesan, gimagijaniko man·giparang ong·ja. Indiba Kristianrangna ia ka·dongani gnang, Jisuni gnigipa changna re·bao gimagijaniko an·chingba man·pagen. Ia ku·rachakaniko kakket ine ma·sina man·anide, Kristoni chakatpilachisa ma·sina amaia.

**"Indiba da·o an·chingko Jokatgipa Kristo Jisuni mikkang pa·achi parape·ako man·aha; uan siako gimaataha aro nama kattachi janggi aro gimagjako niksengataha" - (2 Tim. 1:10).**

Isolni mandena donsogiminde rongtalbea: Kristoko jegale paptango rim·kingkinggiparangna jrungjrotna siani, aro Jisuko paltangni Gitel aro Jokatgipa ine ra·chakgiparangna sigijaniko on·gen.

## 7. SIAKO CHAGRONGANI

Ka·sara ripeng ba mandetangni signina bilongan dukko man·a. Gimaani aro sikdikdik ong·anirangkode gualna man·a. Mandetangrangni gimaanina duko ka·dimeatanikode Kristosa on·na ama. Iakon gisik ra·bo, mandetang sianggiminrang tusiasa, Kristoo neng·takenggiparang Jisuni gnigipa re·bapilan salo chakatatako man·gen.

Isol nambegipa gronggrikani salko donsamsoenga. Bi·sarangko ma·a paarang man·piltaigen. Jik aro segiparang gipalgrikgen. Dingtang ong·ani dongtaijawaha. Cheachi sianiko gimaatginok (1 Kor. 15:54).



Mitamrangde sigimin mandetangrangna ka·oksie uamang baksaa agangrikna me·mang muni pigiparangchi re·e golpo ka·grikanirangko dakronga. Indiba an·chingko indakgipa bewalrangchi ka·beaniko namatna dakaniko Sastroo beng·a.

**"Aro do·o chongipa gita mikogipa aro aganmitugipa me·mang muni pigiparangko aro montol dakgiparangko am·bo ine uamang na·simangna aganoa (indine aganchakbo), Manderang an·tangmangni Isolko am·na nangjama? Janggi tangenggiparangna sigiminrangko (am·na nangama)" - (Isaia 8:19).**

Maini gimin? Sastroo rongtalbeen sigiminrango ma·siani, ba u·iani dongja ine parakaha. Indakgipa dukna ka·dimeaniko on·nade Jisuna agrede darang gipin gri. Dukni somoi salrango Kristo baksaa somoiko re·ataan nambatgipa ong·aia. Iakosan pangnan gisik ra·bo, Kristoni gnigipa re·bapilani salosan mangmang, sigiminrangni chakatahaosan agangrikna ba gronggrikna man·gen.

## 8. SIANIKO KENMANGIJA MIKKANGCHAKANI

Sia an·chingoniko pilakkon ra·sekaha. Indiba an·chingoniko Kristoko ra·angna man·ja, aro Kristoan pilakkon namatpiltaigen. Sia ia a·gilsakko sason ka·na man·chajawa. Gnigipa sianio, Satan, dengurang, siani aro norok wa·alni chankolo bon·atako man·gen (Para. 20:14).

Iano sianiko kenmangija mikkangchakna on·gimin kattarang gnang:

- (1) Kristoo panchaka gnang ka·donge janggi tangbo, unon na·a sianina je somoioba kenjawa.
  - (2) Gisik Rongtalipani on·gimin bilchi, Kristoni niampangna bambo, unon na·a jrungjrotna janggi tanganio napena tarigipa ong·gen.
  - (3) Siani gimin dikdiksana tusia gitasan ra·aibo. Jisuni ku·rangna Uni gnigipa re·bapilario chakataigen.
  - (4) Jisu baksaa salgio jrungjrotna dongkamgnini gimin agangimin kattarangko chanchijringbo.
- Sastroo siana kenaoniko jakgitelata, maina Jisuko sia chena amjaha. Jensalo Jisu an·chingni janggi tanganio ong·ahaon, Ua an·chingna tom·tom ong·aniko on·na:

**"Tom-tom donganiko anga na-simangna donanga, angni tom-tom donganiko anga na-simangna on-na ..... Na-simangni ka-tong jajrengjachina aro kenjachina" - (Johan 14:27).**

Jisuba an-chingna, nokdangni mande sian - bon-an salo ka-dimeatani kattachi sokna gita on-aha. Jisu an-tangan siani salakimo tangangaha; Uan an-chingni ma-sisokgijanirangko u-ia.

**"Uni gimin dedrang an-chi aro be-enko bak man-paani gimin, ua an-tangko ugitan apsanoniko bak man-paachim; maikai ua siachi siani bil gnanggipako, chong-motan, Diabolko gimaatna amgen; aro janggi tanga dipet siani kenario nokol ita man-giparangko jokatna amgen" - (Ibri 2:14, 15).**



Dr. James Simpson, sibokatan samko (anaesthesia) dakchenggipa, demechik dejakra sion namen gimanikbeaha. Ua gipin ma-a paa gitaan namen dukko man-beaha. Indiba ua maiba ka-dongan cholko nikaha. Ka-sabegipa demechikni gopramo, Jisuni agangimin kattako "Jeba Ong-chong Anga Tanga" ingipako see donaha.

Iakosan janapaia. An-chingni dukrang basakobade a-sak salgi gimikkon chipchanga gita nikatman-pila; jeba ong-chong Jisu Tanggipa Ong-a!

Kristoo an-ching siani ja-manoba, ka-donganiko man-piti. Uan chakatpila aro janggi ong-a (Johan 11:25) aro Uni ku-rachaka gnang, "Anga tanggipa ong-ani gimin, na-simangba tanggen" (Johan 14:19). Kristoo mangmangsan sio an-chingni ka-dongan. Aro jensalo Ua re-bapilon, pangnaba sigijaniko an-chingna on-gen. An-ching mamung dakeba siani jagringo janggi tangtaijawaha, maina an-ching jringjrotni janggiko man-ginok. Na-aba ia dal-begipa ka-donganiko nikmanahama, jedakode an-chingni dukni salrango ka-dimeaniko man-na gita? Jisuko na-a an-tangni Jokatgipa ine ra-chakkujaode, da-alu na-a ra-chakjawama?

## Isolni Mondoliko Da-allo Anga Man-genma?

Chasonganti nanganinan Isol dingtangmancha kattarangko ja-manchakgijaan on-a. Pap ka-ani ja-mano Adam aro Hobanaba on-aha. A-gilsakko chichi dubiatna skangba on-aha, Assyria ba Babylonni Israelrangko tomki on-an'i somoioba Isolni katta uamangna gnangchim. Jisu Uni chasongo dingtangmancha kattarangko ra-baaha, aro Isol an-chingni chasongna dingtangmarchagipa kattarangko sokattaiaha. Parape-a odhai 12 aro odhai 14 rango Isolni dingtangmancha an-chingni chasongna on-tegipa kattarang gnang. Ia poraianirango talbate an-ching poraie nikanggen.



### 1. KRISTOCHI SONGGIMIN MONDOLI

Jisuni skiani aro Uni janggi tanganio bebera-anio ku-cholsan ong-aniko ge-songangaha, aro watatarangni mondolio stitgrike melie donganiko Ua songaha. Kristo baksa be-ensan gita melianiko watatarang dakangaha. Ia nangrimaniko Paul bia ka-achi nangrimani baksa toata.

**"Maina anga na-simangna mikbua, Isolni mikbuachi ong-a; maina rongtalgipa me-tra ine Kristona on-na anga na-simangko segipa saksana ku-pakaha" - (2 Kor. 11:2).**

Paulni katta gitade, Kristian mondolia rongtalgipa me-chik, Kristoni namchik ine Kristoni mondoliko mesokna jakala.

Niam Gitchamoba, Isolni basegimin manderang Israelrangkoba me-chik gitaan toe agana. Isol Israelni gimin indine agana; "namchik gitan na-a angna ka-saaha" (Jere. 2:2). "Angan nang-ni segipa" (Jere. 3:14).

Parape-ani ki-tapoba mondoliko me-chikko gita janapa:

**"Aro dal-gipa chinko salgio nikaha; salko gangipa me-chik aro uni ja-arangni ka-mao jajong aro uni skoo aski rongchigni mukut aro biolo gnangchim" - (Para. 12:1).**



- (1) Salko gangipa me-chik. Kristoni rasongko gane ching-atako man-gipa mondoliko mesoka ine nikatna man-a. Jisuan a-gilsakni seng-a (Johan 8:12) aro mondolini memborrangchi a-gilsakni seng-aniko on-skagiparang ong-a (Mat. 5:19).
- (2) Jajongo ga-chakgipa me-chik. Niam Gitchamni somoio, hom-boli aro on-anirango nama kattani teng-chakaniko mesoka. Me-chikni ja-kokkimao jajongni ong-a gita dakjagrungiparangko Kristoni on-chakachi chong-motko mesoka.
- (3) Aski rongchignigipa mukut. Sninggipa sakchigni jemangni Kristoni gimin sakia da-alona kingkingba dimelja. Johan parape-ani talatani gita, Kristoni ge-songgimin Kristian mondolia Israelrang chasong Niam Gitchamo chu-sokea. Sal, jajong aro askirang. Kristian mondolini Nama Kattako gipatani kamchi mesoka.

### 2. SATANKO AMANI GOLPO

Me-chikni bimangchi dal-begipa golpoko ong-ata.

**"Ua biolo gnangchim, aro an-pakna saknae chrikaha. Aro gipin chinko salgio nikaha, aro nibo, sko dotsni aro grong gongchikkung gnanggipa dal-gipa drakon gitchakgipa; aro uni skorango ka-desil ge-sni. Aro uni ki-me salgini askirangni bak gittamni baksako salanga, aro uarangko a-aona galataha. Aro ua drakon an-paknasienggipa me-chikni mikkango chadengaha, maikai ua an-pakoa ua uni deko minokna man-gen. Aro ua depanteko an-pakaha, ua me-a bi-sa, silni gol-dikchi pilak jatko nirikgen. Aro uni deko Isolona aro uni singhasonona rimsekangaha" (Para. 12:2-5).**

la golpoko dol gittam bakko ra-paa.

(1) Me-chik, uan Isolni mondoli ine knaman-aha.

(2) Me-chikni an-pakgipa me-a bi-sa, jekon Isolona aro uni singhasonona rimsekangako man-achim, Kristo ong-a, ua changsao pilak jatrangni sason ka-gipa ong-gen.

(3) Drakon, Diabol ba Satan.

**"Aro salgio dakgrikan ong-achim. Maikel aro Uni sa-grerang ua drakon baksa dakgrikaha aro ua drakon aro uni sa-grerang dakgrikchakaha, indiba amjaha: aro uamangni biapko salgio man-jaha. Aro ia dal-gipa drakonko chong-motan gitchampipa chipu. Diabol aro Satan minggipa, a-gilsak gimikko brangatgipako a-on a galataha, aro uni sa-grerangkoba un baksa galonataha" (Parape-a 12:7-9).**



Chinrangko ma-siahaon, miksongako talbate ma-sina man-a. Jensalo Diabol aro uni sa-grerang biap dongjahaon, uamanga a-on a galonatako man-aha. Jensalo Jisu a-gilsako mande ong-e atchion, Diabol uko nisiatna jotton ka-beahachim. Ua amsokjaha, aro Jisu Isolni singhasonona rimsekangako man-aha.

Unikode, Satan Kristoni ge-songgimin Kristian mondoliko kimite galna kamko ka-skaaha. Watata Johan jean Parape-ani ki-tapko seachim, dal-begipa Satanni Kristo baksa ia a-gilsako dakgrikaniko on-tisa janapaha. Ia dakgrikan bon-achibara Kristoko chisolo datkapani ja-mano Johan salgioni inwatgipa ku-rangko knaaha,

**"Aro anga salgio gam-bee indine ku-rangko knaaha, Da-on jokatani, aro bil, aro songnok chingni Isolni aro Uni Kristoni nokgipa ong-ani ong-baaha. Maina an-chingni jong-adarangko matnanggipako, chong-motan sal-wal an-chigni Isolni mikkango, uamangko matnanggipako galataha" - (Parape-a 12:10), (Johan 12:31 aro Luk 10:18) ko baksa tosusabo,**

Chisolo Jisu Satanko amsrangaha. Unikode ua jokatani cholko oe, chalaki Satanko warachakani bilkosa on-aha. Isolni songnokko kimkimate Jokatgipana Dal-gipa Kamal aro Raja ong-na bilko on-aha. "Da-o jokatani sokbaaha" ine itihasko ong-ataha. A-gilsakko Jokatgipa Kristo atchiaha. Satanni rakbegipa majoanirangko chee, Jisu pap gri tange, sie aro chakatpile sia aro papni kosako chegipa ong-aha. Satanko chekamsrangaha. Chisolo Uni chu-gimik bilko parakaha (pod 5, 7-10). Aganprakanide, "Da-on jokatani sokbaaha." Johannasan ong-aija, indiba a-gilsak gimiknan.



**"Uni gimin kusi ong-bo, salgirang aro na-simang uarango donggiparang. A-ana aro sagalna duk; maina Diabol uni sal on-titisan ine u-ie, ka-onangbee na-simangona ong-onangaha" - (Para. 12:12).**

Pilak salgini kotokrangan Kristoni cheaniko mandera-aha. Kristo satanko ame Satanni nokgipa ong-aniko jringjrotnan gimaatsrangaha.

### 3. KRISTIAN MONDOLIKO SATANNI BOBIL DINGANI

Jisuni salgichina doangna skang Ua Kristian mondoliko songangaha (jekon rongtalgipa me-chikchi chinko on-achim). Uni chisolo sianichi Kristian mondolina Satanni kosako cheani bilko on-aha.

**"Aro Mes Bi-sani an-chini gimin, aro uamangni saki on-ani kattani gimin uamang uko amaha; aro uamang siaona kingking janggitangtangnaba ka-sajaha" - (Para. 12:11).**

Kristo da-o Uni mondolina cheani bilko on-na amgipa ong-a. Jisu chisolo Satanko chesranggipa ong-aha aro ua da-oba Uni mondoli Satanko chegipa ong-engpiti. Bewal rokomgittam chegipa mondoliko mesoka:

(1) "Mes Bi-sani an-chichi uamang uko cheaha." Jisua Isolni singhasonona rimsekangako man-aha, jedakode Uni sninggiparang Uni an-chichi cheaniko man-gen. Uni pakgimin an-chichi jokatna aro an-chingni paprangko rongtalatna ama (1 Johan 1:7) aro salsalanti an-chingna bilakgipa Kristian ong-na bilko on-a.

(2) Uamanga janggitangtangko on-kangnaba kenjaha. "Mes Bi-sani an-chi" uamangko Kristoni gimin sinaba kenatjaha. Isol bangbee dukko chakaha, uni gimin ia Kristian bebera-giparang sastina aro sianinaba jajrengjaha.



Bi-sarangmangba janggitangko on-kangna kenjaha. A-songni niamna bate Kristona on-kangahani gimin ma-gipa saksako Romanrang singhona alaha. Uni chongipa demechik kenjagokani pal Kristona on-kangani gisik baridaoskaaha. Singhorang ma-gipako chikengon, ua chadenge chrikaha, "Angaba Kristian ong-a." Roman Officialrang ukoba rim-e okkrigipa singhorangona galonataha.

(3) "Uamang uko uamangni sakichi cheaha." Kattarang ong-ja, indiba uamangni kattani saki - uamangni tangbewal, Uni Nama Katta aro Jisuni bilna saki ong-e tangani. Andalbatsranggipa Kristian chasongni somoio, Kristian pagitchamrang kakketona re-bapilna kamko ka-aha aro Diabol ka-namgija kamko dakachim, indiba bilakgipa sakiko uamangni janggichi mesokaha.

Parape-a 12:11 o chegipa mondolio chegiparangni gimin mesoka. Watatarang, so-ota man-giparang, kakketona re-dilgiparang aro gipin kakketgipa Kristianrang. Uamangni ka-saningbeani, kakket ong-ani, ka-dongani aro cheani chasongni chasongna a-gilsakko dingtangata.

Jisuko Satan a-gilsako gimaatna amjahani gimin, da-o ua mondoliko gimaatna cholrangko sandiskaenga.

**"Aro drakon an-tangko a-aona galatako nikoa, ua me-asako an-pakgipa me-chikko; aro ua me-chikna do-reng dal-gipani gangpong ge-gniko on-aha. Maikai ua bakraona biaptangona bilangna ama, uano ua, chipuni mikkangoni bilsisa, bilsigni aro adha bilsina alduako man-aha. Aro ua chipu ua me-chikko ta-rakao balpakatna ine ja-man ja-man, chibima gita chiko ku-siktangoniko galataha. Aro a-an ua me-chikko dakchakaha, aro a-a ku-siktangko oaha, aro ua drakonni ku-sikranganiko ong-atgipa chibimako minokaha" (Parape-a 12:13-16).**

Agansogimin gitaan, Satan andalgipa chasongo, Kristian mondoliko gimaatna bilakbee a-riksanalaha. Rokom rokom cholrangchi Satan Kristian mondolio Kristoni bewalrangko gimaatna kamrangko ka-beaha. Drakon Satanko mesoka. Indiba iakon gisik ra-bo, Satan mandeni bil jakchi uni miksonga kamko aro Isolni manderangko bobil dingaha. Atchia baktap, Satan Herod, Roman rajani jakchi so-otna tikelaha. Toromni dilgiparangni jakchi Kristoko sandirikite bobil dinge chisolo datkapaha. Indiba Satanni amna miksongania dal-begipa cheanikosa on-skaaha. An-tangko chisolo amsrangahani gimin, Satan Jisuni mondoliko bilonge ka-o nangaha. Kristoni chisolo siani ja-mano hajalni hajal Kristian janggirang Romanrangni jakchi rokom rokom bewalrangchi so-otako man-aha.



Indiba Watatarangni ja·mano, mondolina dingtang bewalrangko ra·gatbaanirangko dakah. Gnigipa, gittamgipa aro brigipa chasongrangode, Kristo aro Watatarangni skibagimin nama kattarangko srete skibana a·bachengaha. Mitam torom dilgiparangde, kakket aro bebeo donggipa Kristianrangko a·rik·sanalna a·bachengbaaha.

Hisape chane nigiparangni aganani gitade 500,000,000 sak kakketgipa Kristianrang janggitangtangko on·kangaha. Mondoliko ma·kimaatna aro gimaatna Diabolni ong·atgipa a·rik·sanalani chibima mondoliko gimaatna ong·achim. Indiba a·a, a·rik·sanalani aro srete skiani chibimako minoke me·a bi·sani ma·gipako jokataha.

Dal·begipa a·rik·sanalani somoio, kakketgipa mondoli, kakketgijagipa mondolini dilgiparang baksa bakko ra·pajaha aro a·gisirangchi katange ma·chakeaha jeon uamangko 1,260 salrangna alduamittangahachim (Para. 12:6). Ia agansogimin katchinikani kattaranga 538 AD bilsioni 1798 AD bilsiona, dal·begipa toromni dilgipa aro rajarangni jakchi tik somoi gita chu·sokangaha (bilsi ba salko hisapna Ezekiel 4:6 ko nibo).

Ia andalgipa chasongo, Sastroo kakket bebera·gipa Kristianrang. Italini Waldensian a·kaweo, Franceni Salaram jolo aro British chichangni Celtic olakiram nokrango, jeo uamang katnapna man·a, uamang katnape chakaha.



Da·alna Isolni mondoli Ritcha chi·sni sotskuchet A.D. bilsini kakket mondoli dongengpiti. Da·alomangba Drakon Isolni manderangko ka·onangkuenga. Dal·begipa sriksrik dakgrikani dongengpiti. Bebeko agangenchimode, Jisuni re·bana skangmangmangba mondoliko Satan bobil dingkuenga.

**"Aro ua Drakon me·chikko (Isolni mondoliko) ka·ongnangbeaha, aro Isolni ge·etaniko rakigipa aro Jisuni saki gnanggipa, uni Dongpitigipa Bitchrirang baksa dakgrikna re·angaha" (Para. 12:17).**

Ia katchinike agansoania an·chingni chasongo ong·nasienggipaan ong·a. Satan bilongbee ka·ongaha. Dongpitigipa me·chikni bitchri, Isolni manderang baksa dakgrika. Uamangko ma·siani chinrangko niatbo:

(1) Jisuni sakio bebe aro kakket ong·e dongkamgiparang. Sastroni (Isolni) katta gita tiktak bringija, kakket bebera·e dongenggiparang, uamanga nama Kristian janggi tanganichi Jisuna saki on·giparang.

(2) Ia Kristianranga, katchinikani gisik (u·iani gisik) gnangipa manderang. Jisu Kristoni gimin sakiko man·soe Johan parape·ani ki·tapko sena gita amsoka (Para. 1:1-3).

Bangki mondolio bebera·e donggipana ia man·rikani gnang: basegimin a·gilsakni mandechi Isol parape·aniko on·a. Katchinikaniko on·anichi bon·kaman salona Isolni parape·aniko agansoa.

(3) Ia Kristianrangko, Isolni ge·etanirangko rakigipa (manigipa) ine minga. Uamanga Niam Mingchikkungko rakigipasan ong·aija, uamanga manigiparangba ong·a. Isolni kamrangna ka·saania, uamangni ka·tongo ka·srokbee manina skani gisikkoba ong·ata (Rom 5:5; 13:8-10).

Ia Kristian dolara Kristoni bewalko aro skanggipa mondolini bewalko ja·rike, Isolni ge·etanirangko (Niamko) manigiparang ong·a. Uamangni kakket ong·ania Drakon - Diabolko bilongen ka·chichaataha. Ua dongpitigipa me·chikni bitchrirang baksa dakgrikaha, maina uamanga Isolna ka·saachi niamna bamani gisikko ong·ata ine saki on·a. Jisuni aganani gita:

**"Na·simang angna ka·sagenchimode, indide na·simang angni ge·etaniko manigen" - (Johan 14:15).**

Skanggipa sason ka·giparangni jakchi a·rik sanalako man·aha. Bisnok mondoli Kristianranga Isolna an·chingni pilak gisik ka·tong gimikchi ka·sana aro gipinrangnaba an·tangna gitan ka·sana amsoka ine

uamangni tangbewalchi mesoka. Jisuni katta gitade, Isolna ka-saaao aro mandena ka-saaao Isolni Niam Mingchikkungni niamranga chu-gimik ong-a (Mati 22:35-40).

Niam Mingchikkungni brigipa ge-etanio, anitini snigipa (Sonibar) salko Neng-takani sal ine rakichina agana. Kristona ka-saanian uamangni ka-tongo dongkamahani gimin bisnok mondolini Kristianranga neng-takani salko rakigiparang ong-a.


Parape-ani ki-tapo, Neng-takani salan Isolni manderangna bon-kamgipa kattarang ong-a (Parape-a 12:17 aro 14:6, 12-15). Pilak salgini kattarangoba bisnok mondolini Kristian dolni gimin aganchipilani gnang. Kristoan uamangni ripeng aro Gisik Rongtalgipani kamrang uamangko mangrakata. Ia ku-rachakani kakketgipa ong-a. Uamang Jisuni saki aro Mes Bi-sani an-chichi Satanko chegen (Parape-a 12:11).

Na-aba bisnok mondolio, jemangan Isolni ge-etaniko mania aro Kristoni sakiko rakiachim, ua dolo ong-pana skama? Na-aba da-alon chanchianiko dakjawama?

## Da-alu An-chingna Dingtangmancha Isolni Katta Dongama?

Ramon Umashankar - a Brahmin ong-e atchiachim. Uni chonengmitingon na-ade miteni gun gnanggipa ong-a, uni gimin nang-ni rongtalipa ong-aniko ma-sie rongtalako dakna aro bi-jringna ranta ka-bo ine uni skigiparang agane on-aha. Indiba chadamba salrangni somoio ong-e Ramon mite nokrango olakie angara Isolko man-na amchongmotgenma ine chanchibewalachim.

Ramon Kristoni gimin Sastrooniko poraie nina a-bachengaha. Jisuni namgipa sontol mande ong-anini gimin ua pangnan mandera-achim, indiba da-ode ua Jisuan Isolni Depante ong-chongmota ine knaaha. Aro bilsa bakrobee man-na amgijagipa tom-tom ong-aniko bang-a Kristianrango donga ine ua nikaha. Roman indimangba Hindu toromonikon kakketko am-na mangsonga dongaha.



Indiba ua Kristoni janggi tangani gimin chanchianian gapaiahha. Skanggipa changna ua Jisukoba duk aro kena sin-an igisik mande gitan donga ine ma-siaha. Iana skangde, ua Jisuni chisolo datkapaniko man-on Ua Isol ong-e saknaako chakchikna amsoka inesa chanchiaachim. Indiba da-o ua chisolni gimin talate on-na amsokja. Papi manderangna maikai indake dakna amsoka ine chanchibewalrongachim.

Kristoni sianini gimin Ramon chanchijinge, ka-saani bilko ua nikaha. Ua Brahmin ong-e dongani gadangko watgale, Kristo Jokatgipana an-tangni janggiko on-kangna chanchiskaaha. Kristoni on-kanggipa ka-saan baksa toate, Ramon indine aganaha, "Pilakan mamung gitaba ong-angga."

Ia chadamba Brahmin, Kristianni ga-brong bebeko nikaha. Jisu, a-gilsakna jokaniko on-gipa ine ma-siaha.

### 1. BADIA TOROMO JOKANI GNANG?

Jisuan rama - jokatani rama chong-mot

**"Aro sakgipino pilakoba jokani gri: maina salgini ning-o manderango on-a gipin bimung gri, jechi an-ching jokna nanga" - (Wat. 4:12).**

An-chinga papchi gimaatako man-giminrang ong-a ine Sastroo rongtalbee mesoka, uandake pap sianiko on-a (Rom 6:23). Pilakan pap ka-aha aro siao bon-anisan ong-aia. Papni biteoniko naljokna amgipade Jisuna agre gipin dongja.

**"Maina ang Pagipani namnika ian, Depanteko nie Uo bebera-gipa pilakan maikai jringjrotni janggiko man-gen aro uko anga chon-kaman salo chakatatgen" (Johan 6:40).**

Kakketgipa torom mingsasan (dolsasan):

**"Gitel saksan, BEBERA-A MINGSAN, napola mingsan," ine (eph. 4:5 o janapa.**

### 2. ISOLO DA-ALNI KRISTIANRANGNA DINGTANG-MANCHA KATTA DONGAMA?

Oe, ia rokomittam kattarangko Parape-a 14:6-16 o nikna man-a. Larangoni bon-kamgipa Kristoni gnigipa changna re-bapilengani gimin aganchota.



(1) Skanggipa sa-greni katta:

**"Aro anga salgini jatchio bilanggipa sakgipin sa-greko nikaha, ua a-ao donggiparangna, aro pilak jat aro ma-chong aro ku-sik aro mandena aganprakna jringjrotni nama kattako man-e, gam-bee indine aganaha, Isolna kenbo aro Una rasongko on-bo; maina Uni bichalni konta sokbaaha. Aro salgiko aro a-ako aro sagalko aro chirangni chimikrangko dakgipako olakibo" - (Parape-a 14:6, 7).**

Sastroo katta minggittamko sa-gre sakgittamni ra-baa gita agangenchimode, Isolni manderangni jakchisa kattarangko gipatna chu-sokata. Uamang gipin gital kattarangko ra-baja, indiba "jringjrotni nama kattako" a-gimikna, jat, ma-chong, ku-sik aro manderangna ra-baaha. Jisuni nama kattara, Niam Gitchamo "bebera-achi" ra-chake jokaniko man-na amgipa apsan kattaan ong-a (Ibri 3:16-19; 4:2; 11:1-40) - ia apsan skianikon Jisuba skia; ia apsan kattakon sninggiparangba a-gilsakna skia; ia apsan nama kattakon Kristian chasong gimikon skibaaha.

Hajalsa bilsirangna batpilen Andalgipa chasongni salrango ia apsan nama kattaranga gimaanaspile onatako man-aha, indiba Nampiltaianiko dakgiparang kakket aro bebeko tangchaattaaha, aro Isolni manderang a-gilsak gimiko da-alo aganprakenga. Skanggipa sa-gre ia apsan kattakon inwataha, aro uan dingtang bewalosa ong-skaaha - Kristoni gnigipa re-bapilna skang dongenggipa a-gimikni manderangona sokangani cholko on-aha.

Jemangan ia nama kattako ra-chakachim, "Isolna kenao Una rasongko on-china" okamako man-aha. Uamang a-gilsakna Isolni ka-saani cholon-bewalko mesoka. Uamangni kattachisan ong-aija, indiba uamangni janggi tangbewalchi saki on-aha. Kristoni gisikchi gapatako man-gipa manderangko Isol jakkalha ama ine mairongpile parakaniko uamangchi parakaha.



Basako ia sa-gre sakgittamni kattarangko a-gimikona gipatani ong-a? Isolni bichalni konta sokbaahaon ine janapa. Dilani 13 o an-chingna 1844 bilsi A.D. oni bichalna sandiani kamko Jisu a-bachengaha ine talataniko man-beaha. Ua apsan bilsion, 1844 bilsio, Jisu a-gilsakni manderangni gisikko ching-chaate pilak a-gilsakni bokrangonan Parape-a odhai 14 o agangipa nama kattako aganprakaha. Ia katta an-chingko "salgi aro a-ako dakgipa Isolko olakichina" okamaniko janapa. Isol "Neng-takan salko gisik ra-na aro uko rongtale rakichina" an-chingko agana, maina saldoko Isol a-gilsak aro salgirangko ong-ataha" ine Re-ongkata 20:8-11 o janapa. 1844 A.D. bilsio Charles Darwinni ong-telaigipa bewalosa pilakan ong-aha ine bilakbee saki on-ani salrangon Isolba, Ong-atgipa Isolko olakichina manderangko okamaha. Aro ia apsan somoion, sa-gre sakgittamni agana katta gitan snigipa salo neng-takaniko salgi aro a-ako ong-atgipako mandera-e rakiah.

(2) Gnigipa Sa-greni Katta:

**"Aro gipin gnigipa sa-gre, ja-rike inaha, Ga-akaha, ga-akaha dal-gipa Babylon, pilak jatrangko an-tangi til-ekani ka-o nangani draka bitchiko ringatgipa" - (Parape-a 14:8).**

Gnigipa sa-gre ia mikrakataniko on-aha, "Ga-akaha, Dal-gipa Babylon." Parape-a odhai 17 o gisikni "Babylon" ko mesoka - uan kakket aro bebe grigipa Kristian dol ong-a, aro uko bewal-cholono ong-sigipa "Me-chik" baksa toa (Para. 17:5). Parape-a odhai 12 o janapgipa rongtalgpia me-chik kakket aro bebegipa mondolini bobilchim. Babylonni bimungo mesokgipa me-chikara ga-akgimin, jean "uni til-ekrakani draka bitchichi pilak jat aro ma-chongrangko pekatachim." Srete skiani draka bitchia, bringimin Kristianko ong-ata.

Babylonni bewalchi rokom rokom ra-gate skigipa Kristian mondoliko mesoka. Ua mondolia namen kenbegni ong-a maina ua Isolni gimin



dingtang bewalo mesoka: Isolkoa bobil dingrakgipa aro an-tangnasan dakaigipa gita, ba paprangko sandirikitna namnikgipa atchu namchagijagipa gita mesoka. Kakketgipa mondolide, Isolni kakket bewalko aro Uni kakket ong-ani aro ka-sachakbeania Isol ka-sagipa ong-a ine mesoka. Isol manderangko Babylononi "ong-katchina" okama (Para. 18:4). Sastroni gita ong-gija skianirangko jegalna aro Kristoni skiao ja-rikchina okama.

(3) Gittamgipa Sa-greni Katta:

**"Aro gipin gittamgipa sa-gre, ja-rike gam-bee inaha, saoba ua matburingko aro uni bimangko olakiode, aro an-tangni mikkingo ba an-tangni jako uni chinko ra-ode, uaba uni ka-o nangani ringchakanio bringija tarisogimin Isolni ka-o nangani draka bitchiko ringgen; aro ua rongtalgipa sa-grerangni mikkango, aro Mes Bi-sani mikkango wa-al aro gondroko saknaako man-gen ..... Aro matburingko aro uni bimangko olakigiparang aro uni bimungni chinko ra-gipa, sal aro wal neng-takaniko man-ja. ianon rongtalgiparangni, chong-motan Isolni ge-etani aro Jisuko bebera-ako rakigiparangni, chakchika gnang" - (Parape-a 14:9-12).**

Gittamgipa sa-greni kattao a-gilsak gimikko dolgni suale mesoka. Kakketgijagipa mondoli, jemangan matburingko aro uni bimangko olakiachim, aro matburingni chin uamangni mikkingo ba jakpao ra-achim. Gipin dolsara, matburingni biljakko jegale Isolni ge-etaniko manigipa aro Jisuna kakket ong-gipa toromni dolrang ong-achim.

Ia dolgnini gimin nisusae niatbo. Matburingni chinko ra-giparanga. Mandeni chanchibewalao dakdragimin skiani aro dakanirangko mangipa ba ja-rikgipa ong-a. Toromirangde ma-tekani gnang, uamangde: "Chakchikani gnang" Isolni niam/ge-etaniko rakkiparang aro uamanga "Jisuna kakketao dongkamgiparang ong-a.

Ia minggittam skianirang chu-sokahaon, Jisu sigimin-rangko a-gilsakoniko chimongna re-bagen.

**"Aro anga nikaha, aro nibo, aram gipok; ua aramo asonggipa Mandeni Depante saksa gitachim, aro Uni skoo sonani mukut aro uni jako matgipa atchili. Aro sakgipin sa-gre nokdringoni ong-kate aramo asonggipana gam-bee chrikaha; Nang-ni atchiliko watate rabo; maina raani konta sokbaaha; maina a-ako raani minsrangbeaha. Aro aramo asonggipa an-tangni atchiliko a-ao galahaoa a-a raako man-aha" (Para. 14:14-16).**



### 3. BON-KAMGIPA SALO KRISTONI MONDOLI

Bilak kimkimgipa Kristian mandeni on-kangani, chakchikani, bebe ong-ani aro uni gisikni gita tangna skanina aiaa inmanahama? An-chingni somoina Isolchi dingtangtegipa kattako Parape-a odhai 14 o on-aha, maina uachi namako ong-atna ama. Dilani 25 o (Parape-a 12:17 oniko man-bagimin gita, Isolni bon-kamgipa mondoli, Isolni ge-etaniko manigen aro Jisuni sakiko rakigen. Parape-a 14:12 o janapgipa gita, ia apsan dolrangan, "Isolni ge-etanirangko manie Jisuna kakket ong-e dongkamgiparang ong-gen.

Hai an-ching ia Kristian dolni bewalrangko niate nina.

(1) "Uamanga Kristoni sakiko rakigipa." Satanni ka-chichaa uamangni kosako ong-genchimoba uamanga "Jisuo kakket dongkamgipa" ong-a. Uamangni kakket ong-ania an-tangtangni ong-ja, Isolni on-giminsa (Eph. 2:8). Ia mondolia Kristoko bang-bate rongtalbate nike Uni bewalko aro Uni ka-sachakao bebera-e tanggipa ong-e Kristoni uamango dongkamaniko parakgipa ong-a.

(2) Uamanga "Jisuo bebera-ako rakigiparang" ong-a (Para. 14:12). Uamangni ka-tongrang, Jisuni bebeo janggi tangani, Uni skiani aro Uni bebe ong-anian gapaia. Uamanga Isolni kattasan dongaija, indiba "katta" ko rakgiparangba ong-a aro ugita janggi tanggipa ong-a. Uamangnade toroman janggi, kamo

bebera-anikoba mesoka, aro uamango bebe aro bamani gnang. Jisuni bebera-ani cholonko uamango nikna man-a. Uamanga salanti janggi tanganio Sastroni katta gita tanggenchimode namgipa Kristian janggi tanganio tangna ama ine ma-sia. Sastroni kakket kattao ka-saani aro Kristona on-kanganichi mande ka-tongo pilak nangnikanirangna chu-ongnikaniko on-na ama ine nika.

(3) Uamanga "Isolni Niam mingchikkungko manigipa" ong-a.  
 Niam Mingchikkung, Isolni cholonni niam. Uamanga pilak Isolni  
 ge-etako aro Isolni nangnikanio pangnan ong-kamna ska.  
 Uamang Isolna ka-saaniko mesokna aro brigipa ge-etanini  
 neng-takan salko rokie aro pilak ge-etanirangko manie mande  
 skana ka-saaniko mesoka.



(4) Uamanga "Nama Kattako" a-gimikna gipatani bakko  
 ra-giparang ong-a (Para. 14:6). Ia nama kattara, Jisu an-chingni  
 papna sichakaha aro Uni gopramoni chakatpilanichi an-chingba  
 Un baks a bakko man-giparang ong-paa ine paraka. Kristoni  
 bangki mondoli pilak manderangkon pilakchikon branggimin  
 mondolioni ong-kate Sastroni kakket skianio mangmang pangchake Jisu baks a ong-na okamenga.

(5) Uamanga bichalni konta sepangako ma-sie, "raani konta sokbaha" ta-raken kakket aro bebeona  
 an-pilbaaha, aro Kristoko man-kugijagiparang bang-engpiti (Para. 14;15).

(6) Uamanga Isolni on-gimin kamchi gapatako man-giparang ong-a. Dal-gipa Babylon ga-akahani gimin  
 "Uoni ong-katchina" uamang mol-mole okamaniko dakgipa ong-a (Para. 18:4). Pilak baksaba katchaanina  
 aro Jisu baks a nangrimanina uamangni skani gnang.

Sa-gre sakgittamni kattachi ong-katna okamako man-gipa bang-a manderang ka-tong mingsano  
 nangrimatako man-gen. Uamangni kusian gapgipa janggi watata Johan baks a ia okamaniko nang-na  
 on-gen:

**"Jeko chinga nikaha aro knaaha, uko na-simangnaba chinga aganata, maikai na-simangba ching  
 baks a bak man-pagen; aro chingni bak man-paade Pagipa baks a aro Uni Depante Jisu Kristo  
 baks a gnang. Aro iarnagko chinga sea, maikai an-chingni katchaa chu-sokgen"** (1 Johan 1:3, 4).

Uni Gisikchi aro Uni mondolichi, Jisu nang-koba An-tangna on-kangna okamenga:  
**"Aro Gisik aro namchik agana, Re-babo; aro knagipa aganchina, Re-babo; aro ringna sikgipa  
 re-bachina; aro sikgipa indinari chijanggiko ra-china"** (Para. 22:17).

#### 4. ROKOMGNI MI RAANI

Pilak jokgiminrangko rimna Jisuni a-gilsakona re-bataiossa sa-gre sakgittamni nama katta matchotgen  
 (Para. 14:14-16). Salgio tarisogimin bang-begipa dongramona Jisu joka man-giminrangko rimdoanggen  
 (Johan 14:1-3). Ua pangnajolna pap, sabisi, duknirang aro sianiko gimaatgen. Toromirang rasongarigipa  
 gital janggi tangani Un baks a jringjrotha tanggen (Para. 21:1-4).



Jisuni re-bapilani somoio papirangkoba "chimongani"  
 donggen.

**"Aro sakgipin sa-gre salgiogipa torom okdringoni  
 ong-kataha; uaba matgipa atchiliko man-aha. Aro  
 sakgipin sa-gre ganchioni ong-kataha, .....  
 aro ua matgipa atchiliko man-gipana gam-bee indine  
 inwataha, Nang-ni matgipa atchiliko watate a-ani draka  
 buduni chokchimrangko chimongbo, maina ua bite**

**minsrangaha. Aro ua sa-gre an-tangni atchiliko a-aona gale, drakako chimongaha, aro Isolni ka-o nangani dal-gipa sepchakanio gala. Aro ia sepchakaniko songjinmani a-palo ga-bekbekaha, aro an-chi ua sepchakanioni gureni lagamona dipet kros ritchasaona ong-katangaha" (Para. 14:17-20).**

Ian bon-kamgipa papirangko gimaatani ong-gen, uan Kristoni jokataniko jegalgiparangko gimaatano Jisuni dal-begipa dukni somoiba ong-gen. Jisu "papirang baksa chakchikbeenga, maina Ua saksani gimaanikoba nangnikja, indiba sakantini an-pilbaaniko nangnikenga" (2 Pitor 3:9).

Jensalo Jisu an-tangnirangko chimongna re-baon, na-ara badiagipa dolo ong-gen? Na-ara gamchatgipa birongrang baksa chadenggiparango ong-pagenma? Ba ka-o nanganio gimanasisiga minblekgipa draka biteni dolosa ong-genma? (Parape-a 14:17-20).



la ong-nasiako rontalen mesoka. Paksachi Jisu An-tangni datprota man-gipa jakko smile, Isolni ge-etaniko manigipa aro Jisuni bebeko rakigipa toromirang baksa ong-pachina mol-molchaenga (Para. 14:12). Pak gipinchi mandeni ku-rangchi, Sastroko chu-gimik manina nangja aro Isolni ge-etanirangba nangchongmotani dongjaha ine aganskaenga.

chrikattokaha.

Pilat rajani bichal ka-ram dringo indake changsao ong-aha. Paksachi Jisu - Isol - mande ong-gipa. Pakgipinchi Barabas aro ia dukni salo dongpagipa mande jinma. Indiba jensalo Pilate rajani bil gnangbee, "Iamang sakgnioniko sako na-simangna watbo?" ine sing-on, jinma uamang ka-o nangbeani ku-rangchi "Barabasko" ine

Pilat aganchake inaha, "Jokatgipa minggipa, Jisukoa anga maidakskagen?" Union jinma ku-rangsano chrike inaha, "Chisolo datkapbo! Uko chisolo datkapbo!" Da-nang dos gri Jisu chisolo datkapako man-aha, aro papi (dos gnangipa) jakgitelaniko man-aha (Mat. 27:20-26).

Da-aloh, na-a sako basee ra-a, Barabaskoma, ba Jisuko? Na-a mandeni dakjegin skianirangko ra-chake, Isolni ge-etani aro Jisuni kakket kattarangko jegalgenma? Ba, Isolni ge-etanirangko manie Jisuna kakket dongna skama? Ikon gisik ra-bo, Jisusan mangmang, Uni Rongtalipa Gisikchi, ma-sisokgijan salo ma-siatna, dukni salo an-senganiko on-na aro nang-ko chu-ongnikatna ku-rachakgipa ong-a.